

መሸጋዥ ታሪክና ስምምነት



Ivane Javakhishvili Tbilisi State University

Faculty of Humanities

Institute of Caucasiology

Khutiso Mamisimedishvili

Ossetian folklore

იუანე კავახიძეს სახელობის თმილის სახელმწიფო უნივერსიტეტი
პუბლიცისტულ მეცნიერებათა დაწყლობრივი
კავკასიონური ინსტიტუტი

სკოლის მამისიმელიძეს სკოლი

თუმონი ჭოლაძეს



უნივერსიტეტის
გამოცემობა

ოსი ხალხის კოლექტიური მეხსიერება, მხატვრული აზროვნება, ხანგრძლივი ცხოვრებისეული გამოცდილება და კულტურული იდენტობა ყველაზე მკაფიოდ ფოლკლორულ შემოქმედებაში გამოვლინდა.

სტუდენტი ახალგაზრდობის განსაკუთრებული ინტერესის გათვალისწინებით საქართველოში პირველად იძეჭდება ოსური ფოლკლორის სახელმძღვანელო. ავტორი ნიგნძი განიხილავს ოსური ფოლკლორის უანრობრივ შედგენილობას კონკრეტული ტექსტების ტიპოლოგიური, სტრუქტურული და მხატვრული ანალიზის მიხედვით.

ნიგნი განკუთვნილია უმაღლესი სასწავლებლის სტუდენტებისთვის, პუმანიტარულ მეცნიერებათა დარგის სპეციალისტებისა და ოსური ფოლკლორით დაინტერესებული მკითხველისთვის.

რედაქტორი: ზ. კიკნაძე

რეცენზიენტები: ქ. სიხარულიძე

მ. ბაკურიძე

გამოცემულია ივანე ჯავახიშვილის სახელობის თბილისის სახელმწიფო უნივერსიტეტის საუნივერსიტეტო საგამოცემლო საბჭოს გადაწყვეტილებით.

© ივანე ჯავახიშვილის სახელობის თბილისის
სახელმწიფო უნივერსიტეტის გამომცემლობა, 2015

ISBN 978-9941-13-415-9

სარჩევი

რედაქტორისგან	9
წინასიტყვაობა	13
შესავალი	17
ფოლკლორის განმარტება	27
ფოლკლორული შემოქმედების	
ძირითადი ნიშნები	31
ზეპირი გავრცელება	32
ანონიმურობა	34
ვარიანტულობა	36
კოლექტიურობა	39
ტრადიციულობა	40
იმპროვიზაცია	41
სინკრეტიზმი	43
ყოფითობა	45
ოსური ფოლკლორის ჟანრები	46
მითოსი	55
მითოსის განმარტება	57
მითოლოგიური მოტივები და სიუჟეტები	61
კოსმოგონიური და ანთროპოგონიური	
მოტივები ცარციათულ თქმულებებში	62
სამოთხის მითოსი (გურძიხანი და ბონვარონი)	66
წარლვნის მითოსი	71
ძუარების მითოსი	73
ქართული ჯვარი და ოსური ძუარი	75
ძუარები – ქრისტიანული წმინდანები	78

ძუარლაგი	81
ძუართა დაარსების მითოსი	83
საკულტო პოეზია	99
ოსური ხალხური დღესასწაულები	101
სიმღერები ძუარებზე	109
ვასთირჯის ეპითეტები საკულტო სიმღერებში	111
მად მაირამი საკულტო ლექს-სიმღერებში	115
ალარდის სიმღერა	118
ვაცილას სიმღერა	122
ოსური რიტუალი „ცოფაი“ და წმინდა	
მაქსიმეს თქმულება	126
ბასილების სიმღერა	134
აფსათის სიმღერა	138
მიცვალებულის ცხენის კურთხევა (ტექსტი და რიტუალი)	148
საზღაპრო ეპოსი	193
ჯადოსნური ზღაპარი	197
ცხოველთა ზღაპარი	210
საყოფიერო-ნოველისტური ზღაპარი	213
ნართების ეპოსი	225
ჟანრული თავისებურება და ციკლები	227
გამოცემები. ტექსტების შემკრები და მკვლევარი	230
ჟორუ დიუმეზილი – ნართების ეპოსის მკვლევარი	233
ქრონოტოპი	238
ნართების ეპოსის ნარმოშობა და ჩამოყალიბება	239
სკვითების წეს-ჩვეულებების	
ასახვა ნართების ეპოსში	241
ნართების საზოგადოება და მათი საქმიანობა	245
ტრადიციული გმირის ცხოვრების	
ეპიკური მოდელი	251
გმირის სასწაულებრივი ჩასახვა და შობა	253

წრთობა-ინიციაცია	256
ზეციერთა მფარველობა	259
ბოროტ ძალებთან ბრძოლა	261
საცოლის მოპოვება	264
ნართების ჰუბრისი და დაღუპვა	266
თქმულებები ცარციათებზე	283
ცარციათული თქმულებების ვერსიები	285
ცარციათის ეტიმოლოგია.	
ცარციათების სამარხები	290
ცარციათების საცხოვრისი	294
ცარციათების აღსასრული	295
ცარციათები და ნართები	298
შრომის პოეზია	303
პურეული მოსავლის სიმღერა	
„დოვლათის ფრინველი“	307
ლუდის მხარშველთა სიმღერა	318
ნაბდის მთელავთა სიმღერა „ონაი“	332
ქალთა საოჯახო ინდივიდუალური სიმღერები	335
საქორწილო პოეზია	339
საპატარძლოს შერჩევა	342
ურვადი და საპატარძლოს საჩუქარი	343
აცამაზის ქორწილი	346
გამოთხოვება მშობლიურ კერიასთან	347
პატარძლის ღამე – ჩინძახსავ	350
ვაისადინობა	353
საგმირო პოეზია	357
ზადალასკელი დედა	361
სიმღერა აიდარუყზე	364
სიმღერა ყირიმის ხანის ლაშქრობის შესახებ	371
სიმღერა თაიმურაზზე	374
აბრაგული სიმღერები	378

სამგლოვიარო პოეზია	383
ხმით ნატირლები	385
შესრულების ტრადიცია	386
ხმით ნატირლების თემატიკა და სტრუქტურა	388
ხმით ნატირალი „მოთქმა“	390
საძიებლები	395
ადგილთა სახელები	395
ძუარების, სალოცავებისა და ზებუნებრივ	
არსებათა სახელები	396
ფოლკლორულ და მითოლოგიურ	
პერსონაჟთა სახელები	397
საგვარეულო, ხალხი, წარმომავლობა	399
Khvtiso Mamisimedishvili, Osetian folklore	400

რედაქტორისგან

მიუხედავად იმისა, რომ ოსი ხალხი, თუ გენეტიკურად არა, ენობრივად ირანულ-სარმატულ სამყაროს ეკუთვნის, მისი ფოლკლორი, თუ ლინგვისტურ ტერმინოლოგიას გამოვიყენებთ, შეგვიძლია იპერიულ-კავკასიური ზეპირსიტყვიერების ერთ-ერთ დიალექტად, ერთ განშტოებად მივიჩნიოთ. ჯერ კი-დევ არ არის გარკვეული, რა მოიტანეს ალანებმა კავკასიის მთებამდე, სად წარმოიშვა მათი სიამაყე ნართების ეპოსი – დონის სტეპებში თუ კავკასიის მთებში. იმის თქმა კი დაბეჭითებით შეიძლება, რასაც წინამდებარე მონოგრაფია ამონშებს, რომ ახალ საბინადროში, დამხვდურთა მეზობლობაში, მათმა ზეპირსიტყვიერებამ აშკარად გადახალისება განიცადა. ამიტომაც „ოსური ფოლკლორის“ ავტორი გვერდს ვერ აუვლიდა ქართულ-ოსური ურთიერთობის თემას, ამ ორი ხალხის ფოლკლორის ერთმანეთ-თან გენეტიკურ თუ ტიპოლოგიურ სიახლოვეს. ეს თემა ავტორისთვის, როგორც აღმოსავლეთ საქართველოს მთიანეთის საკულტო ცხოვრების ექსპერტისთვის, პრიორიტეტულია... მართალია, მონოგრაფია სახელმძღვანელოდ არის გამიზნული, მაგრამ მისი ავტორი არ კმაყოფილდება საერთო ფაქტების ოდენ აღნუსხვით, რაც, შესაძლოა, საკმარისი იქნებოდა ამ უანრის წიგნისთვის. იგი უღრმავდება თითოეულ ფაქტს და განიხილავს მას სტრუქტურულ და ისტორიულ ჭრილში. მისთვის არ არის საკმარისი, მაგალითად, ოსური ძუარ და ქართული ჯუარ სიტყვა-ცნებების ეტიმოლოგიური იდენტობა, ან ერთის მეორისგან წარმომავლობა. მას სურს ჩასწვდეს თითოეულის სემანტიკურ სიღრმეს, გამოარკვიოს, თუ რა ინოვაციები განვითარდა სესხების შემდეგ ჟამთა ვითარებაში, რა რეალობა დგას

ოსურ საკულტო-საზოგადოებრივ ყოფაში ამ ცნების უკან, ან, გენეტიკურთან ერთად, რა ტიპოლოგიურ მსგავსებას იჩენს ოსური ძუართა სისტემა ქართულ საკულტო სინამდვილესთან.

წიგნი სტუდენტებთან მრავალწლიანი ურთიერთობის შედეგია. დიდი სიმართლეა იმის აღიარებაში, რომ იგი ლექცია-სემინარებზე მსმენელებთან უშუალო კონტაქტში იბადებოდა, ისახებოდა ახალი შეხედულებები თუ თვალსაზრისები ამ უნიკალური, თვითმყოფადი, კავკასიაში გამორჩეული ფოლკლორის ამა თუ იმ პრობლემაზე. ეს გარემოება ანიჭებს სიცოცხლეს ამ წიგნს და ცხოველმყოფელს ხდის მას. რაოდენ ნიშანდობლივია ავტორის შენიშვნა, რომ ამ „მცირერიცხოვანი ხალხის ფოლკლორი კიდევ უფრო მდიდარი აღმოჩნდა, ვიდრე მანამდე წარმომედგინაო“. ასე, ყველაფერი, რაც გიყვარს, ყოველთვის ამოუნურავად გესახება და არ ცდები ამ წარმოსახვაში. მითუმეტეს, როცა საქმე ხალხურ ყოფას და შემოქმედებას ეხება. ეს ხომ უძირო ჭა არის, თუნდაც ერთი სოფელი იყოს, ხალხზე რომ არაფერი ვთქვათ. ეს სიყვარული საგნისადმი და ამოუნურაობის გრძნობა, თითქოს უკიდეგანო ოკეანის ნაპირზე დგომა, წიგნის ყოველ მონაკვეთში ჩანს, თითოეული მათგანი დამოუკიდებელი გამოკვლევის სახეს ატარებს და სამომავლოდ პერსპექტივებს აჩენს.

წიგნის თავისებურება კიდევ ის არის, რომ ფოლკლორული ჟანრები განხილულია არა განცალკევებით, განყენებულად, როგორც თვითკმარი რამ ერთეულები, არამედ სხვა ჟანრებთან და, რაც მთავარია, ყოფასთან კავშირში, როგორც ერთიანი შემოქმედების ორგანული ნაწილი.

„ოსური ფოლკლორი“, რომელსაც ქართულენოვანი ფოლკლორისტიკის მნიშვნელოვან შენაძენად ჩავთვლიდი, თბილის სახელმწიფო უნივერსიტეტის პუმანიტარული ფაკულტეტის, კერძოდ, კავკასიოლოგიის ინსტიტუტის (წინათ კათედრის), წარმატებული ინიციატივაა. ეს მისი საამაყო პრიორიტე-

ტია, რადგან მსგავსი რამ არც მონოგრაფიის, არც სახელმძღვანელოს სახით მოსალოდნელ ენებზე – არც ოსურად, არც რუსულად არ არსებობს. ამიტომაც სასურველია, უფრო მეტიც, აუცილებელია „ოსური ფოლკლორის“ თარგმნა ოსურ და რუსულ ენებზე. და ეს იქნება ჩვენი მეცნიერების არა მცირედი წვლილი ოსოლოგიაში, რომელსაც ჩვენში საკმაო ხნის ტრადიცია აქვს: მის სათავეში სახელოვანი ენათმეცნიერი გიორგი ახვლედიანი დგას.

ზურაბ კიკნაძე

წინასიტყვაობა

მთის ხეობებში მცხოვრებმა ოსებმა ფრაგმენტების სახით XX საუკუნემდე შეინარჩუნეს ტრადიციული ყოფა, რომელიც საზოგადოებაში ზეპირი ტექსტების გავრცელებისა და შენახვის ხელსაყრელ პირობებს ქმნიდა. ბოლო დრომდე მაღალმთიან სოფლებში ოსების ყოველდღიური ცხოვრება ეფუძნებოდა საუკუნეების სილრმიდან მომდინარე ადათებს, პრეცედენტულ სამართალსა და რელიგიურ წარმოდგენებს. სწორედ ხალხურ ტექსტებში, როგორც კოლექტიური შემოქმედების ძეგლებში, ყველაზე მკაფიოდ გამოვლინდა ოსი ხალხის საზოგადოებრივი ცხოვრების თითქმის ყველა მხარე: ისტორიული გამოცდილება, საოჯახო ყოფა, რელიგიური რწმენა, მითოლოგიური წარმოდგენები, პოეტური აზროვნება, გმირობის იდეალი, მორალი, ადამიანის ეგზისტენცია. ოსურმა ზეპირსიტყვიერებამ მსოფლიოს ხალხთა ეპიკური შემოქმედება გაამდიდრა მრავალფეროვანი სიუჟეტებითა და მოტივებით, გმირთა დაუვიწყარი, შთამბეჭდავი მხატვრული სახეებით. წართების ეპოსის შემქმნელ ხალხს ნამდვილად შეუძლია იამაყოს თავისი ფოლკლორით.

„ოსური ფოლკლორი“, როგორც სასწავლო კურსი და ოსი ხალხის ზეპირსიტყვიერების შემსწავლელი სამეცნიერო დისციპლინა, ივანე ჯავახიშვილის სახელობის თბილისის სახელმწიფო უნივერსიტეტში კავკასიოლოგიის საბაკალავრო პროგრამას მხოლოდ 2007 წლიდან დაემატა. ამ დროიდან ვხელმძღვანელობ ლექცია-სემინარებს „ოსურ ფოლკლორში“. აღმოჩნდა, რომ ყოველწლიურად სულ უფრო და უფრო იზრდებოდა სტუდენტთა ინტერესი საგნის მიმართ. მას ირჩევდნენ როგორც ჰუმანიტარულ მეცნიერებათა ფაკულტეტის, ასევე სხვა

ფაკულტეტების სტუდენტებიც. ლექცია-სემინარებზე იბადებოდა არაერთი ახალი შეხედულება თუ თვალსაზრისი ოსური ზეპირსიტყვიერი შემოქმედების შესახებ.

სახელმძღვანელოს ძირითადი ნაწილი 2012–2014 წლებში დაიწერა. ოსურ ტექსტებზე მუშაობა, მათი უანრული კლასიფიკაცია, ახალ-ახალი მასალის მოძიება, არქეტიპების კვლევა და ტრადიციული ელემენტების ანალიზი ნამდვილად გამორჩეულ შემოქმედებით პროცესს წარმოადგენდა, რომელიც სასიამოვნო მოგონებად დამრჩება. ყოველი დილა სიახლის აღმოჩენისა და ახალი ცოდნის შეძენის მოლოდინით თენდებოდა. ნართების ეპოსის შემქმნელი მცირერიცხოვანი ხალხის ფოლკლორი კი-დევ უფრო მდიდარი აღმოჩნდა, ვიდრე მანამდე წარმომედგინა. აღსანიშნავია, რომ ქართულ და ოსურ ზეპირ ტექსტებში მითოლოგების, ცალკეული სიუჟეტებისა და მოტივების საზრისის გარკვევა, სწორედ ამ ორი ხალხის ფოლკლორული შემოქმედების კომპარატივისტული და მხატვრული ანალიზით ხერხდება.

წიგნში განხილულია რჩეული ოსური ხალხური ტექსტები, რომლებიც თავის დროზე ჩაიწერეს და გამოაქვეყნეს აკადემიკოსებმა: ა. შიგრენმა, ა. შიფნერმა, ვს. მილერმა, აგრეთვე ჟ. დიუმეზილმა და სხვებმა. სხვა ენებზე თარგმნილი ზეპირსიტყვიერების ნიმუშები შედარებულია ოსურ დედანთან.

ხალხური ტექსტის პერმენევტიკა საერთო ნიშანთა და მასასიათებელთა ერთობლიობას ემყარება. ოსური ფოლკლორის სხვადასხვა უანრის ნიმუშები წიგნში განხილულია მთელთან მიმართებაში, როგორც ერთი ხალხის ტრადიციული შემოქმედების ნაწილი, საზოგადოების ყოფაში მათი ფუნქციისა და დანიშნულების მიხედვით.

ოსური ტრადიციული ყოფისა და ფოლკლორული შემოქმედებისთვის დამახასიათებელი ტერმინოლოგია სახელმძღვანელოში წარმოდგენილია ოსურ ენაზე შესაბამისი დამწერლობით. ცალკეული სიტყვების სემანტიკისა და წარმომავლობის ასახსნე-

ლად ვიხელმძღვანელე ვ. აბაევის ოსური ენის ისტორიულ-ეტი-მოლოგიური ლექსიკონის ოთხტომეულით.

ამოუწურავი ოსური ფოლკლორული რეპერტუარიდან სა-ხელმძღვანელოში ის ტექსტები განვიხილე, რომლებიც უფრო მეტად გამოხატავენ ოსი ხალხის ტრადიციულ შეხედულებებს, კოლექტიურ მენტალობას, ზნეოპრივ პრინციპებს, რწმენასა და ცხოვრების ყაიდას. ოსურ ზეპირსიტყვიერებას აქვს საკაცობ-რიო მნიშვნელობაც. მართალია, ოსური ფოლკლორი ერთი უნი-კალური ხალხის შემოქმედებით ენერგიასა და სულიერ ღირე-ბულებებს წარმოგვიდგენს, მაგრამ ის იდუმალი სამყარო და მასში გადმოცემული სიბრძნე, თავისი მომნუსხველი მიმზიდვე-ლობით, ნამდვილად ამდიდრებს და ამრავალფეროვნებს მსოფ-ლიოს ხალხთა კულტურულ საგანძურს.

ინდოევროპული წარმოშობის ოსმა ხალხმა კავკასიის ფოლკლორი კიდევ უფრო კავკასიური და ღირებული გახადა. წარმოუდგენელია კავკასიის ხალხთა ფოლკლორული შემოქმე-დება ოსური ზეპირსიტყვიერების გარეშე.

უპრეცედენტო მოვლენად შეიძლება მივიჩნიოთ ოსი ხალ-ხის მიერ ორი განსხვავებული ეპოსის შექმნა, რომლებიც მოგ-ვითხრობენ საგმირო ამბებს ლეგენდარული ხალხების – მოუს-ვენარი ცარციათებისა და ძლევამოსილი ნართების შესახებ. ორივე ეპოსში წარმოდგენილია სრულიად თვითმყოფადი და ორიგინალური სამყარო თავისი შთამბეჭდავი გმირებითა და ან-ტიგმირებით. ნამდვილად უნდა გავიზიაროთ ჟ. დიუმეზილის თვალსაზრისი, რომ ნართების ეპოსის ძირითადი თავდაპირვე-ლი ბირთვი ოს ხალხში ჩამოყალიბდა.

„ოსური ფოლკლორის“ სახელმძღვანელო დღემდე არ გა-მოქვეყნებულა არც რუსულ, არც ოსურ და არც სხვა რომელიმე ხალხის ენაზე. ის პირველად საქართველოში უნივერსიტეტის სტუდენტებისთვის დაიწერა. ვფიქრობ, ოსი ხალხის ფოლკლო-რული შემოქმედების შესწავლა, კვალიფიციური, მაღალი კომ-

პეტენციისა და პროფესიული უნარების მქონე სპეციალისტების მომზადება, სასურველ ნაყოფს გამოიღებს და მოკრძალებულ წვლილს შეიტანს არა მხოლოდ სამეცნიერო დარგის განვითარებაში, არამედ ზოგადჰუმანური ღირებულებების დამკავიდრებაში, თანამედროვე სოციალ-პოლიტიკური და ჰუმანიტარული პრობლემების მოგვარებაში.

დასასრულ, მადლობას მოვახსენებ თსუ კავკასიოლოგის ინსტიტუტის ხელმძღვანელს, პროფესორ ცირა ბარამიძეს, რომლის უშუალო ინიციატივით „ოსური ფოლკლორის“ კურსმა საპატიო ადგილი დაიკავა თბილისის სახელმწიფო უნივერსიტეტის სასწავლო-საბაკალავრო პროგრამაში. ქალბატონმა ცირა ბარამიძემ შესაძლებლობა მომცა ღრმად გავცნობოდი ოსი ხალხის ზეპირსიტყვიერებას და შემექმნა მონოგრაფიული წიგნი „ოსური ფოლკლორი“.

მადლიერებას გამოვხატავ ქალბატონ ნაირა ბეპიევას მიმართ ოსური კულტურის პოპულარიზაციაში განეული ღვაწლი-სათვის. სახელმძღვანელოში გამოყენებულია უშუალოდ ოსური დედნიდან ქართულ ენაზე ნაირა ბეპიევასა და მერი ცხოვრებოვას მიერ მაღალი ოსტატობით თარგმნილი ხალხური ტექსტები.

მადლობას მოვახსენებ თანამედროვე ჰუმანიტარული მეცნიერების თვალსაჩინო წარმომადგენელს ზურაბ კიკნაძეს. ბატონ ზურაბ კიკნაძესთან მრავალწლიანმა თანამშრომლობამ დიდალი თეორიულ-მეთოდოლოგიური ცოდნა და გამოცდილება შემძინა. სწორედ მასთან ერთად საქართველოს მთასა და ბარში, „ლიხს აქით და იქით“ ფოლკლორულ ექსპედიციებში მოგზაურობისას, პირად საუბრებში იბადებოდა „ოსური ფოლკლორის“ სახელმძღვანელოს შექმნის იდეა.

ავტორი

შესავალი

ოსი ხალხის შორეულმა წინაპრებმა, ირანულენოვანმა სკვითებმა და სარმატებმა ევროპისა და აზიის თვალუწვდენელი სივრცეები მოიარეს. სკვითურ-სარმატული ტომებიდან ერთი ნაწილი, ალანების სახელწოდებით, IV საუკუნეში ჩრდილოეთ კავკასიის სტეპებში მომთაბარე ცხოვრებას ეწეოდა (ამიანე მარცელიანე). მოგვიანებით, მათ შექმნეს ადრეფეოდალური სახელმწიფო – ალანთა სამეფო, რომელსაც X-XII საუკუნეებში მჭიდრო ურთიერთობა ჰქონდა საქართველოს ფეოდალურ მონარქიასთან. X საუკუნეში ალანებმა საქართველოს გავლენით ქრისტიანობა მიიღეს. ქრისტიანობის გავრცელებამ კიდევ უფრო გაამყარა და ახალ სიმაღლეზე აიყვანა ქართველი და ოვსი ხალხის ურთიერთობა, ალანთა და საქართველოს სამეფო კარის წარმომადგენლებს შორის გახშირდა დინასტიური ქორწინებები: გიორგი I-ის მეუღლე იყო ოვსთა მეფის ასული, დედა უფლისწული დემეტრესი. ბაგრატ IV-ს ცოლად ჰყავდა ბორენა, ოვსთა მეფის ასული. დავით აღმაშენებლის ასული რუსუდანი გათხოვილი იყო ოვსთა მეფეზე და გახდა ალანთა დედოფალი. დიდებული თამარის დედა, გიორგი III-ის თანამეცხედრე, იყო ოვსთა მეფის ხუდდანის ასული ბურდუხანი, რომლის ღირსებითა და სილამაზით აღფრთოვანებული უცნობი ავტორი „ისტორიანში“ მას უწოდებს „მზე-მზეთას შუენებითა“. თამარის ქმარი იყო დავით სოსლანი, დედით – ბაგრატიონი, მამით – ოვსთა მეფის ძე.

აღანთა სამეფო, რომელიც მდებარეობდა ჩრდილოეთ კავკასიის დასავლეთ ნაწილში, XIII საუკუნის პირველ ნახევარში ჯერ მონღოლებმა დაიპყრეს, შემდეგ თემურ-ლენგმა საბოლო-

ოდ გაანადგურა, ხოლო მოსახლეობის გადარჩენილი ნაწილი ჩრდილოეთ კავკასიის ბარიდან აიყარა და კავკასიონის მთებს შეეხიზნა. ისტორიკოსთა აზრით, სწორედ ამ დროიდან გახდნენ ასები ქართველების უშუალო მეზობლები და დაიწყო მათი, როგორც მთის ხალხის, ეთნიკური ჩამოყალიბება (რ. თოფჩიშვილი).

ოსური ენა განეკუთვნება ინდოევროპულ ენათა ოჯახის ირანულ შტოს. ოსი ხალხი ჩამოყალიბდა თანამედროვე ჩრდილოეთ ასეთის მთიანეთში ირანულენოვანი ტომებისა და კავკასიის ადგილობრივი მოსახლეობის შერევის შედეგად.

ოსების თვითსახელწოდება არის ირონი. ქართული ისტორიული წყაროები მათ ძველთაგანვე ოვსების სახელწოდებით იცნობდა. სწორედ ქართველებისგან გავრცელდა ჯერ რუსულ ენაში და იქიდან მსოფლიოს სხვა ხალხებში ეთნონიმი „ოსი“. ჩრდილოეთ კავკასიის სხვადასხვა ხეობაში დასახლებულ ოსებს არ ჰქონიათ საერთო ეთნიკური სახელწოდებაც. ისტორიკოსთა აზრით, XVIII საუკუნემდე ოსები მხოლოდ ჩრდილოეთ კავკასიის მთიანეთის ოთხ ხეობაში ცხოვრობდნენ. ესენი იყო ალაგირის, ქურთაულის, თაგაურისა და დიგორის ხეობები. ხეობათა გასასვლელებში ყაბარდოელმა თავადებმა ციხე-სიმაგრეები ააგეს და ოსები მთლიანად მოწყვიტეს ჩრდილოეთ კავკასიის ბარს. მთის ვიწრო ხეობებში სიღარიბითა და უმიწობით შეწუხებული ოსები XIII-XIV საუკუნეებიდან განუყვეტლად ცდილობდნენ კავკასიის სამხრეთ ფერდობებზე გადმოსვლას და იქ დამკვიდრებას. ქართველი მეფეების მცდელობა, აღეკვეთათ ოსების ჩრდილოეთ კავკასიიდან სამხრეთის მიმართულებით გადაადგილება, დროებითი აღმოჩნდა.

ალაგირის ხეობიდან გადმოსულმა ოსებმა თანდათან დაიკავეს საქართველოს ისტორიული პროვინცია დვალეთი. ეს პროცესი XVII საუკუნეში ადგილობრივი დვალების ასიმილაციით დასრულდა (თოფჩიშვილი 2007: 94).

იმ დროს, როდესაც ქართლ-კახეთის მეფეებს სისხლის-მღვრელი ბრძოლები ჰქონდათ ირანელ და თურქ დამპყრობ-ლებთან, შიდა ქართლის მთიანეთში (მალრან-დვალეთი) გრძელ-დებოდა ოსთა თარეში, ე. წ. ოსიანობა. ნასოფლარებად ქცეულ შიდა ქართლის მთიანეთში XVIII საუკუნეში ოსური დასახლებე-ბი გაჩნდა.

თავის მხრივ, XVII–XVIII საუკუნეებში ქართლის მეფეები ცდილობდნენ თავიანთი გავლენა და პატრონობა აღედგინათ ჩრდილოეთ ოსეთის ოთხივე ხეობაზე. ისინი, წინამორბედ ბაგ-რატიონთა მსგავსად, არ აკლებდნენ ზრუნვას ოსეთის ქრისტი-ანულ სიწმინდეებს და მათ სახელზე უხვად გასცემდნენ შესა-წირს. ამის დასტურია ჩრდილოეთ ოსეთში რექომისა და ძივლი-სის ძუარებში ქართველ მეფეთა მიერ შენირული ზარები. ქარ-თლ-კახეთის მეფეებს, რომლებსაც იმ პერიოდში შაჰებთან ვა-სალური დამოკიდებულება ჰქონდათ, ქვეყნის მართვა უხდებო-დათ ირანის ხელისუფლების მუდმივი დევნისა და ზედამხედვე-ლობის პირობებში. მათ აიძულებდნენ მიეღოთ ისლამი, რო-გორც მეფობის აუცილებელი პირობა, თუმცა ისინი საიდუმ-ლოდ მაინც აღიარებდნენ ქრისტიანობას. ამიტომ ძუარებისად-მი ზარების შენირვით მეფეები არ ხელმძღვანელობდნენ პოლი-ტიკური მოსაზრებით. ქართლის მეფეები ოსეთში აახლებდნენ მივიწყებულ ქრისტიანობას, აღადგენდნენ სალოცავებს, მფარ-ველ წმინდანთა სახელზე შესაწირავს გასცემდნენ და თავიანთი მისიონერული ღვაწლიდან გამომდინარე, ოსთა მფარველი ძუა-რების მოძმეებად ითვლებოდნენ. მეფეები და ძუარები არა მხო-ლოდ ერთი და იმავე ეპითეტებით მოიხსენებიან, არამედ – მსგავსი ფუნქციებითაც. ძუარებსა და ქართველ მეფეებს ჰყავ-დათ საზიარო ყმები და თავიანთ ქვეშევრდომებზე ზრუნვა მათ უპირველეს მოვალეობას შეადგენდა.

XVII-XVIII საუკუნეებში შაჰებისგან დევნილი ქართლ-კახე-თის მეფეები: თეიმურაზ I, არჩილი, გიორგი XI და ვახტანგ VI –

ჩრდილოეთ ოსეთის ხეობებში კულტურულ-საგანმანათლებლო და მისიონერულ საქმიანობას ეწეოდნენ. მოგვეპოვება ცნობები ქართველი მეფეების ძუარებთან ურთიერთობის შესახებ.

არჩილ მეფე თავისი ოჯახით ოსეთში, კერძოდ, თაგაურისა და დიგორის ხეობებში, თვეობით, ზოგჯერ მთელი წლის განმავლობაში რჩებოდა და იქ ენეოდა პოლიტიკურ თუ შემოქმედებით მოღვაწეობას. არჩილ მეფის ცნობილი „გაბაასებიდან“ ირკვევა, რომ რვა თვე მას ჩხერსა და დვალეთში გაუტარებია. შემდეგ ის ოსეთში, კერძოდ, ფაიქომში გადასულა და ერთი წელიც იქ უცხოვრია, სადაც თავისი „გაბაასების“ დიდი ნაწილი, 724 სტროფი დაუწერია. პოემის 725-ე სტროფში მეფე-პოეტი აღნიშნავს: – „ამას ზეით ოსეთს მითქვამს, ამას ქვეით ვიტყვი რუსეთსო“.

არჩილ მეფე ერთხანს თავის ძმისწულებთან ერთად იმყოფებოდა ოსეთის დასავლეთ ნაწილში, კერძოდ, დიგორში. მას თან ახლდნენ ლევანის ვაჟები: ქაიხოსრო, ვახტანგი (შემდეგ ვახტანგ VI) და დომენტი (ვახუშტი 1973: 482).

ვახტანგ VI-ს, რომელსაც ბავშვობაში ხან ზარამაგში, ხანაც დიგორში უხდებოდა ყოფნა, მოგვიანებით, 1711 წელს ოსეთში ულაშქრია: „ალიმხედრა სპითა შესლვად ოვსეთს და შევიდა და შემუსრნა პ (80) კოშკი, მოწვა და მოსტყვევნა ურჩნი... და მოვიდა... ქართლს გამარჯვებული ქს. ჩლია“ (ვახუშტი 1973: 491). საფიქრებელია, რომ ეს ლაშქრობა ჩრდილოეთ კავკასიაში, რომელიც, ალბათ, ოსეთის შემომტკიცებას ისახავდა მიზნად, არქეტიპულად იმეორებს, საქართველოს მთიანეთში წმინდა ნინოს მისიონერულ მოღვაწეობას და, აგრეთვე, XIII ს-ში განდგომილი ფხოვის შემოერთებისთვის ბრძოლას, როცა თამარმა იქ ქრისტიანობა აღადგინა. როგორც ჩანს, ოსები მეფეს განუდგნენ და ვახტანგ VI ამ ლაშქრობით თითქოს ახალ წესრიგს ამყარებს და ახალ საზოგადოებას აყალიბებს, ის თავის პატრონობასა და ქრისტიანობას აღადგენს ოსეთში.

საზოგადოებაში წესრიგის შეტანას, კულტის განახლებასა და რელიგიური ცხოვრების აღორძინებას ემსახურებოდა ოსეთის სალოცავებში ქართველ მეფეთა მიერ ძუართა სახელზე შენირული ზარები.

რექომის ძუარისთვის, რომელიც ცეის ხეობაში მდებარეობს, 1680 წელს გიორგი XI-ს შეუწირავს ზარი შემდეგი წარწერით: „ქ. ჩვენ ბაგრატონიანმან ხელმწიფემ დიდისა მეფის შანაგაზის შვილმან მეფემ გიორგიმ შემოგწირეთ ზარი ესე მამა წმიდას ქუეყანასა ოსეთისასა, სალოცავსა დიგორისასა და დვალეთისასა ჩუენდა სადღეგრძელოდ და გასამარჯვებლად და მეფობისა ჩვენისა წარსამართებლად. ქვს ტნიც“ (1680 წ.) (თო-გოშვილი 1969: 231).

მანამდე კი, 1673 წელს, გიორგი XI-ს ძივლისის ძუარისთვის შეუწირავს ზარი, რომელზეც მკაფიოდ იკითხება ქართულ ენაზე შესრულებული წარწერა: „მე, ქართლის ხელმწიფემ, მეფეთ-მეფე გიორგიმ, შემოგწირე ესე ზარი შენ, ზიბლისის (ძივლისის) წმინდა გიორგის ჩვენი გამარჯვებისთვის. ქორონიკონით 361“ (თოგოშვილი 1969: 231).

ზარს განსაკუთრებული მნიშვნელობა ჰქონდა ტრადიციული საზოგადოების რელიგიურ ცხოვრებაში. მფარველი წმინდანის ქვეშვერდომები მას, როგორც ძვირფას განძს, განსაკუთრებით იცავდნენ და თვალისჩინივით უფრთხილდებოდნენ.

1683 წელს არჩილ მეფემ ასევე ზარის შენირვით გამოხატა მოძმეობა ძივლისის ძუარის მიმართ. ზარის წარწერა იუწყება: „მე, მეფე არჩილმა, მოგიძლვენი ესე ზარი ძიბლისის (ძივლისის) ჯვარს: ღმერთმა ინებოს, რომ მის ხმაზე მოდიოდნენ ოსები სამების სადიდებლად“ (მამიევი 2010).

ჩვენ არ ვიცით, რომელმა ქართველმა მეფემ შეაბა პირველი ზარი ოსთა ძუარს. მთიელთა სალოცავებთან მოძმეობის ტრადიცია თამარისა და ლაშა გიორგის ეპოქიდან უნდა მომდინარეობდეს, რომელსაც ქართლ-კახეთის XVII-XVIII საუკუნეების გა-

მაჰმადიანებული ქართველი მეფეებიც (კონსტანტინე იმამ-ყული ხანი, დავით იმამ-ყული ხანი) იცავდნენ. ეს ერთგვარი საკრალური ურთიერთობა მფარველ წმინდანებსა და მეფეებს შორის ბაგრატიონთა დინასტიის მმართველობის ბოლომდე შენარჩუნდა (კიუნაძე 1996: 257-268).

სამწუხაროდ, ჩვენამდე ვერ მოაღწიეს სხვა დოკუმენტებმა, რომლებიც მოგვითხრობდნენ ქართველი მეფეების ძუარებთან ურთიერთობის სხვა საკრალურ დეტალებზე. თუმცა შენირული ზარები, როგორც ოსეთში საკულტო ცხოვრების აღორძინების ერთ-ერთი ყველაზე ხილული ნივთი, ქართველ მეფეთა ძუარებთან მოძმეობისა და მათი მისიონერული ღვაწლის მკაფიო დასტურია. ადგილობრივი მოსახლეობის კონსოლიდაციაში განსაკუთრებული მნიშვნელობა ექნებოდა ქართველ მეფეთა მიერ წმინდა სალოცავისათვის შენირული ზარების ხმას, რომელიც უხმობდა ოსურ საზოგადოებას „ერთ შესაკრებელში“, როგორც ძუარის მადიდებელ ყმებსა და ქართლის მეფის ქვეშევრდომებს.

XVIII საუკუნის შუა წლებიდან ჩრდილოეთ კავკასიაში, მათ შორის, ოსეთშიც, რუსეთის გავლენა გაძლიერდა.

1744 წელს რუსეთის მთავრობამ შექმნა ასეთის სასულიერო კომისია. ის თითქმის მთლიანად დაკომპლექტებული იყო ქართველი სასულიერო პირებით, რომლებიც ოსეთის მიუვალ ხეობებსა და მაღალმთიან სოფლებში რუდუნებითა და სასოებით განამტკიცებდნენ ქრისტიანობას. ქართლის მეფე თეიმურაზ II და ანტონ I ხშირად ხვდებოდნენ კომისიის წევრებს. კომისიის ხელმძღვანელი არქიმანდრიტი პახომი საქართველოდან ფულად სახსრებს იღებდა ჩრდილოეთ კავკასიაში ქართველი ტყვეების გამოსახსნელად და სამშობლოში დასაბრუნებლად. ქრისტიანობის გარდა, ქართველი სასულიერო პირები ოსებს შორის ქართულ მნიგნობრობასაც ავრცელებდნენ, ისინი ოსავჭვებს ქართულ წერა-კითხვას ასწავლიდნენ. არქიმანდრიტ

პახომის ინიციატივით 1764 წელს მოზღვების ციხე-სიმაგრეს-თან ოსი ბავშვებისთვის გაიხსნა სკოლა, მანამდე კი ის ქართული სკოლის გახსნას აპირებდა ქურთაულის ხეობაში.

შენიშვნა: შუა საუკუნეებში ოსეთში ღვთისმსახურების დროს ქართულ ენასა და დამწერლობას იყენებდნენ. სწორედ ამით აიხსნება ოსურ ენაში ქართული ან ქართული ენის გავლენით დამკვიდრებული საკარალური, საღვთისმეტყველო ლექსიკის სიმდიდრე.

XVIII საუკუნის ბოლოს ოსმა სწავლულმა იოანე იალღუზიძემ (გაბარათი) (1775-1830) ქართული გრაფიკის საფუძველზე შექმნა ოსური დამწერლობა. დღემდე მოღწეული პირველი ოსური ხელნაწერი შესრულებულია ქართული გრაფიკით ი. იალღუზიძის მიერ და თარიღდება 1802 წლით.

1771 წლიდან ოსეთის სასულიერო კომისიას ხელმძღვანელად რუსი სასულიერო პირი დაუნიშნეს და იგი რუსი სასულიერო პირებით შეავსეს. რუსეთის პოლიტიკური აქტიურობა სულ მაღლე ჩრდილოეთ ოსეთის რუსეთის შემადგენლობაში შეყვანით გაფორმდა. 1774 წელს, თურქეთთან ქურუკ-კაინარჯის ზავის დადების შემდეგ, რუსეთმა ჯერ ყაბარდო შეიიერთა, ხოლო შემდეგ თავისი ბატონობა ჩრდილოეთ კავკასიაში ოსეთის ოთხივე ხეობაზე დაამყარა. 1792 წელს ოსეთის სასულიერო კომისიამ არსებობა შეწყვიტა.

1801 წელს ქართლ-კახეთი რუსეთის გუბერნიად გამოცხადდა. ქართველები და ოსები ერთი იმპერიის, ერთი სახელმწიფოს შემადგენლობაში აღმოჩნდნენ. ისტორიულმა ბედმა ეს ორი ხალხი კიდევ უფრო დააკავშირა ერთმანეთს.

XIX საუკუნის დამდევიდან ოსები შიდა ქართლის მთიანეთიდან მასიურად სახლდებოდნენ მთისწინეთშიც. XIX საუკუნის მეორე ნახევარში რუსეთის მთავრობამ და სინოდმა ოსებს ნებართვა მისცა, გადასულიყვნენ შიდა ქართლიდან და დასახლე-

ბულიყვნენ თბილისის გუბერნიის სახაზინო და საეკლესიო მიწებზე.

XIX საუკუნის ბოლოსა და XX საუკუნის დასაწყისში ოსებმა კომპაქტური დასახლებები შექმნეს აღმოსავლეთ საქართველოს თითქმის ყველა კუთხეში, კერძოდ, ახმეტის, ლაგოდეხის, ყვარლის, გურჯაანის, დუშეთის, ბორჯომის, ქარელის, ხაშურის, გორის, თეთრიწყაროს რაიონის სოფლებში. ოსთა ნაწილი სახლდებოდა სახაზინო მიწებზე, ზოგი ადგილობრივი ფეოდალისგან იჯარით იღებდა, ხოლო ზოგიც კერძო საკუთრებაში ყიდულობდა მინას. ხშირად ისინი შეუსაკუუნების ქართული ფეოდალური ნასოფლარების სიახლოვეს მკვიდრდებოდნენ.

საქართველოს I რესპუბლიკის წლებში (1918-1921 წწ) შიდა ქართლში ბოლშევკიური პროპაგანდის გაძლიერების შედეგად სიტუაცია გამწვავდა. 1920 წლის მაისში ბოლშევკებმა ჯავის რაიონში აჯანყება მოაწყვეს, რომელშიც, სამწუხაროდ, ოსური საზოგადოების ნაწილიც ჩაითრიეს. საქართველოს მთავრობა იძულებული გახდა იქ წესრიგი შეიარაღებული ძალის გამოყენებით აღედგინა.

1921 წელს საბჭოთა რუსეთმა საქართველო დაიპყრო. სულ მალე, 1922 წელს, საბჭოთა ხელისუფლებამ შიდა ქართლში „სამხრეთ ოსეთის ავტონომიური ოლქი“ შექმნა. 1924 წლის 7 ივლისს ჩრდილოეთ კავკასიის ცენტრალურ ნაწილში შეიქმნა კიდევ ერთი ოსური სახელმწიფოებრივი ნარმონაქმნი ჩრდილოეთ ოსეთის ავტონომიური ოლქი, რომელიც 1936 წელს ავტონომიურ რესპუბლიკად გადაკეთდა.

XX საუკუნეში საქართველოში მცხოვრები ოსები თითქმის ადაპტირებული იყვნენ ქართულ ყოფასა და კულტურასთან, რასაც ქართველებსა და ოსებს შორის შერეული ქორწინებების განსაკუთრებულად მაღალი პროცენტული მაჩვენებელიც ადასტურებს. საქართველოს სოფლებსა და ქალაქებში, ქარხნებსა და ფაბრიკებში, სახელმწიფოს მართვა-გამგეობის ორგანოებსა

და კულტურულ დაწესებულებებში ქართველები და ოსები ერთად შრომობდნენ და ერთად იღვწოდნენ ქვეყნის უკეთესი მომავლისთვის. თუმცა პოსტსაბჭოთა პერიოდში განვითარებული პოლიტიკური პროცესების შედეგად შიდა ქართლში (ცხინვალის რეგიონში) მდგომარეობა უკიდურესად დაიძაბა. 2008 წლის აგვისტოში იქ კონფრონლის აღსადგენად რუსეთ-საქართველოს შორის სისხლისმდვრელი ბრძოლა გაჩაღდა, რომელიც რუსეთის ფედერაციის მიერ ცხინვალის რეგიონის, ე. წ. სამხრეთ ოსეთის ავტონომიური ოლქის ოკუპაციით დასრულდა.

ჩემს მიზანს არ წარმოადგენს ქართულ-ოსური ურთიერთობების პოლიტიკური ანალიზი. მხოლოდ იმიტომ, რომ წარსულის მოვლენები მნიშვნელოვან გავლენას ახდენს ნებისმიერი ხალხის შემოქმედებაზე, ეთნოსოციალურ სტრუქტურასა და ფოლკლორის უანრულ სისტემაზე, საჭიროდ ჩავთვალე ოსი ხალხის განვლილი ისტორიული გზის ზოგადი მიმოხილვა.

ალან-ოსების კულტურული იდენტობის, ხანგრძლივი ცხოვრებისეული გამოცდილებისა და მხატვრული აზროვნების გამოხატვის ერთადერთ საშუალებას XX საუკუნემდე ფოლკლორული შემოქმედება წარმოადგენდა. მაღალმთიან სოფლებში მცხოვრები ოსები მითოსის დაუწერელი კანონებით აგრძელებდნენ ყოველდღიურ ცხოვრებას, რომელიც ეფუძნებოდა არქეტიპებს, მფარველი წმინდანის კულტს, საკრალურ ზეპირ ისტორიებსა და პრეცედენტულ-ჩვეულებით სამართალს. ოსები ზეპირად გადასცემდნენ მომავალ თაობებს მითიური მოვლენების ცოდნას, ძრწოლით ანდობდნენ ინიციაციურ საიდუმლოებებსა და ყვებოდნენ ვრცელ ეპიკურ ტექსტებს გმირთა საარაკო თავ-გადასავალზე. მთიან ოსეთში ტრადიციულ ზეპირ ტექსტებზე დაფუძნებული ცოდნა არეგულირებდა საზოგადოების შიგნით თუ მის გარეთ მომხდარ კონფლიქტურ სიტუაციებს, წარმართავდა ყოფა-ცხოვრების ყველა სფეროს.

სანამ უანრების მიხედვით ოსური ხალხური ტექსტების გან-
ხილვას დავიწყებთ, ჯერ განვმარტოთ ხალხური შემოქმედების
ფუნდამენტური საკითხები: რა არის ფოლკლორი? რა სპეცი-
ფიკა აქვს ფოლკლორულ შემოქმედებას? როგორ იქმნება ხალ-
ხური ტექსტი?

ლიტერატურა

ვახუშტი 1973: ბატონიშვილი ვახუშტი, ალწერა სამეფოსა სა-
ქართველოსა, ქართლის ცხოვრება, ტ. IV, ტექ-
სტი დადგენილი ყველა ძირითადი ხელნაწერის
მიხედვით ს. ყაუხჩიშვილის მიერ, გამომც., „საბ-
ჭოთა საქართველო“, თბ., 1973.

თოგოშვილი 1969: გ. თოგოშვილი, საქართველო-ოსეთის ურ-
თიერთობა XV-XVIII სს. გამომც., „საბჭოთა სა-
ქართველო“, თბ., 1969.


თოფჩიშვილი 2007: რ. თოფჩიშვილი, კავკასიის ხალხთა ეთნოგ-
რაფია, „უნივერსალი“, თბ., 2007.

კიკნაძე 1996: ზ. კიკნაძე, ქართული მითოლოგია, I, ჯვარი და
საყმო, ქთ., 1996.

მამიევ 2010: М. Мамиев, Святой Георгий в осетинской религи-
озной традиции. <http://www.rushill.ru> 2010.



ဒုဂ္ဂနိုလ်မူလ် ဂေါ်မာရီဖျော်



ფართო გაგებით, ფოლკლორი არის ხელოვნების განსაკუთრებული დარგი, რომელიც ხალხში ზეპირად იქმნება და ზეპირად სრულდება. ფოლკლორი დაკავშირებულია საზოგადოების ტრადიციულ ყოფასთან და მას ადამიანთა კოლექტიური მეხსიერება ინახავს. ხალხური ტექსტი ეფუძნება უნივერსალურ ფორმათა სისტემას, კერძოდ, ტრადიციულ მსოფლმხედველობრივ ელემენტებს, ტიპოლოგიურ სიუჟეტებსა და მხატვრულ სახეებს. დროსა და სივრცეში ფოლკლორული ნაწარმოები ვარიანტების სახით ვრცელდება და მეტ-ნაკლებად ინარჩუნებს თვითმყოფადობას. ფოლკლორი, როგორც ზეპირი მხატვრული შემოქმედება, განკუთვნილია მოსასმენად და წარმოდგენილია სანახაობრივი ელემენტებით.

მართალია, ფოლკლორი ჯერ კიდევ უდამწერლობო საზოგადოების წიაღში ჩაისახა, მაგრამ ხალხური ტექსტების მიმართ მეცნიერული ინტერესი გვიან გაჩნდა. ფოლკლორისტიკა, ზეპირსიტყვიერების შემსწავლელი ფილოლოგიური მეცნიერება, დასავლეთ ევროპაში XVIII საუკუნის ბოლოს წარმოიშვა. ფოლკლორისტიკის ფუძემდებლები იყვნენ რომანტიკოსები. ფოლკლორისტიკის, როგორც სამეცნიერო დარგის ჩამოყალიბებაში განსაკუთრებული წვლილი შეიტანეს გერმანელმა რომანტიკოსებმა, ძმებმა, იაკობ და ვილჰელმ გრიმებმა. მიუხედავად იმისა, რომ მეცნიერება საკმაოდ გვიან დაინტერესდა ზეპირსიტყვიერებით, „ფოლკლორი კაცობრიობასავით ძველია“ (ა. დანდესი). ფოლკლორის სიძველე ზოგადი ცნებაა და ის ტრადიციის არქაულ მოდელს გულისხმობს. ფოლკლორისტიკაში უფრო მნიშვნელოვანია, რას წარმოადგენს ტექსტი ამჟამად და რა არის მისი საზრისი, ვიდრე იმის გარკვევა, თუ როგორი იყო ტექსტი ჩაწერამდე. თუმცა შესაძლებელია ზოგიერთი ფოლკლორული მო-

ტივისა და სიუჟეტის წარმომავლობის რეკონსტრუქცია საზოგადოების ყოფაში დადასტურებული ტრადიციების მიხედვით. თავის დროზე ვ. მილერმა და უ. დიუმეზილმა ისტორიულ-შედარებითი მეთოდის გამოყენებით ოსების ნართული ეპოსის ზოგიერთი სიუჟეტი სკვითების წეს-ჩვეულებებს დაუკავშირეს.

ხალხური სიტყვიერების, ზოგადად, ხალხური შემოქმედების აღმნიშვნელი საერთაშორისო ტერმინი „ფოლკლორი“ საკმაოდ გვიან გაჩნდა სამეცნიერო ლიტერატურაში. პირველად ტერმინი „ფოლკლორი“ გამოიყენა ინგლისელმა მეცნიერმა უილიამ თომსმა. მან 1846 წელს სტატია სათაურით „Folklore“ დაბეჭდა უურნალ „ათენეუმში“. უილიამ თომსმა ორი ანგლოსაქსური სიტყვისგან შექმნა კომპოზიტი (Folk – ხალხი და Lore – სიბრძნე) ფოლკლორი. შესაძლებელია, ფოლკლორისტის ყურადღებამ ტექსტიდან, მის უკეთ შესაცნობად, ფოლკის ცნობიერებისაკენ გადაინაცვლოს. ეს კი გააფართოებს ფოლკლორისტიკის საგნის სფეროს.

ხალხი (folk), რომელიც ქმნის სიბრძნეს (lore), წარმოადგენს სანგრძლივი დროის მანძილზე ჩამოყალიბებულ, საერთო ნიშნების მქონე საზოგადოებას, მყარ ერთობას, რომელიც ცხოვრობს განსაზღვრულ გეოგრაფიულ სივრცეში, სადაც მან, როგორც მოდგმამ, განიცადა რელიგიური და ენობრივი კონსოლიდაცია. მას აქვს ზეპირი სიუჟეტებით შენახული ცოცხალი მოგონება დასაბამიერ მოვლენებზე, წარსულზე, წინაპრებზე, საერთო მტრებზე, გმირებსა და წმინდანებზე.

საზოგადოების წევრთა კოლექტიური აქტივობის გამოსავლენად ხელსაყრელ პირობებს ქმნიდა ყოველწლიური დღესასწაულების ციკლი, საერთო ტრაპეზი, სამეურნეო საქმიანობა, ძეობა, ქორწილი, სტუმარმასპინძლობა, ლხინი, ნადირობა, ომი, თარეში, ეპიდემია, მიცვალებულის დაკრძალვა. თითოეულ აქტივობას საფუძვლად ედო ტრადიციული ქცევისა და აზროვნე-

ბის სტერეოტიპული ფორმები, რომლებიც ცალკეული ელემენტების სახით აისახებოდა ხალხურ ტექსტებში.

სოციუმის შიგნით მიმდინარე ყოფითი პროცესები ბიძგს აძლევდა საზოგადოებაში მხატვრული აზროვნების ტრადიციული ტიპებისა და მოდელების აღმოცენებას, ფოლკლორული მოტივებისა და სიუჟეტების შექმნას, საერთო შეხედულებებისა და პოეტური გემოვნების ჩამოყალიბებას.

ფოლკლორი არ არის მხოლოდ მხატვრული ტექსტი; ფოლკლორი არის ყველაფერი, რაც ხალხის წიაღში იბადება და ემსახურება მას, აკმაყოფილებს მის მოთხოვნილებებს. შეიძლება ეს იყოს მაღალმხატვრული პოეტური ნაწარმოებიც და უბრალოდ მოყოლილი ნარატივიც, მოკლებული რაიმე შემკულობას, მაგრამ იგი მაინც იმსახურებს ყურადღებას, როგორც გარკვეული მენტალობის გამომხატველი ტექსტი.

ფოლკლორული შემოქმედების ძირითადი ნიშნები

ხალხური ტექსტის სრულყოფილი ანალიზისთვის საჭიროა ფოლკლორული შემოქმედების უზოგადესი კანონებისა და ფოლკლორის თეორიის საკითხების ცოდნა, მათ შორის, თუ როგორ წარმოიშობა და იქმნება ზეპირსიტყვიერი ტექსტი, რა მიზნით სრულდება და რეალიზდება კოლექტივში და ბოლოს, როგორ იქცევა ის მთელი სოციუმის, ხალხის საკუთრებად.

ხალხური ტექსტის მხატვრულ-ესთეტიკური ღირებულების ძირითადი კრიტერიუმების გათვალისწინების გარეშე შეუძლებელია ფოლკლორული შემოქმედების გაგება.

ზეპირსიტყვიერებას აქვს მკაფიოდ განსაზღვრული და მკვეთრად ჩამოყალიბებული სპეციფიკური ნიშნები, რითაც იგი არსებითად განსხვავდება ლიტერატურისგან, ე. წ. მწერლური, ინდივიდუალური შემოქმედებისგან, ესენია: გავრცელების ზე-

პირი ფორმა, ვარიანტულობა, ანონიმურობა, კოლექტიურობა, ტრადიციულობა, ყოფითობა და სინკრეტიზმი.

ფოლკლორული შემოქმედება წარმოადგენს ხელოვნების განსაკუთრებულ ფორმას. ფოლკლორის სპეციფიკის შესწავლა სცილდება ფილოლოგიური მეცნიერების ფარგლებს, რაც განაპირობებს ფოლკლორისტიკის, როგორც სამეცნიერო დისციპლინის სირთულეს. ზეპირსიტყვიერების შესასწავლად მნიშვნელოვანია ეთნოლოგიის, მუსიკათმცოდნეობის, ლიტერატურის თეორიის, დიალექტოლოგიის, სოციოლოგიისა და მეცნიერების სხვა დარგების მონაცემები. მეცნიერების სხვადასხვა დარგი ფოლკლორულ ნაწარმოებს განსხვავებული კუთხით განხილავს. ფოლკლორი, თავისი სირთულიდან გამომდინარე, დღემდე რჩება განსაკუთრებული კვლევისა და ინტერესის ობიექტად. საკუთრივ ფოლკლორისტიკა შეისწავლის ხალხურ ხელოვნებას, ხალხის მხატვრულ შემოქმედებას; მუსიკალური ფოლკლორისტიკა სწავლობს ხალხურ მუსიკას; ქორეოგრაფიული ფოლკლორისტიკა – ხალხურ ცეკვებს; ფილოლოგიური ფოლკლორისტიკა – ხალხური სიტყვის ხელოვნებას.

ზეპირი გავრცელება

ფოლკლორის ერთ-ერთი სპეციფიკური ნიშანი არის ზეპირი გავრცელება. ლიტერატურული ნაწარმოები იწერება და წერილობით ვრცელდება. ხალხური ტექსტი ზეპირად იქმნება და ვრცელდება. კოლექტიური მეხსიერება ინახავდა ისეთ ხალხურ ტექსტებს, რომლებიც აკმაყოფილებდნენ სოციუმის ყოფით მოთხოვნებსა და საზოგადოების მხატვრულ გემოვნებას, სხვანაირად ის ვერც გავრცელდებოდა და ვერც ადამიანთა ხსოვნა შეინახავდა. ფოლკლორს ზოგჯერ მეხსიერების ხელოვნებასაც უნდოდებენ.

ზეპირი გადაცემა ყოველთვის მიმდინარეობს მოსმენილის ცვლილებით: ზოგი ელემენტი ინახება, ზოგი – იკარგება.

ერთი და იმავე ხალხური ტექსტის ყოველი ახალი ჩანაწერი განსხვავდება ყველა წინა ჩანაწერისგან. განსხვავება ვლინდება თვით ერთი და იმავე მთქმელის მიერ გამეორებულ ტექსტებშიც. ნაწარმოების ზეპირი გზით გავრცელებისას მნიშვნელოვანია, თუ ვისგან მოისმინა მთქმელმა ტექსტი და რა ასაკში. გასათვალისწინებელია, აგრეთვე, მთქმელის მეხსიერება, ტალანტი, მის მიერ გადმოცემული ამბის ყოფითი ნიუანსები და სხვ. ფოლკლორული ნაწარმოების ზეპირი გავრცელება თავისთავად გულისხმობს, რომ საქმე გვაქვს უკვე შემოქმედებით შედეგთან.

ხალხური ტექსტის ზეპირი გზით გავრცელების პროცესში სტიქიურად ხდებოდა ისეთი სახეების შერჩევა, რომლებიც მსმენელზე ზემოქმედებას მოახდენდა, მას გააკვირვებდა და აღტაცებაში მოიყვანდა. ამასთანავე, ისეთი ელემენტები და ნიშნები, რომლებიც ერთპიროვნული ინოვაციის შედეგად ან, შეიძლება, შემთხვევით მოხვდა ზეპირ ტექსტში, იდევნებოდა.

რადგან სხვადასხვა ჟანრის ფოლკლორულ ტექსტებს შესრულებისა და ზეპირად წარმოთქმის არაერთგვაროვანი, განსხვავებული პირობები პქონდათ, ცოდნის გადაცემაც სხვადასხვა ხერხითა და გზით ხდებოდა.

შელოცვის ტექსტებს, მაგიური ზემოქმედების ძალა რომ არ დაეკარგათ, სწავლობდნენ საიდუმლოდ და ყველასგან შეუმრნევლად. საკულტო ტექსტებისა და სადიდებლების ცოდნას მომავალი კულტმსახური გარდაცვლილი წინაპრებისგან სიზმარში ეუფლებოდა. ძუარის მსახური ამ გზით ეზიარებოდა საკრალურ სიბრძნეს. ზეპირი ცოდნის რიტუალური ფორმით გადაცემა ფოლკლორის სხვა ჟანრის ტექსტებსაც ახასიათებდა. მათი უმეტესობა ცერემონიების თანხლებით სრულდებოდა: სააკვნო სიმღერებს წარმოთქვამდნენ ახალგაზრდა დედები ჩვილბავშვებთან, შრომის სიმღერებს – მუშაობის პროცესში, ზღაპ-

რებს – დამით, ძირითადად, ზამთარში, სადლეგრძელოებს – სა-ერთო ტრაპეზზე, ნეფე-დედოფლის დალოცვის ტექსტს – კერი-ის ჯაჭვთან, შელოცვებს – ჩურჩულითა და ბუტბუტით, ხმით ნატირლებს – მიცვალებულის ცხედართან და ა. შ. თვით ისეთი ჟანრის ტექსტებსაც, რომლებიც დაკავშირებული არ იყო რაიმე რიტუალთან, ასრულებდნენ სიმღერით ან რიტმული მოძრაობით. შესაბამისად, მსმენელი აუდიტორიის მეხსიერებაში ღრმად იბეჭდებოდა ხალხური ტექსტის მთქმელი-იმპროვიზატორის ხმა, მელოდია, მიმიკა. ფოლკლორული ნაწარმოების ყოველი ახალი წარმოთქმის დროს ხდებოდა იმპროვიზაციის ამ ელემენტების განახლება, გამეორება და აქტივიზაცია. ზეპირი გავრცელება ფოლკლორის არსებითი ნიშანია, აქედან წარმოდგება მისი სახელწოდება ზეპირსიტყვიერება.

შენიშვნა: შეცდომაა, როცა ამბობენ და წერენ: „ხალხური ზეპირსიტყვიერება“. ხალხური სიტყვიერება თავის-თავად წარმოადგენს ზეპირ შემოქმედებას, ხოლო ზეპირსიტყვიერებაში მოიაზრება ხალხური ტექსტები. სწორი ფორმა არის ხალხური სიტყვიერება ან ზეპირსიტყვიერება. ასევე, ყოვლად დაუშვებელია, როცა წერენ და ამბობენ: „ხალხური ფოლკლორი“.

ანონიმურობა

ხალხურ ტექსტს არ ჰყავს ერთი კონკრეტული ავტორი, რადგან ფოლკლორული შემოქმედებითი პროცესი არ ცნობს ავტორობის საკითხს. ხალხურ ტექსტს არა მხოლოდ ერთი ადამიანის, არამედ მთელი ხალხის მეხსიერება ინახავს. შესაბამისად, ფოლკლორული ნაწარმოების წარმოთქმა შეუძლია ყველას, ვინც იცის ტექსტი და არ ეკრძალება მისი შესრულება.

შენიშვნა: მთქმელ-შემსრულებელთა მცირე ჯგუფი ფლობდა საკრალური, მაგიური და მისტიკური შინაარსის ტექსტების ცოდნას, რომელთა გათქმაც არ შეიძლებოდა. მათი ცოდნა საიდუმლოდ უნდა შენახულიყო განდობილთა ვიწრო წრეში...

ვერ დავასახელებთ ვერც ერთი კონკრეტული ხალხური ტექსტის შემსრულებელს, რომელიც შეიძლება მის ავტორად მიგვეჩნია. რასაკვირველია, საზოგადოებაში იყვნენ განსაკუთრებული პოეტური ნიჭით დაჯილდოებული ადამიანები, რომელთა გონებაშიც ყალიბდებოდა თავდაპირველი ტექსტი, მაგრამ პირველი შემსრულებელი ფოლკლორულ ნაწარმოებს ქმნის არა „საკუთარი პიროვნული ჩანაფიქრის“ მიხედვით, არამედ ისეთს, როგორიც ხალხს მოეწონებოდა და მთლიანად გამოხატავდა ხალხის სათემელს. ინდივიდი, ფოლკლორული ნაწარმოების შემსრულებელი, ტექსტში იყენებს ტრადიციულ ე. ნ. მზა მხატვრულ ფორმებს და ხალხური თხრობისთვის დამახასიათებელ ელემენტებს, რომლებიც გადადის ერთი ტექსტიდან მეორეში და ხშირად ზეპირსიტყვიერების მთელ უანრებს მოიცავს. ფოლკლორი იქმნება საავტორო ინდივიდუალობის გარეშე. „უპიროვნობა“ წარმოადგენს ზეპირსიტყვიერების ერთ-ერთ თავისებურებას. ფოლკლორული ნაწარმოების მხატვრული ქსოვილი, თხრობის სტილი მთლიანად ხალხური პოეტიკის ნესებს ემყარება. ხალხურ რეპერტუარში მაშინ მოხვდება ტექსტი, თუ ის გარდაიქმნება საზოგადოების მხატვრული გემოვნების შესაბამისად; „ფოლკს“ აქვს თავისი ყაიდა და პოეტური ყალიბი, რომელშიც იძერწება ყოველი ფოლკლორული ნარატივი, თითოეული ხალხური პოეტური ტექსტი.

ანონიმურობა ფოლკლორისა და ენის საერთო ნიშანია. არც ენას და არც ფოლკლორულ ტექსტს არ ჰყავს ავტორი. ხალხურად წოდებული ყველა სიტყვიერი თუ არასიტყვიერი ტრადიციისადმი ღრმა ინტერესს ფოლკლორისა და ენის საიდუმლოე-

ბით მოცული წარმომავლობაც აძლიერებს. ფოლკლორისგან განსხვავებით, ანონიმურობა არ არის ლიტერატურის სპეციფიკური თვისება. ლიტერატურულ წაწარმოებს ყოველთვის ჰყავს ავტორი და თუ ტექსტი ანონიმურია, ასეთ შემთხვევაში ავტორ-მა თვითონ არ ისურვა ვინაობრის გამუღავნება ან მის შესახებ ცნობები ვერ შემოგვინახა ისტორიამ.

ვარიანტულობა

ხალხური ტექსტი არსებობს ვარიანტების სახით. შეუძლებელია ერთ რომელიმე მათგანს უპირატესობა მივანიჭოთ. ზოგიერთ ეპიზოდს ან მოტივს ერთი ვარიანტი უკეთ გადმოგვცემს, მეორე – ნაკლებად. არქეტიპულ ინვარიანტთან მიახლოება და თავდაპირველი სიუჟეტის რეკონსტრუქცია მხოლოდ მოპოვებული ვერსიების ერთობლივი ანალიზით ხერხდება. ვარიანტები ავსებენ და ამდიდრებენ ერთმანეთს.

ვარიანტების წარმოშობას რამდენიმე მიზეზი იწვევს, სახელდობრ, ხალხური ტექსტის ზეპირი გავრცელება, შესრულების განსხვავებული სიტუაცია, აუდიტორიის განწყობა-მოთხოვნილება და შემსრულებლის პოეტური გემოვნება. ვარიანტების გაჩენას ხელს უწყობს, აგრეთვე, ტრადიციულ საზოგადოებაში ავტორობის უფლების არარსებობაც. ფოლკლორულ შემოქმედებაში არ მოიძებნება ერთი ავტორისგან გამოსული კანონიკური წაწარმოები და, თუ ის არ არის საკრალური ხასიათის ტექსტი, მისი შესრულების თანაბარი უფლება აქვს საზოგადოების ნებისმიერ წევრს, ვისაც ამის სურვილი და ტალანტი აღმოაჩინდება.

ერთსა და იმავე ტექსტს ყოველი ახალი შემსრულებლის მიერ, მისი პოეტური გემოვნებისა და ნიჭის მიხედვით, შეიძლება დაემატოს ან გამოაკლდეს ზოგიერთი მოტივი ან მხატვრული

ელემენტი. ფოლკლორული ნაწარმოების ყოველი ახალი შესრულება ბადებს მის ახალ ვარიანტს. ყოველ ფოლკლორულ ნაწარმოებს იმდენი ვარიანტი შეიძლება ჰქონდეს, რამდენი შემსრულებელიც ეყოლება.

მაგალითად, ხელახალი ჩანარის დროს სასიმღერო ტექსტში შეიძლება რაღაც შეიცვალოს. ახალ ვარიანტზე გავლენა იქონიოს მომღერლის განწყობილებამ, შესრულების განსხვავებულმა პირობებმა და მსმენელთა შემადგენლობამ. ახალი ვარიანტების გაჩენაში დიდ როლს ასრულებს იმპროვიზაცია, რომელზეც ქვემოთ ვისაუბრებთ.

მსგავსი ვარიანტები ჩნდება მაშინ, როცა ფოლკლორული ნაწარმოები ცოცხლობს და არსებობს შემსრულებელთა ერთ წრეში. ასეთ შემთხვევაში ხალხური ტექსტი ინარჩუნებს თვითმყოფადობასა და ერთიანობას.

გეოგრაფიულად დაშორებულ და განსხვავებულ ყოფით გარემოში ზეპირ ტექსტს ახალი გარემოებები ემატება. ფოლკლორული ნაწარმოების თავდაპირველ ვარიანტთა ერთიანი წრე ირღვევა. ახალ გარემოში შეიძლება წარმოიშვას ზეპირი ტექსტის ვარიანტთა ახალი წრე.

ვარიანტები ერთმანეთისგან შეიძლება განსხვავდებოდნენ სახეობრივი წყობით, კომპოზიციურ-სიუჟეტური შედგენილობით, თემატურ-სტილური ხასიათით, მაგრამ ცალკეული განსხვავებები არ გამორიცხავენ დანარჩენი სხვა კომპონენტების უცვლელობასა და დამთხვევას. ისინი ავსებენ ერთმანეთს პოეტური ელემენტებით. ზოგიერთი ვარიანტი სათქმელს სხარტად და მიმზიდველად გადმოგვცემს, ზოგიც – ბუნდოვნად და ნაკლულად, მაგრამ ერთი ტექსტის ყველა ვარიანტი ინარჩუნებს საერთო ფუნქციასა და მეტ-ნაკლებად უცვლელ იდეურ-სახეობრივ სტრუქტურას.

ვარიანტულობის პრობლემას ხშირად უკავშირდება ფოლკლორული ნაწარმოების საზღვრების საკითხი. დროისა და სივ-

რცის ფაქტორების ზემოქმედებით იცვლება ხალხური ნაწარმოები, თავდაპირველი ნაწარმოების საზღვრები იშლება, გამოკლებებისა და დამატებების შედეგად იქმნება ახალი ტექსტი საკუთარი იდეური სახეებით, კომპოზიციით, თემატურ-სტილისტური თავისებურებებით.

შენიშვნა: ზეპირი შესრულების დროს ერთ ფოლკლორულ ნაწარმოებში შეიძლება შევიდეს და შეერიოს სხვა ტექსტის ზოგიერთი კომპონენტი. ერთი ელემენტის, მოტივის ან სიუჟეტის მექანიკურ მიბმას მეორე ნაწარმოებზე კონტამინაცია ეწოდება. ფოლკლორულ შემოქმედებაში გვხვდება სიუჟეტური კონტამინაცია, საერთო ადგილების კონტამინაცია, ფრაზეოლოგიური ფორმულების კონტამინაცია. კონტამინაცია (contaminatio ლათ. – შერევა) ფოლკლორული შემოქმედების სპეციფიკურ-სტილისტურ თავისებურებას წარმოადგენს, რომელიც დამახასიათებელია ზეპირსიტყვიერების ყველა უანრისთვის.

ხალხურ ტექსტზე დიდ გავლენას ახდენს ზეპირი გავრცელება, „მოგზაურობა“ ერთი კუთხიდან მეორეში. ამ დროს ტექსტში იცვლება დიალექტური ფორმები, ლექსიკა, მასში მითოთებული გეოგრაფიული ადგილების სახელწოდება, მხატვრული ელემენტები. ფოლკლორული ნაწარმოები იცვლება დროშიც. ყველ ახალ თაობას მასში შეაქვს წოვაცია.

არ არის გამორიცხული, დროსა და სივრცეში კოლექტიურ მეხსიერებაზე მინდობილ ფოლკლორულ ტექსტში მთლიანად დაირღვეს სტრუქტურა და ნაწარმოები საგრძნობლად დაშორდეს თავის არქეტიპულ ინვარიანტს, მაშინ ძველის ფრაგმენტები ცალკეული ტრადიციული ელემენტებით უკვე ახალ ტექსტში, ახალ ფოლკლორულ ნაწარმოებში გააგრძელებს სიცოცხლეს.

კოლექტიურობა

ფოლკლორის სპეციფიკური ნიშნები დაკავშირებულია ერთმანეთთან. მისი თუნდაც ერთი ნიშანი თავისთავად მოიაზრებს სხვა სპეციფიკური მახასიათებლების არსებობას. ხალხური ტექსტი მხოლოდ ერთი ადამიანის მიერ არ ვრცელდება. მის შენახვა-გავრცელებასა და ვარიანტების შექმნაში თაობები იღებენ მონაწილეობას. ხალხური ტექსტი დაცლილია ინდივიდუალიზმისაგან.

ფოლკლორი იმიტომ არ ატარებს ინდივიდუალიზმის ნიშნებს, რომ ის იქმნება შემოქმედებითი აქტის მრავალჯერადი გამეორების შედეგად.

ხალხური ტექსტის შემსრულებელი ნაწარმოებში გამოხატავს არა საკუთარ პიზიციას, არამედ საზოგადოების სათქმელს, ითვალისწინებს მის გემოვნებასა და მხატვრულ მოთხოვნილებას, ასრულებს კოლექტივის ერთგვარ „დაკვეთას“. ფოლკლორულ ნაწარმოებში გამოხატული აზრი მისაღები უნდა იყოს საზოგადოებისთვის. ზეპირსიტყვიერებაში უპირატესობა ენიჭება საერთო კოლექტიურ მეხსიერებასა და მსოფლმხედველობას, ამიტომ, შეიძლება ითქვას, რომ ფოლკლორი კოლექტიური შემოქმედების ნაყოფია. „კოლექტიურობა“ თვალსაჩინოდ ვლინდება გუნდურად შესრულებულ ნაწარმოებთა გარეგნულ ფორმაში. საზოგადოების წევრთა კოლექტიური აქტივობა ქმნის ხალხური ტექსტის წარმოსათქმელად შესაფერის სიტუაციას, განაწყობს შემსრულებელს და აძლევს შემოქმედებითი ნიჭის გამოვლენის იმპულსს.

კოლექტიურ შემოქმედებით პროცესში ტექსტის რეალიზაციის მიზნით ჩამოყალიბდა მხატვრულ საშუალებათა მთელი სისტემა, პოეტიკის მეცრად განსაზღვრული და დაკანონებული პრინციპები, ცალკეული უანრებისთვის დამახასიათებელი თხრობის ტიპები და მოდელები, სტრუქტიული გამოთქმები,

რომლებიც არ არის ერთი ადამიანის გამონაგონი ან შექმნილი. მისი „ავტორობა“ მთელ ხალხს ეკუთვნის. ფოლკლორულ შემოქმედებას გამოსახვის ერთიანი მხატვრული ფონდი აქვს. ფოლკლორული შემოქმედება სრულად ასახავს ტრადიციული კულტურის შემნახველი ხალხის მენტალობას, სულიერ ცხოვრებას, მათი ყოფის სტილსა და ყაიდას.

ტრადიციულობა

ხალხური ტექსტის სიცოცხლისუნარიანობას ტრადიცია განაპირობებს. თაობიდან თაობას ის ტრადიციის ძალით გადაეცემოდა. ლათინური სიტყვა tradicio აღნიშნავს გადაცემას. ხალხური ნაწარმოები ყალიბდება ერთი პირიდან მეორეზე ზეპირი გადაცემის შედეგად. ფოლკლორული ტრადიცია, როგორც შემოქმედებითი პროცესი, უარყოფს ინდივიდუალიზმს. წარმოქმნილი ვარიანტები განსხვავდებიან ერთმანეთისგან, მაგრამ მათ შორის რჩება ძირეული მსგავსებაც. ვარიანტებს შორის მსგავსებას ტრადიცია განაპირობებს. შემსრულებელი ტრადიციის ძალით უნარჩუნებს ხალხურ ტექსტს მსგავსებას არქეტიპულ ინვარიანტთან, იგივე თავდაპირველ ვარიანტთან. ფოლკლორული ნაწარმოების დინამიკა წარმოშობს სტერეოტიპებსა და ტექსტის უცვლელ კომპონენტებს, რომელმაც ტრადიციული ელემენტების სახე მიიღეს. მათი გენეზისი ბოლომდე მკაფიოდ არ არის გარკვეული. რ. გენონის აზრით, ტრადიციული ელემენტები, თუნდაც დაკინებულად და დაქუცმაცებულად მოღწეული, შორს არის არა თუ ხალხური წარმოშობისაგან, არამედ ადამიანური წარმოშობისაც კი არ არის. მკვლევარმა ფოლკლორულ შემოქმედებაში ტრადიციული ელემენტების განსაკუთრებულ როლზე გაამახვილა ყურადღება. ფოლკლორული ნაწარმოების ვარიანტებში საქმე გვაქვს არა მოდელების

უბრალო გამეორებასთან, არამედ ტრადიციის ძალით კონკრეტული ენობრივი კონსტრუქციებისა და კონკრეტული სტრუქტურების აღდგენასთან.

ტრადიციულ საზოგადოებაში ფოლკლორულ ტექსტს აქვს უტილიტარული ღირებულება. თუ ხალხში ფოლკლორული ნაწარმოების შესრულების სურვილი და აუცილებლობა გაქრა, ტექსტი დაკარგავს აქტუალობას, ყოფიდან „ამოვარდება“ და, თუ არ იქნა ჩაწერილი, ის სამუდამოდ მიეცემა დავიწყებას. თავისი ხასიათითა და ბუნებით კონსერვატიულია ფოლკლორის შემნახველი საზოგადოება, რომელიც ისე ცხოვრობს და იქცევა, როგორც ცხოვრობდნენ და იქცეოდნენ მათი წინაპრები. ტრადიციული ადამიანის ყოფა ეფუძნება წინაპართა ქცევებისა და საქმიანობის მოდელებს, რომლებიც ტრადიციის ძალით გადაეცემოდა მომავალ თაობებს. ტრადიციულობა გულისხმობს, როგორც ყოფაში, ასევე ხალხურ ნაწარმოებში ტრადიციული ელემენტების დაცვას, ინდივიდუალიზმისა და ნოვაციის შეზღუდვას.

იმპროვიზაცია

ყოველი ფოლკლორული ნაწარმოები რეალურად არსებობს მხოლოდ შესრულების მომენტში. ზეპირი ტექსტის გადმოცემის პროცესში (მღერა, თხრობა) შემსრულებელი ინარჩუნებს ერთგვარ ავტონომიას. ამიტომ ნაწარმოები განიცდის მეტ-ნაკლებ ცვლილებას, შემსრულებლის მხრიდან სხვადასხვა ჩარევასა და არაერთგვაროვანი ხარისხის დინამიკას. ხალხური ნაწარმოების ცვლილების ერთ-ერთ სახეს ჰქვია იმპროვიზაცია, რომელიც ფოლკლორული დინამიკის ნაწილს წარმოადგენს. ზეპირი ტექსტი იმპროვიზაციისთვის მუდამ არის ღია და გახსნილი.

ზეპირსიტყვიერების შემქმნელი საზოგადოების კონსერვა-
ტიულობის მიუხედავად, ფოლკლორული ნაწარმოები მაინც გა-
ნიცდის მოდერნიზაციას. ხალხური სიტყვიერების ყოველ
ჟანრს აქვს იმპროვიზაციის გამოვლენის საკუთარი ტრადიცია,
საკუთარი სფერო, საშუალება და თავისებურება. იმპროვიზა-
ცია მთლიანად ტრადიციულ ელემენტებს ემყარება, რომლებ-
საც აქვთ მხატვრული ღირებულება. იმპროვიზაცია გულის-
ხმობს ტექსტის სახელდახელოდ, წინასაწარმოუმზადებლად
შეთხვასა და ექსპრომტად შესრულებას. ის განსაკუთრებით
ვლინდება სასიმღერო ლექსებსა და ხმით ნატირლებში. იმპრო-
ვიზატორი ტრადიციული მხატვრული მარაგიდან ირჩევს ისეთ
ელემენტებს, რომლებიც ტექსტის შესრულების დროს გამოად-
გება. იმპროვიზაციის დონე მთლიანად დამოკიდებულია
მთქმელზე. გასათვალისწინებელია, თუ რამდენად არის დამო-
კიდებული მომღერალი ადგილობრივ ტრადიციაზე. ის ბაძავს
იმ შემსრულებელს, ვისგანაც ტექსტი შეითვისა და ორიენტირე-
ბულია ნოვაციაზე, ახალი ტრადიციის შემოტანაზე, რომელშიც
აისახება სხვა ადგილზე შესრულებული ნაწარმოების შემოქმე-
დებითი თავისებურება.

იმპროვიზაცია, ვ. ანიკინის აზრით, არის ტრადიციული
ელემენტების ერთგვარი კომპინაცია, რომელიც მიმდინარეობს
ახალი მხატვრული საშუალებების გაჩენით (ანიკინი 1996: 153).
ყოველი ფოლკლორული ჟანრი ინარჩუნებს ერთგვარ თანაფარ-
დობას ტრადიციულ ელემენტებსა და იმპროვიზაციის საფუძ-
ველზე დასაშვებ ცვლილებებს შორის. იმპროვიზატორი სარ-
გებლობს ტრადიციული ელემენტების ჟანრული მარაგით. იმ-
პროვიზაცია გულისხმობს ერთგვარ სიახლეს, ისეთი ელემენ-
ტის დაფიქსირებას, რომელიც მანამდე არ იყო ნაწარმოებში.
ერთსა და იმავე ტექსტსაც კი ზოგჯერ მთქმელი განსხვავებუ-
ლად ასრულებს. დინამიკა ვრცელდება ტექსტის მოტივთა შედ-
გენილობაზე. ზოგიერთი ელემენტი შეიძლება ამოვარდეს, ან

გაჩნდეს დამატებითი მოტივი სხვების ჩამოშორების გარეშე. აგრეთვე სიმღერაში შეიძლება მოტივთა პირდაპირი ჩანაცვლებაც. როცა საქმე გვაქვს სასიმღერო ტექსტის დეფორმაციასთან, ტრადიციულად მყარ ელემენტებს ახალი მოტივი მექანიკურად უერთდება. იმპროვიზაციის დროს ნაწარმოების შინაგანი მნიშვნელობის მქონე თემატური მოტივები არ იცვლება, დაცულია, აგრეთვე, კომპოზიცია და ტექსტის იდეურ-სახეობრივი დომინანტი. ისინი ქმნიან ზეპირი ნაწარმოების სტატიკურ „ბირთვს“, რომელიც იცავს ტექსტის მხატვრულ მთლიანობასა და სტრუქტურულ სიმყარეს.

იმპროვიზაციის, როგორც შემოქმედებითი ცვლილების, საშუალებას შემსრულებელს თვითონ ზეპირი ტექსტი ანიჭებს, რადგან ფოლკლორული ნაწარმოები არ არსებობს გაქვავებული სახით. აგრეთვე, არ არსებობს კანონი, რომელიც რეგლამენტირებას გაუწევს ტექსტის აგებულებას, სტრუქტურასა და სტილისტურ-სახეობრივ თავისებურებას.

ფოლკლორული ნაწარმოების ცალკეული ნაწილებისა და ელემენტების ცვლილებას მხოლოდ იმპროვიზაცია არ იწვევს. ცვლილება, იმპროვიზაციის გარდა, შეიძლება გამოიწვიოს სხვადასხვა მიზეზმა, კერძოდ, შემსრულებლის ცუდმა მეხსიერებამ, ტრადიციის ყოფიდან ამოვარდნამ, ტექსტის სხვა ადგილზე გავრცელებამ, დრომ და ა. შ.

სინკრეტიზმი

შემოქმედებითი სპეციფიკიდან გამომდინარე, ფოლკლორულ ნაწარმოებში შესრულების დროს თავს იყრის მხატვრული გამოსახვის არაერთი ელემენტი, როგორიცაა: ცეკვა, სიტყვა, სიმღერა, მელოდია...

სხვადასხვა ფორმისა და მიმდინარეობის, მოძღვრებების, ხელოვნების დარგებისა და აზროვნების ტიპების უსისტემო შერწყმას ფართო გაგებით სინკრეტიზმი ჰქვია. ამიტომ შეიძლება საუბარი რელიგიურ სინკრეტიზმზე, ფოლკლორულ სინკრეტიზმზე და სხვ.

რადგან ფოლკლორული ნაწარმოები ზეპირად იქმნება და განკუთვნილია მოსასმენად, იგი წარმოდგენილია სანახაობრივი ელემენტებით.

ხალხური ტექსტის შემსრულებელი აუდიტორიაზე შთაბეჭდილების მოხდენის მიზნით მხატვრული გამოსახვის მრავალ საშუალებას მიმართავს. ზოგიერთი ტექსტი სრულდება სიმღერით, ჰანგისა და პლასტიკური მოძრაობის თანხლებით, ზოგიც ნილბებს, კოსტიუმებსა და სხვა დამხმარე საშუალებებს იყენებს. სინკრეტული ხელოვნების მაღალი დონე განსაკუთრებით გუნდურ ლექს-სიმღერებსა და რიტუალურ ტექსტებში დასტურდება (მაგ., ცხენის კურთხევის რიტუალი, ცეკვა-სიმღერა „ცოფაი“ და სხვ.), სადაც გამოყენებულია დრამატული ხელოვნების სხვადასხვა ფორმა. სინკრეტულ ხასიათს ატარებს ოსური ხალხური ტექსტების დიდი ნაწილი, რომლებშიც ხელოვნების სხვადასხვა უანრის ელემენტები დაუნაწევრებლად თანაარსებობენ.

სინკრეტიზმი არის დაუნაწევრებლობა, უწყვეტობა, შერწყმული მდგომარეობა, როცა ამ მოვლენის შემადგენელი ნაწილები თანაარსებობენ მხოლოდ მთელის ნაწილებად და არასოდეს მის გარეშე.

ყველა ხალხური თამაშობა ატარებს სინკრეტულ ხასიათს. სხვადასხვა უანრის ტექსტებში სინკრეტიზმი გვხვდება განსხვავებული ხარისხით. ის უფრო მეტად ახასიათებს საწესჩვეულებო ლექს-სიმღერებს. კერძოდ, სინკრეტული შემოქმედების ნიმუშებია საკულტო და სამეურნეო დანიშნულების ლექს-სიმღერები, ხმით ნატირლები, შელოცვები და, გარკვეულწილად,

ბალადები. ბალადები ოსი ხალხის ტრადიციაში სიმღერით სრულდება მუსიკალურ აკომპანიმენტზე. ვ. აბაევის ცნობით, ოსურმა ეპიკურმა სიმღერამ ჩვენამდე ორი სახით მოაღწია. ერთს ჰქვია ქადაგი (*kadæg*) და მეორეს – ზარაგი (*zaræg*). ორივეში შესამჩნევი იყო სინკრეტიზმის ნიშნები. ქადაგის ტიპის სიმღერად ითვლებოდა ნართული და ზოგიერთი სხვა ეპიკური ტექსტი, რომელიც თორმეტსიმიან არფაზე სიმღერით სრულდებოდა.

ვ. ანიკინი მიუთითებს სინკრეტიზმის ნიშნებზე ზღაპარშიც. მკვლევარის აზრით, ზღაპრის, როგორც ზეპირი მონათხრობის ზოგიერთი ნაწილი, კერძოდ, სასიმღერო-სათამაშო პასაჟები, შეიძლებოდა სცენაზეც განესახიერებინათ (ანიკინი 1996: 157). ეს თვალსაზრისი სრულებითაც არ არის საფუძველს მოკლებული, რადგან, ცნობილია, რომ ზეპირ პროზაში ზღაპარს ოდეს-ლაც სხვა როლი ჰქონდა მინიჭებული, ხოლო საბავშვო ზღაპრებში ნამდვილად გვხვდება სასიმღერო ჩანართები და დრამატული თამაშები.

ყოფითობა

ფოლკლორს აქვს კიდევ ერთი განსაკუთრებული გამაერთიანებელი სპეციფიკური ნიშანი – ყოფითობა, რომელზეც ქართულ ფოლკლორისტიკაში პირველად ზ. კიკნაძემ გაამახვილა ყურადღება და ის ზეპირი შემოქმედების ძირითად მახასიათებლად მიიჩნია. „ხალხის სიბრძნე“ მხოლოდ სიტყვას არ მოიცავს. იგი მთლიანად ადამიანთა ყოფას ასახავს. ზეპირსიტყვიერი ტექსტი გარკვეულ სიტუაციაში კონკრეტული ყოფითი მოვლენების გამოსახატავად იქმნება და სრულდება. მაგალითად, საძეობო ლექსები ახალშობილისადმი მიძღვნილ ზემზე წარმოითქმის, საკულტო ტექსტები – რელიგიურ რიტუალზე წმინდან-

თა სადიდებლად, ნაბდის მთელავთა სიმღერა – შრომის პროცესში, ხმით ნატირალი მიცვალებულის დატირების დროს, იგივე შეიძლება ითქვას შელოცვებზე, საქორწილო ლექს-სიმღერებზე და ა.შ. ხალხური ტექსტი უნდა გაანალიზდეს ყოფითი კონტექსტის გათვალისწინებით. ზ. კიკნაძის აზრით, ყოფითობა არსებით გავლენას ახდენს ფოლკლორის შედგენილობაზე და მის უანრულ სისტემას განსაზღვრავს.

ოსური ფოლკლორის ჟანრები

ყოველი ფოლკლორული ნაწარმოები თავისი შემოქმედებითი შესაძლებლობებითა და განსაკუთრებული ნიშნებით არსებობს რომელიმე ჟანრის ფარგლებში.

ჟანრი ფრანგული სიტყვაა (*genre*) და აღნიშნავს ხელოვნების რაიმე დარგის ნაწარმოებთა ისეთ ერთობლიობას, რომ ლებსაც აქვთ ფორმისა და შინაარსის მიხედვით ერთნაირი ნიშნები და მახასიათებლები, ეს იქნება სიუჟეტური, სტილისტური და სხვა. ამის მიხედვით არსებობს ჟანრები მუსიკაში, ლიტერატურაში, ფოლკლორში. ფოლკლორის თითოეულ ჟანრში საერთო მახასიათებლების მქონე ტექსტები ერთიანდება, რაც გამოიხატება ნაწარმოების მხატვრულ ფორმაში, შინაარსა და შესრულების პრაქტიკაში.

ლიტერატურისა და ფოლკლორის ჟანრული სისტემა უნივერსალურია. პროზაული და პოეტური ნაწარმოებები, ეპიკური, ლირიკული და დრამატული ტექსტები გვხვდება როვორც მწერლობაში, ისე ხალხურ შემოქმედებაში. თუმცა ლიტერატურული ნაწარმოები ერთი კონკრეტული ავტორის მხატვრული ჩანაფიქრის რეალიზაციას ნარმოადგენს, ხოლო ფოლკლორული ტექსტები საზოგადოების (ფოლკის) ყოფის მოთხოვნილების შესაბამისად იქმნება და მთელი კოლექტივის მსოფლმხედ-

ველობასა და მხატვრულ აზროვნებას გამოხატავს. ზეპირსიტყ-ვიერების ჟანრებს ისეთი ნიშან-თვისებები ახასიათებთ, როგო-რიც ლიტერატურულ ჟანრებს არა აქვთ.

ჟანრი ყალიბდება როგორც სტრუქტურულ-სახეობრივი და კომპოზიციურ-პოეტური ორგანიზაციის ტიპი. თითოეული ხალხური ტექსტი თავისი მხატვრული და თემატურ-შინაარ-სობრივი ნიშან-თვისებების მიხედვით ერთ რომელიმე კონკრე-ტულ ჟანრში ერთიანდება. ჟანრულ სისტემაში საკუთარი ადგი-ლის მიჩენით შესაძლებელი ხდება ხალხური ტექსტების კლასი-ფიკაცია. ნაწარმოებთა მხოლოდ თემატური სიახლოვე არ განა-პირობებს ჟანრის არსებობას. ზ. კიკნაძემ ზეპირსიტყვიერი ჟანრები ტრადიციული საზოგადოების ყოფით სტრუქტურას დაუკავშირა და ხალხური ტექსტების კლასიფიკაციის უნივერ-სალური მოდელი წარმოადგინა. ფოლკლორულ ნაწარმოებებს აქვთ უტილიტარული მიზნები. ზეპირსიტყვიერების ჟანრები ყოფიდან არის ამოზრდილი.

ჟანრი აერთიანებს შინაარსობრივი და ფორმალური ნიშნე-ბით ტიპოლოგიურ ტექსტებს. იმისთვის, თუ რომელ ჟანრს უნ-და მივაკუთვნოთ ესა თუ ის ხალხური ნაწარმოები, ვ. პროპის აზრით, უნდა გავითვალისწინოთ ტექსტის „ყოფითი გამოყენე-ბა“, „შესრულების ფორმა“ და „დამოკიდებულება მუსიკასთან“ (პროპი 1976: 37). ეს კრიტერიუმები ერთობლივად განსაზღვრა-ვენ ჟანრს და არა ცალ-ცალკე.

ჟანრები განსხვავდებიან ერთმანეთისგან თავიანთი სტრუქ-ტურული აგებულებით, კომპოზიციით, მხატვრული გამოსახვის საშუალებებით, თემატური ნიშნებით და სტილისტური ფორმუ-ლებით. თითოეულ ჟანრს აქვს თავისი წესი, სისტემა, პოეტიკა, სხვადასხვა ელემენტების ჩანაცვლების თავისი კანონი. მათი განხორციელება, რეალიზაცია ხდება ფოლკლორული პროცე-სის დროს. ფოლკლორში ჟანრული კომპონენტები მუდმივად მეორდება. სწორედ ამ მიზეზით მკვლევარები ადგენენ ფოლ-

კლორული სიუჟეტების, მოტივების, სტერეოტიპული გამოთქმების საძიებლებს.

მართალია, უანრული სისტემა ზოგად, უნივერსალურ მოდელს წარმოადგენს, მაგრამ ოსური ფოლკლორის უანრები საკუთრივ ოსი ხალხის საზოგადოებრივ ყოფას, ტრადიციულ საქმიანობასა და ისტორიულ გამოცდილებას ეფუძნება. ის აირეკლავს არა მხოლოდ ოსი ხალხის ტრადიციულ ყოფას, არამედ საზოგადოების მენტალობის სტრუქტურასაც. ოსი ხალხის იდენტობის საერთო ნიშნები და მახასიათებლები: რელიგიური რწმენა და საზოგადოებრივი ყოფის სოციალური სტრუქტურა, გეოგრაფიული არეალი და სამეზობლო, საერთო მტერი და გმირები, წარსულის ხსოვნა, ენა და ადათი – გავლენას ახდენდა, აყალიბებდა და განსაზღვრავდა ოსური ფოლკლორის უანრულ თავისებურებას.

ხალხური ტექსტების კლასიფიკაციისთვის ამოსავალი მასასიათებლები შეიძლება იყოს განსხვავებული. შეგვიძლია ცალ-ცალკე დავაჯგუფოთ პროზაული და პოეტური ძეგლები, რიტუალური და არარიტუალური, საკრალური და სეკულარული ტექსტები, გუნდური და ინდივიდუალური ლექს-სიმღერები. თუმცა ყოველი ამგვარი მიდგომა უანრული კლასიფიკაციისთვის იქნება ცალსახა და ზედაპირული. ფოლკლორულ ნაწარმოებს უანრულ სისტემაში ადგილი უნდა მივაკუთვნოთ იმის მიხედვით, თუ რა ფუნქცია აქვს ხალხურ ტექსტს საზოგადოების ყოფაში (ზ. კიკნაძე), რას უკავშირდება ის, ადამიანის დაბადებას, ზეციურ ძალებთან ურთიერთობას, შრომას, ბრძოლას, ლხინს, ქორწილს, დემონური ძალების წინაშე შიშს თუ ადამიანის გარდაცვალებას.

უანრული სისტემის ჩამოყალიბება ფოლკლორული ნაწარმოებების მხოლოდ უტილიტარულმა ხასიათმა არ განაპირობა. დღემდე გაურკვეველი რჩება, რა დროიდან ჩამოყალიბდა ზე-

პირსიტყვიერი უანრები თავისი მკაცრად განსაზღვრული სტრუქტურითა და შინაარსობრივი ნიშნებით.

ვ. ანიკინი უანრული სისტემის წარმოშობას ისტორიული თვალსაზრისით განიხილავს. მისი აზრით, ხალხური ტექსტის არაერთგზის შესრულებით, მრავალჯერადი შემოქმედებითი აქტით ტიპურ სახეებსა და ფორმებს შორის ძლიერდება შესაბამისობა, მიმდინარეობს სტრუქტურის უნივერსალიზაცია. როცა ტიპობრივი უნიფიკაციის პროცესი მიდის ბოლომდე, ფოლკლორში იქმნება კალაპოტი, საიდანაც უკვე მომდინარეობს უანრული ნიშნებით ერთგრიპური ნაწარმოებები (ანიკინი 1996: 95).

ოსური ფოლკლორის უანრული შემადგენლობა მრავალფეროვანია. მასში წარმოდგენილია მსოფლიო ფოლკლორის თითქმის ყველა ცნობილი უანრი. გადმოცემას, ლეგენდას ოსურ ენაზე ჰქვია თაურალ (tauræg), ხოლო ეპიკური უანრის პოეტურ სიმღერებს – ქადაგ (kadæg). ანდაზას ოსურ ენაზე ენოდება ამბისონდ (ამბიсонდ), ზღაპარს – არღაუ (argħay), ლიროეპიკურ სიმღერას – ზარაგ (zaræg), ხმით ნატირალს – ყარაგ (xərāg) და სხვ. ამდენად, ტერმინები: ზარაგ, ქადაგ, ყარაგ, თაურალ, არღაუ, ამბისონდ – გამოიყენება ოსური ხალხური ტექსტების უანრული სპეციფიკის აღსანიშნავად.

ფორმალურ-თემატური თვალსაზრისით ოსურ ფოლკლორში შეიძლება რამდენიმე ძირითადი უანრი გამოვყოთ, რომლებსაც ცალკეულ თავებში შესაბამისი ტექსტებით განვიხილავ.

პროზა

- მითოსი (კოსმოგონიური და ანთროპოგონიული მოტივები ოსურ ხალხურ ტექსტებში, მითიური ხალხები, სამოთხის მითოსი, მითოლოგიური გადმოცემები ძუარების შესახებ, ესქატოლოგიური მითები).

- საზღაპარო ეპოსი (არაკები ცხოველებზე, საყოფაცხოვ-რებო ნოველა, ჯადოსნური ზღაპარი).
- საგმირო-სათავგადასავლო ეპოსი (ნართების ეპოსი, და-რეძანიანთა ციკლის თქმულებები და გადმოცემები ცარ-ციათებზე).

პოეზია

- საკულტო-მითოლოგიური პოეზია (ვასთირჯი, მად მაირა-მი, ვაცილა ოსურ ლექს-სიმღერებში, რიტუალური სიმღე-რა „ცოფა“, ალარდი დაავადებათა პრევენციის სიმღე-რებში, ბასილები ოსურ რიტუალურ პოეზიაში, აფსათი სა-მონადირეო ლექს-სიმღერებში).
- შრომის პოეზია: ა) სამიწათმოქმედო ლექს-სიმღერები. ბ) ლუდის მხარშველთა სიმღერები გ) ქალთა საოჯახო საქ-მიანობის ამსახველი ლექს-სიმღერები.
- მაგიური პოეზია
- საგმირო პოეზია: ა) საბრძოლო სიმღერები; ბ) ბალადები
- სატრფიალო პოეზია.
- საოჯახო-საყოფაცხოვრებო პოეზია (სააკვნო, ენის გასა-ტეხი, საბავშვო, სუფრული, საქორნილო, სამგლოვიარო).
- მცირე ფორმის ჟანრები: ანდაზა, გამოცანა.

ფოლკლორული ჟანრები არ არიან იზოლირებული. ისინი ერთმანეთს უკავშირდებიან პოეტიკის წესებით, მხატვრული სახეებით, ცალკეული მოტივებითა და სიუჟეტებით. ისინი ხში-რად გავლენას ახდენენ ერთმანეთზეც.

ჟანრებს შორის საზღვრის გავლება ზოგჯერ გარკვეულ სირთულეს ქმნის. საგმირო-სათავგადასავლო ეპოსის ცალკეუ-ლი ნაწილები ფოლკლორულ შემოქმედებაში წარმოდგენილია

როგორც პროზაული მონათხრობის სახით, ისე პოეტურად, გა-
ლექსილი და სასიმღეროდ გაწყობილი. პროზაული მითოლოგი-
ური გადმოცემების გვერდით გვხვდება პოეტური მითოლოგიუ-
რი სიმღერები.

ტრადიციულ საზოგადოებაში ადამიანი მთელი თავისი
ცხოვრების მანძილზე, დაბადებიდან გარდაცვალებამდე, მონა-
ნილეობას იღებდა რიტუალებში და მისი შესაბამისი ხალხური
ტექსტების შესრულებაში. თავის მხრივ, სააკვნო სიმღერები,
მაგიური ტექსტები, შრომის ლექ-სიმღერები, მფარველ წმინ-
დანთა სახელზე აღვლენილი სადიდებლები და მითოლოგიური
გადმოცემები, სატრფიალო და საქორწილო სიმღერები, საბ-
რძოლო ლექსები და საგმირო ეპოსები, სამგლოვიარო ტექსტე-
ბი და ხმით ნატირლები აყალიბებდნენ საზოგადოების თითოე-
ული წევრისა და მთელი სოციუმის მსოფლშეგრძნებას, მხატ-
ვრულ გემოვნებას, სოციალურ სტატუსს. ხალხური ტექსტი,
მხატვრულობის გარდა, დანახული უნდა იყოს რელიგიურ, სო-
ციალურ და პრაგმატულ განზომილებაში.

ოსურ ფოლკლორში ყველა ჟანრი თანაბარი მრავალფე-
როვნებით არ არის წარმოდგენილი. ოსური ფოლკლორი განსა-
კუთრებით მდიდარია ვრცელი ეპიკური ტექსტებით, მითოლო-
გიური გადმოცემებითა და სარიტუალო-საწესჩვეულებო ლექს-
სიმღერებით.

კავკასიის ერთი ხალხის ზეპირსიტყვიერი ფონდიდან ცალ-
კეული მოტივები და სიუჟეტები გადადიდა მეზობელი ხალხე-
ბის ფოლკლორულ რეპერტუარში და გავლენას ახდენდა მის
ჟანრულ შედგენილობაზე. აღმოსავლეთ საქართველოს მთია-
ნეთსა და ჩრდილოეთ ოსეთის ხეობებში ჩამოყალიბდა მფარ-
ველ წმინდანთა თაყვანისცემის საერთო მოდელი. შესაბამისად,
როგორც ოსურ, ისე ქართველ მთიელთა ზეპირსიტყვიერებაში
დასტურდება მსგავს სიუჟეტებზე აგებული საკულტო-მითო-
ლოგიური შინაარსის ტექსტები. ხალხური ტექსტები მარადიულ

გაზაფხულზე ოსურ ფოლკლორში თამარის ქართული მითოსის გავლენით ჩამოყალიბდა. ასევე ოსური ხალხური ტექსტები და-რევანიანებზე ქართული „ამირანიანიდან“ არის ნასესხები. თავის მხრივ, ოსური ფოლკლორიდან გავრცელდა ქართველ მთიე-ლებში ნართული ეპოსის ცალკეული სიუჟეტები.

ოსებმა, აფხაზებმა, ვაინახებმა და ადილეს ხალხებმა შექმნეს ნართების ეპოსი მსგავსი სიუჟეტებით, მოტივებითა და პერსო-ნაჟებით. ნართების ეპოსი მეტ-ნაკლებად გავრცელდა და გადა-მუშავდა ადგილობრივ ნიადაგზე ჩრდილოეთ კავკასიის თითქმის ყველა ხალხის ზეპირსიტყვიერებაში. ოსური ფოლკლორის უან-რებზე მნიშვნელოვანი გავლენა მოახდინა ნართების ეპოსმა. ნართების ეპოსის ცალკეულმა ელემენტებმა ოსური ზეპირსიტყ-ვიერების თითქმის ყველა უანრში ამა თუ იმ ფორმით შეაღწია. ნართების ეპოსის გავლენა ოსური ფოლკლორის თითქმის ყველა უანრის ტექსტებში მხოლოდ ზოგიერთი ნართი პერსონაჟის ხსე-ნებითა და მონანილეობით, ნართული მოტივებისა და სიუჟეტე-ბის გავლენით, მითოპოეტური რემინისცენციებით და გამოთ-ქმებით არ შემოიფარგლება. სხვადასხვა უანრის ზეპირსიტყვიერ ტექსტებში ძირითადი საზრისი და სათქმელი ხშირად ნართების ავტორიტეტით არის გამაგრებული.

ფოლკლორული უანრების ჩამოყალიბების ისტორიული ას-პექტის კვლევა ძალიან რთულია და მნიშვნელოვანი დასკვნის გამოტანის საშუალებას არ იძლევა. ფოლკლორი არ არის დო-კუმენტური, წერილობითი შემოქმედება. ოსური ხალხური ტექ-სტების შეკრება ძირითადად დაიწყო XIX საუკუნის მეორე ნა-ხევრიდან. არ ვიცით, ფორმისა და შინაარსის მიხედვით რა თა-ვისებურებას ამჟღავნებდნენ ეს ტექსტები უფრო ადრე, წინა საუკუნეებში და მათ ვერც ძველ ვარიანტებთან შევადარებთ. რადგან ხალხური ტექსტი ზეპირად იქმნება და ზეპირად ვრცელდება, შეუძლებელია რომელიმე ფოლკლორული ნაწარ-მოების დათარიღება. ფოლკლორული უანრების გენეზისისა და

ხალხური ტექსტების ისტორიულიძირების კვლევა მხოლოდ ვარაუდების გამოთქმის შესაძლებლობას გვიტოვებს. ზეპირსი-ტყვიერების თითოეული უანრი ხალხის შემოქმედებით გამოცდილებასა და ტრადიციას ემყარება, რომელიც საუკუნეების სიღრმიდან მომდინარეობს.

ლიტერატურა

- ანიკინი 1996:** Аникин В. П., Теория Фольклора, курс лекций, Московский гос. университет имени М. В. Ломоносова, Филологический факультет, Москва, 1996.
- კიკნაძე 2008:** ზ. კიკნაძე, ქართული ფოლკლორი, თსუ გამოცემლობა, 2008.
- პროპი 1976:** Пропп В. Я., Фольклор и действительность: Избранные статьи. М., 1976.



ମୋହନୀ



ოსი ხალხის წარმოდგენები სამყაროზე, ადამიანზე, სამყაროში არსებულ საგნებსა თუ მოვლენებზე, მათ წარმოშობასა და დანიშნულებაზე აისახა მითოლოგიურ გადმოცემებსა და სარიტუალო ტექსტებში. მითოსი, ცალკეული მოტივებისა და მითოლოგების სახით, შეიძლება შეგვხვდეს ოსური ფოლკლორის სხვადასხვა ჟანრის ნაწარმოებში.

მითოსის განმარტება

მითოსი მოგვითხრობს საკრალურ ამბავს სამყაროს წარმოშობისა და საზოგადოებრივი ცხოვრების საწყისი მოვლენების შესახებ. ძველბერძნულ ენაში თავდაპირველად მითოსი აღნიშნავდა თხრობას, ჩვეულებრივ ამბავს.

მითოსი არ ეფუძნება გამონაგონსა და ერთი ავტორის ინდივიდუალურ მხატვრულ ჩანაფიქრს. იგი, მხატვრული ლიტერატურის მსგავსად, არ წარმოგვიდგენს სინამდვილეს ტროპული მეტყველების სახეებით, მეტაფორებითა და შედარებებით, რომლებიც საგანთა და მოვლენათა მხოლოდ ზედაპირულ მსგავსებას ემყარება. მითოსი არა მსგავსებას, არამედ საგანთა და მოვლენათა სიღრმისეულ იდენტობას წარმოგვიდგენს. მითოსი არც მსჯელობითა და სილოგიზმებით ცდილობს ჭეშმარიტების დამტკიცებას. მითოსი, მასში გადმოცემული ამბით, ადამიანთა ცნობიერებაში აღბეჭდილი სიმბოლოებითა და იგავური თხრობის მეშვეობით, უშუალოდ ასახავს ჭეშმარიტებას სინამდვილეზე. ტრადიციული საზოგადოება მითოსს ნამდვილ ამბად მოიაზრებს, რომელიც აწესრიგებს და წარმართავს საზოგადო-

ების ყოფა-ცხოვრების ყველა სფეროს. მითოსური ამბების ცოდნას ადამიანთა ზეპირი მეხსიერება ინახავს.

მირჩა ელიადეს (1907-1986) განმარტებით, მითებში მოთხ-რობილი ამბავი მიჩნეულია სიმართლედ, რადგან მას შეხება აქვს სინამდვილესთან და საკრალურია, რადგან ის ზებუნებრივ არსებათა ქმედებებს გადმოგვცემს. მითოსი მოგვითხრობს მხოლოდ იმაზე, რაც ოდესლაც რეალურად მოხდა, ხოლო მის შედეგებს ადამიანი თავის ირგვლივ ყოველდღიურ ყოფაში ხედავს.

მითოსში სამოქმედო სივრცე განსაზღვრულია. მოქმედება ძირითადად ხდება კონკრეტულ გეოგრაფიულ სივრცეში. მასში ასახული გეოგრაფიული ლანდშაფტი, ადგილთა სახელწოდებები, რეალური გარემო ამაღლებს მითში გადმოცემული ამბის სანდოობასა და სინამდვილის ხარისხს.

არსებითად განსხვავდება ერთმანეთისგან მითოსური დრო და ზღაპრის განუსაზღვრელი დრო. მითოსში მოქმედება ხდება წარსულში, თუმცა არა ისტორიულ წარსულში, არამედ მითოსურ, ისტორიამდელ წარსულში. მითოსური დრო რიტუალის სახით აღდგება ისტორიულ დროში. ზღაპარს კი, მასში გადმოცემული ამბით, შეხება არა აქვს ჩვენს დროსთან.

მითოსური დრო არის ძლიერი, საკრალური დრო, იგივე არქეტიპების ხანა, როცა პირველად იქმნებოდა საგნები და მოვლენები, „როცა რაღაც ახალი, მნიშვნელოვანი და ძლიერი მთელი თავისი სისრულით გაცხადდა“ (ელიადე). პირველად შექმნილი საგნები არქეტიპებია. სამყარო და მისი ნაწილები, ადამიანი, საზოგადოებრივი ყოფა, სოციუმი, სხვადასხვა ინსტიტუციები – ყველაფერი მითოსურ დროში, არქეტიპების ხანაში შეიქმნა. ადამიანები ისტორიულ დროში მხოლოდ იმეორებენ მითოსურ ქმედებათა მოდელებს.

მითს არ აინტერესებს ქრონოლოგია, არც მოვლენათა სიზუსტე და ისტორიული პიროვნებების ნამდვილობა. ჩვეულებრივი ისტორიოგრაფიისაგან განსხვავებით, რომელიც ისტორი-

ულ დროში მომხდარ მოვლენებს იკვლევს, მითი ისტორიული დროის მიღმა ჩადენილ ქმედებებს ასახავს. მითებში გაცხადებული ამბების ერთობლიობა ქმნის საკრალურ ისტორიას.

მითოსური დრო არის ღია ისტორიული დროის მიმართ, რომლის ყველა აწმყოში შეიძლება აღდგეს მითოსი რიტუალის მეშვეობით, „როცა შეიძლება ხელახლა დაესწრო ღვთაებრივი ქმნილებების სანახაობას, კვლავ შეხვდე ზებუნებრივ არსებებს და ერთხელ კიდევ შეისწავლო მათი შემოქმედებითი გაკვეთილი“ (ელიადე).

მითოსი შეიცავს ეზოთერულ ცოდნას. მითების ცოდნით ადამიანი კავშირს ამყარებს ზებუნებრივ ძალებთან, ეზიარება საგანთა წარმოშობის საიდუმლოს და ახორციელებს მათზე კონტროლს.

მითოსი წარმოდგენილია ვრცელი და მოკლე ტექსტებით. ცნობილია უძველესი მითოლოგიური ეპოსები შუმერულ, აქა-დურ და უგარიტულ ენებზე, აგრეთვე სკანდინავიური მითოლოგიური ეპოსი – „უფროსი ედა“. მითოლოგიური მოტივებით მდიდარი ნართების ეპოსის გარდა, ოსურ ფოლკლორში დასტურდება მითოლოგიური შინაარსის ტექსტები ძუარებზე, რომლებიც გადმოგვცემენ არა მხოლოდ საკრალურის დაარსებასა და ზებუნებრივ არსებათა ქმედებებს, არამედ იმ მოვლენებსაც, რომლებიც საზოგადოებრივ ცხოვრებას დაედო საფუძვლად, ქცევის წესებს, ადამიანებისა და ზეციურ არსებათა ურთიერთობას.

მითოსი შეიძლება არსებობდეს ნახატის ან სიტყვის სახით. ოსური ენის დიგორულ დიალექტზე ცისარტყყელას ჰქვია „სოსლანის მშვილდი“ (Сослан ანდურა). ეს სახელწოდება მითოლოგიური აზროვნების შედეგია, რომელიც შეკუმშულად შეიცავს საგნის შესახებ რაღაც ამბავს ან მინიშნებას.

მითოსი არსებობს რიტუალის სახით. ემილ დიურკემი რიტუალს უწოდებს ამოქმედებულ მითოსს. რიტუალის დროს აღდგება საკრალური დრო და ნამდვილდება მითში გადმოცემული ამბავი. ზ. კიკნაძის აზრით, ყოველ რიტუალს საფუძვლად

უდევს მითი, როგორც სცენარი. ოსური ფოლკლორი მდიდარია სარიტუალო ტექსტებით, როგორიცაა: „ცო-ფაი“, ცხენის კურთხევის რიტუალი, პირველი ხნულის გავლების რიტუალური ლექს-სიმღერა „დოვლათის ფრინველი“ და სხვ. რიტუალის მიზანია საწყისთან დაბრუნება და ზებუნებრივ არსებათა შემოქმედებითი აქტების გამეორება, როდესაც მითიური არსებები ანძყოში ეცხადებიან და რიტუალის მონაწილეთა თანამედროვენი ხდებიან. რიტუალი „ასაბუთებს“ მითში გადმოცემული ამბის ჭეშმარიტებას.

მითს საფუძვლად უდევს მითოლოგემა, რომელიც რაიმე მოვლენის საწყისს წარმოგვიდგენს. ზ. კიკნაძე მითოლოგემას უწოდებს მითოლოგიური ტექსტის საშენ მასალას. მითოლოგემას ხშირად იყენებენ უნივერსალური, მსოფლიოს ხალხთა კულტურაში ფართოდ გავრცელებული მითოლოგიური სიუჟეტების, სცენების, სახეების აღსანიშნავად. მითოლოგემა, როგორც მითოლოგიური მსოფლმხედველობის შემცველი მოკლე სიტყვიერი გამოთქმა, გვხვდება არამითოლოგიურ ტექსტებშიც.

შუაგულის მითოლოგემა, ისევე როგორც ზოგადად მითოსი, კოსმოგონიურია თავისი წარმოშობით. წართების საცხოვრისი განასახიერებს სამყაროს შუაგულს, როგორც საუკეთესო ადგილს, პერიფერიებში კი ცხოვრობენ ბოროტი ძალები, რომლებთან ბრძოლაც უხდებათ ნართ გმირებს. შუაგული მითოლოგიურ ცნობიერებაში აღიქმება, როგორც საუკეთესო და ყველაზე ჰარმონიული ადგილი. ის მითოლოგიურ ტექსტებში განასახიერებს საკრალურ ცენტრს, რომლის თვალსაჩინო გამოხატულებაც ოსურ (არა მხოლოდ ოსურ) ტრადიციაში არის კერია. სამყაროს შუაგულსა და საკრალურ ცენტრს წარმოადგენს წრიულ რიტუალურ ცეკვებში წრის შიგნით მოთავსებული საგანი. ნებისმიერი წრიული მოძრაობა გულისხმობს ცენტრის არსებობას. წრიული მოძრაობით სრულდებოდა ოსური რიტუალი „ცოფაი“, რომლის მიზანიც იყო საკრალური ცენტრის მონიშვნა და განახლება.

ცისა და მიწის კავშირის მითოლოგებაც თავისი არსითა და დანიშნულებით არის კოსმოგონიური. ცასა და მიწას შორის არის უხილავი კავშირი, თუმცა მითოლოგიურ ტექსტებში მას შეიძლება გამოხატავდეს ნებისმიერი ფიზიკური საგანი. ოსურ მითოსში ცისა და მიწის კავშირს გამოხატავს ძუარის სახელზე აღმართული ნაგებობა, წმინდა ხე, კერის ჯაჭვი – რახისი, აგრეთვე ოქროს კიბე, რომლითაც მად მაირამი ციდან დედამიწაზე ჩამოდის.

შენიშვნა: აქადური მითოლოგება – რიქის შამე უ ერცეთიმ – ცისა და მიწის კავშირს აღნიშნავს. ოსურ ენაზე რახისი ჰქვია ჯაჭვ-საკიდელს, რომელიც სიმბოლურად ცისა და მიწის კავშირს გამოხატავს. სიტყვა რახისი შეიძლება ირანულენოვანმა ტომებმა მესოპოტამიელი მეზობლებისაგან ისესხეს.

დაბრუნების მითოლოგება ხშირად გვხვდება ეპიკურ ტექსტებში. გმირი უნდა დაბრუნდეს იქ, საიდანაც გავიდა. დაბრუნების მითოლოგებაზეა აგებული ჯადოსნური ზღაპარი.

მითოლოგები ბევრია. ძირითადი კოსმოგონიური მითოლოგების გარდა, შეგვიძლია დავასახელოთ სამოთხის მითოლოგება, გველეშაპის მითოლოგება, ხელახალი შობის მითოლოგება, წარღვნის მითოლოგება და სხვ.

მითოლოგიური მოტივები და სიუჟეტები

მითოლოგების გაშლით მივიღებთ მითოლოგიური შინაარსის ნარატივს. ოსური მითები შინაარსის მიხედვით მრავალფეროვანია, მაგრამ ის უფრო ხშირად წარმოდგენილია ცალკეული მოტივებისა და სიუჟეტების სახით. კოსმოგონიურ და ანთროპოგონიურ წარმოდგენებს ვხვდებით ცარციათულ თქმულებებში. საზოგადოებაში ცივილიზაციის საწყისების შემოტანასა და კულტურული გმირების მოღვაწეობას გადმოგვცემს ნართების ეპოსის

ზოგიერთი ეპიზოდი. მარადიული გაზაფხულისა და მისი დაკარგვის მითოსი აისახა ხალხურ ტექსტში „გურძიხანი და ბონვარნონი“. ოსურ ზეპირსიტყვიერებაში არის მითოლოგიური გადმოცემების მთელი ციკლი, რომლებიც მოგვითხრობენ სალოცავების (ძუარების) დაარსების, ძუარებისა (მფარველი წმინდანები) და ადამიანების ურთიერთობის შესახებ. ოსურ ეპიკურ ტექსტებში ვეცნობით მითიური ხალხების – ნართებისა და ცარციათების მოუსვენარ ცხოვრებას, მათ ჰუბრისსა და დაღუბვას.

მ. ელიადეს სიტყვებით რომ ვთქვათ, მითოსი, ჰირველ რიგში, აცხადებს ლვთიური გეგმის არსებობას, საზოგადოების ცხოვრებაში უზინაესი ღმერთისა და ზებუნებრივ არსებათა მონანილეობას.

ოსურ თქმულებათა პერსონაჟები არიან განსხვავებული სტატუსისა და ფუნქციის მქონე ზეციური არსებები: მგზავრთა და მამაკაცთა მფარველი ვასთირვი, მოსავლისა და ამინდის გამგებელი ვაცილა, ზეციური მჭედელი ქურდალაგონი, კერის მფარველი საფა, წყალთა გამგებელი ღონბეთირი, წვრილფეხა საქონლის მფარველი ფალვარა, მგლებისა და მსხვილფეხა საქონლის პატრონი თუთირი, ქართა გამგებელი გალაგონი, ყვავილბატონების უფროსი ალარდი, ნადირობის მფარველი აფსათი, საიქიოს მეკარე ამინონი, საიქიოს გამგებელი ბარასთირი და სხვ. ისინი, ოსური ტექსტების მიხედვით, იცნობენ ერთმანეთს, ხშირად იკრიბებიან საღვთო ნადიმზე და ადამიანთა დასახმარებლად გადაწყვეტილებებს იღებენ.

კოსმოგონიური და ანთროპოგონიური მოტივები ცარციათულ თქმულებებში

მითოსი თავისი არსით კოსმოგონიურია, რადგან ის ყოველ-თვის რაღაცის საწყისს გადმოგვცემს. კოსმოგონიური ტექსტები მოგვითხრობენ მთელი სამყაროს ან მისი ნაწილების შექმნის შესახებ. ოსურ მითოსში გვხვდება კოსმოგონიური მოტივის

შემცველი სიუჟეტიანი ტექსტი. კერძოდ, კოსმოგონიით იწყება ცარციათული თქმულებები, რომელიც მიანიშნებს ნარატივის არა სიძველეზე, არამედ ოსი ხალხის კოსმოგონიურ წარმოდგენებზე, რომლის მიხედვით, სამყაროს შექმნა ანგელოზებისა და ძუარების ნადიმზე გადაწყდა. მნიშვნელოვანი მოვლენის წინ ზეციური ძალების ნადიმი და თათბირი დამახასიათებელია ოსური ხალხური ტექსტებისთვის. ოსური მითოსის თანახმად, სამყაროს შექმნა მზისა და მთვარის დაშორებით დაიწყო.

ტექსტი: „იმ დროს დღე და ღამე არ განირჩეოდა. მთელ ქვეყანაზე მხოლოდ სინათლე მეფობდა. მნათობები მორიგეობით ათბობდნენ ღვთაებებს, ანგელოზებს, მათ მეგობრებს“ (თქმულებები 2009: 12).

სამყაროს შემოქმედი, ოსური მითოსის მიხედვით, არის ომერთი. მან მისცა დედამინის ფორმა ღრუბლებს, რომელიც, როგორც „კოსმოგონიური მასალა“ მონაწილეობს შესაქმის პროცესში.

ტექსტი: „ღმერთმა აიღო ხელში ღრუბლის ქულები და გულდა-გულ დააგუნდავა. ღრუბლების გუნდა გაფართოვდა, გაიზარდა და დედამინაც ასე შეიქმნა. მინამ ადგილი კი დაიკავა, მაგრამ ცხელდებოდა და ღელავდა. გამძვინვარებული ქარი მტვერსა და მიწას იტაცებდა, ზოგან თხრიდა, ზოგან, პირიქით, აკოკოლავებდა, აგროვებდა და ასე გაჩნდა დედამინაზე ღრანტეები, მთები, ვაკე თუ მაღლობი. მიწა სამოთხესავით ადგილას დამკვიდრდა, მაგრამ ირგვლივ სულიერის ჭაჭანება არ იყო – არც არავინ დადიოდა, არც არავინ დაფრინავდა“ (თქმულებები 2009: 13-14).

მსოფლიოში ცნობილი ოთხი კოსმოგონიური მოდელის ფონზე, რაც უნდა პრიმიტიულად მოგვეჩვენოს სამყაროს შექმნის ეს ფორმა, იგი მაინც ასახავს ხალხურ წარმოდგენას ისეთ

დასაბამიერ მოვლენებზე, როგორიც არის მზისა და მთვარის დაშორიშორება და შედეგად დღის და ღამის წარმოშობა, ღრუბლების გაჩენა და დედამიწის რელიეფის შექმნა.

ოსური ანთროპოგონიური წარმოდგენები დასტურდება ცარციათულ თქმულებებში. ის ადამიანის შექმნას სიუჟეტის სახით გადმოგვცემს, რომელშიც ძირითად როლებს ღმერთი და მზე ინაწილებენ. ოსური მითოსი სრულ შესაბამისობაშია მსოფლიო მითოლოგიებთან, რომლის თანახმად, სამყარო, ადამიანის გარეშე, არ არის სრულყოფილი.

ტექსტი: „დედამიწაზე სულიერი არ ჭაჭანებდა. მზემ დახედა დედამინას, მოენონა, მაგრამ დანაღვლიანდა და ღმერთის შესჩივლა: – იმ საუცხოო ქვეყანაში სულიერის ჭაჭანება არ არის და რა გამახარებსო.

ღმერთმა შექმნა ქვემდრომები, მწერები, მხეცები... მზე მაინც წუხდა, რადგან სამყაროს შექმნა დასრულებული არ იყო. მას უნდოდა, ღმერთს ისეთი არსება შეექმნა, რომელიც მინას გააღამაზებდა და დაიცავდა“ (თქმულებები 2009: 14-15)

ცარციათების თქმულებების მიხედვით, ღმერთმა შექმნა პირველი ადამიანი ცარძო. ადამიანის გაჩენის აუცილებლობა ყოვლისშემოქმედს მზემ შთააგონა. მზეს უნდოდა, ღმერთს ისეთი არსება შეექმნა, რომ მას მიწის გალამაზება და ცოცხალი არსებების დაცვა შეძლებოდა, რომელიც, თუ ძალ-ღონით არა, ჭკუით მაინც ყველაზე ძლიერი იქნებოდა.

ქველი მითოლოგიებისა და ბიბლიის მსგავსად, ოსურ მითოსშიც ძირითად მასალად ადამიანის შესაქმნელად გამოყენებულია მიწა.

I ტექსტი:

„ღმერთმა თიხა მიწა მოზილა, შიგ კლდის ქანები შეურია, თიხა მიწა ამითი უფრო მკვრივი გახადა, მერე მთის ანკარა წყა-

რო მიასხურა და გაჩნდა კაცი. მიწისაგან ტანი შექმნა, კლდის ქანებისაგან – თავი, მთის წყაროსაგან – სისხლი“ (თქმულებები 2009: 15).

II ტექსტი:

„ღმერთმა დაიპარა თავისი შიკრიკი და უთხრა:

- წადი და დედამიწიდან მომიტანე კლდის ქანების გუნდა და წყალი.

შიკრიკმა მოიტანა, მოართვა ღმერთს.

ღმერთმა გუნდას წყალი დაასხა, კლდის ქანები შეურია, მათ-რახი გადაუჭირა და მინაზე ჩამოაგდო.

პრძანა ღმერთმა:

- იქეცი სულიერად!

მინარევები სისხლად, ხორცად და ძვლებად იქცა. მერე ფეხზე დადგა, სიარული დაიწყო, ირგვლივ მიმოიხედა, გაიარ-გამოიარა, ქვეყნიერება მოეწონა“ (თქმულებები 2009: 20).

ტექსტის მიხედვით, პირველი ადამიანი, რომელიც ღმერთმა თიხისა და კლდის ქანებისაგან შექმნა, სულიერ არსებად მათრახის დარტყმის შედეგად გადაიქცა. მათრახი, როგორც ერთი სულიერის მეორე არსებად გადაქცევის ჯადოსნური საშუალება, ხშირად გვხვდება ოსურ ხალხურ ტექსტებში, მათ შორის, ნართების ეპოსშიც.

ცარციათული თქმულებების მიხედვით, პირველშექმნილი არსება მოკლებული იყო ელემენტარულ ადამიანურ უნარებს: „კაცი გაჩნდა, მაგრამ რა გინდა! ვერც ლაპარაკობდა, არც არა-ფერი ესმოდა. მაშინ ქარის ღვთაება გალაგონმა კაცის ყურებში ერთი ძლიერად დაუსტვინა და ყურებში ფანდირის სიმების საამო ჰანგები მოესმა. კაცი სრულყოფილ ქმნილებად იქცა“ (თქმულებები 2009: 15).

კოსმოგონიური და ანთროპოგონიური მოტივები ცარციათების თქმულებებში ორადორი ვარიანტით არის წარმოდგენილი. ორივე ვარიანტი და ბეგიზოვისგან არის ჩანერილი. სამწუ-

ხაროდ, არ მოგვეპოვება კოსმოგონიური და ანთროპოგონიური სხვა ოსური ტექსტები, რომლებიც ურთიერთშედარებისა და მითოსური სურათის სრულყოფილად დახატვის საშუალებას მოგვცემდა.

ცარციათული თქმულებებისა და ნართების ეპოსის ცალკე-ული ეპიზოდები გვიდასტურებენ, რომ სამყარო და ადამიანი ისეთი, როგორიც არის, გახდა ზებუნებრივ არსებათა ჩარევის შედეგად. ზეციური არსებები იკრიბებიან და ბჭობენ, როგორ აქციონ ადამიანი სოციალურად აქტიურ, კულტურულ-რელიგიურ არსებად. ოსური მითოსის მიხედვით, მიწათმოქმედება, იარაღის დამზადება, ნადირობის წესები, ლუდის დუღება, ძუარების სამსახური, ქორწილი, მიცვალებულის დაკრძალვა ადამიანებს ზეციურმა არსებებმა ასწავლეს.

სამოთხის მითოსი

(გურძიხანი და ბონვარონი)

ოსური ფოლკლორი იცნობს ხალხურ ტექსტებს საუკეთესო წარსულზე, მარადიულ გაზაფხულზე, როცა ადამიანთა მოდგმას უკვდავება ჰქონდა მინიჭებული. ადამიანები არც ბერდებოდნენ და არც ავადმყოფობა აწუხებდათ. მათ საცხოვრისში წელიწადის დროები ერთმანეთს არ ენაცვლებოდა, მუდამ გაზაფხული იდგა. მთებსა და მწვერვალებზე, როგორც ახლა, თოვლი და ყინული კი არ იდო, არამედ მწვანე ბალახი იზრდებოდა და უამრავი ყვავილი ხარობდა. გაზაფხულის ზამთრით ჩანაცვლება, უკვდავებისა და სამოთხისებური ყოფის დაკარგვა, ბიბლიური ტრადიციის ანალოგიურად, მითებშიც აკრძალვის დარღვევას უკავშირდება.

ოსური თქმულებების უმრავლესობა ნართების ეპოქას იდეალურ ხანად მიიჩნევს, რომელიც ზოგჯერ სამოთხისებურ ყო-

ფას უტოლდება. ზოგიერთი ვარიანტით, ისინი თითქოს ფლობ-დნენ კიდეც მინიჭებულ უკვდავებას, რომელიც მათ ღმერთან დაპირისპირების გამო დაკარგეს.

მარადიული გაზაფხულის მითოსს მნიშვნელოვანი გამოკვლე-ვა უძღვნა ზ. კიუნაძემ. ქართულ მითოლოგიაში მარადიული გაზაფ-ხულის მითოსი თამარ მეფეს უკავშირდება (კიუნაძე 2008: 61-66).

ოსური მითოსი იცნობს მარადიული გაზაფხულის შესახებ ხალხურ ტექსტს „გურძიხანი და ბონვარონი“, რომელშიც ამ-ქვეყნიურ სამოთხეს, როგორც დიდებულ წარსულს, თამარ მე-ფე და თამარის ეპოქა გამოხატავს. მისი ერთ-ერთი ვარიანტი XIX საუკუნის 90-იან წლებში აღ. მაჩაბელს უცნობი ოსი მთქმე-ლისგან ჩაუწერია. ეს ტექსტი სათაურით „თქმულება თამარ დედოფალზე“ დაიბეჭდა 1898 წელს „აკაკის კრებულის“ მერვე ნომერში. თამარის მითოსის ოსურ ვარიანტს წარმოდგენს, აგ-რეთვე, ხალხური გადმოცემა „გურძიხანი და ბონვარონი.“ ოსურ ტექსტში თამარ მეფე გურძიხანად (\leftarrow გურჯი ხანუმი) იწოდება. ბონვარონი კი ოსურ ენაზე ჰქვია ცისკრის ვარ-სკვლავს, რომელიც გურძიხანს სკივრში ჰყოლია დატყვევებუ-ლი. „გურძიხანი და ბონვარონი“ ქართულ ენაზე თარგმნა მერი ცხოვრებოვამ და გიორგი ბესთაუთის რედაქტორობით 1974 წელს გამოქვეყნდა „ოსური ზღაპრების“ კრებულში.

როგორც მარადიული გაზაფხულის ქართული მითოსი, ისე მისი ოსური ვერსიაც, აკრძალვის დარღვევის გამო, სამოთხისე-ბური ყოფის წარმავალი წუთისოფლით შეცვლას გადმოგვცემს.

გურძიხანის მითოში მოქმედება ხდება კონკრეტულ გეოგ-რაფიულ სივრცეში. თქმულებაში ნახსენებია ტოპონიმები: ქუ-თათი (ქუთაისი), რაჭა, ონი, კუდარო. გურძიხანი ცხოვრობდა ხურბადანის მთაზე, რომელსაც, გადმოცემის მიხედვით, აკ-რძალვის დარღვევის შემდეგ ბრუტსაბელა დაერქვა. ოსურ თქმულებაში გვხვდება ისტორიული ანაქრონიზმები, რომლე-ბიც ზოგადად დამახასიათებელია ხალხური თხრობისათვის.

ტექსტში ნახსენებია სტამბოლი, სადაც ბერძენთა მეფის ჯა-
დოსნური თევზის სანახავად წავიდა გურძიხანი.

ტექსტი: „ადრე ძალზე შორეულ წარსულში, ერთი დედოფალი
ცხოვრობდა, ძალზე ჭკვიანი, სახელად გურძიხანი
ერქვა.

იმ დროს თოვლი არ მოდიოდა ხოლმე და ქვეყანა
მუდამ ათასფრად იყო აყვავებული. ირგვლივ გადამ-
წვანებულ მინდვრებში პირუტყვი უმწყემსოდ იალა-
ლობდა. გურძიხანი ხურბადანის მთაზე ცხოვრობდა.
იქ ედგა საოცარი სასახლე, რომელსაც სახურავად
ამომავალი ვარსკვლავი ედგა, იატაკად ძვირფასი
ქვა ეგო და კედლები კი სარკისა ჰქონდა.

ერთ მშვენიერ დღეს გურძიხანმა გადაწყვიტა სტამბოლში
წასულიყო. იმ ხანებში ბერძნების ხელმწიფეს ისეთი თევზი და-
უჭერია, რომელიც ადამიანის ენაზე მეტყველებდა და მკითხა-
ობდა. გურძიხანმა თავის მოახლეებს შორის ყველაზე ჭკვიანი
და ლამაზი ქალი – ყარუ აირჩია და წაიყვანა. სამიც კაცი გაიყო-
ლა და გაუდგნენ გზას.

გამგზავრებამდე გურძიხანმა იხმო თავისი მეკუჭნავე, სა-
სახლის ყველა გასაღები ჩააბარა და მკაცრად გააფრთხილა,
ყველაზე ძლიერ იმ რვა გასაღებისთვის ეგდო ყური, ცალკე რომ
ჰქონდა ასხმული თასმაზე.

გურძიხანს რვა სკივრი ჰქონდა ერთმანეთში ჩადგმული და
კლიტით დაკეტილი. მეკუჭნავეს უთხრა გურძიხანმა: „აპა, ჩემი
ერთგულო, საყვარელო კუძა, გაბარებ ჩემი სასახლის გასაღე-
ბებს და ჩემს დაბრუნებამდე შენ იქნები აქ დიასახლისი. მხო-
ლოდ დაიხსომე: თუ გინდა, რომ ჩვენც მშვიდობით დავბრუნ-
დეთ და შენც კარგად დაგვხვდე, ამ სკივრის კარებს ნუ გააღებ,
თორემ უნინ შენ დაიღუპები და მერე ჩვენც დაგვლუპავ, ვეღარ
ვიხილავთ ერთმანეთს“.

წავიდა გურძიხანი და დარჩა სახლში კუძა თავისი გასაღებების ასხმულებით. გურძიხანის წასვლისთანავე შეუჩნდა ეშმაკი კუძას და დაკარგა მოსვენება. ჩაუვარდა ცნობისმოყვარეობა, რა იქნება ამ სკივრში დამალული.

სამი დღე და ომე ითმინა, ითმინა კუძამ და მერე წასძლია სულმა. ადგა და გარეთა სკივრის კარი გააღო. არაფერი იყო სკივრში გარდა თავისზე უფრო მომცრო სკივრისა. მერვე სკივრამდე რომ მივიდა, გულმა ძერას უმატა. კუძას ეშმაკი არ ასვენებდა, გული ეუბნებოდა: „გახსენ, კუძა, ეგ სკივრი და გურძიხანის მაგივრად შენ დაჯდები სადედოფლო სკამზე.“

ბევრი იყოყმანა თუ ცოტა კუძამ, აჯობა ეშმაკმა. ახადა ყუთს თავი თუ არა, ისკუპა ყუთიდან ბონვარონმა (ცისკრის ვარსკვლავმა) და ცაზე არ დასკუპდა! არ გაუვლია წუთს და ციდან ფანტელ-ფანტელი თოვლი წამოვიდა. სულელ კუძას ჯერ გული შეუღონდა, მერე როცა მოსულიერდა, კლდიდან გადაიჩესა და ხევში სულ წაფლეთ-წაფლეთ ჩაცვივდა მისი სხეული. სამ დღეში გურძიხანმა ქუთათის ქალაქამდე ჩააღწია თავისი მხლებლებით. აქ ფანტელ-ფანტელ თოვა რომ დაიწყო, მიხვდა გურძიხანი, კუძამ სიტყვა გატეხა და თოვლის მომყვანი ღვთაება ბონვარონი სკივრიდან ამოუშვა.

დაბრუნდა ქუთათიდან გურძიხანი. თოვლი კი ბარდნიდა და ბარდნიდა. რაჭას რომ მიუახლოვდნენ, იმ სისქე თოვლი დასდო, ცხენებს მოსართავებამდე სწვდებოდა. გამოეგებნენ რაჭველები და წინ გადაუდგნენ: „ჩვენთან შეიცადეთ გამოდარებამდე, თორემ თოვლი ცხენებს დაგიხრიობთონ“. არ დაუჯერა გურძიხანმა, მაინც განაგრძო გზა. მარტო ეს უთხრა რაჭველებს: „ამ ადგილს დღეის შემდეგ ონი დაერქვასო“, რადგან თოვლი უკვე ბეჭებამდე მისწვდა ცხენებს. აქედან რომ გავიდნენ, ამინდი კი-დევ უფრო გაუარესდა. როგორც იყო ერთ ხეობას მიაღწიეს, მაგრამ ამის იქით ვეღარ შეძლეს წასვლა: ცხენიან ხალხიანად

გაიყინენ და ჯირკვებივით დაეყარნენ. ამის შემდეგ ამ ადგილს კვიდირ (კუნძი) – კუდარო შერჩა სახელად.

ხურბადანის მთას სახელად მას შემდეგ ბურსაბძელას ეძახიან, რადგან გურძიხანი კუძას გასაღებებს რომ აბარებდა, ერთგულმა მსახურმა ყარუმ ყურში უჩურჩულა: „მე არ ვენ-დობი კუძას, მოგატყუებს ეგ ბურ (ყვითელი) მელა“ (ოსური ზღარები 1974: 251).

ქართული მითის სხვადასხვა ვარიანტების მიხედვით, თამარს ყუთში დატყვევებული ჰყავდა სულლუმი, მერცხალი, ცისკრის ვარსკვლავი, თოვლის ვარსკვლავი, შუქურ ვარსკვლავი ან ზოგადად ზამთრის მომყვანი ფრინველი, რომლის ანალოგიც ოსურ სალხურ ტექსტში არის ბონვარონი, იგივე ცისკრის ვარსკვლავი.

ქართული თქმულებისგან განსხვავებით, ოსურ ტექსტში აკრძალვის დარღვევა გაძლიერებულია ეშმაკის მოტივით. გურძიხანის მსახურმა (მეკუჭნავე) კუძამ ეშმაკის წაქეზებით გააღმინება და მიერ კუძას ცდუნება, აკრძალვის დარღვევა და, ამის გამო, მარადიული გაზაფხულის წარმავალი წუთისოფლით ჩანაცვლება ოსურ ტექსტში სამოთხის დაკარგვის ბიბლიურ პარადიგმას წარმოადგენს. მას შემდეგ, რაც კუძამ სკივრი გააღმინება, იქიდან ბონვარონი ამოფრინდა და გაზაფხული ზამთარმა შეცვალა. ოსური ტექსტის მიხედვით, დაიღუპა აკრძალვის დამრღვევი კუძა, ის კლდეში გადაიჩეხა, რაც თქმულებაში დაცემის სიმბოლოდ აღიქმება. გურძიხანმა, დაკარგული სამოთხის დედოფალმა, ვეღარ შეძლო მთაზე ასვლა. სამოთხისებური ყოფა დაცემულმა და წარმავალმა წუთისოფელმა შეცვალა.

აღ. მაჩაბლის მიერ ჩაწერილ ვარიანტშიც იგივე ფინალი მეორდება: თამარმა ვეღარ შეძლო ბრუტსაბძელას მთაზე ასვლა, რადგან ის ღრმა თოვლს დაეფარა. თამარს დაუწყევლია: შენს თოვლს თოვლმა მოუსწროს. მას შემდეგ ბრუტსაბძელის ძველ

თოვლს ახალი უსწრებს. ასე გაჩნდა ოსეთში ზამთარი, თორემ იქ თოვლი მანამდის არ მოდიოდა, მთელ ბრუტსაბქელზე ვენახი იყო გაშენებულიო,“ – მოგვითხრობს გადმოცემა (აკაკის კრებული 1898: 19-20).

თამარ მეფიე ოსური ხალხური ტექსტების პოპულარულ პერსონაჟს წარმოადგენს. ზოგიერთი ოსური თქმულება თამარ მეფის საკრალურ საქმიანობას გადმოგვცემს და, ისევე როგორც ქართული ტრადიცია, მას ეკლესია-მონასტრების მშენებლობას მიაწერს. თამარ მეფის შენირული ოქროთი სბელებს ეკლესია აუგიათ და მას ოქროს ძუარს (Съязгъаерин дзуар) უწოდებდნენ. (ლეგენდები 1972: 153) ოსური გადმოცემის თანახმად, თამარ მეფეს მაცხოვრის ქედზე აუშენებია ტაძარი, სადაც გალუევები ყოველ წელს შესაწირით მიღიოდნენ წმინდანის სადიდებლად (ლეგენდები 1972: 153).

წარლვნის მითოსი

მსოფლიოს თითქმის ყველა ძველი მითოსი მოგვითხრობს ლეგენდარულ ხალხებზე, რომლებიც დიდი სტიქიური კატასტროფებისა თუ ღვთის სასჯელის გამო აღიგავნენ პირისაგან მიწისა. ოსური თქმულებებიც იცნობენ მითიურ ხალხებს – ნართებსა და ცარციათებს, რომლებიც განადგურდნენ. ისინი ქედმალობამ და ამპარტავნობამ იმსხვერპლა.

ოსურ ფოლკლორში გვხვდება ბიბლიური წარლვნის გახალხურებულ სიუჟეტზე აგებული თქმულება „არიგი და მაგირა“. ტექსტის მიხედვით, როდესაც დედამიწაზე ხალხი გამრავლდა, ადამიანებმა ღმერთი დაივიწყეს. მხოლოდ ერთი ცოლ-ქმარი ლოცულობდა ღმერთს, ხატსა და ანგელოზებს. ცოლს არიგი ერქვა, ქმარს – მაგირა. ღმერთმა მათთან მერცხალი გამოგზავნა და დაარიგა, რომ გაეკეთებინათ კიდობანი და შიგ თითო

წყვილი პირუტყვი და ფრინველი შეეყვანათ, აგრეთვე, ყველა ჯიშის მცენარე, დაეკეტათ კიდობნის კარები და სამი დღე არ გაეღოთ. მართლაც, დაიწყო წარლვნა და ბოლოს, ისევე როგორც ბიბლიაში ნოეს ოჯახი, ოსურ თქმულებაშიც მხოლოდ არიგა და მარიგა გადაურჩნენ წარლვნას (ლეგენდები 1972: 135-136). სხვა მხრივ, ოსური ზეპირსიტყვიერი ტექსტები არ ინახავენ უნივერსალური წარლვნის ხსოვნას.

ლიტერატურა

ელიადე 2009: მ. ელიადე, მითის ასპექტები, ილიას უნივერსიტეტის გამომცემლობა, თბ., 2009.

თქმულებები 2009: ოსური თქმულებები, თარგმნა ნაირა ბეპი-ევმა, გამომცემლობა „უნივერსალი“, 2009.

კიკაძე 2008: ზ. კიკაძე, ქართული ფოლკლორი, თსუ გამომცემლობა, თბ., 2008.

ლეგენდები 1972: ოსური ზღაპრები და ლეგენდები, თარგმნა მერი ცხოვრებოვამ, გამომცემლობა „ირისთონი“, ცხინვალი, 1972.

ოსური ზღაპრები 1974: ოსური ზღაპრები, თარგმნა მერი ცხოვრებოვამ, გამომცემლობა „ირისთონი“, ცხინვალი, 1974.



မျှော်ဗုဒ္ဓဘာ



ოსური ფოლკლორის ერთ-ერთ მნიშვნელოვან ჟანრს შეადგენს მითორელიგიური შინაარსის ტექსტები ძუარებზე. ძუარების რწმენას განსაკუთრებული მნიშვნელობა ჰქონდა ოსური ტრადიციული საზოგადოების კონსოლიდაციაში და ის დღესაც დიდ როლს ასრულებს ოსი ხალხის ყოველდღიურ ცხოვრებაში. ჩრდილოეთ ოსეთში ძუარების „ტრადიციული რელიგიური რწმენა“ (როგორც იქ ამჟამად უწოდებენ) თითქმის სახელმწიფო რელიგიის რანგშია აყვანილი. ზოგიერთი ძუარის დღეობა ჩრდილოეთ ოსეთში გამოცხადებულია რესპუბლიკის საერთო სახალხო დღესასწაულად.

ძუარებისადმი ოსების ტრადიციულმა რწმენამ დღემდე ზეპირი ტექსტებისა და რიტუალების სახით მოაღწია.

ქართული ჯვარი და ოსური ძუარი

ოსური ფოლკლორის ცნობილი მკვლევარი ვ. მილერი ასე განმარტავს ძუარს: სიტყვა „ძუარი“ (ძველი) ნასესხებია ქართული ჯვარიდან და აღნიშნავს ჯვარს (крест), სამლოცველოს, წმინდა ადგილს, ღვთაებრივ ძალას და წმინდანს (მილერი 1882: 240). ოსური ძუარის ქართულიდან წარმომავლობას ადასტურებს ცნობილი ოსი მეცნიერი ვ. აბაევიც. მისი აზრით, ისევე როგორც ქრისტიანულ ღვთისმსახურებასთან დაკავშირებული მთელი რიგი ტერმინები, ძუარიც ოსურ ენაში ქართულიდან არის შესული და მას აქვს ისეთივე სემანტიკა, როგორც აღმოსავლეთ საქართველოს მთიანეთში ჯვარსა და ხატს (აბაევი 1958: 401).

ეჭვგარეშეა, რომ მფარველი წმინდანისა და მისი მიწიერი საპრძანისის აღმნიშვნელი სიტყვა „ძუარი“ ოსურ ენაში გაჩნდა ქართული კულტურის გავლენით ქრისტიანობის გავრცელების შემდეგ. აღმოსავლეთ საქართველოს მთიანეთის რელიგიური საზოგადოებების მფარველ წმინდანთა ზოგადი სახელი არის ჯვარი. თუშ-ფშავ-ხევსურეთში ჯვარს მსაზღვრელად ახლავს იმ თემ-სოფლის ან ადგილის სახელწოდება, რომელსაც წმინდანი მფარველობს და მისი მიწიერი საპრძანისი მდებარეობს: გუდანის ჯვარი, კარატის ჯვარი, ხახმატის ჯვარი, ანატორის ჯვარი და სხვ. ქართველ მთიელთა ტრადიციის მსგავსად, ოსურ საკულტო პრაქტიკაშიც ყოველ თემს თავისი მფარველი ძუარი ჰყავს და ზოგიერთი მათგანი მოიხსენიება ტოპონიმური სახელწოდებებით: რექომი ძუარი, ძივლისი ძუარი, რეგახი ძუარი და სხვ.

ოსი ხალხის რელიგიურ ყოფაში ქრისტიანობის პაგანიზაციის უფრო ფართო მასშტაბის მიუხედავად, ძუარს ოსურ ენაში ისეთივე მნიშვნელობა აქვს, როგორიც ჯვარსა და ხატს ქართული ენის მთის დიალექტებში, ანუ ძუარს ისეთივე ფუნქცია აქვს ოსების ტრადიციულ ყოფაში, როგორც ჯვარსა და ხატს აღმოსავლეთ საქართველოს მთიანეთის საყმოებში. საკულტო ნაგებობა, რომელშიც ოსები ძუარს ადიდებენ, აღმოსავლეთ საქართველოს მთიანეთის ჯვარ-ხატთა სამლოცველოების ანალოგიურია. გარდა ამისა, ოსური ტრადიციით, ძუარის ადგილსამყოფელი შეიძლება იყოს ეკლესია, ეკლესიის ნანგრევი, წმინდა ხედა სხვ.

ქართული ენიდან არის შესული ოსურში ქრისტიანულ წმინდანთა და ანგელოზთა სახელები: თარანჯელოზ (მთავარანგელოზი,) მიქალვაბირთა (მიქელვაბრიელი), სანიბა (სამება). ქართული ენის გავლენით დამკვიდრდა ოსების რელიგიურ ყოფაში ძუართა დღესასწაულების ზოგიერთი სახელწოდება: ქასუთა (ქაშუეთობა), ათინავი (ათენგენობა), ჯეორგუბა (გიორგობა).

ოსური ტრადიციით ძუართა რამდენიმე ჯგუფი გამოიყოფა: 1. ძუარები, რომლებსაც მთელს ჩრდილოეთ ოსეთში იცნობენ და თაყვანს სცემენ (რექომის ძუარი, მიქალგაბირთა, ხეთაგის ძუარი, ტბაუ ვაცილა); 2. ხეობის მფარველი ძუარები, რომლებსაც ხეობაში შემავალი ყველა სოფლის მცხოვრები ადიდებს (ძივლისის ძუარი, სანიბა, ავდ ძუარი...); 3. სასოფლო ძუარები (ფირი ძუარი, რეგახი ძუარი და სხვ.); 4. გვარის მფარველი ძუარები (ჯერიათი ძუარი); 5. ოჯახის მფარველი ძუარები. ოსების რწმენით, ყოველ ადამიანს ჰყავს თავისი მფარველი ანგელოზი. ანგელოზურ არსებას ოსურ ენაზე ჰქვია ზედი და დაუავი. ისინი უფრო ხშირად მრავლობით რიცხვში არიან ნახსენები და ანგელოზთა დასს, ანგელოზთა ზეციურ მხედრობას განასახიერებენ. სიტყვაზედი (ვად, ჩვად) მომდინარეობს ირანული ენიდან.

შენიშვნა: შუა საუკუნეებში ცენტრალური კავკასიის მთიანეთში ჯვარ-ხატების თაყვანისცემის საერთო მოდელი ჩამოყალიბდა. ვაინახებში ჯვარ-ხატების თაყვანისცმის კულტი სათანადოდ შესწავლილი არ არის. საკრალური შინაარსის შემცველი ვაინახური ტოპონიმების ნაწილი: ჯარიახი (ჯვრის წყალი), ურდიუ წივ (გიორგის ხატი), ხუცა ინ (ხუცესის ხეობა), თიშუოლ წივ (ლვთისმშობლის ხატი) და სხვ. – გვიდასტურებს, რომ ჩეჩინები და ინგუშები იქ ისლამის დამკვიდრებამდე ჯვარ-ხატებს (წივ, წიუ, ერდა) ადიდებდნენ. წივ, წიუ, წი ვაინახურ ენებზე აღნიშნავს, ხატს, წმინდანს.

ჩრდილოეთ ოსეთის მთიანეთში, სახელდობრ, ალაგირის, ქურთათის, თაგაურისა და დიგორის ხეობებში მფარველ წმინდანთა კულტი ვრცელდებოდა როგორც ზეპირი გზით საქართველოს მთიანეთიდან და, მათ შორის, დვალეთიდან, ისე ოფიციალური, კანონიკური გზით, საქართველოს სამეფო ხელისუფლებისა და მართლმადიდებლური ეკლესიის მხარდაჭერით.

საქართველოს ერთიანი ფეოდალური მონარქიის დაცემის შემდეგ, მონგოლთა ბატონობისა და თემურ ლენგის შემოსევების პერიოდში, ოსეთში არაერთი ეკლესია და მონასტერი განადგურდა. თუმცა, ქრისტიანული ეკლესიის ნანგრევებზე, მოგვიანებით, ხალხური რელიგიური კულტი აღორძინდა. ადგილობრივი მცხოვრებლები ძუარს, როგორც მფარველ წმინდანს, თაყვანს სცემდნენ და ადიდებდნენ. ოსების უმრავლესობა თავს მიიჩნევს მართლმადიდებელ ქრისტიანად, ნაწილი კი აღიარებს სუნიტურ ისლამს, რომელიც მათ ყაბარდოელებისაგან XVII-XVIII საუკუნეებში მიიღეს.

ძუარები – ქრისტიანული წმინდანები

თანამედროვე მკვლევარების ერთი ნაწილი ძუარებს სამეცნიერო ლიტერატურაში ღვთაებებად მოიხსენიებს. XVIII საუკუნის ქართველი მეცნიერი ვახუშტი ბაგრატიონი თავის ისტორიულ-ეთნოგრაფიულ ნაშრომში „აღწერა სამეფოსა საქართველოსა“, რომელშიც ოსების ყოფასა და რელიგიურ რწმენას განიხილავს, ძუარებს არ უწოდებს ღვთაებებს. ვახუშტი ისებზე არსად წერს, რომ ისინი წარმართები არიან. ის გარკვევით აღნიშნავს, რომ „წარჩინებული მათნი არიან მაჰმადიანნი და დაბალნი გლეხნი – ქრისტიანენი“ (ვახუშტი 1973: 638).

ძუარების დაყოფა ღვთაებებად დარგობრივი ფუნქციების მიხედვით ძირითადად საბჭოთა იდეოლოგიის გავლენით აიხსნება. საბჭოთა კავშირში, როგორც წარმართულ-ათეისტური ტიპის სახელმწიფოში, უფრო მისაღები იყო მეცნიერებს ეკვლიათ წარმართული ეპოქის ღვთაებები, ვიდრე ტექსტები გახალხურებულ ქრისტიანულ წმინდანებზე. იდეოლოგიური სტერეოტიპებიდან გამომდინარე, ძუარს ღვთაების სტატუსი ძირითადად საბჭოთა ეპოქის მკვლევარებმა მიანიჭეს. მეფის რუსეთის პერიოდის მეც-

ნიერები ძუარებს არ უწოდებდნენ ღვთაებებს. ვ. მილერის (1848-1913) ცნობით, „ოსები ძუარებს არასოდეს მოიხსენიებდნენ ღმერთის სახელწოდებით. ოსი არასოდეს იტყოდა, რომ ვასთირ-ჯი ან ფალვარა არის ღვთაება“ (მილერი 1882: 239).

შენიშვნა: ოსი ხალხის მითოსს წარმოგვიდგენს ლ. ჩიბიროვი თავის უაღრესად საინტერესო ნაშრომში „ოსი ხალ-ხის ტრადიციული სულიერი კულტურა“ (ჩიბიროვი 2008). ავტორი ძუარებთან დაკავშირებულ ხალხურ ტექსტებს, ოსი ხალხის მითოპოეტურ შემოქმედე-ბასა და ტრადიციულ შეხედულებებს ანიმიზმს, ტო-ტემიზმსა და სხვა მაგიურ რჩმენა-წარმოდგენებს უკავშირებს. ძუარების თაყვანისცემას ლ. ჩიბირო-ვი ოსი ხალხის ცრურწმენის გამოვლინებად მიჩი-ნევს. თანამედროვე დასავლური მეცნიერება კი (მ. ელიადე, კ. ლევი-სტროსი, რ. გენონი და სხვ.) მითს განიხილავს ტრადიციული საზოგადოების თვალ-თახედვით, რომ მითი არის ნამდვილი ამბავი, უფრო მეტიც, ის არის წმინდა გადმოცემა, რომელიც სამ-ყაროზე ან მის ნაწილებზე არსებით ჭეშმარიტებას შეიცავს.

ოსები აღიარებენ ერთ ღმერთს, რომელსაც ოსურ ენაზე ჰქვია „ხუცაუ“. საკულტო ტექსტებში მისი ეპითეტი არის „დი-დი“ – „სთირ“ ხუცაუ. მითოლოგიური გადმოცემების მიხედვით, ის არის ერთადერთი და არ ჰყავს თანასწორი. დანარჩენ ზეცი-ურ ბინადრებს კულტმსახურნი მიმართავენ არა როგორც ღვთაებებს, არამედ როგორც მფარველ წმინდანებს, ძუარებსა და ანგელოზებს. არც ერთ მათგანს არა აქვს ხალხურ ტექსტებში ღვთაების სტატუსი.

ძუარი შუამავალია ღმერთ ხუცაუსა და ადამიანებს შორის. ღმერთი ერთია, ძუარები – ბევრი. ისინი ხუცაუმ შექმნა და გამოგ-ზავნა ადამიანთა დასახმარებლად. ოსურ ტრადიციაში ძუართა

გავრცელებული სახელწოდება ხუცაუ ძუარ (ხუყაუ ძუარ) – ღვთის ძუარი – მიუთითებს, რომ ძუარები ღმერთის, ხუცაუს შვილები არიან. „ღვთისა (ხუყაუ) და ღვთისგან შექმნილი ძუარების მადლი არ მოკლებოდეთ თქვენს ოჯახებს!“ – მიმართავს ძუარლაგი მლოცველს და პირველად ხუცაუს ახსენებს (აგნაევი 1999: 172). ანალიგიურია ჯვარ-ხატთა შესახებ ქართველ მთიელთა შეხედულებაც. აღმოსავლეთ საქართველოს მთიანეთში ღმერთი ერთია, მას ჰქვია მორიგე ღმერთი. ყველა თემს ჰყავს თავისი მფარველი ჯვარი, იგივე მფარველი წმინდანი. აღმოსავლეთ საქართველოს მთიანეთში ჯვარის სინონიმი არის ხატი (იკონ), ღვთისშვილი (ღმერთის შვილი), ღვთისნასახი. ისინი ღმერთმა გამოგზავნა ადამიანთა მფარველად და დასახმარებლად.

შენიშვნა: ოსების უზენაესი ღმერთის სახელის „ხუცაუს“ (ლეზგიურ ენაზე – „ხუცარ“) ეტიმოლოგია ორანული და სხვა ენობრივი მონაცემებით ვერ იხსნება. გამოითქვა მისი ქართულ „ხუც“ (ხუცესი <– უ-ხუცეს-ი>) ძირთან ნათესაობის თვალსაზრისი (აბაევი 1960: 16-17). ჩრდილოეთ კავკასიის მთიელებმა ერთი ღმერთის იდეა, როგორც ჩანს, ქრისტიანული რწმენის მიღების შემდეგ შეიმეცნეს.

ძუარებისადმი ოსების თაყვანისცემა არ არის წარმართობა, ორრნმენიანობა, მრავალმერთიანობა, მართლმადიდებლურნარმართული სინკრეტიზმი და არც ქრისტიანობამდელი რელიგია. ძუარების კულტი სწორედ ქრისტიანობის წიაღში, ოს ხალხში ქრისტიანული რელიგიის გახალხურების შედეგად (რადგან ის ზეპირი სახით ინახებოდა ხალხის მეხსიერებაში) ჩამოყალიბდა. ძუარების კულტი თავისი შინაარსით არის გახალხურებული რელიგია და ის ქრისტიანულ ყაიდაზეა აგებული.

ძუარლაგი

ქართველები და ოსები საქართველოს მთიანეთისა და დღე-ვანდელი ჩრდილოეთ ოსეთის მრავალ სალოცავში ბოლო დრომდე ერთად აღნიშნავდნენ რელიგიურ დღესასწაულებს. კულტმსახურება ძუარებში იმავე სახით სრულდება, როგორც აღმოსავლეთ საქართველოს მთიანეთის ჯვარ-ხატებში.

ძუარში რიტუალს უძღვება ძუარლაგი (ძვარი ლაგ) – (ძუარ – ჯვარი, ლაგ – კაცი). სიტყვა ძუარლაგის აღნაგობას აშკარად ეტყობა ქართული ტრადიციის გავლენის კვალი (ძუარლაგი – ძუარის კაცი <– ხატის კაცი, ჯვარის მსახური). საქართველოში, კერძოდ, ჯავისა და ცხინვალის რაიონში მცხოვრებ ოსებში კულტმსახურის აღმნიშვნელი სიტყვა დეკანოზი, ქართველ მთიელთა (მთიულეთ-გუდამაყარი) საკულტო პრაქტიკიდან უნდა შესულიყო, სადაც ჯვარ-ხატთა მსახური საეკლესიო იერარქიაში უფროსი მღვდლის დეკანოზის სახელს ატარებს.

ძუარლაგს ირჩევდნენ, თუმცა დასტურდება პრეცედენტი, როცა მას მემკვიდრეობით გადაეცემოდა ძუარის სამსახური. ოსური მითოლოგიური ტექსტები მოგვითხრობენ ძუარლაგობის ზეციური წარმომავლობის შესახებ. ძუარლაგი, ისევე როგორც აღმოსავლეთ საქართველოს მთიანეთში ხუცესი, ხევისბერი და დეკანოზი, იყო შუამავალი ადამიანებსა და მფარველ წმინდანებს (ძუარებს) შორის. ხუცესის მსგავსად ძუარლაგიც საგანგებოდ მარხულობდა და იწმინდებოდა დღესასწაულის დაწყებამდე.

ოსები და ქართველი მთიელები მფარველ წმინდანთა განდიდებისა და თაყვანისცემის მიზნით, კულტმსახურების დროს იყენებენ ერთსა და იმავე საკრალურ საგნებსა და სიმბოლოებს. ძუარლაგი ზარებშებმული საკულტო დროშით ადიდებს ღმერთსა და ძუარებს. ისევე როგორც აღმოსავლეთ საქართველოს მთია-

ნეთში, ოსებშიც საკულტო დროშა განასახიერებს აბსოლუტურ სიწმინდეს, მფარველ წმინდანს. თვით დროშის ოსური სახელწოდება, „თრსა“ (тырыса), ქართული ენიდან არის ნასესხები.

შენიშვნა: ოსურ ენაში ქართულიდან ნასესხებ და თანხმოვნით დაწყებულ სიტყვებში ხდება მუღერობის დაკარგვა და დ ბგერას თ თანხმოვანი ენაცვლება: დროშა → თრსა; დვალი → თუალი).

ძუარლაგი ლოცავს მახვენარს, ამწყალობნებს ძუარისთვის შესანირ კურეტსა და ცხვარს, „სერავს“ სარიტუალო კვერებს, ჩირითებს (Чиритæ). უშუალოდ ძუარლაგის ხელმძღვანელობით ტარდება მსხვერპლშენირვა. ისევე როგორც აღმოსავლეთ საქართველოს მთიანეთში, ოსებშიც რელიგიური რიტუალის აუცილებელ ატრიბუტს წარმოადგენს ლუდი (ნაეგაჲი).

რელიგიურ რიტუალს ძუარში იწყებდა ძუარლაგი (ძუარის კაცი), რომელიც აღავლენდა ლოცვა-დამწყალობნებას. ძუარლაგი საკულტო ტექსტებში პირველად ადიდებდა დიდ ღმერთს სთირ ხუცაუს (Стыр Хуыщау), შემდეგ – ვასთირჯის (დიგ. ვასკერგი), ვაცილას, მად მაირამს და დანარჩენ ძუარებს.

ძუარს, როგორც მფარველ წმინდანსა და შუამავალს ღმერთ ხუცაუს წინაშე, ძუარლაგი შესთხოვს მოსავლისა და საქონლის ბარაქას, ვაჟის დაბადებას, შვილების გამრავლებას, ავადმყოფის გამოჯანმრთელებას, შორს წასულის მშვიდობით დაბრუნებას. ოსების რწმენით, ყველაზე დიდი ძალა მიენერებათ იმ ძუარებს, რომლებიც ქრისტიანული ეკლესიების ნანგრევებთან დაარსდნენ.

მფარველ ძუართა სახელწოდებებისა და საკრალური ლექსიკის გარდა, სავარაუდოდ, ოსურ მითორელიგიურ ტექსტებში სხვა ელემენტებიც ქართული ყოფიდან შევიდა და აისახა. ამჯერად მხოლოდ რამდენიმე მათგანზე შევაჩერებ ყურადღებას.

ძუარების შესახებ ოსური მითოლოგიური ტექსტების შინაარსი, სტრუქტურა, სიმბოლიკა, იდეოლოგია და საზრისი ქართველ მთიელთა ანდრეზების ანალოგიურია.

ძუართა დაარსების მითოსი

ოსი ხალხის კოლექტიურმა მეხსიერებამ დღემდე შეინახა სახეცვლილი ქრისტიანული სიუჟეტები, საკრალური სიმბოლოები და საღვთისმსახურო ტერმინოლოგია.

ოსური მითორელიგიური ტექსტები მოგვითხრობენ ძუარების დაარსების საკრალურ ისტორიებს. ძუარები ზეციური სამყაროდან სხვადასხვა სახით ევლინებიან თავიანთ რჩეულებს: ზოგჯერ ადამიანის გარეგნობით, ხან ცეცხლის სვეტის, საკრალური ნივთის, ხანაც მტრედის ან ირმის სახით და თვითონ ირჩევენ მიწიერ საპრძანისს. ძუარი არსდება ადამიანის ნებისაგან დამოუკიდებლად. ზოგიერთი ტექსტი გადმოგვცემს სიწმინდის დაარსებაში ძუარლაგის მონაწილეობას. ოსური მითოსი ჰიეროფანიის ადგილს ძუარის მიწიერ საპრძანისად მიიჩნევს.

საყოველთაოდ ცნობილ ძუარებზე საკრალურ ისტორიებს ჩრდილოეთ ოსეთის ყველა ხეობაში იცნობენ. ძუარების მითოსი იმავე ტიპის სიუჟეტებითაა გადმოცემული, როგორც ანდრეზები ქართველ მთიელთა ჯვარ-ხატების შესახებ.

ძუართა დაარსების ანდრეზებში რამდენიმე მოდელი გამოიყოფა, რომლებიც ასევე დამახასიათებელია ჯვარ-ხატთა საკრალური ისტორიებისთვის. მათგან ყველაზე ნიშანდობლივია ციდან საგნების ცვენა, ხარის მიერ ძუარის მიწიერი საპრძანისის აღმოჩენა, ნანგრევში ჩამარხული საგანძურის ადგილზე სალოცავის აღმართვა და მტრედის სახით მოფრენილი ძუარის გან სიწმინდის დაარსება.

ჯაჭვ-საკიდელი. ოსურ ხალხურ ტექსტებში მფარველი წმინდანის დაარსების ერთ-ერთი მოდელს წარმოადგენს ციდან საგნების ცვენა, რომელიც ძუარების ზეციურ წარმომავლობაზე მიანიშნებს. საკრალური ნივთების ციდან ჩამოცვენის მოტივი გვხვდება ჰეროდოტეს სკვითურ ისტორიაში და ქართველ მთიელთა ანდრეზებში. თუმცა ჰეროდოტეს ტექსტში საგნების ციდან ცვენის მითოლოგების გადმოგვცემს არა სალოცავის და-არსებას, არამედ სკვითებში მეფობის წარმოშობას. საკრალური ისტორია ზოგჯერ მფარველი წმინდანის დაარსებასა და მეფობის წარმომავლობას ერთი და იმავე მოდელით წარმოგვიდგენს. მათ, ორივეს, მეფობასაც და მფარველი წმინდანის კულტსაც, იდენტური ნიშან-თვისებები აქვთ, ორივე მიჩნეულია ზეციური წარმოშობის მოვლენად.

ხევსურული ანდრეზის თანახმად, შიბისა და თასის ციდან ჩამოვარდნის ადგილას დაარსდა კარატის ჯვარი (ანდრეზები 2009: 58-59).

ჩრდილოეთ ოსეთში ქურთათის ხეობის სათემო სიწმინდის – ძივლისის ძუარის დაარსებაც ჯაჭვ-საკიდლის ციდან ჩამოგდებას უკავშირდება.

ტექსტი: ქურთათის ხეობაში ერთხელ შუა ზაფხულში უჩვეულოდ დიდი თოვლი მოსულა. ირგვლივ ყველაფერი თოვლს დაუფარავს. ძივლისელებს დაუნახავთ, რომ სოფლის მახლობლად, ერთ მოშიშვლებულ ადგილას, საერთოდ არ იღო თოვლი. ისინი იმდენად გაოცებულან, რომ გადაუწყვეტიათ ახლოდან ენახათ ეს უცნაური მოვლენა. ძივლისელებს გაუკვალავთ თოვლი, მისულან იმ ადგილას, სადაც მიწა თოვლს არ იკარებდა და რას ხედავენ! მიწაზე ბალახი თურმე მწვანედ ბიბინებდა, ორ ჯაჭვ-საკიდელს კი, მწვანე ბალახზე, ჯერ კიდევ ორთქლი ასდიოდა. ხალხი მიხვდა, რომ ეს ჯაჭვები ზეციდან იყო ჩა-

მოცვენილი და იმ ადგილას სალოცავი აუშენებიათ. ასე დაარსებულა ძივლისის ძუარი. იმ დღიდან ქურთათის ხეობის მცხოვრებლები ძივლისის ძუარს ეთაყვანებიან. ის ჯაჭვები კი, როგორც ღვთიური სასწაულის დადასტურება, კვლავაც ძივლისის ძუარში ინახება. მისი დღესასწაულის დღეს (15 ივლისს) ჯერ ძუარლაგი ადიდებს ღმერთსა და ძუარებს, ხოლო შემდეგ მღლოცველები, ერთი ჯაჭვით – მამაკაცები, მეორე ჯაჭვით – ქალები, მადლს გამოსთხოვენ მფარველ წმინდანს (ძივლისის ძუარი).

ჯაჭვ-საკიდელსა და შიბს ქართველი მთიელებისა და ოსების საკულტო პრაქტიკაში აქვს საკრალური დანიშნულება. ის ცისა და მიწის კავშირს გამოხატავს. ხალხური ლექსის მიხედვით, ლაშარის ჯვრის მუხა, სანამ ზურაბ ერისთავი მოჭრიდა, ცას ოქროს შიბით უკავშირდებოდა: „წმინდა გიორგი მეც ვიყავ, ცას ვები ოქროს შიბითა“, – აცხადებს ლაშარის ჯვარი ერთ-ერთ საკულტო სიმღერაში.

ოსურ თქმულებაში ძუარი ზეციური ჯაჭვების გამოჩენით ნიშანს აძლევს საზოგადოებას და მყარდება კომუნიკაცია ზებუნებრივ ძალებსა და ადამიანებს შორის. ჯაჭვ-საკიდლის დაცემის ადგილას სალოცავის დაარსების აუცილებლობა ცის ბინადართა საკრალური ქმედებებითა და ავტორიტეტით არის გამყარებული. იმ საზოგადოებამ, რომელმაც ძივლისში ციდან ჩამოგდებული ჯაჭვები იხილა, იცის, რომ პირველი ჯაჭვ-საკიდელი ვასთირჯის თხოვნით ზეციურმა მჭედელმა ქურდალაგონმა გამოჭედა და კერის მფარველმა საფამ ზეციდან მიწაზე ჩამოაგდო, როგორც კერის ჯაჭვის ნიმუში. ახლა კი მათ თვალინი ხდება საკრალურის განახლება.

თქმულების მიხედვით, ძივლისელებმა გაცხელებული ჯაჭვ-საკიდლები იხილეს, რაც იმის ნიშანია, რომ ეს ნივთები ცეცხლმოდებული უნდა წამოსულიყო ციდან, როგორც ცეცხლის

სვეტი, სვეტი ნათლისა. მაგრამ მას შემდეგ, რაც ძუარმა თავისი ნებით თავისი მიწიერი საბრძანისი აირჩია, ცეცხლი ჩაქრა და ჰიეროფანის შემსწრეებს თოვლის სიახლოვეს მხოლოდ გაცხელებული საკიდლები დახვდათ. ამით ძუარმა ხალხს მიკარების საშუალება მისცა, რათა ამიერიდან იქ, იმ ადგილას, ძივლისში ვასთირჯის კულტს დასდებოდა საფუძველი. ხევსურული ანდრეზის თანახმად, „ცითავ ცეცხლი ჩამოჩნდავ შიბის აღითაო, ხატის აღე კი ყოფილიყვაო“ (ოჩიაური 1967: 180),

ოსურ ტექსტში ძუარის მიერ თავის მიწიერ საბრძანისად ზეციური ჯაჭვებით „შემოხაზული“ ადგილი, ძივლისის დათოვ-ლილ ლანდშაფტზე გადარჩენილი მწვანე ბალახი, სიწმინდის, მარადიული გაზაფხულისა და სამოთხის ნიშან-სიმბოლოს წარმოადგენს.

ქართული ანდრეზების მიხედვით, ჰიეროფანის ყველაზე გავრცელებული ნიშანი არის კერიაზე, ჯაჭვ-საკიდლის ქვეშ ამოსული იფანი და მასზე შემოხვეული გველი. მეორე ვარიანტით, გველი ჩამოჰყვება ჯაჭვ-საკიდელს, ჩაძვრება კერიაზე შემოდგმულ ქვაბში და წამლავს საჭმელს, რომლითაც თითქმის მთელი ოჯახი იღუპება. გადარჩებიან მხოლოდ ოჯახის რძალი და პატარა ბავშვი. ჯვარი იკავებს ამონუვეტილი ოჯახის ფუძეს და იქ, კერიაზე, შუაგულში, როგორც საუკეთესო ადგილზე, მისი სახელობის სალოცავი აღიმართება.

ზეციური წარმომავლობის ჯაჭვ-საკიდლის თემაზე ოსმანალხმა არაერთი გადმოცემა შემოინახა. მათ შორის საყურადღებოა „ჯერიათების რახისი“ (ჯაჭვ-საკიდელი), რომელიც ერთი საგვარეულოს მფარველი ძუარის დაარსებას გადმოგვცემს.

ტექსტი: სოფელ კადგარონში ჯერიათებს ერთ წვიმიან საღამოს თავიანთი სახლიდან დაუნახავთ, რომ მათ სათიბში დადგმულ თივის ზეინზე რაღაც ბრიალებდა. ჯერ უფიქრიათ, ალბათ მეხი დაეცა ზვინს, თივა სადაცაა ჩაიწვებაო და ზვინთან მისულან. ყველანი

გაოცებულან, როცა ზვინის თავზე წითელი, კაშკაშა, გავარვარებული რახისი – ჯაჭვ-საკიდელი უნა-ხავთ, მაგრამ პალახს თურმე ცეცხლი არ ეკიდებო-და. ჯერიათები მიმხვდარან, რომ ის იყო ზეციური წარმომავლობის ჯაჭვი, ქურდალაგონის გამოჭედი-ლი, რომლებსაც მათი წინაპრები სალოცავებში ინა-ხავდნენ. ჯერიათებმა რახისის ჩამოგდების ადგი-ლას სალოცავი ააგეს და იმ დღიდან ისინი, როგორც ძუარისგან ხელდებულები, ეთაყვანებოდნენ მფარ-ველ წმინდანს (ტუაევა).

კერიის ჯაჭვი ოსურ ტრადიციაში უდიდეს სიწმინდეს წარ-მოადგენდა. ოსები კერიის ჯაჭვთან დებდნენ ფიცს, ლოცუ-ლობდნენ და ოჯახის ახალი წევრი დასალოცად მიჰყავდათ. ცი-დან ჩამოგდებული ჯაჭვ-საკიდელი, როგორც უმაღლესი საკ-რალური სტატუსის მქონე საგანი, სალოცავის დაარსების მიზე-ზი ხდება.

ღვთაებრივი წარმოშობის ჯაჭვებს ოსებიცა და ქართველი მთიელებიც ზეციურ სამყაროსთან კომუნიკაციის საშუალებად იყენებდნენ. რელიგიური რიტუალის დროს მღლოცველები მას ხელში იჭერდნენ და მფარველ წმინდანს დახმარებას შესთხო-ვენ. ასეთივე საიდუმლო წარმოშობის ჯაჭვი ლომისის ჯვარში დღემდე ინახება. ჯალაბაურების ჯაჭვს, რომელსაც საკრალურ ნივთად მიიჩნევდნენ და ლაშარის ჯვარში ინახებოდა, მორჩი-ლების ნიშნად ფშავლები კისერზე იდებდნენ და მფარველ წმინ-დანს ავადმყოფობისგან განკურნებას შესთხოვდნენ (ბარდავე-ლიძე 1974: 24).

ხარი. ზოგიერთი ძუარის მიწიერი საპრძანისის აღმოჩენა, ოსური გადმოცემების მიხედვით, ხარს უკავშირდება. ოსების ტრადიციულ ყოფაში ისევე, როგორც სხვა მიწათმოქმედი ხალხების სამეურნეო ცხოვრებაში, ხარს მნიშვნელოვანი როლი ენიჭებოდა. ცნობილია ხარის მონაწილეობა პირველი ხნულის

გავლების საკრალურ რიტუალში. რელიგიურ დღესასწაულზე მლოცველები საუკეთესო ხარებს ძუარებს სწირავდნენ. განსაკუთრებით მაღალი საკრალური ავტორიტეტი ჰქონდათ თუთირის თვეში დაბადებულ ხარებს. ნართების ეპოსის მიხედვით, თუთირის დღესასწაულზე დაბადებულმა ორმა მოზვერმა აიტანა სოფიოს აკლდამამდე ბათრაძის ცხედარი.

აღმოსავლეთ საქართველოს მთიანეთში უძილაურთ თემის მფარველ წმინდანს, კოპალას, ჰყავდა კურეტები, რომლებიც გათავისუფლებული იყვნენ ყოველგვარი სამინათმოქმედო საქმიანობისგან.

ოსური გადმოცემების მიხედვით, საკუთარი ხარები ჰყოლია, აგრეთვე, ერთ-ერთ ყველაზე პოპულარულ წმინდანს ვასთირჯის, რომლის ნება-სურვილით, ადამიანის ხელის გარეშე, აგებულა პირველი სალოცავი – რექომი ძუარი. რექომი ძუარის აგება ვასთირჯის ჯერ კიდევ მაშინ გადაუწყვეტია, როცა მთებზე თოვლი არ მოდიოდა და ყინულის ნაცვლად მწვერვალებზე ბალახი მწვანედ ბიბინებდა. თქმულება მოგვითხრობს რექომი ძუარის დაარსებაში ვასთირჯის ხარების მონაწილეობის შესახებ, რომლებიც მფარველი წმინდანის დავალებით მოქმედებდნენ.

ტექსტი: ერთხელ ვასთირჯიმ გადაწყვიტა ოსებისთვის ისეთი ხისგან აეშენებინა სამლოცველო, რომელიც სამუდამოდ იქნებოდა და არასოდეს დალპებოდა. ასეთი ხეები კი მხოლოდ მთის მეორე მხარეს იზრდებოდა. ვასთირჯიმ უბრძანა თავის ხარებს, რომ გადმოეზიდათ იქიდან მორები იმ მთაზე, სადაც ახლა მყინვარია, რექომის პირდაპირ. ურემი ტყეში ხეებით თავისით დატვირთულა და ხარები მითითებული გზით, გამცილებლის გარეშე, წამოსულან. ერთ ადგილას, სადაც ხარები გაჩერებულან, ხეები ურმიდან გადმოცლილა და ხარებიც ისევ ვასთირჯისთან დაბრუნებულან. მორებისგან თავისით აგებულა სა-

ლოცავი, ადამიანის დახმარების, ადამიანის ხელის გარეშე (მილერი 1882: 256).

ურემში შებმული ვასთირჯის ხარების მიერ სალოცავის ასაშენებლად წმინდა ხეების გადაზიდვა და ძუარის მინიერი საპრძანისის აღმოჩენა გვაგონებს ბიბლიურ მოთხრობას უფლის კიდობანზე, რომელიც ურემში შებმული უდელდაუდგმელი ძროხებით გადაიტანეს ფილისტიმელთა ქვეყნიდან ისრაელთა სასაზღვრო დაბაში. ბიბლიის მიხედვით, ისინი „გზას მიჰყვებოდნენ და ზმუოდნენ, არც მარჯვნივ გადაუხვევიათ, არც მარცხნივ. ყანაში, სადაც ძროხები გაჩერდნენ, „ურმის ხეები დაჩერხეს, ფურები კი ალსავლენ მსხვერპლად აღუვლინეს უფალს“ (მეფ. 6: 1-14).

ურემში შებმული ხარებით სიწმინდის გადატანა ერთი ადგილიდან მეორეზე და საკრალური ცენტრის აღმოჩენა გავრცელებული მითოლოგება ქართულ ზეპირსიტყვიერებაშიც. ამ მითოლოგებაზეა აგებული ლომისის, წმინდა მაქსიმესა და ძარნემის წმინდა გიორგის დაარსების ტექსტები. ძველი ბერძნული მითი მოგვითხრობს, რომ ძვირფასი დის, მშვენიერი ევროპას საძებნელად წასული კადმოსი, წინასწარმეტყველების თანახმად, გაჰყოლია ძროხას და სწორედ იმ ადგილას, სადაც პირუტყვი დაწოლილა, ქალაქი თებე დაუარსებია. ქართულ ანდრეზებშიც ხარები ზებუნებრივი ძალების პრძანებით მოქმედებენ და ადამიანებს მფარველი წმინდანის ნებას უცხადებენ.

ოსები ხარებშებმულ ურემზე დებდნენ ასევე მეხისაგან გარდაცვლილის ცხედარს, ხარებს უშვებდნენ და სადაც ისინი გაჩერდებოდნენ, მიცვალებულს იქ მარხავდნენ. იმ ადგილზე კი ხეს რგავდნენ და სალოცავ ნიშს აარსებდნენ. ყოველწლიურად ვაცილას პატივსაცემად ისინი ხესთან მსხვერპლს სწირავდნენ. მეხდაცემულის დაკრძალვას უკავშირდება ოსური რიტუალი ცოფაი, რომელზეც ქვემოთ საგანგებოდ ვისაუბრებთ.

ირყაუ ხუცაუ ძუარის დაარსებაც, ოსური მითოსის თანახმად, ხარს უკავშირდება. ვასთირჯის პრძანებით სოფლის მლოცველი ხელწმინდა მოხუცი მიჰყვება ნახირიდან გამორჩეულ ქორა ხარს, რომელიც უჩვენებს, თუ სად უნდა აღიმართოს სამლოცველო (კუვანდონი).

ტექსტი: ერთხელ თურმე ირყაუში შავი ჭირის ეპიდემია მძვინვარებდა. ხალხი წყდებოდა, ოჯახები იღუპებოდა. სოფლის ერთ-ერთ უხუცესს, პიპო გურციევს, რომელიც ხალხის გადარჩენისთვის ლოცულობდა, სიზმარში ვასთირჯი გამოსცხადება და უთქვამს, რომ მეორე დილით მისულიყო სამწყემსურში, ნახირიდან გამოსულ თეთრ ხარს გაჰყოლოდა და, სადაც ის დაწვებოდა, იმ ადგილზე აღემართა კუვანდონი – ძუარის სამლოცველო, მისთვის ხარი შეენირა და ლოცვა აღევლინა, რის შემდეგაც შავი ჭირი შეწყდებოდა.

დილით რომ გაუღვიძია, პიპო გურციევს ყველაფერი ისე გაუკეთებია, როგორც ვასთირჯიმ უბრძანა. ხალხი მართლაც გადარჩენილა, ეპიდემია შეჩერებულა, მაგრამ თვითონ პიპო იმავე საღამოს გარდაცვლილა (ირყაუ ხუცაუ ძუარ).

მითოლოგიური გადმოცემების მიხედვით, ძუარები სიზმარში ევლინებიან თავიანთ რჩეულებს და უცხადებენ საიდუმლოს. ირყაუ ხუცაუ ძუარის დაარსების ტექსტი გადმოგცემს არქეტიპულ ქმედებას, რომელმაც სოფელში ახალ ყოფას დაუდო სათავე.

განძი. ოსური მითოსის თანახმად, განძს ძუარი იცავს და პატრონობს, ან ძუარი თავის ყმებს განძის სახით ეცხადება. განძის მოტივით განსაკუთრებით მდიდარია ქართული მითოსი, რომელიც მოგვითხრობს საიდუმლო საგანძურებზე. განძის ფუნქციები და საკრალური ნიშნები, განძისა და ჯვარ-ხატების,

განძისა და ადამიანების ურთიერთობა საფუძვლიანად შეისწავლა ზ. კიკნაძე (კიკნაძე 1996: 151-168).

ანდრეზების მიხედვით, ყველაზე პოპულარული ადგილი, სადაც განძი შეიძლება აღმოჩნდეს, არის ნანგრევი. საიდუმლო საგანძურებში აღმოჩნილ ნივთებს შორის მითოსი განსაკუთრებულ მნიშვნელობას თასს ანიჭებს. ხევსურული ანდრეზის თანახმად, ციდან ჩამოცვენილი შიბისა და თასის მიწაში დამარხვის ადგილას აღმართეს კარატის ჯვარი (ანდრეზები 2009: 58-59). ოსურ ტრადიციაში თასი განსაკუთრებული პატივისცემით სარგებლობს, რომლის არქეტიპად შეიძლება ნართების ვაცა-მონგა მივიჩნიოთ.

ერთ-ერთი ოსური გადმოცემის მიხედვით, მივიწყებული ძუარი ხალხს განძის სახით ეცხადება. სოფელ რეგახში ძუარის კულტის განახლებას გადმოცემა ეკლესიის ნანგრევში ჩამარხულ განძს უკავშირებს. რჯულისა და წმინდანის მფარველობის გარეშე დარჩენილმა სოფლის მოსახლეობამ რელიგიური კულტის აღორძინებით განსაცდელს თავი დააღწია. კულტმსახურების აღდგენით სოფლის წინაშე რწმენის, გადარჩენისა და ბედნიერი მომავლის პერსპექტივა იშლება.

ტექსტი: ერთხელ სოფელ რეგახის მცხოვრებლებს შავი ჭირი დარევიათ. ეპიდემია ხალხს თურმე მუსრს ავლებდა, როცა ბრძენი მოხუცის რჩევით რეგახლებს ერთი ადგილი გაუთხრიათ. მიწის ქვეშ ეკლესიის კედლები გამოჩენილა, რომლის შუაგულშიც უნახავთ საიდუმლო სამალავი. სამალავში ისეთი ნივთები ყოფილა ჩამარხული, რომლებსაც უწინ რელიგიურ დღესასწაულებზე ღვთისმსახურების დროს იყენებდნენ. იქ უნახავთ, აგრეთვე, სალუდე თასი. როგორც კი ძველ ნასაყდრალთან პირველი ლოცვა აღუსრულებიათ, ეპიდემია სოფელში მაშინვე შემწყდარა. ხალხს იქ დაუწესებია – ხუცაუ ძუარის

თაყვანისცემა, რომელსაც სოფლის სახელის მიხედვით რეგახი ძუარიც ჰქვია. ამჟამად რეგახი ძუარში რელიგიურ დღესასწაულზე იმ სოფლიდან წასული ყველა გვარი მიდის და მფარველ წმინდანს ეთაყვანება. სამალავში აღმოჩენილი სალუდე თასი სასწაულმოქმედი ყოფილა: ძუარის პატივსაცემად გამართულ ტრაპეზზე რამდენი კაციც უნდა ყოფილიყო, იმ სალუდე თასში ჩასხმული ლუდი მაინც ყველას ჰყოფილია. მოგვიანებით თასი ვიღაცას მოუპარავს. ოლონდ ამის შემდეგ თასს უწინდელი თვითება დაუკარგავს (რეგახის ძუარი).

საყოველთაო განსაცდელი, რომელიც რეგახს დაატყდა, ძუარის გამოჩენის მოახლოებაზე მიანიშნებს. ისევე როგორც მინაში ჩაგდებული თესლიდან უნდა ამოიზარდოს მცენარე და მოისხას ნაყოფი, მინაში ჩამარხული განძიც უეჭველად გამოავლენს თავის საკრალურ ბუნებას. საიდუმლო საგანძურში თასის გამოჩენა საკულტო ცხოვრების დასაბამზე მიანიშნებს. ხევსურული ანდრეზის თანახმად, შუბნურის ჯვარი დაარსდა იმ კერიასთან, სადაც საიდუმლოდ თუშეთიდან წამოღებული საკულტო თასი ჩაფლეს. შუბნურის ჯვარი, კერიასთან ჩამარხული თასიდან ამოზრდილი წმინდა ხის – იფანის, ან მასზე შემოხვეული გველის სახით ეცხადება ოჯახის წევრებს და განსაცდელს მოუვლენს. ჯვარი განდევნის ყველას, უკლებლივ, და იმ დღიდან თავის მიწიერ საბრძანისად დაიჭერს გათავისუფლებულ ადგილს (ანდრეზები 2009: 61-62).

ხეთაგის ტყის სასწაული. ჰიეროფანია, როგორც ზებუნებრივი სასწაული, სხვადასხვა სახით ვლინდება და მისი მომსწრე, როგორც წესი, ძუარის ერთგული ყმა ხდება. თქმულება, რომელიც ხეთაგი ვასთირჯის დაარსებას გადმოგვცემს, თითქოს სრულიად რეალურ ვითარებას ასახავს. გმირის სამოქმედო ასპარეზიც არ სცილდება კონკრეტულ გეოგრაფიულ სივრცეს.

თქმულების მთავარი პერსონაჟი არის ყაბარდოში მცხოვრები თავადის უმცროსი ვაჟი ხეთაგი. უფროსმა ძმებმა გაქრისტიანებული ხეთაგის მოკვლა გადაწყვიტეს. ვასთირჯი, მგზავრთა და მეომართა მფარველი წმინდანი, ღვთაებრივი ძალით იცავს განსაცდელში ჩავარდნილ, დევნილ ხეთაგს. ის ადგილი, სადაც ზებუნებრივი სასწაულით გადარჩა ჭაბუკი, იძენს საკრალურ სტატუსს და ხდება ხეთაგი ძუარის საბრძანისი.

ტექსტი: ყაბარდოში უცხოვრია მოხუც თავადს – ინალს. მას სამი ვაჟი ჰყოლია: ბიასლანი, ტასოლთანი და ხეთაგი. როცა უფროს ძმებს შეუტყვიათ ხეთაგის გაქრისტიანება, მისი მოკვლა განუზრახავთ. ხეთაგი მშობლიური სოფლიდან გაქცეულა. ძმები დადევნებიან. ოსეთში, სოფელ სუადაგის მახლობლად, ისინი დასწევიან. ხეთაგს გარდაუვალი სიკვდილი ემუქ-რებოდა უფროსი ძმებისგან და საშველად მას დახმარება ვასთირჯისთვის უთხოვია. განსაცდელის უამს ხეთაგს ციდან ხმა ჩამოესმა: „ხეთაგ, ტყისკენ!“ რადგან ტყემდე ჯერ კიდევ დიდი მანძილი იყო დარჩენილი და ჭაბუკი მტრებს ტყეში ველარ შეასწრებდა, სირბილისაგან არაქათგამოცლილს უთქვამს: „ხეთაგი ტყეში ვერ შეასწრებს, დაე, ტყემ მოუსწროს ხეთაგს!“ მართლაც, მყისვე ხშირი ტყე ზეანეულა, ალაგირის ხეობის ფერდობიდან გადმოსულა მდინარე არდონის მეორე ნაპირზე, ხეთაგის გარშემო დაშვებულა და ჭაბუკისთვის საფარველი დაუდვია. მომხდარი სასწაულით თავზარდაცემულ უფროს ძმებს სასწრაფოდ დაუტოვებიათ ის ადგილი. ხეთაგს იმ ტყეში ერთი წელი გაუტარებია, შედეგ კი გადასულა სოფელ ნარში და იქ თურმე ხეთაგურების გვარს დაუდო სათავე. იმ ფერდობზე, საიდანაც ტყე გადმოსულა, ახლა მხოლოდ ბალახიდა იზრდება. ასე გაჩენილა ხეთაგის ტყე ან, როგორც ქალები ამბობენ, მრგვალი ტყის სალოცავი (Тым-

ნილქაბდე ძვარ). ქალები დღემდე არ ახსენებენ წმინდანის სახელს და მხოლოდ მსაზღვრელი სახელით ან ფუნქციის მიხედვით მოიხსენიებენ: „მამაკაცების მფარველი“. ასევე „მრგვალი ტყის წმინდანში“ ოსი ქალები ხეთაგის ვასთირჯის გულისხმობენ. ოსებში დღემდე ერთ-ერთი ყველაზე გავრცელებული დალოცვა ასეთია: – „როგორც დიდმა ღმერთმა ხეთაგი გადაარჩინა, ისე თქვენც გიშველოთ!“ (პოპოვი 1995: 70).

ტექსტი მოგვითხრობს, თუ როგორ იხსნა მფარველმა წმინდანმა განსაცდელისგან ხეთაგი, რომელსაც სასწაული მოუვლინა და უჩვენა მფარველი წმინდანის ღვთაებრივი ძლევამოსილება. ხეთაგის ამბავი რამდენიმე მოტივს შეიცავს. თქმულება ტიპოლოგიური სიუჟეტებით გადმოგვცემს ზებუნებრივ სასწაულს, საფარველის დადებას, გვარის წარმოშობას, სალოცავის დაარსებასა და კულტის აღმოცენებას.

ღმერთის სამი ცრემლი. თარანჯელოზის, მიქალგაბირთა-სა და რექომის სალოცავების დაარსებისა და მათი ზეციური წარმომავლობის შესახებ მოგვითხრობს ნართული თქმულება. ტექსტის მიხედვით, ბათრაძის დაღუპვის შემდეგ ღმერთმა ძუარებსა და ანგელოზებს ნართი ჭაბუკის სოფიოს აკლდამაში დაკრძალვა უბრძანა. ძუარებმა და ანგელოზებმა ბათრაძის ცხედარი ვერ ასწიეს, ვერც თორმეტმა უღელმა ხარმა დაძრა გარდაცვლილი. მაშინ ღმერთმა ურჩია, რომ თუთირის დღესასწაულზე დაბადებული ორი მოზვერი შეებათ უღელში ცხედრის წასალებად. შეაბეს ძუარებმა თუთირის დღესასწაულზე დაბადებული ორი მოზვერი და ბათრაძი სოფიოს აკლდამამდე აიტანეს, მაგრამ ახლა შიგ შეტანა გაუჭირდათ.

„ანგელოზებმა ისევ ღმერთს მიმართეს, აუხსნეს საქმის ვითარება.

- იგი ჩემგან საჩუქარს ითხოვსო, – თქვა ღმერთმა და ცი-დან სამი ცრემლი ჩამოაგდო.

ეს იყო და ანგელოზებმა თავისუფლად შეიტანეს სოფიოს აკლდამაში ბათრაძის ცხედარი და დამარხეს.

იქ, სადაც ღმერთის სამი ცრემლი დაეცა, სამი სალოცავი აღიმართა: თარანჯელოზი, მიქალგაბირთა და რექომი“ (ნართე-ბი 1988: 272).

საერთო მოტივები და სიმბოლოები. როგორც ირკვევა, ძუარების კულტის წარმოშობასა და კულტმსახურების წესების ჩამოყალიბებაში მნიშვნელოვანი როლი ითამაშა ქართულმა გარემომ. თუმცა ეს პროცესი არ ყოფილა ცალმხრივი. ოსური ყოფიდან შემოვიდა ქართველ მთიელთა ტრადიციაში არაერთი მნიშვნელოვანი ელემენტი. ეს ორი ხალხი მაღალი სულიერი ფასეულობებით ამდიდრებდა ერთმანეთის ტრადიციებს. აღსანიშნავია, რომ ფშავ-ხევსურეთის საყმოების მფარველი წმინდანის სახელი – იახსარი ოსური სიტყვიდან მომდინარეობს და აღნიშნავს გულადს, მამაცს.

ოსური გადმოცემები ძუარებზე და აღმოსავლეთ საქართველოს მთიანეთის ჯვარ-ხატთა ანდრეზები ქმნიან საერთო ჰერმენევტულ წრეს. ტექსტებში ძუარები და ჯვარ-ხატები წარმოდგენილია ერთი და იმავე საკრალური სიმბოლოებით, ესენია: ცეცხლის ღრუბელი, წმინდა ფრინველი, ნათლის სვეტი, ზეციური ჯაჭვი, მინაში ჩამარხული წმინდა თასი, სამსხვერპლო ქორახარი.

აღსანიშნავია, რომ აღმოსავლეთ საქართველოს მთიანეთის ანდრეზების მსგავსად, ალაგირის ხეობაში სამ ადგილას სალოცავის დაარსება ძუარის მტრედის სახით მოფრენას უკავშირდება.

ოსურ თქმულებებს, რომლებიც საკრალურის დაარსებას გადმოგვცემენ, ყველაზე მეტი სიახლოვე აქვთ აღმოსავლეთ საქართველოს მთიანეთის მითორელიგიური შინაარსის ტექ-

სტებთან – ანდრეზებთან. ეს სიახლოვე მხოლოდ საკრალური ნიშნებისა და სიმბოლოების გარეგნული მსგავსებით არ შემოიფარგლება. სახეზეა ცალკეული მოტივებისა და სიუჟეტების კიდევ უფრო სიღრმისეული თანხვედრა. ისევე როგორც ჯვარი, ძუარიც არსდება იქ, სადაც ციდან წმინდა საგნები ცვივა ან წმინდა ფრინველი დაფრინდება; ის ციდან სვეტად ჩამოდის, მოძრაობს ცეცხლის ღრუბლის სახით; მოგზაურობს მეზობელ თემებსა და ხეობებში. ერთგულ მსახურად და თავის ძუარლაგად „დაიჭერს“ ამორჩეული გვარის წევრს; სჯის მოყმეს, რომელმაც უმნიშვნელო დახმარებისთვის შეაწუხა ძუარი; ძუარი არის ტყვის მხსნელი; ძუარის რჩეული პოულობს წმინდა საგანძურს; ძუარლაგი ხედავს სიზმარში მფარველ წმინდანს, ესაუბრება ძუარს და მისი დავალებით მოქმედებს.

ოსური ძუარებისა და ქართველი მთიელების ჯვარ-ხატთა დაარსების ანდრეზები ერთი საერთო წყაროდან იღებენ სათავეს.

ლიტერატურა:

აბაევ 1960: Абаев В. И., Дохристианская религия алан, XXV международный конгрес востоковедов, Доклады делегации СССР. Издательство восточной литературы. Москва, 1960.

აგნაევი 1999: Агнаев Г., Осетинские обычаи, «курсдон», Владикавказ, 1999.

ანდრეზები 2009: ზ. კიკნაძე, ანდრეზები (აღმოსავლეთ საქართველოს მთიანეთის რელიგიურ-მითოლოგიური გადმოცემები), ილია ჭავჭავაძის სახელმწიფო უნივერსიტეტის გამომცემლობა, თბ., 2009.

ბარდაველიძე 1974: ვ. ბარდაველიძე, აღმოსავლეთ საქართველოს მთიანეთის ტრადიციული საზოგადოებრივ-საკულტო ძეგლები, ტ. 1, „მეცნიერება“, 1974.

ირიყაუ ხუცაუ ძუარ: Раздел: Святые места Осетии, Святилище Ирыхъяуы Хуыщауы дзуар, <http://www.osetins.com>

კიკნაძე 1996: ზ. კიკნაძე, ქართული მითოლოგია, I, ჯვარი და საყმო, ქთ., 1996.

კოკიევი 1930: Кокиев Г. А., Святилища Даргавского ущелья, журнал „Схидный свет“, Харьков, 1930. №12. www.nocss.ru

მამისიმედიშვილი 2012: ხ. მამისიმედიშვილი, რეცენზია ლ. ჩიბიროვის წიგნზე „ოსი ხალხის ტრადიციული სულიერი კულტურა, ჰუმანიტარულ კვლევათა უურნალი „კადმოსი“, 4, ილიას სახელმწიფო უნივერსიტეტის გამომცემლობა, თბ., 2012.

მილერი 1882: Миллер Вс., Осетинские этюды, II, М., 1882.

ოჩიაური 1967: თ. ოჩიაური, მითოლოგიური გადმოცემები აღმოსავლეთ საქართველოს მთიანეთში, „მეცნიერება“, თბ., 1967.

პოპოვი 1995: Попов К. П., Священная роща Хетага / Сев.-Осет. респ. о-во «Памятники Отечества»; Мин-во охраны окружающей среды и природ. ресурсов РСО-Алания. Владикавказ: Ир, 1995.

რეგახი ძუარი: Раздел: Святые места Осетии, Святилище Хуыщауы дзуар в Регахе, <http://www.osetins.com>

ტუაევა: Туаева А., Тайны древней земли Иристон, <http://www.iris-ton.com>

ჩიბიროვი 2008: Чибиров Л. А., Традиционная духовная культура осетин, РОССПЭН, Москва, 2008.

Цагараево: Цагараев В., Осетинские дзуарлаги. <http://www.anaharsis.ru>

дзарысын дзуар: Раздел: Святые места Осетии, Святилище Дзывгъисы дзуар, <http://www.osetins.com>



Նախալուստ Տողթոս



ოსურ პოეტურ ფოლკლორში მნიშვნელოვანი ადგილი უკავია საკულტო-სარწმუნოებრივი შინაარსის ლექს-სიმღერებს მთარველ წმინდანებზე – ძუარებზე, რომლებსაც, კლასიფიკაციის მიხედვით, ძირითადად საწესჩვეულებო პოეზიის უანრს აკუთვნებდნენ. ფართო გაგებით ფოლკლორული შემოქმედება დაკავშირებულია საზოგადოების ყოფასა და წეს-ჩვეულებებთან. საწესჩვეულებო ფოლკლორში მნიშვნელოვანი ადგილი უკავია კალენდარულ და საოჯახო-საწესო პოეზიას.

ლექს-სიმღერებს, რომლებიც ხალხური კალენდრის მიხედვით, წლის ერთ კონკრეტულ დღეს, კონკრეტულ დღესასწაულზე სრულდებოდა, კალენდარულ პოეზიას უწოდებენ.

ოსური საკულტო პოეზიის განხილვამდე, ჯერ მოკლედ გავეცნოთ ოსურ ხალხურ დღესასწაულებს, სადაც ხშირად სრულდებოდა ძუარებთან დაკავშირებული ლექს-სიმღერები.

ოსური საკულტო დღესასწაულები

ოსური ხალხური დღეობები წმინდანთა ხსენების ქრისტიანულ კალენდარს ემყარება, რომელიც იქ შუა საუკუნეებში ქართული კულტურის გავლენით დამკვიდრდა. საბჭოთა მეცნიერები ხალხურ დღეობებს არ აკავშირებდნენ ქრისტიანობასთან და მას, უბრალოდ, კალენდარულ დღესასწაულებს უწოდებდნენ, რომელსაც სამ ნაწილად – ზამთრის, საგაზაფხულო და საზაფხულო-საშემოდგომო დღესასწაულებად ჰყოფდნენ.

ჯერ კიდევ ა. ზისერმანი მიუთითებდა, რომ „ოსებს ჰქონდათ განუსაზღვრელად მრავალი დღეობა“ (ზისერმანი 1878:

86). მათგან ნაწილი მიეკუთვნებოდა საოჯახო დღესასწაულებს, ზოგიც – საერთო სათემოს.

ყოველ ოსურ ხალხურ დღეობას ჰქონდა თავისი სცენარი, დანიშნულება, ფუნქცია და კონკრეტული მიზანი. თუმცა ადვილი შესამჩნევია ოსურ მითორელიგიურ პრაქტიკაში მათი საერთო ნიშნები. თითქმის ყველა დღესასწაულს, თუ რიტუალი სალოცავში ტარდებოდა, ძუარლაგი უძღვებოდა. ის აღავლენდა ძუართა სადიდებელს. ყველა დღესასწაულისთვის საგანგებოდ მზადდებოდა ლუდი და სრულდებოდა მსხვერპლშეწირვა.

ოსური ტრადიციით, ზამთრის დღესასწაულები იწყება ციკურსობით, რომელიც ახალი წლის დადგომამდე ერთი კვირით ადრე იმართება და უკავშირდება შობას. ციკურსობის დღეს ოსები დილიდანვე ბავშვებითა და ოჯახის წევრებით მიღიოდნენ სალოცავში. მზის ჩასვლის შემდეგ კი თითოეული ოჯახი თავის სახლთან დიდ კოცონს ანთებდა. ბავშვები კოცონზე ხტებოდნენ, მღეროდნენ, მხიარულობდნენ. უფროსები ლოცულობდნენ: „ – რაც მწეხარება და უბედურებაა, სულ ამ ცეცხლში დაიწვას და დაიდაგოსო“. ზოგიერთი გადმოცემით, ციკურსობის დღესასწაულზე ცეცხლს ანთებდნენ ყრმა იესოს გასათბობად, რომელიც სიცივეში მოევლინა ქვეყნიერებას. აღსანიშნავია, რომ დეკემბერს ოსები უწოდებენ ციკურსის თვეს (ყაპურს მაში) შობის თვეს. შობის ორმოცდლიან მარხვას უკავშირდება დღესასწაულის სახელწოდება ციკურსი, რომელიც მომდინარეობს ძველი ირანული სიტყვიდან და აქვს ორმოცის სემანტიკა (აბაევი 1958: 323).

ციკურსობის შემდეგ ოსები აღნიშნავდნენ დუაი ასთაუს. მას დუაი ასთაუ, ანუ ორს შუა იმიტომ ერქვა, რომ ის ორ დღესასწაულს – ციკურსობასა და ნოვ ბონს (ახალ წელს) შორის ტარდებოდა. დუაი ასთაუს ჰქვია, აგრეთვე, ხამაგრძელებელი ხსახ – ეშმაკების ლამე. იმავე დღეს სვანები აღნიშნავენ დღესასწაულს, რომელსაც ჰქვია დორუნეულგა, სიტყვასიტყვით ორთა შუა.

ზამთრის ციკლის განსაკუთრებული დღესასწაული იყო ნოგ ბონი (ახალი წელი). მთის სოფლებში ნოგ ბონის დღესასწაულზე იმართებოდა კარნავალური სანახაობანი ნიღბების გამოყენებით, კარდაკარ სიარული. დიგორის ხეობაში მცხოვრები ოსები კი ამ დღისთვის საგანგებოდ აცხობდნენ ბასილებს, ცხოველებისა და ადამიანების გამოსახულებით.

ნოგბონის მეექვსე დღეს ოსები აღნიშნავდნენ დონსყაფანს (Донъескъафах, წყალკურთხევა). დილით ადრე ოჯახის პატარძალი და მოზრდილი გოგონები რიტუალური ნამცხვრებით მიღიოდნენ წყაროზე, ლოცულობდნენ და წყლის ასულებს – დონ ჩიზჯითას – ევედრებოდნენ ბედნიერ მომავალს. წყალში ყრიდნენ რიტუალურ ნამცხვრებს შინაური საქონლის გამოსახულებით, რათა მოემადლიერებინათ წყლის ასულები. ოსების რწმენით, დონსყაფანის დღეს, ვინც წყაროზე პირველი აავსებდა ჭურჭელს და შინ მიიტანდა, ის იმ წელიწადს ყველაზე ბედნიერი იქნებოდა (ჩიბიროვი 2008: 390).

ზამთრის ციკლის დღესასწაულები მთავრდებოდა ქომახსანით (პირის შეკვრა, კომ – პირი, ახახე – შეკვრა, მარხვის დაწყება), რომელიც დიდმარხვის წინ მთელი ორი კვირა გრძელდებოდა. პირველ კვირას ერქვა ხორციელი და მეორე კვირას ურს კვირი (თეთრი კვირა), იგივე ყველიერი, აღება. კვირის თითოეულ დღეს ოსები სხვადასხვა წმინდანს ადიდებდნენ და მიცვალებულებს იხსენებდნენ. ქომახსანის ბოლო კვირა საღამოს ოჯახის წევრები საოჯახო ინვენტარს რეცხავდნენ, სახლს ალაგებდნენ, ბანაობდნენ და განმენდილი ხვდებოდნენ მარხოს (მარხი, მარხვა).

მარხოს პირველი სამი დღე ემთხვეოდა თუთირის დღესასწაულს. ოსების რწმენით, თუთირი (წმინდა თევდორე ტირონი) მგლებს მფარველობდა და მისი ნებართვის გარეშე მგლებს არ შეეძლოთ შინაური პირუტყვისთვის ზიანის მიყენება. ამიტომ

მარხოს პირველ სამ დღეს განსაკუთრებით მკაცრად უქმობდნენ და მას ერქვა თუთირ ქომდარან (Тутыры комдараң). ტყეში, მთაში ან მინდორში დამით გარეთ დარჩენილი პირუტყვი მგელს რომ არ შეეჭამა, ოსები თუთირის დღესასწაულზე აკეთებდნენ მგლის პირის შესაკრავს. ბანრით შეკრულ სავარცხელს, მაკრატელსა და ცულს ბოძზე აბამდნენ და სწამდათ, რომ მგელი მათ პირუტყვს ზიანს ველარ მიაყენებდა.

საგაზაფხულო დღესასწაულებს მიეკუთვნება პურეულის დღე – ხორ-ხორ (хор-хор), პირველი ხნულის გავლება, რომელსაც ყოველთვის დიდმარხვის მეორე კვირის სამშაბათს აღნიშნავდნენ და ვაცილას ადიდებდნენ. მას ერქვა ასევე ხორ ბონ – პურეულის დღე. ხორხორობისთვის ოსები განსაკუთრებით ემზადებოდნენ და მას ყველა ოჯახი აღნიშნავდა. დღესასწაულს მართავდნენ საერთო სასოფლო მოედანზე, რომელიც ითვლებოდა ყაუზადის (хъаузад), სოფლის მფარველი ანგელოზის, მოვლინების ადგილად. იქ მიჰქონდათ ხაბიზგინები და სადღესასწაულო კერძები, აგრეთვე, არაყი და ლუდი. დღესასწაული იწყებოდა წინამძღოლის, იგივე გუთნისდედის არჩევით, რომელიც უეჭველად წარმატებული, წმინდა და „კარგი ფეხის“ კაცი უნდა ყოფილიყო. იმ წლინადს ის გაუძღვებოდა მიწის სამუშაოებს. შემდეგ მამაკაცები უღელში აბამდნენ ხარებს და ისინი მიჰყავდათ უახლოესი მამულისკენ. იქ გამრიგე, არჩეული გუთნის დედა, გაავლებდა სამ რიტუალურ კვალს, ნახნავში თესლს ჩაყრიდა და მას ფეხით შედგებოდა. რიტუალის დასრულების შემდეგ, ყველანი სოფელში ბრუნდებოდნენ და იმართებოდა საერთო ტრაპეზი – ქუვდ. ნადიმის დაწყების წინ სოფლის უხუცესი წარმოთქვამდა საკულტო ტექსტს, ის ჯერ ადიდებდა საერთოსურ და სოფლის მფარველ წმინდანებს, ხოლო შემდეგ ვაცილას ევედრებოდა უხვ მოსავალს. ლოცვის დამთავრებისთანავე იმართებოდა ნადიმი თეატრალიზებული წარმოდგენების თანხლებით. ახალგაზრდები ცეკვავდნენ და მღეროდნენ სიმღე-

რებს. კარნავალური დღესასწაულის მთავარი პერსონაჟი იყო გუთნისდედა – მინდვრის სამუშაოების არჩეული წინამძღვრი.

დიდმარხვის მესამე და მეოთხე კვირის შაბათს ოსები მიცვალებულთა სულებს ახსენებდნენ და მათი „სტუმრობის“ დღეს – ლაუზგანანს (лаузგანან) – აღნიშნავდნენ. ლაუზგანანს შეესატყვისება სვანების დღესასწაული ლიფანალი, რომელიც იმავე დღეს იმართებოდა. ლიფანალის რიტუალს ჰქონდა ისეთივე კომპოზიცია და ფუნქცია, როგორიც ლაუზგანანს. ოსებიც და სვანებიც იმ დღით მიცვალებულთა სულებს მასპინძლობდნენ.

დიდმარხვის მეოთხე კვირის ოთხშაბათ დღეს კი ოსები უნიდებდნენ ასთაუმარხოს (astaeumarcho), ანუ შუა მარხვას (astae – შუა, marxo – მარხვა). ხევსურეთში იმავე დღეს მსგავსი რიტუალი ტარდებოდა და მას ერქვა მარხოშუობა. ასთაუმარხოს (მარხოშუობას) ოსები, ისევე როგორც მათი მეზობელი ქართველი მთიელები, განსაკუთრებით უქმობდნენ.

შენიშვნა: სვანებიც განსაკუთრებულად აღნიშნავდნენ შუამარხვას და მას ლიმკვი/ისგლილჩალს უნიდებდნენ. დიასახლისი საგანგებოდ ამ დღისთვის რიტუალურ პურებს აცხობდა, რომლებსაც ოჯახის წევრები ვახშამზე სრული დუმილის დაცვით შეეცეოდნენ.

ვისაც ახალი მიცვალებული ჰყავდა, აღდგომიდან ერთი კვირით ადრე, შაბათ დღეს საკურთხს ამზადებდა. ამას მოსდევდა ვნების კვირა და ქუაძანი (куадзан, პირის გახსნა), იგივე აღდგომა, რომელსაც ოსები ყველგან დიდი ზარ-ზეიმით აღნიშნავდნენ. მომდევნო კვირას ისინი მართავდნენ ასევე დიდ დღესასწაულს ბალდარანს (ნალდარან).

საგაზაფხულო დღესასწაულებს მიეკუთვნება ქასუთა (касутა) – ქაშუეთობა, რომელსაც აღნიშნავდნენ თაგაურის, ქურთათის და თრუსოს ხეობაში მცხოვრები ოსები. ქურთათის ხეო-

Бағыттың оның қарашасынан күштегі жағдайда оның тұрмысынан да әзілдіктерге көмек аударылады. 1990-жылдан бері Қазақстандағы әдебиеттің мемлекеттік мәдениеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады. 1990-жылдан бері Қазақстандағы әдебиеттің мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады.

Алғандағы мәдениеттің мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады. 1990-жылдан бері Қазақстандағы әдебиеттің мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады. 1990-жылдан бері Қазақстандағы әдебиеттің мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады. 1990-жылдан бері Қазақстандағы әдебиеттің мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады.

Халықаралық мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады. 1990-жылдан бері Қазақстандағы әдебиеттің мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады. 1990-жылдан бері Қазақстандағы әдебиеттің мемлекеттік миссияның үлгілерінде қарашасынан күштегі жағдайда оның тұрмысынан да әзілдіктерге көмек аударылады.

ლი ათენგენობა და ოსთა ათინაგი თითქმის ერთსა და იმავე დროს იმართება. სიტყვა ათინაგი (ათინაგი ← ათინოგენი) მომდინარეობს IV საუკუნის ქრისტიანი წმინდა მონაშის სახელიდან და მისი ხსენების დღე, რომელიც თანამედროვე ქრისტიანული კალენდრით 19 ივლისს იმართება, ამთავრებს სააღდგომო ციკლის დღესასწაულებს.

ზაფხულის დღესასწაულებს შორის მნიშვნელოვანი იყო 28 აგვისტოს ღვთისმშობლის მიძინების დღის აღნიშვნა, რომელსაც ოსები მაირამ ქუაძანს (Майрәмъ куадзән) უწოდებენ.

საშემოდგომო დღესასწაულებს მიეკუთვნებოდა იჩინა (иҷына), რომელიც ტარდებოდა დიგორის ხეობაში ცხვრის საშემოდგომო პარსვის დროს. მკვლევართა აზრით, დღესასწაულის სახელწოდება მომდინარეობს ქართული სიტყვიდან ენკენია → იჩინა.

საშემოდგომო დღესასწაულებს მიეკუთვნებოდა ხორ სართ ქუვდი (хоры сәрты куывд), სიტყვასიტყვით, პირველად მონეული მოსავლის ტრაპეზი, რომლითაც მთავრდებოდა წლის სამინათმოქმედო სამუშაოები. პირველად მოსავალს იღებდნენ ძუარის მამულებში, რომელსაც ერქვა იუმაიავ ძუარ ხუმთა (иумәйәг дзуары хуымтә). იქ მონეულ მოსავალს ოსები იყენებდნენ ძუარებში ლუდის სადუღებლად, არყის გამოსახდელად და ქადების გამოსაცხობად. თითოეულ ძუარს თავისი სახნავ-სათესი მიწა ჰქონდა. ზოგიერთ მთიან რაიონში, სადაც ძუარების-თვის არ იყო გამოყოფილი სახნავ-სათესი მიწები, მის მაგივრობას წევდა საერთო სათიბი. სათიბს განსაზღვრულ ფასად აძლევდნენ ერთ-ერთ სოფლელს, რომელსაც სანაცვლოდ უნდა გაემართა ტრაპეზი ხორ სართ ქუვდის დღესასწაულზე (ჩიბიროვი 2008: 477-478). სალოცავთა (ძუარის, ჯვარის) მამულების დამუშავების ტრადიცია, ხევსურეთისგან განსხვავებით, ოსეთის მთიანეთში ბოლო დრომდე ვერ შემორჩა. ხორ სართ ქუვ-

დის საერთო ტრაპეზის დამთავრებისთანავე ოსები გადიოდნენ სამკალში და ისევე როგორც პირველი ხნულის გავლების დროს, ახლაც, პირველი ყანაში შედიოდა ყველაზე წარმატებული მამაკაცი, რათა უხვი მოსავალი მიეღოთ. მას კვალში სხვები მიჰყვებოდნენ. სამინათმოქმედო სამუშაოები ოსებში იწყებოდა ხორხორის დღესასწაულით და მთავრდებოდა ხორ სართ ქუვდით. ხშირად ორივეს ერთი და იმავე სახელწოდებით აღნიშნავდნენ და ორივეს ერქვა ხორ ბონ – პურეულის დღე.

წლის მანძილზე გამართული აგრარული დღესასწაულების სერიიდან ოსურ ტრადიციაში უკანასკნელად შეიძლება ჩაითვალოს ზეუმონ ՚ხსავი (ვაკეუმის „ხსევი“, რომელიც ქართულ ენაზე სიტყვასიტყვით არის „ჩალის წუხრა“. ზეუმონ ხსავი იმართებოდა კალოობის დამთავრების შემდეგ და სიმბოლურად გამოხატავდა მინდვრის სამუშაოების დასრულებას, ესე იგი, არა მარტო პურეულის დაბინავებას, არამედ ნამჯის აღებასაც. მას აღნიშნავდნენ შაბათ საღამოს ოჯახურ წრეში, სადაც ოჯახის უფროსი უხვი მოსავლისა და ბარაქის გამოთხოვის მიზნით აღავლენდა ძუართა სადიდებელს.

თავისი მნიშვნელობითა და განსაკუთრებული მასშტაბით ოსების კალენდარული დღესასწაულების წლიურ ციკლში გამოირჩევა ვასთირჯისადმი მიძღვნილი დღეობა, რომელიც ცნობილია ჯეორგუბას (ჯეორგიანა, გიორგობა) სახელწოდებით. ჯეორგუბას ოსები აღნიშნავდნენ მაირამ ქუაძანის დღესასწაულიდან 12 კვირის შემდეგ და ის ყოველთვის ნოემბერში ტარდებოდა. დღესასწაული ზოგჯერ ერთი-ორი კვირა გრძელდებოდა. ზოგიერთი მკვლევარის აზრით, ოსები ძველად ჯეორგუბას გაზაფხულზეც, კერძოდ, 23 აპრილსაც აღნიშნავდნენ. ჩრდილოეთ ოსეთის ოთხივე ხეობის თითქმის ყველა სოფელს ჰქონდა ვასთირჯის სალოცავი, წმინდანის მიწიერი საბრძანისი. მათ შორის ყველაზე პოპულარული იყო ალაგირის ხეობაში ნიხასის ვასთირჯი, აგრეთვე, ქურთათის ხეობაში ძივლისის ძუარი –

ძივლისის ვასთირჯის მიწიერ საბრძანისს წარმოადგენდა როგორც ბაზილიკური და გუმბათიანი ტრადიციული ქრისტიანული ტაძრები, ისე ქვის მშრალი წყობით აღმართული ნაგებობები, რომლებიც, გარეგნულად, შეიძლება ითქვას, იყო აღმოსავლეთ საქართველოს მთიანეთის ჯვარ-ხატების იდენტური. ვასთირჯის სახელობის სალოცავ ნიშებად გვხვდება, აგრეთვე, ქვა, ერთი ხე ან ნმინდა ტყე.

ჯეორგუბასთან დაკავშირებულ დღესასწაულზე ყველაზე მნიშვნელოვანი იყო პირველი კვირის სამშაბათი, რომელსაც ერქვა ვასთირჯი ხსავ – უასტყარი „ხსავ (ვასთირჯის ღამე), როდესაც მფარველ წმინდანს ყველა ოჯახი საღვთო ძღვნითა და ღამისთვით სტუმრობდა. ზოგიერთი ცნობით, ძივლისის ძუარში ჯეორგუბას დღესასწაულზე გამართულ თამაშებში ხშირად 300-400 ახალგაზრდა მონაწილეობდა, ხოლო ჯირითში – 200-300 მხედარი. ნოემბერში ოსებს უკვე აღებული და დაბინავებული ჰქონდათ მოსავალი, ასევე დამთავრებული იყო მიწათმოქმედებასთან დაკავშირებული საქმიანობა, რაც ხელს უწყობდა დღესასწაულის მასშტაბური, გრანდიოზული სახით წარმოდგენას. აღსანიშნავია, რომ ოსებში ჩამოყალიბდა მტკიცე ტრადიცია, რომ ყველა ახალდაქორწინებულ წყვილს ჯეორგუბას დღესასწაულამდე ორი კვირის მანძილზე უნდა ჰქონოდა ქორწილი. ასე რომ, ხალხური დღესასწაულების წლიური ციკლი ოსებში ჯეორგუბით მთავრდებოდა.

სიმღერები ძუარებზე

მფარველი წმინდანის მიმართ აღვლენილი სიმღერები ძირითადად რელიგიურ რიტუალზე სალოცავში გუნდურად სრულდება. თუმცა იმდენად პოპულარულია ამ ტიპის სიმღერები, რომ ოსები ძუარებს უმდეროდნენ ყველგან: მთის მწვერვა-

ლებზე აღმართულ სალოცავებში და საერთო სადღესასწაულო ტრაპეზზეც.

ოსური ხალხური მუსიკა ეყრდნობოდა ზეპირ ხალხურ ტრადიციებს. მისი, როგორც ხელოვნების დარგის ჩამოყალიბებაში გასათვალისწინებელია ქრისტიანული ღვთისმსახურების გავლენა და კავკასიური სუბსტრატი.

მამაკაცთა მიერ შესრულებული ოსური ხალხური გუნდური სიმღერები მრავალხმიანია, რითაც ის განირჩევა ქალთა სასიმღერო რეპერტუარისგან. ტექსტის პოეტურ ორგანიზებასა და კომპოზიციაში მნიშვნელოვან როლს ასრულებს რეფრენი, რიტორიკული შეძახილი და მიმართვა. ძუარებზე შექმნილი ხალხური ნაწარმოებები საყურადღებოა არა მხოლოდ ფილოლოგიური, არამედ მუსიკალური ფოლკლორისატიკის თვალსაზრისითაც. მკვლევართა შეხედულებით, ამ ტიპის სიმღერებში მუსიკალურ ინვარიანტსა და პოეტურ ვარიანტებს შორის სიღრმისეული კავშირი დასტურდება.

ოსურ საკულტო-მითოლოგიურ პოეზიაში შეიძლება გამოყოფილი სიუჟეტიანი ლექსები, ე. წ. ეპიკური ფორმის ნაწარმოებები და ლოცვითი ლექსები, ე. წ. მცირე ლირიკული ფორმის ტექსტები.

ლოცვით ლირიკულ ლექსებს აქვთ მარტივი სტრუქტურა. ის უფრო თავისუფალია მხატვრული ელემენტებისგან და მოწოდებულია რელიგიური გრძნობის გადმოსაცემად.

საკულტო-მითოლოგიური სიმღერების პერსონაჟები, როგორც წესი, არიან მფარველი წმინდანები. ყველაზე მეტი პოპულარობით სარგებლობს ის ლექს-სიმღერები, რომელთა პერსონაჟიც არის ვასთირჯი (წმინდა გიორგი), ვაცილა (წმინდა ილია) და ღვთისმშობელი მარიამი (მად მაირამ). სასიმღერო ტექსტებში განდიდებულია, აგრეთვე, სხვა ზეციური არსებები: ნადირობის მფარველი აფსათი, ბასილები, ალარდი.

შენიშვნა: საკულტო ლექს-სიმღერებში არ განვიხილავ რელი-გიურ დღესასწაულებზე კულტმსახურთა მიერ აღ-ვლენილ ძუართა სადიდებლებს.

ოსურ საკულტო ლექს-სიმღერებში გამოყენებულია ამ უან-რისთვის დამახასიათებელი მიმართვის ფორმა. მფარველი წმინდანისადმი მიმართვას მნიშვნელოვანი მხატვრული და ემო-ციური დატვირთვა ენიჭება. შემსრულებელი თითქოს ცდი-ლობს ძუარის ყურადღების მიპყრობას. ის იწვევს ლოცვის გან-ცდას, მიმართვაში გამოხატულია მფარველი წმინდანის სიდია-დე, მისდამი მოწინება და პატივისცემა. მთქმელი არ მიმართავს მას, როგორც თანასწორს, გამოხატავს განსაკუთრებულ თავ-მდაბლობას. მიმართვაში სჭვივის რწმენა, რომ მფარველი წმინ-დანი მიანიჭებთ წყალობას.

საკულტო სიმღერებში ძირითადი ნაწილი ეთმობა ხვეწნა--ვედრებას, მთქმელი-მომღერალი ძუარს შესთხოვს წყალობას, ოჯახისა და შინაური ცხოველის გამრავლებას, სწეულის გან-კურნებას, მტერზე გამარჯვებას, უხვ მოსავალს, ნადირობაში დახმარებას, მგზავრობაში მფარველობას.

საკულტო შინაარსის ტექსტებში მომღერლები ხოტბას ას-ხამენ მფარველ წმინდანებს, რომლებზეც, მათი აზრით, დამო-კიდებულია საზოგადოების კეთილდღეობა.

საკულტო სიმღერებში ძუარები შემკობილი არიან თავიან-თი ღვთაებრივი ძალის გამომხატველი ატრიბუტებით, ფუნქცი-ური მახასიათებლებით.

ვასთირჯის ეპითეტები საკულტო სიმღერებში

ოსურ ფოლკლორში მრავალ ვარიანტად არის ცნობილი სიმღერები მგზავრთა და მეომარ მამაკაცთა მფარველ ვასთირ-ჯიზე. ოსების თითქმის ყოველ აულს აქვს ვასთირჯისადმი

მიძღვნილი სიმღერის საკუთარი ვარიანტი. ოსური ენის დიგორულ დიალექტზე წმინდა გიორგის ჰქვია ვასკერგი (Уаскерги).

ვასთირჯის სადიდებელ სიმღერებს მხოლოდ მამაკაცები ასრულებდნენ, რადგან, ოს ხალხში დამკვიდრებული ტრადიციის მიხედვით, ქალებს მისი სახელის წარმოთქმა ეკრძალებოდათ და მას მოიხსენიებენ ფსევდონიმით ლაგთა ძუარ (მამაკაცების სალოცავი, ჯვარი).

ლექს-სიმღერებში ვასთირჯის, როგორც მფარველი წმინდანისა და ზეციური არსების, სიმბოლოდ წარმოდგენილია ოქრო, რომელსაც ხალხურ ტრადიციაში სიწმინდისა და ღვთაებრივი ბუნების გამომხატველ ლითონად მიიჩნევენ.

ოსურ სასიმღერო ლექსებში წმინდა გიორგის ჰქვია ოქროს ვასთირჯი (სიღზარინ ვასთირჯი – сыгъзәрин уастырджи), ოქროსფრთიანი (сыгъзәрийнә базургин). სოფელ სბაში სალოცავს უნიდებენ სიღზარინ ძუარს (ოქროს ჯვარი, სალოცავი). შეიძლება ითქვას, რომ ოქრო (სიღზარინ) ძუარების ზოგად ეპითეტ-საც წარმოადგენს. 6. ანთელავას ცნობით, ოსურ ხალხურ ტექსტებში სიღზარინ გვხვდება, აგრეთვე, ქრისტეს ეპითეტად: «Майрәмъ фырт сыгъзәрин Чырысти» – „მარიამის ვაჟი ოქროს ქრისტე“ (ანთელავა 2011: 123). ანალოგიურია ბავშვთა მფარველი წითელი ალარდის ეპითეტი მითოპოეტურ სასიმღერო ტექსტებში: „ჩვენი ოქროს წითელი ალარდი“ (нაე сыгъзәрин Сырх Аларди). ოქროს მითოლოგება უნივერსალურია და ის საკრალურ სიმბოლოდ ითვლება. ქართულ საკულტო ტექსტებშიც საკრალურის გამოხატვის ფუნქცია ენიჭება ოქროს თას-განძს. ანდრეზებში მოთხრობილია ოქროსშიბიან და ოქროს თასის გამომტანელ ღვთისშვილებზე. ფშაურ სადიდებელში თამარის ეპითეტი „ოქროსგვირგვინიანი“ სიწმინდისა და მეფობის საერთო სიმბოლოს წარმოადგენს. ზეციურ მეფობას გამოხატავს კვირიას ეპითეტი „ოქროსკარავიანი“ (მამისიმედიშვილი 2009: 62).

სასიმღერო ტექსტებში გვხვდება ძუართა როგორც ზოგადი ხასიათის ეპითეტები (რომლებიც მიესადაგება ყველა მფარველ წმინდანსა და გვიჩვენებს მათ საკრალურ ბუნებას), ასევე გამოყენებულია მფარველ წმინდანთა ინდივიდუალური ხასიათის მითოლოგემური სინტაგმები (რომლებიც ძუართა კონკრეტულ ფუნქციებს გადმოგვცემს).

ლექს-სიმღერებში ვასთირჯი შემკულია ქრისტიანულ ტრადიციაში დამკვიდრებული ეპითეტებით: „მაღალი“ (стыр), „მართალი“ (расти), „მწყალობელი“ (хорзехаи), „თვალცეცხლოვანი“ (пачхарцает), „ქველი“ (хъебатыр), „ძლიერი“ (тыхджын) და სხვ., რომლებიც მფარველ წმინდანთა ღვთაებრივი თვისებების ზოგად მახასიათებლად უნდა მივიჩნიოთ.

ოსურ საკულტო ტექსტებში ვასთირჯი თეთრნაბადმოსხმული მოხუცი მხედრის სახით არის წარმოდგენილი. ირონულ დიალექტზე შექმნილ ხალხურ სიმღერაში ვასთირჯის ეპითეტი არის თეთრნვერა (урсеноцко). ოსური ტრადიციისგან განსხვავებით, ქართულ იკონოგრაფიაში წმინდა გიორგის ძირითადად უწვერული ვაჟის სახით გამოხატავდნენ.

ოსების რწმენით, ვასთირჯი ითვლება მეომართა და მგზავრთა მფარველ წმინდანად. წმინდა გიორგის ეპითეტი – მგზავრთა მფარველი – გვხვდება აღმოსავლეთ საქართველოს მთიანეთის საკულტო ტექსტებში. ხახმატის ჯვრის ეპითეტი არის „გიორგი მგზავრის ანგელოზი“. როგორც ქართულ, ისე ოსურ ტრადიციაში წმინდა გიორგის, როგორც მგზავრთა მფარველ წმინდანს, საპატიო ადგილი უკავია. ოსები სამგზავროდ წასულ მოყმეს ყოველთვის ვასთირჯის ავედრებენ. შორეული მგზავრობიდან დაბრუნებული მამაკაციც წმინდანის მიმართ სამადლობელს აღავლენს. ამიტომ ვასთირჯი სასიმღერო ტექსტში წარმოდგენილია ეპითეტით – „მგზავრთა მფარველი“.

ვასთირჯის სიმღერა

ვაი-ვაი, შენზე ვლოცულობთ, ვასთირჯი, ჰეი!
ვაი, სოი, ოი, შენზე ვლოცულობთ,
ოი, დავლოცოთ ოქროს ვასთირჯი!
ოი, სოი, ოი, შენ გლოცავთ.
თეთრწვერა, წისქვილს მიმავალო, ოქროს ვასთირჯი!
ოი, კვლავაც გლოცავთ, ეი!
ვაი, ოი და კვლავაც დაგლოცავთ!
ოი, შენი ჭირი ჩვენ!
ოი, შენზე ვლოცულობთ, ვასთირჯი, ეი!
ვაი, ისევ შენ გემუდარებით, ეი!
ოი, სოი, ოი, ვილოცოთ,
– ამბობს მგზავრთა მფარველი ვასთირჯი,
ვაი, ოი, ჩვენო მაღალო, კვლავ გლოცავთ“.

(ოსური სიტყვიერება 2005: 25).

საკულტო სიმღერებში ძუარების ფუნქციები და საკრალური თვისებები გადმოცემულია მოკლე სიტყვიერი გამოთქმებით: მიმართებითი ხასიათის სინტაგმებითა და ფრაზეოლოგიზმებით. ზოგიერთი მათგანი ტექსტში მეტაფორულ მნიშვნელობას იძენს. ისინი შეიცავენ მითოლოგიური ხასიათის ცოდნას, დაფუძნებულს ოსი ხალხის ტრადიციებსა და რელიგიურ მსოფლმხედველობაზე, რომელიც ადგილობრივ ნიადაგზე გადამუშავდა და თაობიდან თაობას ზეპირად გადაეცემოდა.

მითოლოგიურ ლექს-სიმღერებში ძუართა ეპითეტებად წარმოდგენილი პოეტური სინტაგმები და სხვა სახის სიტყვიერი ფორმულები მფარველ წმინდანებს სხვადასხვა ნიშნით ახასიათებენ. სასიმღერო ტექსტებში ისინი გამოყენებულია ძუართა სადიდებლად. ძუართა საკრალურ ისტორიებსა და მათ ღვანლს სასიმღერო ტექსტის შემსრულებლები არასოდეს გადმოსცემდნენ ვრცელი ნარატივებით და მხოლოდ მითოლოგებური მოკლე პოეტური ფორმულებით კმაყოფილდებოდნენ, რადგან მათი

მნიშვნელობა ისედაც კარგად იყო ცნობილი მსმენელი საზოგა-დოებისთვის. ამიტომ სასიმღერო ლექსის მხოლოდ ერთი ტაეპი – „შენ გლოცავთ, თეთრწვერა, ნისქვილს მიმავალო, ოქროს ვასთირჯი“ (დაუმა კუს კუვამ, ურბიაწი, კუყიდვაუ, სიგვავერ უასთარჯი), საკმარისია აუდიტორიისთვის ვასთირჯის ერთ-ერთი საკრალური ისტორიის გასახსენებლად.

მად მაირამი საკულტო ლექს-სიმღერებში

ოსურ ხალხურ ტექსტებში ღვთისმშობელ მარიამს ჰქვია მად მაირამ (Мады Майрәм) – დედა მარიამი. ღვთისმშობლის აბსოლუტურ დედობას გამოხატავს ქართულ ფოლკლორში დამკვიდრებული სინტაგმა – დედა მარიამი და, როგორც ჩანს, ის ამ ფორმით დამკვიდრდა ოსურ ტრადიციაშიც. ოსები მად მაირამს ცის ბინადართა შორის ყველაზე კეთილ, სათნო და მოწყ-ალე წმინდანად მიიჩნევნ.

მად მაირამის სახე ოსურ ხალხურ ტექსტებში გამითიურებულია და წმინდანისადმი მიძღვნილი ლექს-სიმღერები გამო-ირჩევა საკრალური ელემენტების სიმდიდრით.

ხალხური სიმღერის ერთ-ერთი ვარიანტის მიხედვით, მად მაირამი, როგორც მფარველი წმინდანი, ადამიანებს უზენაეს ღმერთთან შუამავლობს. მინაზე ჩამოსასვლელად ის ციდან ოქ-როს კიბეს უშვებს. მას ადამიანებთან ღვთიური მადლი და წყალობა ჩამოაქვს. ოქრო, როგორც ღვთაებრივი ლითონი, კიბის საკრალურობაზე მიანიშნებს.

„ღვთისმშობელმა მარიამმა
ოქროს კიბე ჩამოუშვა,
ზეციდან ძირს ჩამობრძანდა“.

«Хуыщауы ныййарәг Мадымайрәм
Уәларвәй раяугаста сызгъәрин асин,
Аәрцыдис зәеххон адәммә».»

(өсүркін Сибұлғынан 2005: 26. 154)

Киңеге өңгөрілген қолданаударының әдәмдердің тәжірибелісінен өткізу үшін олардың мәдениеттің жаңыларын сипаттаудың тиесі болып табылады. Олардың тиесінен өткізу үшін олардың мәдениеттің жаңыларын сипаттаудың тиесі болып табылады.

Алсаңыздардың көзінен, өзінен анықталған мәдениеттің өзінен, өзінен өткізу үшін олардың мәдениеттің жаңыларын сипаттаудың тиесі болып табылады. Олардың мәдениеттің жаңыларын сипаттаудың тиесі болып табылады.

Ластанардың өзінен, өзінен өткізу үшін олардың мәдениеттің жаңыларын сипаттаудың тиесі болып табылады.

„Мәдениеттің өзінен, өзінен өткізу үшін олардың мәдениеттің жаңыларын сипаттаудың тиесі болып табылады. Олардың мәдениеттің жаңыларын сипаттаудың тиесі болып табылады.

(Нұрлан Нұрланов 2010: 15).

Киңеге, өзінен, өзінен өткізу үшін олардың мәдениеттің жаңыларын сипаттаудың тиесі болып табылады. Олардың мәдениеттің жаңыларын сипаттаудың тиесі болып табылады.

ღვთისმშობელი ოს ხალხში ერთ-ერთი ყველაზე პოპულარული წმინდანია. ლექსის მიხედვით, ყოველი მთიდან ხეობებს მად მაირამის (დედა მარიამის) სალოცავი გადმოჰყურებს, რომელსაც მლოცველები ხარსა და ყურყვითელა ბატკანს სწირავენ. ლექსი გადმოგვცემს, რომ დაბურულ ტყეში წმინდანის სადიდებელი ლუდის მოსამზადებლად სვია იზრდება, ხორბლის ხოდაბუნებში კი სალუდე მარცვალი მწიფდება.

რიტუალური ლექს-სიმღერით უშვილოები დედა მარიამს შვილს შესთხოვენ, ხოლო ისინი, ვისაც შვილები ჰყავთ, მათ მფარველობას ევედრებიან:

„ღვთისმშობელო, დედა მარიამ,
თითოეულ გორაკზე ხომ შენი სალოცავია,
შენთვის შესანირავი რქებიანი ხარია,
უშვილონი შვილს გთხოვენ, ღვთისმშობელო მარიამ,
ყოველ დაბურულ ტყეში შენთვის მოსულა სვია,
ხორბლის ხოდაბუნებში სალუდე მარცვალია,
ყურყვითელა ბატკანი შენთვის დასაკლავია,
შენ ჰყარვიდე ჩვენს შვილებს, ღვთისმშობელო მარიამ!“

(ოსური სიტყვიერება 2005: 26).

ტექსტში გამოხატულია მოწინება და პატივისცემა მფარველი წმინდანის მიმართ, აგრეთვე, რწმენა, რომ დედა მარიამი შეისმენს მათ თხოვნა-მუდარას და წყალობას მოუკლენს.

აღსანიშნავია, რომ ჩრდილოეთ ოსეთის მთიანეთში ბავშვის შობიდან ცოტა ხნის შემდეგ დედები რიტუალური ქადებითა და სასმელით მიდიოდნენ მად მაირამის სალოცავში, რომელიც თითქმის ყოველი სოფლის შემოგარენში ერთ წმინდა ხესთან ან ვერტიკალურად აღმართულ ქვასთან იყო დაფუძნებული. დედები თაყვანს სცემდნენ და ლუდს ასხურებდნენ ხეებს ლოცვა--ვედრებით: „ო, დედა მარიამ, რძის მომგვრელო, რძის მოცემას გევედრებით!“ (მილერი 1881: 290). ქალიშვილები წმინდანს სა-

სურველ მამაკაცზე გათხოვებასა და ბედნიერი ოჯახის პატარ-ძლობას შესთხოვდნენ. აღსანიშნავია, რომ მად მაირამის სა-ლოცავთან მიჰყავდათ უშვილო ქალები და ის დედები, რომ-ლებსაც მხოლოდ გოგონები უჩნდებოდათ და, სათანადო მსხვერპლშენირგასთან ერთად, მად მაირამს ვაჟების „გამოგ-ზავნას“ ეველრებოდნენ. აქვე უნდა ითქვას, რომ პარასკევას ანუ მარიამის დღეს (მაირამი) ოსი ქალები უქმობდნენ და არავი-თარ შემთხვევაში საკერავს ხელს არ მოჰკიდებდნენ (ანთელავა 2012: 92).

ლ. ჩიბიროვი, ხალხურ ტექსტებში წარმოდგენილი თვისე-ბების მიხედვით, მად მაირამს ნაყოფიერებისა და ბარაქიანობის მფარველ ქალღვთაებასთან აკავშირებს (ჩიბიროვი 2008: 473). აღსანიშნავია, რომ ოსურ მითოპოეზიაში ისევე, როგორც ზო-გადად ქრისტიანულ ტრადიციაში, დედა მარიამი აბსოლუტურ დედობასთან არის გაიგივებული. ხალხურ ცნობიერებაში მან დედებისა და მშობიარე ქალების მფარველი წმინდანის ფუნ-ქციები შეიძინა. ოსურ ხალხურ ტექსტებში მად მაირამის, რო-გორც მფრველი წმინდანის სახის ამგვარ ინტერპრეტირებას ხელი შეუწყო ღვთისმშობლის იკონოგრაფიამაც, სადაც მარად-ქალწული დედა ახალშობილ ჩვილ ბავშვთან ერთად არის გამო-სახული. აქედან გამომდინარე, მად მაირამზე, როგორც დედე-ბის მფარველ წმინდანზე, ოსურ ხალხურ ტექსტებში გაჩნდა ახალი მოტივები და ფოლკლორული ნარატივები, რომლებიც პაგანიზაციის ელემენტებს შეიცავენ.

ალარდის სიმღერა

ოსებში გავრცელებულია ყვავილბატონებისა და წითელბა-ტონების გამომწვევ დაავადებათა მფარველ ალარდისადმი მიძღვნილი რიტუალური სიმღერები. ოსური ენის ირონულ დია-

ლექტზე მას ჰქვია ალარდი, ხოლო დიგორულ დიალექტზე – ალუარდი. ნაკლებ სარწმუნოდ მეჩვენება ზოგიერთი მეცნიერის (რ. შტაკელბერგი) თვალსაზრისი ყვავილბატონების მფარველის სახელწოდება ალაურდის კახეთის ალავერდიდან წარმომავლობის შესახებ. ოსურ ენაზე ალდარი ჰქვია ბატონს. შეიძლება ყვავილისა და წითელას გამომწვევ დაავადებათა მფარველის სახელი მომდინარეობდეს სიტყვიდან ალდარი (Алдар).

ალარდი ადამიანებს თავის სტუმრობას ბავშვის ტანზე წითელი გამონაყარით ამცნობდა. ალარდის მოსამადლიერებლად მრავალფეროვან რიტუალებს ატარებდნენ და მას განსაკუთრებულად უმასპინძლდებოდნენ. ბატონებით დაავადებულ ბავშვს ყველა სურვილს უსრულებდნენ, რადგან მიაჩნდათ, რომ ბავშვის პირით ბატონები ლაპარაკობდნენ.

ქ. სიხარულიძე ყვავილბატონების მოსამადლიერებლად ოსებში გავრცელებული რიტუალის შესახებ წერს: „როცა ბავშვი ყვავილით გახდებოდა ავად, დედის მეგობარი ქალები იკრიბებოდნენ ოჯახში. აცხობდნენ კვერებს, რომლებზეც საკმეველს დებდნენ. სამი კვერი ეჭირათ ბავშვის თავს ზემოთ (თავშემოვლის მსგავსად). ქალები წრიულად დგებოდნენ საწოლის გარშემო. შემდეგ სიარულით წრეს უვლიდნენ და მღეროდნენ: „ო, ნათელო ალაურდებო, თქვენ გევედრებით, უმხიარულობთ და ვიღიმებით, რადგან თქვენ მიიღეთ მოწყალება და გვესტუმრეთ. თეთრ ხარებს დაგიკლავთ, ბავშვს კი თეთრი მარმაშების დანიავებით გავაგრილებთ. მოგიმზადებთ გემრიელ კვერებს საუკეთესო ჭვავითა და ხაჭოთი. მოგიდუღებთ კარგ ლუდს. გაგამგზავრებთ იქ, სადაც მიწაზე რბილი ბამბაა დაგებული, რომ რბილად დაწვეთ“ (სიხარულიძე 2007: 67).

წრიულ მოძრაობას მართავდნენ ბავშვის ირგვლივ, რადგან მიაჩნდათ, რომ მის სხეულში იყო ალარდი. ამიტომ შუაგული საკრალურ ცენტრს განასახიერებდა. საკრალურ ცენტრში გადის სიმბოლური უხილავი (ან ხილული) ღერძი, ზეციური და მი-

წიერი სამყაროს კომუნიკაციის საშუალება. ეს შეიძლება იყოს ოსურ მითოლოგიაში კიბე, რომლითაც ალარდები ზეციდან დე-დამინაზე ჩამოდიან და იქიდან კი უკან თავიანთ „სამშობლოში“ ბრუნდებიან: „აჩუქეთ ჩვენს ბავშვს ჯანმრთელობა. მაშინ მოგამაგრებთ ვერცხლის მშვენიერ ფრთებს და თქვენ შეძლებთ სამშობლოში დაბრუნებას! – მიმართავდნენ სახადშეყრილი ბავშვის მშობლები ალარდს“ (სიხარულიძე 2006: 67). ხალხის რწმენით, სწორედ ამ კიბით უნდა აიტანონ ხორციელთა შეწირული მსხვერპლი უზენაეს ღმერთთან ზეცის ბინადრებმა.

ალარდისადმი მიძღვნილი სარიტუალო სიმღერის მიხედვით, მისი ეპითეტი არის წითელი (ცირქ). ქართულ მითოლოგიურ ტექსტებშიც ყვავილბატონები, დაავადების ერთ-ერთი სახელწოდების მიხედვით (წითელა, წითურა), დაკავშირებულია წითელ ფერთან.

ბატონებით დაავადებული ბავშვის ოთახს წითელი ფერის ნაჭრებითა და სხვა აქსესუარებით რთავდნენ. ოსურ ხალხურ ლექს-სიმღერაში ალარდი, წითელი ფერის გარდა, წარმოდგენილია, აგრეთვე, ზოგადად ძუარებისა და სხვა ზეციური ძალებისთვის დამახასიათებელი ზოგადი ეპითეტებით, როგორიცაა: „ნათელი“, „ოქროსი“, „ფრთოსანი“:

„აგერ ზეციდან მოვლენილი
ჩვენი წითელი, ოქროს ალარდი,
ცეკვა-ცეკვით მობრძანდება,
სიცილ-სიცილით წაბრძანდება,
ოი, მას შემოვევლეთ!“

(ოსური სიტყვიერება 2005: 28).

წითელი, როგორც ალარდის ეპითეტი, წმინდანის ინდივი-დუალური მახასიათებელია. ალარდის ეპითეტები, წითელი და ოქრო, სინონიმურ მნიშვნელობას იძენენ და ორივე მის ღვთაებ-რივ ბუნებაზე მიუთითებს. ოსები თაყვანს სცემენ სირს ძუარს

(წითელ სალოცავს, ჯვარს), რომელიც პოპულარულია მთელ ოსეთში. შესაძლოა, სირხ ძუარი (сырх дзуар) თავდაპირველად ალარდის სახელობის სალოცავიც ყოფილიყო და შემდეგ შეითავსა მან სხვა მფარველ წმინდანთა ფუნქციებიც. მაგ., ოსები ახლა სირხ ძუარში ვასთირჯისაც მოიაზრებენ.

ალარდის სახელწოდება აისახა ჩრდილოეთ ოსეთის ტოპონიმებშიც: Алардыйы рагъ – ალარდის ქედი, Алаурдий дор – ალაურდის ქვა და სხვ. (დარჩიევა: 2012).

ალარდის, როგორც მრისხანე ზეციური არსების, გაპრაზება არ შეიძლებოდა და დიდი ეპიდემიების დროს დაავადებულთა ახლობლები მღეროდნენ, ცეკვავდნენ და ცდილობდნენ ალარდის კეთილგანწყობის მოპოვებას. სასიმღერო ტექსტში მთქმელი მომღერლები წარმოსახვით შესაძლებლობას გამოხატავდნენ სიტყვებით: „წითელი, ოქროს ალარდი ცეკვა-ცეკვით მობრძანდება და სიცილ-სიცილით წაპრძანდება.“ ხშირად ეპიდემიით დაუძლეურებული, მომაკვდავი ადამიანები საკუთარი ფეხით ჩუმი ღიღინით მიდიოდნენ აკლდამებში და იქ ფანდურით ხელში, წმინდანის სადიდებელი სიმღერებით ეგებებოდნენ სიკვდილს.

ალარდის მიმართ განსაკუთრებულ შიშს გრძნობენ ოსები. „დაგატყდეს ალარდის რისხვა!“ – ოსებს ყველაზე საშინელ წყევლად მიაჩინიათ.

ალარდი, ოსების რწმენით, ცხოვრობს ზეცაში და იქიდან ოქროს ან ვერცხლის კიბით ეშვება. მის სახელს განსაკუთრებით ქალები ადიდებენ და მას ცხვარს ან ბატყანს სწირავენ. ჩრდილოეთ ოსეთის ოთხივე ხეობაში ვხვდებით ალარდის სახელობის სალოცავებს, რომლებიც ყოველთვის სოფლიდან ზურგშექცევით დგანან, რათა სოფლისკენ „არ გამოეხედათ“. ლოცვის დროს ალარდს მიმართავენ: „ზურგი შეგვაქციე და ამის შემდეგ ნულარ დაგვენახები...“ (ანთელავა 2013: 20).

ალარდის სახელობის დღესასწაულს ოსები აღდგომის შემ-დეგ, სხვადასხვა დროს, მაისსა და ივნისში, თუმცა, უეჭველად, ორშაბათ დღეს აღნიშნავდნენ. მრისხანე წმინდანს, როგორც წესი, მსხვერპლს სწირავდნენ, იშლებოდა საერთო ტრაპეზი – ქუვდი, ახალგაზრდები ცეკვავდნენ და მდეროდნენ, იმართებოდა ჯირითი.

ვაცილას სიმღერა

ვახუშტი ოვსთა რწმენა-წარმოდგენების შესახებ წერს: „გარნა ყოველთავე უწყიან მზგავსი კერპისა, რომელსა უწოდებენ ვაჩილას, რამეთუ შესწირვე ელიას თხასა და ჭორცსა შესჭამენ თვთვე, ხოლო ტყავსა გასჭიმავენ მაღალსა ძელსა ზედა და თაყვანი-სცემენ ტყავსა მას დღესა შინა ელიასასა, რათა არა მოულინოსთ ელიამ სეტყუანი და მოსცეს ნაყოფი ქუეყანისანი“ (ვახუშტი 1973: 638).

როგორც ჩანს, მკვლევარმა იცოდა, რომ ვაცილას კულტი დაკავშირებული იყო წმინდა ელია წინასწარმეტყველის სახელთან და მას ოსთა რელიგიურ ყოფაში არ ჰქონდა კერპის სტატუსი. თუმცა, რადგან ვაცილასადმი მიძღვნილ რიტუალებს ოსები აღავლენდნენ არა ქრისტიანულ ტაძარში, არამედ ხალხური ტრადიციის მიხედვით აღმართულ ძუარში, ვახუშტიმ „ვაჩილას“ სალოცავს უწოდა „მზგავსი კერპისა“. ზუსტ ცნობას გვაწვდის ვახუშტი მსხვერპლშენირვის შესახებ. ელიას, რომელსაც ოსები ზოგიერთ კილოზე „ვაჩილასაც“ უწოდებენ, როგორც საქართველოში, ასევე ჩრდილოეთ ოსეთის ოთხივე ხეობაში, რელიგიურ დღესასწაულზე თხას სწირავდნენ და სადღესასწაულო ტრაპეზს მართავდნენ. ვახუშტი მკაფიოდ განმარტავს აგრეთვე მსხვერპლშენირვის მიზანს. მისი აზრით, ოსები ვაცილა-ელიას

თაყვანს სცემდნენ, „რათა არა მოულინოსთ ელიამ სეტყუანი და მოსცეს ნაყოფი ქუეყანისანი“.

ვაცილა, რომელსაც დიგორულ დიალექტზე ჰქვია ელია, ოსური ხალხური ტექსტების მიხედვით, არის დარ-ავდრის გამგებელი. რადგან ამინდს უკავშირდება მოსავლის სიუხვე, ხალხი პატივს მიაგებს ვაცილას და მისი სახელობის ძუარები ოსების მრავალ სოფელში გვხვდება. ამინდის გამგებლობა მიეწერება ელიას ქართული ტრადიციითაც. საქართველოს ყველა კუთხეში ყოველწლიურად 20 ივლისს (ძვ. სტილით) იმართება ელიაობა, წმინდანისადმი მიძღვნილი დღესასწაული.

ისევე როგორც ვასთირჯი და სხვა ძუარები, ვაცილებიც, მითოლოგიური ლექს-სიმღერების გარდა, გვხვდებიან ოსური ხალხური ეპიკური ტექსტების, მათ შორის, ნართების ეპოსის პერსონაჟებად. ვაცილა ზოგჯერ მრავლობით რიცხვში მოიხსენიება. ნართულ თქმულებებში ვაცილათებისა და ბათრაძის ბრძოლა ეპიკურ ჭრილშია გადაწყვეტილი.

ვაცილასადმი მიძღვნილი სიმღერები გამოირჩევა ვერბალური ნაწილის სიძუნწით, მთელი ყურადღება გადატანილია რიტორიკულ შეძახილზე, ტექსტის რიტმულ აღნაგობასა და მელოდიაზე. სიმღერაში, რომელსაც აქვს მიმართვის ფორმა და ლოცვითი შინაარსი, მთქმელი-მომღერალი ცნობილი ქრისტიანული ეპითეტებით („მწყალობელი“, „კეთილი“) ამკობს ვაცილას და ცდილობს წმინდანის ყურადღების მიპყრობას:

„აგერ მაღლობზე ბრძანდები, ვაი,
ვაი-ვაი, ჩევენო მწყალობელო, ვაი,
ვაი-ვაი, კეთილო ვაცილა, ვაი!“

(ოსური ზეპირსიტყვიერება 2005: 28).

ოსურ საკულტო ტექსტებში ვაცილა კიდევ რამდენიმე ეპითეტით მოიხსენიება: ტბაუ ვაცილა, ურს ვაცილა და ხორ ვაცი-

ლა. „ტბაუ“ არის ტოპონიმი თაგაურის ხეობაში, სოფელ ლამარ-დონის მახლობლად, მაღალი მთის მწვერვალის სახელწოდება. ტოპონიმური ეპითეტი „ტბაუ“ წმინდანის მიწიერ საბრძანისზე მიანიშნებს. ვაცილას მეორე ეპითეტი „ურს“ ოსურ ენაზე აღნიშნავს თეთრს და ზეციერი არსების საწმინდეს, მის საკრალურობას გამოხატავს. თეთრი გვხვდება წმინდა გიორგის ეპითეტად ქართულ ტრადიციაშიც. რაც შეეხება ვაცილას მესამე ეპითეტს „ხორ“, ოსურ ენაზე ჰქვია პურეულს, მარცვლეულს, ხორბლეულს და წმინდანის ფუნქციას, მის მიერ პურეული მოსავლის მფარველობას აღნიშნავს. ოსები ეპითეტით „ხორ“ ვაცილას მიმართავენ პირველი ხნულის გავლების დროს, კერძოდ, ხორხორობის დღესასწაულზე და პურეული მოსავლის აღების დროს. ოსური ტრადიციით, მარცვლეული კულტურის მოყვანა ზეციური წარმომავლობისა. წართების ეპოსის მიხედვით, ვაცილამ გადასცა ხორბლის პირველი სათესლე მარცვლები კერი-ის მფარველ საფასთან სტუმრად მყოფ სოსლანს და უთხრა: „ – მივცემ მე ამ ხორბლის მარცვლებს ნართებს. გაზაფხულზე, როგორც კი მინა გაიღვიძებს, დათესონ და წლიდან წლამდე საჭირო სარჩოს მოიწევენ“ (წართები 1988: 105).

„ხორ ვაცილას“ (პურეულის ვაცილას) ოსები პურეული მოსავლის სიუხვესა და ბარაქიანობას შესთხოვენ. თხოვნა-მუდარა და უხვი პურეული მოსავლის წყალობის იმედი სჭვივის ვაცილას მიმართ აღვლენილ ოსურ ლექს-სიმღერებში:

„ხორ-ვაცილა ჩვენი მწყალობელია, ვაი, ვაი!
მარცვლეულს გვიწყალობებს ვაცილა, ვაი!
საქონელს კი – ფალვარა, ვაი!

(ოსური ზეპირსიტყვიერება 2005: 28).

ვაცილას კულტი ოსურ მითორელიგიურ ტრადიციაში დაკავშირებულია ბიბლიურ ელია წინასწარმეტყველის სახელთან

და, როგორც ჩანს, ვაცილას თაყვანისცემა ადგილობრივ ნია-დაგზე ქრისტიანობის გავრცელების შემდეგ, ქართული კულ-ტურის გავლენით დამკვიდრდა.

ვაცილა-ელიას ზეპუნებრივი თვისებები: დარ-ავდრის გამ-გებლობა, ამინდზე ზემოქმედება, ჭექა-ქუხილის გამოწვევა და მეხის ჩამოგდება – წმინდა ელია წინასწარმეტყველის სასწაუ-ლებს უკავშირდება. ბიბლიის მიხედვით, თავის მიწიერ ცხოვრე-ბაში ელია თიშბელს შეეძლო ისრაელში წვიმისა და გვალვის გა-მოწვევა (3. მეფ. 17: 1). ასევე, ბიბლია მოგვითხრობს, რომ მთის მწვერვალზე მყოფი ელია წინასწარმეტყველის ბრძანებით „ჩამოიჭრა ცეცხლი ციდან და შთანთქა“ დასწეულებული ახა-ზია მეფის წარგზავნილი ორი ორმოცდაათეული (4. მეფ. 1: 9-14). ბოლოს კი, უფალმა ცეცხლოვან ეტლში შებმული ცეცხლო-ვანი რაშებით ელია თიშბელი ცად აიყვანა (4. მეფ. 2: 11).

წმინდა ილიას თაყვანისცემა ფართოდ გავრცელდა აღმო-სავლეთ და სამხრეთ სლავებში. ბიბლიური ტრადიციის მიხედ-ვით, მას ყველგან ამინდზე ზემოქმედებას შესთხოვდნენ (მაკა-შინა 1982: 83-101).

ოსებს სწამდათ, რომ ღმერთის მითითებით ვაცილა დედამი-ნას გავარვარებულ ისარს უშენს. ამ ისრით დაღუპულები კი წმინ-დანებად ითვლებოდნენ. რადგან მეხდაცემულის სიკვდილს ოსები ვაცილას მიაწერდნენ, ამიტომ გარდაცვლილს ისინი არ დასტი-როდნენ, არამედ მის გარშემო იკრიბებოდნენ, წრეს შეკრავდნენ და მართავდნენ რიტუალურ ცეკვა-სიმღერას „ცოფას“:

„ცოფაი ქომგარონი,
ცოფაი თქვენი მფარველი,
ცოფაი ალდარი.“

ერთი მღერის, სხვები ბანს აძლევენ:

„ეი, ეი, გვწყალობდეს ჩვენი მფარველი!“
ოი, ტაბუ ავადმყოფთა მფარველს!
ეი, ეი, დიდება ჩვენს მფარველს! (სოკაევა 2010: 115).

ცოფაის ეტიმოლოგია და მნიშვნელობა დღემდე გაურკვევე-ველია. ზოგიერთი მკვლევარი უარყოფს მის ირანულ წარმომავლობას და ადგილობრივ კავკასიურ სამყაროსთან აკავშირებს.

მკვლევართა (ვ. აბაევი, ლ. ჩიბიროვი) აზრით, ცოფაი არის სარიტუალო ცეკვა-სიმღერა. „ცოფაი“ XVIII საუკუნის მეორე ნახევარში აღწერა გერმანელმა მოგზაურმა ა. შტიოდერმა, რომლის ცნობით, სარიტუალო სიმღერა შემოიფარგლებოდა ერთადერთი მისამღერით: „ო, ელია, ელია! ალდარი ცოფაი“ (შტიოდერი 1967: 54-56). ორსიტყვიან მიმართვაში – „ალარდი ცოფაი“ – პირველი ნაწილი წარმოადგენს ეპითეტს, ხოლო მეორე ნაწილი კი მფარველი წმინდანის სახელს ან ფსევდონიმს უნდა აღნიშნავდეს. როგორც ცნობილია, ალდარი ოსურ ენაზე ჰქვია ბატონს. ამგვარი ფორმით კი აღმოსავლეთ საქართველოს მთიანეთის საკულტო ტექსტებში ჯვარ-ხატებსა და მფარველ წმინდანებს მიმართავენ: „თავადო მთავარანგელოზო“, „ბატონო ხთიშობელო“, „მთავარო მთავარანგელოზო“, „ხელმწიფე ხთიშობელო“ (სადიდებლები 1998).

ოსური რიტუალი „ცოფაი“ იმართება ვაცილას სადიდებლად, მეხდაცემულის გასაპატიოსნებლად, აგრეთვე, მფარველი ძუარის ახალი მიწიერი საბრძანისის საკრალიზაციის მიზნით. ცეკვა-სიმღერა „ცოფაის“ მნიშვნელოვანი ანალოგიები დაეძებნება წმინდა მაქსიმეს ქართულ ფოლკლორულ ვერსიებთან.

ოსური რიტუალი „ცოფაი“ და წმინდა მაქსიმეს თქმულება

დასავლეთ საქართველოში, კერძოდ, ლეჩეუმში, დეხვირის თემში, XIX საუკუნის 80-იან წლებამდე, კალოობის დროს, დეხვირიდან მურამდე, სადაც ტრადიციის მიხედვით მდებარეობს წმინდა მაქსიმე კონფესორის საფლავი, ადგილობრივი გლეხები

და სასულიერო პირები გამოდარების მიზნით ამინდის გამოთხოვის რიტუალს მართავდნენ (ჩიქოვანი 1971).

ოსური სარიტუალო ცეკვა-სიმღერა „ცოფა“ და ლეჩეუმში გავრცელებული წმინდა მაქსიმეს თქმულება მსგავს მითოკულ-ტუროლოგიურ ელემენტებს ეფუძნება. მათი ტიპოლოგია და სტრუქტურული ანალიზი არქეტიპული ინვარიანტის რეკონსტრუქციისა და საერთო კულტურული სუბსტრატის, ძირითადი სიუჟეტური ხაზის გამოკვეთის საშუალებას იძლევა.

მაქსიმეს შესახებ ჩანსერილი ფოლკლორული ტექსტების მიხედვით, ლეჩეუმში, დეხვირის თემის სოფლებში, კალოობის დროს, ქარეიშვილ-ჭაბუკიანი თავის ხარებს, მაძლრები რომ ყოფილიყვნენ, დამით მეზობლის ყანებში აძოვებდა. მაქსიმე იცავდა ყანებს ქარეიშვილის ხარებისგან და შეუმჩნევლად იქიდან ერეკებოდა. მაქსიმემ ამხილა ქარეიშვილი ულირს საქციელში, მაგრამ ვერ შეასმინა და ამიტომ მას სასჯელი მოუვლინა: კალოობის დროს, როცა ყველას კალოზე მზე აცხუნებდა და ძნებს ლენავდნენ, ქარეიშვილის კალოს თავზე ღრუბელი ედგა და ანვიმდა. წვიმა ქარეიშვილს პურეულის გალენვისა და მოსავლის დაბინავების საშუალებას არ აძლევდა. ასე გამეორდა რამდენ-ჯერმე. შენუხებულმა ქარეიშვილმა ერთხელაც გადმოიღო თოფი და ღრუბელს ესროლა. ღრუბლიდან მოკლული მაქსიმე ჩამოვარდა. შენუხებდა მკვლელი და მაქსიმე საიდუმლოდ დამარხა, თუმცა მეორე დღეს წმინდანი საფლავიდან ამოსული დახვდა. ქარეიშვილმა მაქსიმე ახლა სხვა ადგილზე დამარხა, მაგრამ კვლავ იგივე გამეორდა. მესამე დამარხვის შემდეგ ქარეიშვილ-ჭაბუკიანს სიზმარში მაქსიმე გამოეცხადა და უბრძანა: უხმარ მარხილზე დაედო მოკლულის ცხედარი, უღელში შეება უხედარი ხარები და გაეშვა. სადაც ხარები გაჩერდებოდნენ, წმინდანი იქ დაემარხა. ქარეიშვილი ასეც მოიქცა. ხარებმა გაიარეს გვირგვინიშის წვერი, ორბელის წვერი და ბოლოს მურში გაჩერებულან, სადაც ქარეიშვილს მაქსიმე დაუმარხავს, ხოლო შემდეგ იქ

წმინდა მაქსიმეს სახელობის ეკლესია აუგიათ. კალოობის დროს, ხანგრძლივი წვიმებით შეწუხებული დეხვირის თემის მა-მაკაცები განმენდილი და ნამარხულევი იკრიბებოდნენ სოფ-ლის შუაგულში, მორჩილების ნიშნად კისერზე „დვლეჭებს“ იდებდნენ, ლიტანითა და გალობით ისინი იმავე გზას გადიოდ-ნენ, რომელიც წმინდა მაქსიმეს დაკრძალვის დღეს ხარებმა გა-იარეს და წმინდანს გამოდარებას შესთხოვდნენ.

ოსური რიტუალისა და მაქსიმეს თქმულების ძირითად ქსო-ვილს მსგავსი მოტივებითა და საკრალური ინვენტარით გამ-დიდრებული ელემენტები ქმნიან, როგორიცაა: პურეული მო-სავლის მფარველობა, ბუნების სტიქიური ძალების მონაწილეო-ბა, მეხდაცემულის სიკვდილი, დაღუპულის რამდენჯერმე დაკ-რძალვა, ხარების მიერ მიცვალებულის საფლავის აღმოჩენა, სალოცავის დაარსება, ჰიეროფანიის ადგილის რიტუალური მსვლელობით საკრალიზება, საკრალური ცენტრის ყოველწლი-ური განახლება, ამინდის გამოთხოვა. მათ შორის ზოგიერთი ელემენტი და მითოლოგებმა უნივერსალურ კატეგორიას განე-კუთნება, ზოგიც – კერძო გამოვლინებას.

ლეჩხუმურ ზეპირ ტექსტებში მაქსიმე, ისევე როგორც ელია-ვაცილა, პურეული მოსავლის, ჭირნახულის მფარველად გვევ-ლინება. ის იცავს ყანებს ქარეიშვილ-ჭაბუკიანის ხარებისგან.

მაქსიმე, ელია-ვაცილას მსგავსად, ამინდს განაგებს. ურჩ ქარეიშვილ-ჭაბუკიანს მან წვიმა მოუვლინა. ხალხური ტექსტე-ბის მიხედვით, ცა, რაც უნდა მოწმენდილი ყოფილიყო, თუ მაქ-სიმე დაღმა იზამდა ხელს, წვიმას დაუშვებდა, თუ აღმა იზამდა, ისევ დარი იყო; მაქსიმე ნისლში გამოეხვევა და საწვიმარ ღრუბ-ლად მოევლინება სოფელს; მაქსიმე ცოდვილის კალოს ცვარავს და პურის გალენვას არ ანებებს; მაქსიმე საშინელ წვიმას დაუშ-ვებს ქარეიშვილის კალოზე და წლის მოსავალი ღვარს მიაქვს (ჩიქოვანი 1971: 75).

ოსური რიტუალი „ცოფაი“ ეძღვნება მეხისაგან გარდაცვლილს, რომლის დაღუპვაც, ხალხური ტრადიციით, დარ-ავ-დრის გამგებელ ვაცილას მიეწერება. ლეჩეუმურ თქმულებაში, მართალია, მაქსიმე ქარეიშვილის ნასროლი ტყვიით იღუპება, მაგრამ, გადმოცემის მიხედვით, ქარეიშვილმა თავის კალოზე ჩამოწოლილ ღრუბელს ესროლა თოფი, მოულოდნელად კი ღრუბლიდან ქარეიშვილის თოფით მოკლული მაქსიმე ჩამოვარდა. ღრუბლისთვის თოფის სროლა მაქსიმეს თქმულების ამ ეპიზოდში შეიძლება ამინდის დაშინების რიტუალის გამოძახილიც იყოს. ცნობილია, რომ ხუნძები ღრუბელს თოფს ესროდნენ, რომ მისთვის მიმართულება შეეცვლევინებინათ და სეტყვა თავიდან აერიდებინათ (სიხარულიძე 2006: 139).

ოსები მეხისაგან გარდაცვლილს მეხის ჩამოვარდნის ადგილას მარხავდნენ, საფლავზე სამ დღე-ღამეს მორიგეობდნენ და ცეკვა-სიმღერით ვაცილას ადიდებდნენ. თუ წვიმები გაგრძელდებოდა, ჭირისუფლები მიცვალებულს საფლავიდან იღებდნენ, ცხედარს მარხილზე ან ურემზე უდებდნენ, მასში ხარებს შეაბამდნენ, გაუშვებდნენ და სადაც ხარები გაჩერდებოდნენ, იქ გარდაცვლილს, რიტუალური ცეკვა-სიმღერა „ცოფაის“ თანხლებით, ხელმეორედ მარხავდნენ. შემდეგ იმ ადგილას ხეს რგავდნენ, სალოცავს აარსებდნენ და ვაცილას პატივსაცემად ყოველწლიურად მსხვერპლს სწირავდნენ.

ქართული ტექსტის მიხედვით, ქარეიშვილმა მაქსიმე მინას სამჯერ მიაბარა. თუმცა, გამოდარების ნაცვლად, წვიმები გაგრძელებულა. როგორც ოსური რიტუალის, ისე მაქსიმეს ტექსტის მიხედვით, გარდაცვლილს ხარებშებმულ ურემზე (მარხილზე) ათავსებენ, ხარებს თავის ნებაზე უშვებენ და სადაც ისინი გაჩერდებოდნენ, მიცვალებულსაც იქ მარხავდნენ. ორივე შემთხვევაში საფლავს წმინდა ადგილად მიიჩნევდნენ, დაკრძალვის ადგილი საკრალურ მნიშვნელობას იძენდა და იქ მფარველი წმინდანის სახელზე სალოცავს აგებდნენ. ხარის მი-

ერ სიწმინდის აღმოჩენა გავრცელებული სიუჟეტია როგორც ოსურ, ისე ქართულ ხალხურ ტექსტებში. ოსური ტრადიცია რე-ქომი ძუარის საპრანანისის აღმოჩენას ვასთირჯის ხარებს მია-ნერს. სვანეთში გავრცელებული გადმოცემის თანახმად, ორ ბუდას ულელი დაადგეს და გაუშვეს. იმ ადგილას, სადაც ხარები გაჩერდნენ, თარგლეზერის ეკლესია ააგეს. ხარებმა აღმოჩინეს ლომისისა და ძარწემის წმინდა გიორგის მიწიერი საპრანისიც.

ოსური ცეკვა-სიმღერა „ცოფაი“ ღრმა კოსმოგონიური სიმბოლიზმის შემცველია: მისტერიის მონაწილენი მეხდაცემულის ან მისი საფლავის გარშემო დიდ წრეს შემოხაზავდნენ და ხელჩაკიდებულები მართავდნენ სარიტუალო ცეკვა „ცოფაის“. როგორც წესი, მოცეკვავებებს წრის გადაბიჯება ეკრძალებოდათ. ერთ-ერთი მონაწილე წარმოთქვამდა სასიმღერო ტექსტს, ხოლო სხვები იმეორებდნენ: «Ой, алай, ой, алай! Алай џоппай бестен хуарзей!» (ოი, ალაი, ცოფაი, ყველას წყალობა).

წრიული მოძრაობა და ბრუნვა-ტრიალი მიზნად ისახავდა საგნის საკრალიზებას ან საკრალურის განახლებას. წრის შიგნით, შუაში მოთავსებული საგანი წარმოადგენდა საკრალურ ცენტრს, რომელიც, ამასთანავე, განასახიერებდა სამყაროს შუაგულს. ის შეიძლება ყოფილიყო კერია, საკულტო დროშა, ეკლესია, წმინდა ხე, კულტმსახური ან თვითონ წმინდანი. წრე თავის-თავში გულისხმობს ცენტრსაც (ალავერდაშვილი 2013: 36). ცოფაის რიტუალის დროს წრის შუაში არის მეხდაცემულის საფლავი ან მისი ცხედარი. იმ ადგილას, რომელიც უნდა იქცეს საკრალურ ცენტრად და ზეციურ ძალებთან კომუნიკაციის საშუალებად, რგავენ ხეს ან აგებენ სამღლოცველოს, როგორც სამყაროს ღერძის განსახიერებას. ხე, სამღლოცველო და კერია ურთიერთმონაცვლე საკრალური ობიექტებია. საკრალურ სივრცეში შესაბამის მატერიალურ ინვენტარზე რიტუალური ქმედებები განახლებს საზოგადოების ცოდნასა და აძლიერებს მფარველი

წმინდანის მიმართ კოლექტივის რელიგიურ რწმენას. რიტუალის გზით ხილული საგნებისა და მატერიალური ობიექტის ზებუნებრივ ძალებთან დაკავშირება განაპირობებს მათ საკრალურ იმიჯს და მათზე მუდმივგანახლებად კოლექტიურ ცოდნას.

მფარველი წმინდანის მიწიერი საბრძანისის ირგვლივ რიტუალურ ცეკვა-სიმღერებს მთელ კავკასიაში იცნობენ. რიტუალური ფერხისების ძირითადი კომპოზიციაც ერთნაირია.

წრიული რიტუალური ცეკვა მეხდაცემულის საფლავზე, სალოცავის დაარსება და ხის დარგვა განასახიერებს ცისა და მიწის კავშირს, დედამიწის ჭიპისკენ, სამყაროს ცენტრისკენ მიმართულ კოსმიურ ღერძს. „ცოფაის“ რიტუალი და მაქსიმეს მისტერია (ზ. კიკნაძის ტერმინით) არის ერთგვარი მექანიზმი, რომლის საშუალებითაც ხდება ადგილის საკრალიზება. ორივე რიტუალური სისტემა, რომელიც აისახა მაქსიმეს თქმულებასა და ოსურ „ცოფაიში“, ერთ მიზანს ემსახურება: მოხაზოს წმინდა ადგილი, მონიშნოს საკრალური ცენტრი, სადაც მფარველი წმინდანის სალოცავი აღიმართება.

„ცოფაი“, როგორც რიტუალური ცეკვა, იმართებოდა, აგრეთვე, ძლიერი გვალვების დროს. რიტუალის მონაწილენი ვა-ცილას ევედრებოდნენ წვიმის მოყვანას, კარდაკარ დადიოდნენ, ასრულებდნენ „ცოფაის“ და ვაცილას სადიდებელ სიმღერებს. ანალოგიურ მითორიტუალურ მოდელს ეფუძნება მაქსიმეს მისტერიაც.

გადმოცემის თანახმად, მაქსიმეს მურში დაკრძალვის შემდეგ საშინელი წვიმები გაგრძელდა. მოსახლეობა კალოს ვეღარ ლენავდა. წმინდა მაქსიმეს მკვლელი სინანულში ჩავარდა. მაშინ მან ჩვენება ნახა. ქარეიშვილს წმინდა მაქსიმე გამოეცხადა და ასწავლა, თუ როგორ უნდა ელოცათ წვიმის შესაჩერებლად. იმ დღიდან, ყოველ კალოობას იმართებოდა რელიგიური დღესასწაული მურობა, რომელიც კარნავალურ ელემენტებსაც შეიცავდა. დეხვირის ციხესთან იკრიბებოდა გაწმენდილი და ნა-

მარხულევი მოსახლეობა, ძირითადად მამაკაცები, რომლებიც მორჩილების ნიშნად კისერზე „ლვლეჭებს“ იპამდნენ. ისინი, სასულიერო პირების თანხლებით, ფეხშიშველი იმავე გზით მიდიოდნენ წმინდა მაქსიმეს საფლავზე, რა გზაც მაქსიმეს დაკრძალვის დღეს გაიარეს „უსხმა“ მოზვრებმა. მისტერიის მონაწილენი რიტუალური მსვლელობით მფარველ წმინდანს გამოდარებას შესთხოვდნენ:

„წმი-და მაქ-სი-მე, ო-ი-ო-ჰო, ჰო,
და-რი- გვი-ბო-ძე, ა-ა-ა-ა
შე-გვი-ხვე-ნი-ე!“ (ჩიქოვანი 1971: 79).

ყოველწლიური რიტუალური მსვლელობა დეხვირის ციხიდან მაქსიმეს საფლავამდე კოსმოგონიური სიმბოლიკის შემცველია. მსვლელობა საკრალური ცენტრის განახლების მიზნით ეწყობოდა. კალოობის დროს მისტერიის მონაწილენი თავიანთი ქმედებით რიტუალურად იმეორებდნენ იმას, რაც ოდესაც მოხდა. სალოცავის დაარსებას ჰიეროფანია უდევს საფუძვლად. რიტუალი კი განამტკიცებდა სიწმინდის განსაკუთრებულ ხარისხს და მფარველი წმინდანის მიწიერი საპრანანის საკრალურ ავტორიტეტს. მ. ელიადეს აზრით, სამყაროს ყოველწლიური განახლება ყველაზე მნიშვნელოვან რელიგიურ ცერემონიას წარმოადგენდა: „სამყაროს განახლება კი შესაძლებელია მხოლოდ იმის გამეორებით, რაც უკვდავებმა გააკეთეს მას უამსაშინა, შესაქმეს რომ იმეორებდნენ“ (ელიადე 2009: 42-43).

ჭირნახულის მფარველობა, ამინდის მართვა, მიცვალებულის რამდენჯერმე დაკრძალვა, მიცვალებულის ხარებშებმული ურმით გადატანა და წმინდა ადგილის აღმოჩენა ოსური რიტუალი „ცოფაისა“ და მაქსიმეს თქმულების საერთო სიუჟეტს ქმნის. მართალია, წმინდა მაქსიმეს ამინდის გამოთხოვის რიტუალში საკრალური ცენტრის ირგვლივ წრიული მოძრაობის ნაცვლად ვხვდებით რიტუალურ მსვლელობს, მაგრამ ორივე ცერე-

მონიას მიზნად ჰქონდა სივრცის საკრალიზება და ამინდის გამოთხოვა. რიტუალის მონაწილეებს მურობის დღესასწაულზე წინ მღვდელი მიუძღვოდათ. ასევე ადგილობრივი ხუცეს-ხევისბრები ხელმძღვანელობდნენ აღმოსავლეთ საქართველოს მთიანეთში დიდ დღესასწაულებზე ჯერის დროშით წმინდა ადგილების მოლოცას. რიტუალის მიზანი იყო საკრალურის განახლება, სივრცის საკრალიზება.

ამინდის გამოთხოვის ოსური ცეკვა-სიმღერა „ცოფაისა“ და წმინდა მაქსიმესადმი მიძღვნილი ლეჩხუმური რიტუალის სტრუქტურა გვიჩვენებს, რომ ორივეს, როგორც სცენარი, მსგავსი აგებულების მითი უდევს საფუძვლად. ორივეს ჰქონდა ერთი და იგივე ფუნქცია და მიზანი. წმინდა მაქსიმეს თქმულება-რიტუალში გამოყენებულია წმინდა ელიას კულტთან დაკავშირებული ელემენტები. ორივე გამოირჩევა სინკრეტული ხელოვნების მძაფრი დრამატული ფორმით. ისინი ატარებენ საიდუმლო რიტუალის სიმბოლურ ნიშნებს და აქვთ მკვეთრად გამოკვეთილი რელიგიურ-მისტიკური შინაარსი. მას ასრულებენ ერთი რელიგიური საზოგადოების წევრები, ერთი თემის ან საგვარეულოს წარმომადგენლები. წრიული ცეკვა-მოძრაობა საკრალური ობიექტის ირგვლივ ისევე, როგორც ტაძრის გარშემო ლიტანია დიდი დღესასწაულებისა და საერთო განსაკდელის ჟამს, ადასტურებს საზოგადოების რელიგიურ კონსოლიდაციას მფარველი წმინდანის წინაშე.

მაქსიმეს მისტერიასა და ოსური „ცოფაის“ რიტუალურ კომპოზიციაში ვხვდებით არქეტიკული მოვლენებისა და სიმბოლოების თავისებურ მოდელირებას. მაქსიმეს მისტერიასა და ოსური „ცოფაის“ რიტუალურ კომპოზიციაში ვხვდებით არქეტიკული მოვლენებისა და სიმბოლოების თავისებურ მოდელირებას. მაქსიმეს ლეჩხუმურ თქმულება-ცერემონიაში საქმე გვაქვს ფოლკლორული შემოქმედების სპეციფიკურ-სტილურ თავისებურებასთან, ე. წ. კონტამინაციასთან, კერძოდ, ელია წინასწარმეტყ-

ველთან დაკავშირებული ხალხურ წარმოდგენების, მოტივებისა და რიტუალური ელემენტების მიბმა-შერევასთან.

სარიტუალო ცეკვა-სიმღერა „ცოფაი“ (ჩოფაი), ოსების გარდა, დასტურდება ყარაჩაელებში, ბალყარელებსა და აფხაზებში. როგორც ირკვევა, კავკასიის ხალხებში ჩამოყალიბდა მსგავსი სტრუქტურის მქონე ამინდის გამოთხოვის მითორიტუალური სისტემა. მას იცნობდნენ ქართველებიც და ეს მოდელი, როგორც სცენარი, საფუძვლად ედო წმინდა მაქსიმესალმი მიძღვნილ მისტერიას.

ბასილების სიმღერა

ბასილების დღესასწაული საახალწლო ციკლს მიეკუთვნება. საახალწლოდ ოსი ქალები აცხობდნენ ნახევრად მრგვალ რიტუალურ ქადებს, აგრეთვე, ნამცხვრებს, ცხოველების, ფრინველებისა და ადამიანების ფიგურებით, რომლებსაც ბასილებს (ბასილა) უწოდებდნენ. ბასილებს ჰქონდათ სხვადასხვა ფორმა და ხშირად კუთხეებში ჯვრებს უკეთებდნენ. მკვლევარები მიიჩნევენ, რომ ბასილების დაცხობას ჰქონდა საკრალური დანიშნულება, რათა დამდეგ წელს ოჯახისთვის მოეტანა ლვთის წყალობა: ბედნიერება, უხვი მოსავალი და საქონლის ნამატი.

ბასილების ტრადიციას კარგად იცნობენ საქართველოს სხვადასხვა კუთხეში. იმდენად პოპულარული იყო ოსებში ბასილობის დღესასწაული, რომ დიგორის ხეობის მცხოვრებლები იანვარს ბასილების თვეს (ბასილი მაშა) უწოდებდნენ. ბაშილა-ის სახელით იცნობენ იანვარს ყარაჩაელები და ბალყარელებიც.

ბასილების ტრადიცია დაკავშირებულია IV საუკუნის ქრისტიანი წმინდანის ბასილი დიდი კაბადოკიელის სახელთან, რომლის ხსენების დღეს მართლმადიდებლური სამყარო 1 იანვარს აღნიშნავს.

ოსების რწმენით, ბასილები იყვნენ ანგელოზური არსებები და ოჯახს მფარველობდნენ. ბასილობის დღესასწაულზე იმართებოდა კარდაკარ ჩამოვლის კარნავალური რიტუალი. კარნავალში მონაწილეობას იღებდა სოფლის ახალგაზრდობა, რომელიც ბასილობის ალსანიშნავად საგანგებოდ ემზადებოდა. ვ. ვარზიათის ცნობით, დღესასწაულის დადგომამდე ისინი იკრიბებოდნენ და ირჩევდნენ ღონისძიების უფროსს, რომელიც ხელმძღვანელობდა რიტუალში მონაწილე ჯგუფებს, აგრეთვე, შესანირავის შეგროვებასა და მის განაწილებას (ვარზიათი 1995).

ბასილობის ღამეს, როცა ახალი წელი დგებოდა, ახალგაზრდები მორიგეობით, ჯგუფ-ჯგუფად, მხიარული ჟივილ-ხივილითა და საბასილო სიმღერების შესრულებით მიღიოდნენ თითოეული თანასოფლელის ოჯახში. რიტუალის მონაწილე ახალგაზრდები შემოსილი იყვნენ საკარნავალო ტანსაცმლით. მათ ეცვათ ბეწვიანი, კერძოდ, ცხვრის ტყავის გადმობრუნებული ქურქები, ხოლო სახეზე ეკეთათ ნაბდისგან დამზადებული ნიღბები – ცასგომ (ცაციომ). ახალგაზრდები ჩერდებოდნენ თითქმის ყველა სახლთან და ოჯახის თითოეულ წევრს ულოცავ-დნენ ახალი წლის დადგომას, ბასილობას. ისინი ხუმრობით, ცეკვა-სიმღერით, სიცილითა და შეძახილებით საერთო მხიარულებაში აპამდნენ თანასოფლელებს. რიტუალის შემსრულებლები ყველა სახლს სიხარულით ავსებდნენ და მათ მთელი წლის მანძილზე ბედნიერებასა და სიხარულს უსურვებდნენ. კარდაკარ სიარულის დროს ახალგაზრდები ასრულებდნენ სარიტუალო სიმღერებს. ოსური ფოლკლორი იცნობს ბასილების სასიმღერო ტექსტის ორ ვერსიას: ერთ მათგანს დიგორულ დიალექტზე ჰქვია ბასილები (ბასილა), ხოლო ირონულ დიალექტზე – ხაძარონთა (ხაძვარონთა). რიტუალის მონაწილენი ჯერ ბასილებს ადიდებდნენ, შემდეგ ოჯახის დიასახლისს წულის შობას

უსურვებდნენ, ბოლოს კი – ოჯახის უფროსს ნადირობაში წარმატებას:

„ოი, ბასილებო, ბასილებო,
კარგო ბასილებო, ჰოი, ჰოი,
ჰოი, თქვენმა დიასახლისმა ვაჟი შვას,
ჰოი, თქვენი ოჯახის უფროსმა ირემი მოკლას.“

(ოსური სიტყვიერება 2005: 28-29).

რომელ პერსონაჟებს განასახიერებდნენ ტყავით შემოსილი რიტუალის მონაწილენი, რომლებსაც შინაურ ცხოველთა ნიღბები ჰქონდათ მორგებული? ბასილების როლის ერთგვარ იმიტაციას ხომ არ წარმოადგენდა მათი მოძრაობა? როგორც აღვნიშნეთ, რიტუალურ ბასილებსაც ცხოველთა ფიგურალური გამოსახულებებით აცხობდნენ. ცხოველის ბეწვი ფარავდა პერსონაჟის ადამიანურ ბუნებას. მკვლევართა აზრით, ცხოველის ტყავი და ბეწვი, რომლებშიც გამოწყობილი იყვნენ მონაწილენი, მიჩნეულია სიუხვისა და ბარაქიანობის სიმბოლოდ. მთელი ამ თეატრალიზებული ცერემონიის მიზანი სიუხვისა და ბარაქის რიტუალური გამოწყევა უნდა ყოფილიყო. ნაყოფიერი და მოსავლიანი წელიწადის უზრუნველსაყოფად მასპინძლები კარნავალში მონაწილე ძვირფასი სტუმრებისთვის სურსათ-სანოვაგეს არ იშურებდნენ. თუმცა კარდაკარ ჩამოვლის საბასილო რიტუალს, იმ სახით როგორიც შემორჩა ოსურ ხალხურ ტრადიციაში, თითქმის დაკარგული აქვს თავდაპირველი მნიშვნელობა და მან სამხიარულო-გასართობი ფუნქცია შეიძინა.

რიტუალის მონაწილენი საერთო საბასილო ტრაპეზისთვის საჩუქრებს სიმღერით თხოულობდნენ: არაყს, ლუდს, ლორის ნეკნებს, სამ ხაჭაპურს. თუ მასპინძელს სიძუნწეს შეამჩნევდნენ, ერთი სიმღერის დასრულების შემდეგ, მეორე გუნდი დაიწყებდა სიმღერას:

„ჩვენი საბასილო მოგვეცით, მოგვეცით,
ლურჯი ბოთლით ცხარე არაყი,
შავი დოქით შავი ლუდი, შავი ლუდი,
მოშიშხინე ღორის ნეკნები, ღორის ნეკნები,
ჩვენი სამი ხაჭაპური, ჩვენი სამი ხაჭაპური,
გამოგვიტანეთ, გამოგვიტანეთ,
ოი, ბათა, თქვენთან მოვდივართ.
თუ ძუნწი ხარ, არ მოვალთ.
გავბრუნდებით უმალ.“

(ოსური სიტყვიერება 2005: 28-29).

ტექსტში მთელი ყურადღება გადატანილია მელოდიაზე. თხოვნის გაძლიერების მიზნით გამოყენებულია გამეორება. სიმღერა გრძელდებოდა იქამდე, სანამ მასპინძელი რიტუალის მონაწილეებს არ გამოუტანდა ყველს, მოხარშულ ქათამს, კვერცხს, არაყსა და სხვა სასმელ-საჭმელს. რიტუალში მნიშვნელოვანი ადგილი ეკავა გროტესკსა და პანტომიმს. ზოგჯერ მეალილოები მართავდნენ ჩხუბის ინსცენირებას, რომლის დროსაც ერთ-ერთ მათგანი „იღუპებოდა“. მის „გასაცოცხლებლად“ კი საჭირო იყო სურსათ-სანოვაგე და ამ ხერხით ხშირად მასპინძლებს დამატებითი ნობათის გამოტანა უხდებოდათ. სიკვდილის იმიტაციითა და გაცოცხლებით რიტუალის მონაწილე პერსონაჟი მოკვდავ და მკვდრეთით აღმდგარ ღვთაებას განასახიერებდა. ქართულ ბერიკაობის რიტუალშიც კარნავალის მონაწილეებს თუ მასპინძელი არ გამოუტანდა სანოვაგეს, ბერიკები ეზოში გაუგორდებოდნენ, რაც ხალხს ცუდ ნიშნად მიაჩნდა (ქურდოვანიძე 2001: 91).

აღსანიშნავია, რომ ოსურ საბასილო რიტუალსა და ქართულ ბერიკაობაში გვხვდება მსგავსი სტრუქტურული ელემენტები. ქართული ბერიკაობა-ყერნობა აღმოსავლეთ საქართველოს სხვადასხვა კუთხეში ყველიერის კვირაში იმართებოდა და დიდმარხვის პირველ ორშაბათამდე გრძელდებოდა. მკვლევა-

რეპი ბერიკაობა-ყევნობას, აგრეთვე, კვდომა-ალორძინების მისტერიის გამოხატულებად მიიჩნევენ. მსგავს რიტუალებს, რომლებსაც წელიწადის სხვადასხვა დროს ასრულებდნენ, მთელ ჩრდილოეთ კავკასიაში იცნობდნენ.

აფსათის სიმღერა

„გუშინ შვიდნი გურჯანელნი
სანადიროდ წასულიყვნენ“.

ხალხური

ტრადიციულად ადამიანის საქმიანობის ძირითადი სფერო იყო მიწათმოქმედება და მესაქონლეობა. ბიბლიის მიხედვით, ღმერთმა შექმნა ცხოველთა და ფრინველთა სამყარო. ღმერთმა განაწესა ადამიანი მათ მწყემსად და პატრონად: „გამოსახა უფალმა ღმერთმა მინისაგან ველის ყველა ცხოველი და ცის ყველა ფრინველი და მიჰგვარა ადამს, რომ ენახა, რას დაარქმევდა“ (დაბ. 2: 19). ადამიანს განსხვავებული ურთიერთობა აქვს შინაურ და გარეულ ცხოველებთან. შინაური ცხოველი არის თვინიერი და ადამიანის სამსახურში განწესებული, ადამიანი ზრუნავს მასზე, მწყემსავს და პატრონობს. გარეულ ცხოველებთან მას სხვა სახის ურთიერთობა ჩამოუყალიბდა. ადამიანს არ შეუძლია გარეული ცხოველების თავის სამსახურში ჩაყენება და მათზე მზრუნველობა. მას მხოლოდ განსაზღვრული წესების დაცვით მათი მონადირება შეუძლია. ტრადიციულ საზოგადოებაში გარეულ ცხოველებზე ნადირობას ქცევებისა და წესების მთელი სისტემა განსაზღვრავდა.

მთის ხალხებში, უნაყოფო ნიადაგისა და სახნავ-სათიბი მიწების სიმწირის გამო, ნადირობა ხშირად საკვების მოპოვებისა

და თავის რჩენის ერთადერთ საშუალებას წარმოადგენდა. ამავე დროს ნადირობა წმინდა საქმედ იყო მიჩნეული.

გარეულ ცხოველს თავისი მფარველი, პატრონი და მწყემსი ჰყავს. კავკასიის ხალხთა მითებში ნადირთმწყემსი წარმოდგენილია როგორც ზოომორფული, ასევე ანთროპომორფული სახით. ის შეიძლება ყოფილიყო როგორც ქალი, ასევე – კაციც.

ხალხური ტექსტები წადირთმწყემსს სხვადასხვა სახელწოდებით იცნობენ, მაგრამ მათ აერთიანებთ მსგავსი ნიშნებიც, რომლებიც საერთო ტრადიციიდან იღებენ სათავეს.

ქართულ სამონადირეო ტექსტებში წადირთმფარველებად გამოყვანილი არიან ტყის დედოფალი ტყაში მაფა და კლდის ბინადარი დალი. მთხოობელები მათ მომაჯადოებელ სილამაზეს გვიხატავენ. „როგორც დალისთან, ასევე ტყაშ მაფასთან მონადირეს სასიყვარულო ურთიერთობა აქვს და ეს არის გარანტი მონადირის წარმატებისა“ (კიკნაძე 2005: 195). პოეტური და პროზაული გადმოცემები მოგვითხრობენ იღბლიან მონადირეებთან დალისა და ტყაში მაფას სასიყვარულო ურთიერთობებზე, აგრეთვე, წადირთპატრონთა სასტიკი შურისძიების შესახებ.

თავისუფალი სვანის მასალებით, სვანეთში მონადირე, კლდის დალის გარდა, წადირობაში გამარჯვებისთვის თხოვნით მიმართავდა ღმერთს, წმინდა გიორგის და აფსათს. მ. ჩიქოვანის აზრით, მატრიარქატის დროის კეთილი ღვთაება დალი თანდათან ბოროტ ტყის ქალად გარდაისახა და მის ადგილს კაცღვთაება აფსათი იჭერს (ჩიქოვანი 1959). თუმცა, ფოლკლორული მასალების მიხედვით, წადირთმფარველი პარალელურად შეიძლებოდა ყოფილიყო როგორც მამრი ღვთაება, ისე ქალღვთაება. ზოგჯერ კი წადირთა გამგებლები და-ძმის სახით არიან წარმოდგენილი, რომლებიც რიგრიგობით მფარველობენ წადირთა ჯოგებს.

ერთ-ერთ სვანურ ლექს-სიმღერაში ნადირთლვთაება აფსა-თი მოხსენიებულია ქალღმერთ დალის შვილად. მართალია, ისი-ნი ერთად მოქმედებენ და აჯილდოებენ მონადირეს, მაგრამ, ო. ონიანის აზრით, დალის, როგორც ნადირობის ქალღვთაების ფუნქციები ტექსტში შეკვეცილია, დაქვეითებული და იგი ოჯა-ხის დიასახლისის როლშია გამოყვანილი, ხოლო მისი შვილი აფ-სათი კი წარმოდგენილია მამრი ღვთაების, ნადირთპატრონის ფუნქციით (ონიანი 2009: 195).

აფსათის შესახებ სვანური ხალხური ტექსტები მეტად მწი-რია და არ იძლევა მისი, როგორც მითოლოგიური პერსონაჟის სრულყოფილად აღქმის საშუალებას. აფსათზე უფრო მეტი ხალხური ტექსტები მოიძებნება ოსურ ფოლკლორში. რადგან ირანული მოდგმის ხალხთა მითოლოგიისთვის უცხო იყო ნა-დირთპატრონის კულტის არსებობა, ოსურ მითოლოგიაში პერ-სონაჟ აფსათს კავკასიური სუბსტრატის გამოვლენად მიიჩნე-ვენ. კავკასიური სუბსტრატით ხსნის ვ. აბაევიც ოსურ ხალხურ ტექსტებსა და რწმენა-წარმოდგენებში აფსათის, როგორც ნა-დირთმწყემსის არსებობას (აბაევი 1990: 133). ამავე სახელწო-დების ნადირთ ღვთაება გვხვდება ყარაჩაელებისა და ბალყარე-ლების ხალხურ ტექსტებშიც.

მართლაც, ნადირთ მწყემს აფსათს ისეთივე თვისებები გა-აჩნია, როგორიც აფხაზურ ხალხურ ტექსტებში აუვეიფშას, ჩერქეზულში – მეზითხას, ქართულში – ოჩოპინტრეს და ა.შ. მაგრამ, შეიძლება ვიფიქროთ, რომ ოსებმა, ბალყარელებმა, ყა-რაჩაელებმა, ადილეელებმა, აბხაზებმა და ქართველმა მთიე-ლებმა საერთო მითოლოგიური ელემენტებით გამდიდრებული სამონადირეო ფოლკლორი შექმნეს. სიტყვა „აფსათის“ დამაჯე-რებელი და სარწმუნო ეტიმოლოგია სამეცნიერო ლიტერატუ-რაში არ მოიძებნება. ნ. ანთელავას აზრით, ქართული ენიდან უნდა იყოს შესული. ტერმინის დაბოლოება

„И“ ფორმანტს მკვლევარი ქართული ენის სახელობითი ბრუნვის ნიშნად მიიჩნევს (ანთელავა 2012: 32).

ოსური ხალხური ტექსტებისა და რწმენა-ნარმოდგენების მიხედვით ნადირთ მწყემსი აფსათი გარეულ ცხოველებს მწყემსავს და პატრონობს. ოსური ტრადიცია მისი სახელობის საკულტო ნაგებობას არ იცნობს. თუმცა მონადირეები მას ლოცვით მიმართავენ და ნადირობაში დახმარებას შესთხოვენ. აფსათის ადგილსამყოფელი არის სავხობის მთაზე, რომელიც ნართების ეპოსში ძირითად მოქმედებათა საკრალურ ცენტრს წარმოადგენს. აფსათს, ისევე როგორც ზოგადად ნადირთმფარველს, შეუძლია დახოცილი და შეჭმული ნადირის ძვლებიდან მისი გაცოცხლება. მონადირეები ნადირობაში წარმატებასაც და ხელის მოცარვასაც აფსათს უკავშირებდნენ. აფსათის დახმარების გარეშე მათ შეუძლებლად მიაჩნდათ ნადირის მოკვლა.

აღსანიშნავია, რომ ჩრდილოეთ ოსეთის მთიანეთში მონადირეებს შემუშავებული ჰქონდათ განსაკუთრებული, სამონადირეო ლექსიკა, რომელსაც მხოლოდ ნადირობის დროს იყენებდნენ. ვინც ნადირობას არ მისდევდა, იმან არც მონადირეთა „ენა“ იცოდა (ჩიბიროვი 2008: 206). სამონადირეო ენის არსებობა ოს ხალხში მონადირეობის მაღალ კულტურასა და ნადირობის ხანგრძლივ ტრადიციაზე მიუთითებს.

ნადირობა რომ წარმატებული ყოფილიყო, სანადიროდ წასვლის წინ ოსი მონადირეებიც იმავე სახის აკრძალვებს იცავდნენ, როგორსაც კავკასიის სხვა მთის ხალხებში. მაგალითად, ოსების რწმენითაც, არ შეიძლებოდა ნადირის დიდი რაოდენობით ხოცვა და ნადირთმწყემსის განრისხება. დანიშნულ ადგილზე მისვლის შემდეგ, მონადირეთა წინამდლოლი აფსათის მიმართ ლოცვას აღავლენდა და სახლიდან წამოლებულ რიტუალურ ქადებს სერავდა. თუ ნადირობა წარმატებული იქნებოდა, დაბრუნებისას მონადირეები იმავე ადგილას ჩერდებოდნენ, ან-თებდნენ ცეცხლს და აფსათის სახელზე რიტუალურ მწვადებს

– ახსარფამბალთას (ახსარფამბალი) ამზადებდნენ. სამონადირეო აკრძალვებისა და ქცევების დაწესებას ნართების ეპოსი აფსათს მიაწერს. როდესაც კერიის მფარველ საფასთან შეკრებილი ზეცის ბინადრები ნართ სოსლანს ასაჩუქრებდნენ, ნადირთაგატრონმა აფსათმა ყველას გასაგონად თქვა: „ – ვუნილადებ ჩემი საქონლიდან ნართებს, მაგრამ მთლად მუქთად არა: ვინც სანადიროდ წამოვა, თან სამი ხაჭაპური წამოილოს, ჩემი სახელი ახსენოს და სავხოხზე რომ ნადირს მოკლავს, მარჯვენა ბარკალი ყოველთვის პირველ შემხვედრს უნილადოს“ (ნართები 1988: 104). ამ წესს, ისევე როგორც მაღალმთიან კავკასიაში ყველგან, ოსი მონადირებიც მტკიცედ იცავდნენ. ნადირობის მფარველ აფსათს სამ ხაჭაპურს სწირავდნენ და პირველ შემხვედრს მოკლული ნადირის ბარკალს უყოფდნენ.

აფსათი (დიგ. ავსათი) არის ნართული თქმულებების ეპიკური პერსონაჟი. ნადირთმწყემსმა ავსათმა ნართ აცას ერთხელ ოქროს სალამური უსახსოვრა, რომელიც სიკვდილის წინ აცამ თავის შვილს, აცამაზს გადასცა. სალამურის ხმაზე სამყარო სამოთხისეულ წესრიგს უბრუნდებოდა: ქორბუდა ირმები ხარის ხმით ყვიროდნენ, დატოტვილ რქებს ცისკენ წევდნენ და ნარნარად ცეკვავდნენ, სავხოხის შავი თხები შავ პიტალოებზე ჩამორბოდნენ და რქაგრეხილ ხარ-ჯიხვებთან მსუბუქ სიმდს აბამდნენ, ავსათის ურიცხვი ჯოგები კლდის ძირს ასკდებოდნენ, მოტიტვლებული მინდვრები ათასფერი ყვავილით იფარებოდა და ზედ პეპლები დაფარფატებდნენ, მარადიულმა მყინვარებმა დნობა იწყეს...“ (ნართები 1988: 283).

ავსათმა აგუნდა მზეთუნახავსა და აცამაზს ვერცხლის დიდებული საქორნილო ეტლი აჩუქა, რომელშიც შვიდი ქორბუდა ირემი იყო შებმული.

ოსური ეპოსის მიხედვით, ნართი გმირების თავგადასავალში მნიშვნელოვანი მოვლენები ნადირობის დროს ხდება. სწორედ ნართების ეპოსში ასახული სამონადირეო მოტივები და

წარმოდგენები მიაჩნია ე. ვირსალაძეს კავკასიური წარმოშობის ელემენტებად, ამ რეგიონის მითოსური მსოფლმხედველობის-თვის ორგანულად და დამახასიათებლად, ადგილობრივი სუბ-სტრატის გამოვლინებად (ვირსალაძე 1964: 99).

ოსურ ფოლკლორულ რეპერტუარში გვხვდება ნადირთ-მწყემს აფსათისადმი მიძღვნილი ლიროეპიკური სიმღერებიც.

სასიმღერო ტექსტის მიხედვით, აფსათი არის მხცოვანი, რომელსაც მთის კალთაზე დილით დიდი ხის ქვეშ ტკბილად სძინავს, მისი შვიდი ვაჟი კი მას ხან ფოთლიანი რტოებით ბუ-ზებს უგერიებს, ხანაც ისინი ვახშამს ამზადებენ. ტ. მახაურის აზრით, „ბერძნულ პანს მოგვაგონებს ოსური ნადირთლვთაება აფსათი, მაგრამ ის პანივით მარტოხელა როდია, გარს ახვევია საკუთარი ვაჟების ამალა და განცხრომით სძინავს (მახაური 2008: 24). აღსანიშნავია, რომ ოსურ ეპიკურ და ლიროეპიკურ ტექსტებში მფარველი წმინდანები პერსონიფიცირებული არიან და ზოგიერთ მათგანს ჰყავს შვილები: ვასთირჯის შვილს ჰქვია ძამბოლათი, ვაცილას ვაჟს – თემსიყო, აფსათის ძეს – ბუქუმარი, სხვა ვერსიით – უუჟუმარგი. ისინი თითქოს ადამიანების მსგავსად ცხოვრობენ და მოქმედებენ. ოსურ ტექსტებში ზეცის ბინადრები ადამიანურ თვისებებთან ერთად ფლობენ ღვთაებრივ ბუნებას, ისინი ადამიანებზე მაღლა დგანან და მათ მფარველობენ.

ყარაჩაულ-ბალყარული ფოლკლორის მიხედვით, აფსათს ჰყავს უმშვენიერესი ქალიშვილი, რომელიც განთქმულ მონადირეს – ბინოგერს სამფეხა თეთრი ირმის სახით ევლინება:

„ზესამე ფერი იმ ორ ფეხზე მაღალი ჰქონდა,
საქალამნე სადგისივით ჩლიქები ჰქონდა,
რქები კი ჰქონდა, როგორც შამფური.“

(კავკასიის ფოლკლორი 2008: 945).

ბიინოგერი ციცაბო კლდის წვერზე დაეწია თეთრ ირემს, რომელმაც დასაღუპავად განწირულ მონადირეს თავისი ნამ-დვილი ვინაობა გაუმჟღავნა:

„არც ჯინი ვარ, არც შეითანი,
არც ირემი, რომ დამიმიზნო და მესროლო,
არც ფურირემი, რომ გამომწველო.
მე ირემი კი არადა, აფხათის ლამაზი ასული ვარ.“

(კავკასიის ფოლკლორი 2008: 946).

აფხათის ასული ყარაჩაულ-ბალყარულ მითოსში ისეთივე თვისებებით არის წარმოდგენილი, როგორითაც დალი – სვანურ სამონადირეო ტექსტებში. ორივე ნადირობატრონი მონადირეს ზომორფული და ანთროპომორფული სახით ეცხადება. ადამიანის ურთიერთობა ნადირობასთან საბედისწერო სახეს იღებს და, როგორც წესი, ტრაგიკულად მთავრდება. აფხათის ასული დალის მსგავსად წყევლის ბიინოგერს:

„ფეხქვეშ მღელვარე ზღვა გქონდეს,
თავს ზემოთ – მხოლოდ ცის სიმაღლე,
აქეთ-იქიდან ისე მჭიდროდ მოგადგნენ კლდენი,
შეითანიც ვერ გაეტიოს“.

(კავკასიის ფოლკლორი 2008: 946).

აფხათის ასულისგან დაწყევლილმა მონადირემ თხუთმეტი დღე დაჰყო კლდის ქიმზე. მკლავზე ხორცი აიჭრა და იმას სჭამდა, კანჭზე ხორცი აიჭრა და თავის ერთგულ ძალლს იმით კვებავდა.

ბიინოგერი სასიკვდილოდ არის განწირული. მას არც ძმის მზრუნველობა და არც საყვარელი ყაბარდოელი ქალის ხვეწნა--ვედრება შველის. ის ვერ ჩამოდის კლდის ქიმიდან და, საბორლოოდ, აფხათის ასულისგან დაწყევლილი, ჩამოვარდება და და-

იკეპება „როგორც სახინკლე ხორცი“. ხალხურ ტექსტში, მართალია, არ არის ზუსტი მინიშნება, მაგრამ, სავარაუდოდ, ყარაჩაულ-ბალყარულ სიმღერაში ბიინოგერი აფსათის ასულმა ღალატისა და ყაბარდოელი ქალის სიყვარულის გამო დალუპა.

აფსათის შესახებ ერთ-ერთი ცნობილი ოსური სასიმღერო ტექსტის პირველ ნაწილში გამოხატულია მთქმელის ლირიკული განცდები, მონიშნება და პატივისცემა ნადირთ მწყემსის მიმართ. როგორც ცნობილია, მონადირეობა დაკავშირებული იყო რისკა და ხიფათთან. ადამიანი ყველაზე მეტად იქ, ნადირთ პატრონის სამფლობელოში, ვიდრე სხვა ნებისმიერ ადგილზე, განიცდიდა ბუნების სტიქიურ ძალებს და, ამასთანავე, გრძნობდა საკუთარ უმწეობას. ამიტომ მონადირეები ცდილობდნენ ნადირთპატრონის გულის მოგებასა და მის მომადლიერებას. ოსურ ფოლკლორში პოპულარულია სიმღერა შვიდი მონადირის შესახებ, რომლებიც აფსათს ლოცვითი შინაარსის ლექს-სიმღერით ნადირობაში შეწევნას სთხოვენ:

„ეპეი აფსათ, შეგვენიე,
მოგვეც ქორბუდა ირემი,
მოგვეხდე და შეგვიწყალე.
შენზე მლოცველი სუყველა,
აგვავსე შენი წყალობით.
გამობრძანდი, გადმოგვხედე
მაღლობიდან დაბლობში მყოფთ.
გამობრძანდი, გადმოგვხედე,
მხცოვანო აფსათ, შეგვენიე.“

(ოსური სიტყვიერება 2005: 26-27)

სიმღერის მეორე ნაწილს აქვს ეპიკური შინაარსი, რომლის სიუჟეტიც აფსათისა და მონადირეების ურთიერთობას ასახავს.

ტექსტის მიხედვით, ხეობის ბოლოში სადღაც თოფმა იგრიალა. აფსათმა, როგორც ნადირთ პატრონმა, მყისვე გაიღვიძა,

წამოხტა და თავის ვაჟებს ხმაურის მიზეზი გამოჰკითხა. აფსა-
თის ყველაზე ფეხმარდი ვაჟი სასწრაფოდ გავარდა, ხელი მოიჩ-
რდილა და, რაც დაინახა, მამას შეატყობინა:

ქვემოთ, ხეობის ბოლოდან შვიდი მხედარი მოიმღეროდა.
შავ ცხენებზე ამხედრებულ მონადირეებს თოვი მხარილივ
ეკიდათ და აფსათს ევედრებოდნენ:

„გამობრძანდი, გადმოგვხედე,
მაღლობიდან დაბლობში მყოფთ.
ჩვენო აფსათ, შეგვიწყალე,
ირმის ჯოგი გვიწყალობე!“

(ოსური სიტყვიერება 2005: 26-27).

ოსური სიმღერის მიხედვით, აფსათმა შვიდი მხედრის
ლოცვა-ვედრება შეისმინა. მან თავის ვაჟებს სტუმრების პატი-
ვისცემა, ირმის ჯოგის მორეკა და შესაფერისი გამასპინძლება
უბრძანა. აფსათს, როგორც ნადირთპატრონსა და ნადირ-
თმწემსს, როგორც მასპინძელს, ტყეში სტუმრად მოსულ მონა-
დირეთა დახვედრა მართებდა. თუმცა სამონადირეო სიმღერის
სხვაგვარი დასასრულიც არის შესაძლებელი.

მაგრამ ვინ არის ის შვიდი, შვიდ შავ ცხენზე ამხედრებული
მონადირე? ქართულ ხალხურ სასიმღერო პოეზიაში არის ერთი
ტექსტი, რომელშიც გადმოცემულია სანადიროდ წასული შვიდი
გურჯანელი მონადირის თავგადასავალი. ლექსის მიხედვით,
მათი წადირობა ტახზე იღბლიანი ყოფილა:

„გუშინ შვიდნი გურჯანელნი
სანადიროდ წასულიყვნენ,
იქ მოეცლათ თეთრი ტახი,
ხორცი მოემრავლებინათ,
მოეკლათ, ხორცი ემრავლათ,
სხვა ნაპირზე წასულიყვნენ.“

ლექსში ტახზე ნარმატებულ ნადირობას მოსდევს ჯიხვებზე უიღბლო ნადირობა. ჯიხვი, სამონადირეო ტრადიციის მიხედვით, წმინდა ცხოველად მიიჩნევა. „სხვა ნაპირზე“ წასულ შვიდ გურჯანელ მონადირეს ჯიხვზე ნადირობაში ხელი მოეცარა: შვიდმა მონადირემ შვიდ-შვიდჯერ ესროლა ნადირს, მაგრამ წარუმატებლად. მხოლოდ ბერმა პაპამ შეძლო ჯიხვის მონადირება:

„შვიდთა ვესროლეთ შვიდ-შვიდი,
არც ერთი არ მოეკიდა,
ესროლა ბერმა პაპამა,
ჯიხვი რქით გადმოეკიდა“.

პაპის ეპითეტი „ბერი“ მხოლოდ მის ხანდაზმულობას არ გამოხატავს. ის მოხუცის სიწმინდეზეც მიანიშნებს. სიწმინდე მისი იღბლიანი ნადირობის მიზეზი უნდა ყოფილიყო. სანადიროდ წასულ მონადირეს სიწმინდის ისეთივე ხარისხით დაცვა მოეთხოვება, როგორიც ბერს, ხევისბერს, ჯვარში შესვლის წინ.

ლექსს აქვს საკრალური შინაარსი, რადგან ნადირობა ადამიანთა საქმიანობის საკრალურ სფეროს განეკუთვნებოდა. ლექსში საკრალური რიცხვის – შვიდის – ხშირი ხსენებაც ამის დასტურია. როგორც ჩანს, შვიდ მონადირეს უფრო მეტი სიწმინდე მოეთხოვებოდა ნადირთპატრონისგან.

სხვა ქართული ბალადის მიხედვით, შვიდმა მონადირემ შვიდ-შვიდჯერ უშედეგოდ ესროლა ვეფხვს მაშინ, როცა ბიძის პირველივე ნასროლზე „ვეფხვი მწკლიდ ჩამეეკიდა“:

„შვიდ ძმათა, მერვეს ბიძასა ვეფხვი კლდით გადმოგვეკიდა.
შვიდთავ ვესროლეთ შვიდ-შვიდი, ვეფხვს ერთიც არ მეეკიდა.
მერვემ ესროლა ბიძამა, ვეფხვი მწკლით ჩამეეკიდა.
შვიდნივემც ქალად გვაქცივნა, ყროლ კაცს საქმარედ აგვეკიდა!
ეს ჩვენი თოფ-იარალი ჭალას მურყვანზე დაჰკიდა!“

(ხალხური ანთოლოგია 2010: 83).

როგორც ჩანს, უძველეს სამონადირეო ტრადიციასთან გვაქვს საქმე, როცა მონადირეთა საკრალურ რაოდენობას მათი იღბლიანი ნადირობა უნდა უზრუნველყო. ოსური ლექს-სიმღერა ბოლომდე არ გადმოგვცემს, თუ როგორ უმასპინძლა ნადირთმწყემსმა აფსათმა შეიდ მონადირეს. ჩვენამდე მხოლოდ ლიროეპიკური ტექსტის ფრაგმენტმა მოაღწია. შეიდი მონადირის წარმატება ოსურ სიმღერაში მათ მიერ სიწმინდისა და ქცევის წესების დაცვაზე და, შესაბამისად, აფსათის კეთილგანწყობაზე იქნებოდა დამოკიდებული.

ოსურ და ქართულ ხალხურ პოეზიაში პოპულარული ყოფილა შეიდი მონადირის მოტივი. ორივე ტექსტი, ქართულიც და ოსურიც, სავარაუდოდ, საერთო არქეტიპული ინვარიანტიდან მომდინარეობს.

მიცვალებულის ცხენის კურთხევა (ტექსტი და რიტუალი)

ოსურ სამგლოვიარო რიტუალებს შორის ერთ-ერთი მნიშვნელოვანი ადგილი უკავია მიცვალებულის ცხენის კურთხევას. ოსების რწმენით, მიცვალებულს ამ ქვეყნიდან სულეთში გასამგზავრებლად და საიქიოს გზაზე დაბრკოლებების გადასალახად უეჭველად სჭირდებოდა ცხენი, რომელიც იმ ქვეყნად მოემსახურებოდა. ცხენს, როგორც წესი, გარდაცვლილი მამაკაცის სახელზე აკურთხებდნენ.

ცხენის კურთხევის ტექსტის ოსური სახელწოდება გადმოიცემა კომპოზიტით ბაზფალდისან (ნახფალდისან), რომლის პირველი ნაწილი ბახ (ნახ) აღნიშნავს ცხენს, ხოლო მეორე ნაწილი – ფალდისან (ფალდისან) – გამოხატავს შენირვას, კურთხევას, ქმნას, მოხდენას.

ცხენის კურთხევის ტექსტს წარმოთქვამდა საიდუმლო რიტუალებში განდობილი და საზოგადოებაში პატივცემული უხუცესი, რომელსაც ერქვა ბაზფალდისაგი (ცხენის შემწირველი). ის ფლობდა ცხენის კურთხევის ტექსტის სრულყოფილ ცოდნასა და დეკლამაციის ხელოვნებას. ასეთ მოხუცებს ჩრდილოეთ ოსეთის შორეულ სოფლებშიც იცნობდნენ და ხშირად იწვევდნენ მიცვალებულის დაკრძალვაზე.

ცხენის კურთხევის (ნახტომისაჲ) რუსული თარგმანი 1843 წელს ა. შოგრენმა უურნალ „მაიაკში“ გამოაქვეყნა (შოგრენი 1843), მოგვიანებით, 1868 წელს, ა. შიფნერმა გამოსცა „ოსური ტექსტები“. კრებულში მან მოათავსა ცხენის კურთხევის ორი ვერსია, სახელდობრ, ერთი – ვ. წორაევის ოსურ ენაზე ჩაწერილი ნიმუში (რუსულ ენაზე თარგმანითურთ), ხოლო მეორე – ა. შოგრენის ადრე გამოქვეყნებული ტექსტი (შიფნერი 1868: 25-30; 36-38). ასევე ცნობილია ვ. მილერისეული ცხენის კურთხევის დიგორული ვარიანტი, შესაბამისი რუსული თარგმანითა და კომენტარებით (მილერი 1881: 109-115). ცხენის კურთხევის კიდევ ერთი ვარიანტი გვხვდება 1987 წელს ცხინვალში გამოქვეყნებულ ბ. გატიევის წიგნში “Суеверия и предрассудки у осетин”. კნ. 3.

2005 წელს ქართულ ენაზე (ოსურ დედანთან ერთად) გამოქვეყნდა ცხენშეწირვის ტექსტი, რომელიც ოსურიდან თარგმნეს 6. ბეპიევმა და ბ. ცხოვრებოვამ (ოსური სიტყვიერება 2005: 46-52). ცხენშეწირვის ხუთივე ვარიანტი (ა. შოგრენის, ა. შიფნერის, ვ. მილერის, ბ. გატიევისა და 6. ბეპიევის გამოქვეყნებული ვერსიები) განსხვავდება ერთმანეთისგან, მაგრამ მათ შორის სხვაობა არ არის სიღრმისეული, ოთხივე ტექსტს აქვს მსგავსი სტრუქტურა და საერთო საზრისი, ისინი სხვადასხვა დეტალებით ავსებენ ერთმანეთს.

ცხენის კურთხევის რიტუალს საფუძვლად უდევს ოსი ხალხის მითორელიგიური წარმოდგენები საიქიო ცხოვრებაზე, რომლის მიხედვით, გარდაცვლილს იმ ქვეყნად ჰქონდა ისეთივე

მოთხოვნილებები, როგორიც მიწიერ ცხოვრებაში. ამიტომ ნათესავები გარდაცვლილს ისე ამზადებდნენ, როგორც რეალურ ცხოვრებაში ემზადებიან შორეული მგზავრობის წინ.

ბახვალდისაგი ცხენის კურთხევის ტექსტში აღნერს იმ მისტიკურ, რთულ და სახიფათო მოგზაურობას, რომელიც მიცვალებულის სულს უნდა გაევლო ბეწვის ხიდიდან და საიქიოს კარიბჭიდან სასუფევლამდე. ტექსტში აქტუალურია გზის თემა, რადგან საიქიოს თითოეული „კადრი“ ცხენის კურთხევაში დანახულია გზიდან, მგზავრის პოზიციიდან.

როგორც ცნობილია, ადამიანი გარდაცვალების შემდეგ საბოლოოდ მკვიდრდება ახალ სტატუსში. ტრადიციულ საზოგადოებაში ადამიანს ცხოვრების გზაზე, დაბადებიდან გარდაცვალებამდე, უხდებოდა მრავალი დაბრკოლების გადალახვა. თავისი ყოფიერების სხვადასხვა ეტაპზე ადამიანი პასუხს აგებდა განვლილ ცხოვრებაზე და საზოგადოებას ერთგვარ ანგარიშს აბარებდა. საზოგადოებასა და მის კონკრეტულ წევრს შორის ურთიერთვალდებულება და ურთიერთპასუხისმგებლობა ყველაზე მძაფრად ვლინდება სამგლოვიარო რიტუალებში.

ცხენშენირვის ცერემონიის მიზანი იყო მიცვალებულის აღჭურვა სულის ცხენით, რომელსაც უნდა მიეყვანა გარდაცვლილი იმქვეყნად მისთვის გამზადებულ ადგილზე. ცხენშენირვის რიტუალი მოწოდებული იყო მიცვალებულისთვის დაელოცა საიქიოში გასავლელი გზა, რის შემდეგაც, ოსების რწმენით, გარდაცვლილი ახალი სტატუსით გააგრძელებდა მარადიულ ცხოვრებას წინაპრების სულთა საუფლოში.

ცხენის კურთხევის ტექსტს აქვს ესქატოლოგიური შინაარსი. მასში აღნერილია მომავლის უკანასკნელი მოვლენები: სამსჯავრო, ჯოჯოხეთი (ზინდონი) და სამოთხე (ძანათი).

ცხენის კურთხევა, როგორც წესი, ტარდებოდა უშუალოდ დაკრძალვის წინ სოფლის სასაფლაოზე, მიცვალებულის საფლავთან ან საგვარეულო აკლდამასთან. თუმცა მაღალმთიან

ოსურ სოფლებში, სადაც სასაფლაო განთავსებული იყო ციცაბო, კლდოვან ფერდობზე, ცხენს ზოგჯერ სახლიდან მიცვალებულის გამოსვენების შემდეგ ეზოში აკურთხებდნენ. მაჰმადიანი ოსებიც ცხენშეწირვის რიტუალს ატარებდნენ არა სასაფლაოზე, არამედ გარდაცვლილის ეზოში.

მიცვალებულის სულეთში გასამგზავრებლად ირჩევდნენ საუკეთესო ცხენს, რომელსაც რიტუალისთვის განსაკუთრებით ამზადებდნენ. მას გარდაცვლილის უფროსი, გამოცდილი ნათესავი რთავდა და კაზმავდა. ცხენს უნაგირის ქვეშ ბალიშის ნაცვლად უფენდნენ უხმარ ტარსიკონს ან ზოგჯერ ქვრივი ქალის თავსაფარს. თუ გარდაცვლილი ახალგაზრდა იყო, ცხენს ზურგზე ფოჩებიან აბრეშუმის ბალდადს აფარებდნენ. კისერზე ფაფარს ურთავდნენ. უნაგირზე ჰკიდებდნენ ჩაბალახს, შოლტსა და საბრძოლო იარაღს. ცხენს კუდსა და ფაფარს უწნავდნენ, რომლებსაც სხვადასხვა ფერის აბრეშუმისა და სატინის ბაფთებით უმშვენებდნენ. ქალები მიცვალებულისთვის საჩუქრად იხსნიდნენ სამკაულებს – ბეჭდებს, ყელსაბამებს, სამაჯურებს – და ცხენის მოსართავად იყენებდნენ. ცხენისთვის მომზადებული ჰკონდათ ცოტა ფეტვი ან ქერი, როგორც საგზალი. ცხენი ისე იყო მორთულ-მოკაზმული თითქოს შორეულ მოგზაურობაში მიდიოდა. ცხენის კურთხევის დროს ცდილობდნენ რიტუალისთვის დადგენილი წესებით ეხელმძღვანელათ, სხვა შემთხვევაში, ოსების რწმენით, რიტუალი დაკარგავდა თავის დანიშნულებას (რახნო 2010: 218).

ცხენის გამძლოლს ხელში ეკავა უხმარი მათრახი. ცხენი მიჰყვებოდა კუბოს და მიაცილებდა მიცვალებულს სოფლის სასაფლაომდე ან საგვარეულო აკლდამამდე. სასაფლაოზე მიჰქონდათ აგრეთვე დაკრძალვის დღეს დაკლული ცხვრის ტყავი და სასმელი. ხალხი, რომელიც მიცვალებულის დაკრძალვას ესწრებოდა, საფლავის ირგვლივ წრიულად იკრიბებოდა. ამის შემდეგ იწყებოდა ცხენის კურთხევის ძირითადი რიტუალი. კუ-

ბოს თავთან მორთულ-მოკაზმული ცხენი მიჰყავდათ. ცხენი რომ მშვიდად ყოფილიყო, მას პირზე მარცვლეულით სავსე თოფრას ჰქიდებდნენ. შეჯგუფებული ხალხიდან გამოდიოდა ბახფალდისაგი, ცხენის წინ ჩერდებოდა, აღვირს ხელში უდებდა მიცვალებულს, თვითონ იღებდა ლუდით სავსე თასს ან არყით სავსე ყანნს და წარმოთქვამდა ცხენის კურთხევის (ნახტელდი-სან) ვრცელ ტექსტს.

ოსური „ცხენის კურთხევა“ წარმოადგენს ესქატოლოგიურ ხალხურ ტექსტს, რომელიც მოგვითხრობს საბოლოო დასას-რულზე, ადამიანის საბოლოო ბედზე, გადმოგვცემს ადამიანის სულის საბოლოო დამკვიდრებას ახალ სტატუსში. რის შესახე-ბაც „ცხენის კურთხევა“ გვიცხადებს, მისი უშუალო მხილველი მხოლოდ მიცვალებული შეიძლება გახდეს. ის თითქოს ხილვებ-ზე აგებული. რიტუალის მონაწილე მსმენელი კურთხევანში გადმოცემულ ამბავს აღიქვამს როგორც წამდვილად მომხდარს ან აუცილებლად მოსახდენს. ტექსტში საიქიო ცხოვრებისა და სულეთში მიცვალებულთა გავლილი (გასავლელი) გზის აღწერა შეიცავს ეზოთერულ ცოდნას მიღმა სამყაროზე.

ფორმის მიხედვით ბახფალდისანი არის სრულქმნილი პოე-ტური წაწარმოები, კომპოზიციურად შეკრული და მყარი სტრუქტურის მქონე ტექსტი. ის განეკუთვნება ლიროებიკურ ჟანრს, რადგან მასში მძაფრი ადამიანური განცდებით არის გადმოცემული მიღმა სამყაროს მისტიკური სცენები. „ცხენშე-წირვის“ ზოგიერთ ეპიზოდს აქვს, აგრეთვე, ხევსურული წაქა-დაგარის ფორმა და შეიცავს წინასწარმეტყველებას საიქიო ცხოვრებაზე.

ცხენის კურთხევის ტექსტი, ფოლკლორული ტრადიციის შესაბამისად, თაობიდან თაობას ზეპირი სახით გადაეცემოდა. თუმცა ბახფალდისაგები მიუთითებენ, რომ იმის ცოდნა, რაზეც ტექსტში საუბრობენ, ღვთაებრივი გამოცხადების შედეგად შე-იძინეს. ცხენის კურთხევის ტექსტზე გარკვეული გავლენა უნდა

მოეხდინა სახარებასა და აპოკრიფულ ლიტერატურას, რომლის ცალკეული ეპიზოდები ზეპირი გზით ვრცელდებოდა ჩრდილოეთ ოსეთის მთის ხეობებში.

ცხენის კურთხევის ტექსტის სტრუქტურა და ძირითადი შინაარსი, რამდენადაც ზეპირად შესრულებულ ტექსტს შეუძლია, ინარჩუნებს მეტ-ნაკლებ სიმყარეს. თუ არ ჩავთვლით ფოლკლორული ნაწარმოებისთვის დამახასიათებელ ვარიანტულ განსხვავებებს, ყოველ მიცვალებულთან ცხენის კურთხევის (ნახტალდისან) ერთი და იგივე ტექსტი სრულდებოდა. ბაზალდისაგი „მოჰყვებოდა მიცვალებულის ღირსებებს, შემდეგ მხატვრულად ახასიათებდა საიქიოში მიმავალს, მისი გზის სიძნელებს, რომელთა დასაძლევად მას უეჭველად ცხენი ესაჭიროებოდა. ამასთან მისი სიტყვა გამოირჩეოდა მაღალმხატვრულობითა და მსმენელზე ზემოქმედების დიდი უნარით“ (ჩეთითი 1988: 83).

ცხენის კურთხევის ტექსტში ბაზალდისაგი აღწერდა გარდაცვლილი მოყმის სულის შესვლას საიქიოში, მის მიერ სასუფევლამდე განვლილ გზას, რომელიც, ხალხის წარმოდგენით, ყოველ მიცვალებულს უნდა გაევლო. კაი ყმის სასუფეველში დამკვიდრების ტექსტი შეიძლებოდა გამოეყენებინათ ნებისმიერი გარდაცვლილის ცხენის კურთხევის რიტუალში. ცნობილია ვ. მილერის მიერ გამოქვეყნებული ბაზალდისანი, რომელშიც მოთხოვილია სოსლანის თანამებრძოლის და მასთან ერთად გორის ციხის გამტეხის, ზიმაიხოს ვაჟის არზიშაიხას მიერ საიქიოს გზის გავლა და მისი სამოთხეში დამკვიდრება.

ცხენის კურთხევის ტექსტის მთავარი პერსონაჟი არის საიქიოს გზაზე შემდგარი, სულის ცხენზე ამხედრებული, მრავალი ღირსებით შემკული გარდაცვლილი მოყმე. მთელი ტექსტი ორიენტირებულია მის მოძრაობაზე. მთავარი გმირის გარდა, ტექსტში მონაწილეობენ მფარველი წმინდანები, მითოლოგიური პერსონაჟები და, რაც მთავარია, საიქიოს ბინადრები. ტექ-

სტი მოწოდებულია, მსმენელს განუმტკიცოს რწმენა იმქვეყნიურ მარადიულ ცხოვრებაზე.

ბახფალდისანს აქვს მყარი სტრუქტურა. ის იწყება მიცვალებულის ამქვეყნიური, განვლილი გზის შეფასებით, ან ღმერთის განდიდებით და მთავრდება მიცვალებულის იმქვეყნიური, მარადიული ცხოვრების დალოცვით. დალოცვა-განდიდების ამ ორ დასაწყის და დასასარულ ფორმულებს შორის არის მოქცეული ცხენის კურთხევის ძირითადი ეპიკური ნაწილი, რომელიც პირობითად შეიძლება ხუთ ნაწილად დავყოთ: 1. ზეციერთა მონაწილეობა ცხენის არჩევა-მომზადებაში საიქიოში გასამგზავრებლად; 2. ბეწვის ხიდი და საუბარი ამინონთან; 3. ცოდვილები და მართლები საიქიოში; 4. ბავშვები სამოთხის შესასვლელთან; 5. სასუფეველში დამკვიდრება. ცხენის კურთხევის ვარიანტებს შორის ყველაზე ვრცელი არის მესამე ნაწილი, საიქიოში ცოდვილთა ტანჯვისა და მართალთა ნეტარების ამსახველი სცენები.

გარდაცვლილზე, როგორც წესი, მხოლოდ კარგს ამბობენ. ბახფალდისაგიც (ცხენის დამკურთხებელი) იცავს საყოველთაოდ დამკვიდრებულ ტრადიციას. კურთხევის დასაწყისში ის მიცვალებულის განვლილ ცხოვრებას აფასებს და აცხადებს: „კარგი კაცი იყო და მოკვდა. კარგი ცხენი უნდა შევწიროთ.“ გარდაცვლილის პირად ლირსებებზე უფრო ვრცლად მოგვითხრობს ცხენის კურთხევის შოგრენისეული ტექსტის დასაწყისი: „უფალო ღმერთო, დღეს წავიდა ლირსეული ადამიანი, ის იყო ძალან კარგი კაცი, რომლის მსგავსიც მხოლოდ ერთია ზეცაში, ახლა ყველა, აქ მოსული, მასზე ტირის. ის იყო ყველას დამპურებელი, ყველას შემრიგებელი და ამიტომ ყველას უყვარდა. წმინდა გიორგი ძმობაში ეფიცებოდა...“ (შიოზნერი 1868: 25). ცხენის კურთხევის ზოგიერთი ვარიანტი იწყება ღმერთის განდიდების ფორმულითა და მიცვალებულის სულის დალოცვით: „დიდება შენდა, ღმერთო! შენ შეგვქმენი. დღეის იქით ამათ მეტ დარდს ნუღარ მოხკერდებ, ნათელშიც იქნები, (სახელი)! შე-

ნი საყვარელი ცხენი იყო და შენიანები შენ გნირავენ. გახსნილი გქონდეს გზა სამოთხისკენ, გახსნილი გზითაც მისულიყავი ბარასთირთან“ (შიფნერი 1868: 36). ანალოგიური დასაწყისი აქვს მიცვალებულის სულის კურთხევის ფშავხევსურულ ვერ-სიებს. განსხვავებას ქმნის საიქიოს გამგებლის ბარასთირის ხენება.

ცხენის კურთხევის ტექსტს აქვს ქრისტიანული დალოცვის მარტივი და რთული დასასრული ფორმულები. ყველაზე უმარტივეს ლოცვით ფორმულაში ბაზფალდისავი ერთი და იმავე სიტყვების სამჯერ გამეორებით გარდაცვლილს სამოთხეში დამკვიდრებასა და მარადიულ ნათელს უსურვებს: „სამოთხეში შესულიყავი! იყავ ნათელში, იყავ ნათელში, იყავ ნათელში! ამინ, ამინ, ამინ!“ (შიფნერი 1868: 38)

როგორც ცნობილია, ოსური ფოლკლორის ყველა უანრში ვხვდებით ნართების ეპოსის ცალკეულ ელემენტებს. გამონაკლისს არც ცხენის კურთხევის ტექსტი წარმოადგენს. ერთ-ერთი ყველაზე ვრცელი ნართული ამბავი „სოსლანის მოგზაურობა საიქიოში“ და ცხენის კურთხევის ტექსტი საერთო სიუჟეტზეა აგებული, ორივე ნანარმოებში გვხვდება პარალელური ეპიზოდები და მოტივები. ყოველ მიცვალებულს, როგორც „ცხენ-შენირვიდან“ ირკვევა, სასუფევლისკენ იმავე გზის გავლა უხდება, რომელიც, ნართების ეპოსის მიხედვით, გაიარა სოსლანმა. უფრო ზუსტად, ოსების რწმენით, ყველა მიცვალებული სააქაოდან საიქიოში ერთსა და იმავე გზას გადის, ამიტომ ყოველი ახალი შესრულებისას „ცხენშენირვის“ ტექსტში აღწერილი სცენები მეტ-ნაკლებად უცვლელი რჩება.

ცხენის კურთხევის ტექსტი თავდაპირველ არქეტიპულ ქმედებას გვიცხადებს, კერძოდ, ზეციური რაშით მიცვალებულის მგზავრობას მიღმა სამყაროში. ტექსტში ძირითადი მოქმედება ხდება საიქიოს გზაზე. რადგან მგზავრი სწრაფად გადის მანძილს, სივრცე და ლანდშაფტი ხშირად იცვლება. ცხენის კურ-

თხევის ტექსტში მოქმედება ხდება უცხო, ცოცხალთაგან უხილავ მიღმა, თითქოს ვირტუალურ სამყაროში. თუმცა ტექსტი გვისახელებს იმ ადგილებს, სადაც განსაკუთრებული დაბრკოლების გადალახვა უხდება საიქიოს მგზავრს და ისინი სულეთის ერთგვარ „ტოპონიმებს“ წარმოადგენენ, როგორიცაა: საიქიოს კარი, ბეწვის ხიდი, გზაჯვარედინი, შუა გზა, სამოთხის კარიბჭე, რძისფერი ტბა, მწვანე მინდორი. საიქიოს ბინადართა სამოქმედო ასპარეზი, რომელიც პარალელური სივრცისა და დროის შთაბეჭდილებას ქმნის, არ არის ერთფეროვანი. მართალია, ტექსტში ნახსენებია მთები, კლდეები, ტბები, ველები და მდინარეები, მაგრამ საიქიოს ლანდშაფტი განსხვავდება წუთისოფლის ბუნებისგან. საიქიოს უცნობი სივრცე, მის ბინადართა უცნაური ქცევებით, ტექსტში აღძრავს სიუცხოვის განცდას.

ბაზფალდისაგის წარმოთქმულ ცხენის კურთხევის ვარიანტებში მოქმედების დრო ხშირად იცვლება. ბაზფალდისაგი მოქმედებას გადმოგვცემს ხან როგორც წარსულში მომხდარს, ხან – აწმყოში და ხან როგორც მომავალ დროში მოსახდენ-შესაძლებელს. მაგრამ ის, რაც „ცხენშენირვაში“ ხდება, სცილდება ჩვეულებრივ, ამქვეყნიურ ქრონტოპს. ტექსტში მოქმედება, რომელიც სწრაფად ვითარდება, ხდება მითოსურ დროში. ეს დრო რიტუალურად მეორდება ყოველ აწმყოში, ყოველ მიცვალებულთან, რადგან ყველა გარდაცვლილმა რიტუალურად იგივე გზა უნდა გაიაროს, რომელიც ოდესლაც ზეციურმა არსებებმა აკურთხეს და პირველმა მიცვალებულმა გაიარა. რიტუალის გზით ხდება თავდაპირველი მითიური მოვლენების გამოხმობა. ბაზფალდისაგიც, სულის ცხენიც და მიცვალებულიც იმეორებენ იმ პირველ, არქეტიპულ ქმედებებს. შეიძლება ვიფიქროთ, რომ საიქიოს გზა სასუფევლამდე წუთისოფლის გზის ერთგვარ პარადიგმას წარმოადგენს. ტექსტის ძირითადი ნაწილი მაინც გარდაუვალ მომავალზე მოგვითხრობს, რომელიც უნდა გადაიტანოს საიქიოში მიმავალმა მხედარმა. ტექსტი ორიენტირებუ-

ლია იქით, რომ მსმენელს თვალწინ გადაუშალოს იმქვეყნიური ცხოვრება და გააცნოს საიქიოში მომხდარი მოვლენები.

„ცხენშენირვის“ დასაწყისი მიცვალებულის საიქიოში გა- სამგზავრებლად სულის ცხენის შერჩევას გადმოგვცემს. ტექ- სტის ამ ნაწილში მოქმედება საკრალურ დროსა და სივრცეში ხდება, რადგან სულის ცხენის შერჩევაში ზეციური არსებებიც მონაწილეობენ. მართალია, რეალურად, სულის ცხენს, სანამ მიცვალებულის სახელზე აკურთხებდნენ, ჩვეულებრივ საყო- ფაცხოვრებო დანიშნულებისთვის იყენებდნენ, მაგრამ, ცხენის კურთხევის ტექსტის მიხედვით, დაუშვებელია საიქიოში გამ- გზავრება ისეთი ცხენით, რომელიც მხოლოდ გამწევ ძალასა და გადაადგილების საშუალებას წარმოადგენს. სულის ცხენი უნდა ფლობდეს განსაკუთრებულ უნარ-ჩვევებს, ამიტომ ის ზღაპ- რულ და მიუწვდომელ თერქ-თურქის ქვეყანაშიც უძებნიათ, საიდანაც მხოლოდ ერთხელ ნართების უხუცესმა ურუზმაგმა და მისმა უსახელო ვაჟმა საუკეთესო ცხენების რემა გამოირე- კეს. „ცხენშენირვის“ მიხედვით, საიქიოში გასამგზავრებლად შესაფერის ცხენს მაინც ვერსად მიაგნეს, რადგან მიცვალებუ- ლის სულისთვის საკადრისი ცხენი მხოლოდ ზეცაში, მგზავრთა და მამაკაცთა მფარველ ვასთირჯის რემაში შეიძლება მოიძებ- ნოს:

„ცაში ყვითელი კლდის ძირას,
ვასთირჯის – დიდება მის სახელს, –
სამი რაში ჰყავს:
აქეთა რომელიცაა, ხელს ნუ ახლებ, იკბინება,
იქითასაც ნუ წამოიყვან: წიხლი იცის,
შუაში მდგარი აირჩიე.“

(ოსური სიტყვიერება 2005: 46-47.)

საიქიოში გასამგზავრებლად ცხენი ზეციურმა არსებებმა უნდა გაამზადონ. ამიტომ ბახფალდისაგი მიმართავს მიცვალე-

ბულს, რომ სულის ცხენი ზეცაში, ლვთაებრივ მჭედელს – ქურ-დალაგონს მიჰვაროს, რომელიც ოქროს ნალებს გამოუწ-რთობს და მას ოქროს ლურსმნით დაუჭედავს. მზის ვაჟი მახა-მათი უნაგირს აჩუქებს, მთვარის ვაჟი – აღვირ-მოსართაკს.

საიქიოში მიცვალებულის გასამგზავრებლად მომზადებაში ზეციერთა მონაწილეობას განსაკუთრებით ვრცლად გადმოგ-ვცემს ჯერ კიდევ XIX საუკუნის I ნახევარში ა. შოგრენის მიერ ჩაწერილი ცხენის კურთხევის ტექსტი (შიფნერი 1868: 25-26). ცხენის კურთხევის შოგრენისეულ ვარიანტში გადმოცემულია ადამიანებისა და ზეციური არსებების ისეთივე ჰარმონიული ურთიერთობა, როგორიც ნართების ეპოსშია აღნერილი, როცა საფასთან მიწვეული ზეცის ბინადრები სოსლანს აჯილდოებ-დნენ.

მნიშვნელოვანი მოვლენის წინ ზეციურ არსებათა თათბირი ხშირად გვხვდება ოსურ მითოლოგიურ ტექსტებში. ისინი თათ-ბირობენ მიცვალებულის საიქიოში გამგზავრების წინაც, რად-გან ოსების რწმენით, ცის ბინადრები განაგებენ ადამიანთა ბედს წუთისოფელში. სწორედ მაშინ, როდესაც ადამიანი ამთავ-რებს თავის ამქვეყნიურ ყოფას, ზეციურმა არსებებმა პირვე-ლებმა უნდა დაულოცონ გარდაცვლილს სასუფევლის გზა.

ცხენის კურთხევის დიგორული ვარიანტის მიხედვით, საიქიოში მიმავალი ახალგაზრდა მგზავრი ანგელოზი ჰგონიათ ზეციურ არსებებს, რომლებიც ჭაბუკს ცხენის მოსაკაზმავად გზაზე სხვადასხვა ნივთებს ჩუქნიან. „ – ზადი (ანგელოზი) მო-დის, – ამბობენ ისინი. – დაუაგი (წმინდანი) მოდის“, – ამბობენ ისინი. „ – მე არ ვარ ზადი, – თქვა მან. – მე არ ვარ დაუაგი, – თქვა მან. – ლარიბი ადამიანი ვიყავი, ძმებისმოყვარე ვიყავი, სოფლისმოყვარე ვიყავი, ახლობლების დამხმარე ვიყავი, გა-მარჯვებულების მტერი ვიყავი, სისხლისამღები ვიყავი, მიცვა-ლებულებთან მივდივარ“ (მილერი 1881: 109). დიგორულ ცხენის კურთხევის ტექსტში მიცვალებულის სულის ანგელოზურ არსე-

ბად მიჩნევა ეზმიანება თუშური „დალაის“ სტრიქონებს, რომელიც ასევე მოყმის საიქიოში შესვლას ეხება: „ნეტავ შენ, საიქიოსა შიგ შეხვალ მტრედის ფერადო, დალაი...“ (ხალხური ანთოლოგია 2010: 163-164). ზ. კიკნაძის აზრით, მიცვალებულის სულის მტრედის სახით წარმოდგენა, რასაც ხუცობის ენაზე („ჯვართ-ენაზე“) სულინმინდა ეწოდება, უნდა გამოხატავდეს ხალხურ თვალსაზრისს, რომ „მტრედის ფერად ანუ სულინმინდის სახით მხოლოდ კაი ყმები შედიან საიქიოში“ (კიკნაძე 2008: 307).

ცხენის კურთხევის ვარიანტების უმრავლესობას აქვს მიმართვის ფორმა. ბახფალდისაგი მიმართავს გარდაცვლილს, ურჩევს, თუ როგორ უნდა გადაღახოს დაბრკოლებები საიქიოსკენ მიმავალ უცხო გზაზე. ბახფალდისაგის რჩევა-დარიგებას, რომელიც იმ თავდაპირველი მითიური ქმედების ცოდნას ემყარება, ისმენს ცხენის კურთხევის რიტუალის ყველა მონაწილე.

მიცვალებულის სიკვდილისშემდგომ მოგზაურობაში პირველი დაბრკოლება ბეწვის ხიდამდე, საიქიოს მეკარე ამინონთან შეხვედრამდე გამოჩნდება.

ჯადოსნური ზღაპრის გმირისაგან განსხვავებით, რომელსაც, წუთისოფლის გზაჯვარედინთან მისულს, არ ჰყავს მრჩეველი და გზის გამგნები, „ცხენშენირვის“ მთავარ პერსონაჟს ზეციური არსება ან საიქიოს მეგზური ეხმარება. ცხენის კურთხევის ტექსტის ზოგიერთი ეპიზოდი ჰგავს ნაქადაგარს და შეიცავს წინასწარმეტყველებას. ბახფალდისაგი საიქიოს მგზავრს იმ ცოდნას გადასცემს, რომელიც ოდესლაც ზეციერებმა ასწავლეს მათ წინაპრებს. ის ურჩევს საიქიოს მგზავრს, არ წავიდეს მარჯვნივ, რადგან ის არის მოსისხართა გზა; აფრთხილებს, არ წავიდეს მარცხნივ, რადგან ის არის ბოროტმოქმედთა სავალი გზა და მხოლოდ შუა გზას გაჰყვეს. „ცხენშენირვის“ ტექსტში ხშირად ვლინდება ცენტრისკენული მოძრაობა, მოქმედების ეპიცენტრად შუა ადგილის ამორჩევა, რადგან შუაგული ცისა

და მიწის საუკეთესო, ჰარმონიული ადგილია. ტექსტში შუაგულისკენ ლტოლვა სხვადასხვა სახე-სიმბოლოებით ვლინდება: მიცვალებულის საკადრის ცხენს ვერც მარცხნივ პოულობენ და ვერც მარჯვნივ მიაგნებენ; ვასთირჯის სამი ცხენიდან არც აქეთას უნდა ახლონ ხელი, არც იქითას, შუაში მდგარი უნდა აირჩიონ და ახლაც, გზაჯვარედინთან, იგივე წუთისოფლის დასასრულთან, მისულ საიქიოს მხედარს ბახფალდისაგი შუა გზაზე წასვლას ურჩევს:

„შუა გზას გაჲყევ,
ერთი ბეწვის ხიდთან მიგიყვანს,
მაგრამ არ შედრკე, არ შეშინდე,
ცხენს მათრახი გადაუჭირე
ისე ძლიერ, რომ ხელისგულზე ტყავი აგასკდეს,
ცხენს კი ბარძაყზე – ხორცი.
და მიადგები მკვდართა საუფლოს.“

(ოსური სიტყვიერება 2005: 47).

ცხენშენირვის ტექსტში ბეწვის ხიდი წარმოადგენს საიქიოსკენ მიმავალ გზაზე ყველაზე შემაძრნუნებელ ადგილს, ცოცხალთა და მიცვალებულთა სამკვიდრებლების გზაგასაყარს, სადაც მთავრდება მოკვდავთათვის ნაცნობი, ჩვეულებრივი გარემო და ხიდს იქით, მდინარის გაღმა იწყება პირველი ხილვის თავზარდამცემი სიუცხვევე. ბეწვის ხიდის ეპიზოდში იკვეთება ფსიქოლოგიური მოტივი – შეუცნობლის წინაშე შიში და უმწეობა, რადგან ტექსტის მიხედვით, „ახალგაზრდა ცხენი არის მფრთხალი, ახალგაზრდა მხედარი – გამოუცდელი“ (მილერი 1881: 115). ამიტომ ბახფალდისაგი მოსალოდნელი განსაცდელის შესახებ წინასწარ აფრთხილებს საიქიოს მხედარს და ბეწვის ხიდთან განსაკუთრებული შემართების გამოჩენას ურჩევს. ტექსტში საიქიოს მგზავრის გასაგონად, მის გასამხნევებლად ხშირად ისმის შეძახილი: – „ნუ შეშინდები!“ ნაწარმოებს

თავიდან ბოლომდე გასდევს სულეთში მიმავალი მგზავრის მიმართ პახფალდისაგის, „ცხენშეწირვის“ იგივე ლირიკული გმირის, მხურვალე თანაგრძნობა: „მიხვალ ბეწვის ხიდთან! ნურაფრის ნუ შეგეშინდება! ზემოდან დაგყვირებენ, ქვემოდან ამოგახებენ, – იმათგან ერთი წამრთმევია, მეორე მაცდუნებელი. ნურაფრის ნუ შეგეშინდება! ცხენს მათრახი გადაუჭირე ისე ძლიერ, რომ ხელისგულზე ტყავი აგასკდეს, ცხენს კი ბარძაყზე – ხორცი! გადახვალ ხიდზე, მიხვალ ამინონთან“ (შიონერი 1868: 36).

ოსური ხალხური ტექსტების მიხედვით, საიქიოს გამგებლის პარასთირის გარეშე არავის შეუძლია სულეთში შესვლა ან გამოსვლა. პარასთირის განკარგულებით საიქიოს მეკარე ამინონი აღებს მიცვალებულთა ქვეყნის კარებს, ხოლო პარასთირი მიცვალებულებს, მათი ამ ქვეყნად ჩადენილი ქმედებების მიხედვით, ანაწილებს სამოთხეში (ძანათში) ან ჯოჯოხეთში (ზინდონში).

ცხენის კურთხევის თითქმის ყველა ვარიანტში საიქიოს კარიბჭესთან მისულ მხედარს პახფალდისაგი (ცხენის მაკურთხებელი) ურჩევს ქცევის განსაზღვრული წესების დაცვას, რომლის არქეტიპსაც ნართების ეპოსში ვხვდებით. მიცვალებულთა ქვეყანაში მიმავალი მხედარი საიქიოს კარებთან მზის ჩასვლამდე უნდა მივიდეს, რადგან დაგვიანებულ მგზავრს მკვდართა საუფლოში მეკარე ამინონი აღარ შეუშვებდა. ოსების რწმენით, მზის ჩასვლის შემდეგ გათენებამდე საიქიოს კარები იკეტებოდა და არავის ჰქონდა იქ შესვლის ან იქიდან გამოსვლის უფლება. ამით აიხსნება მიცვალებულის მზის ჩასვლამდე დაკრძალვის ტრადიციაც. მზის ჩასვლის შემდეგ არ შეიძლებოდა მიცვალებულის დატირებაც. ქართულ ხალხურ პოეზიაში გმირის დაღუპვა მზის ჩასვლასთან ასოცირდება. ჩამავალ მზეს მკვდრის მზესაც უწოდებენ. ზოგიერთ შემთხვევაში პარასთირი მიცვალებულს სახლში წასვლის ნებას რთავდა, მაგრამ ის მზის ჩასვლამდე უეჭველად უნდა დაბრუნებულიყო მიცვალებულთა

ქვეყანაში, რადგან მზის ჩასვლის შემდეგ დაიკეტებოდა კარები და მას საიქიოში აღარავინ შეუშებდა. ერთხელ ბარასთირმა მიცვალებულთა ქვეყნიდან გამოუშვა ურუზმაგის უსახელო ვაჟი. ნართების ეპოსი მოგვითხრობს ურუზმაგის უსახელო ვაჟის საიქიოში დაბრუნების სევდიან ისტორიას. რადგან მზე უკვე ჩადიოდა და ბიჭს მიცვალებულთა საუფლოში შესვლა აგვიანდებოდა, სათანა ღმერთს შეევედრა: „ღმერთო, უზენაესო! თუ დედის გულში ჩახედვა შეგიძლია, გთხოვ, მთებს ოდნავი შუქი მიანათე!“ სასწაულმაც არ დააყოვნა და ვაჟმა მშვიდად შეძლო საიქიოში შესვლა (ნართები 1988: 86). ნართების ეპოსში ბეწვის ხიდი არ გვხვდება. მის ნაცვლად არის საიქიოს კარები, რომელსაც არაერთი ნართი პერსონაჟი გაივლის. ზოგი მიცვალებულთა ქვეყნიდან იმ კარებით გამოდის ცოცხალთა ქვეყანაში და შემდეგ კვლავ იმავე გზით ბრუნდება (ურუზმაგის უსახელო ვაჟი) სულეთში. საიქიოს კარები მაგარია და ყველას, ვისაც მოესურვება, არ შეუძლია იქ შესვლა და გამოსვლა. ნართების ეპოსიდან ცნობილია, რომ მოკვდავთაგან მხოლოდ ერთმა, სოსლანმა შეძლო სულეთის მოხილვა, თუმცა სოსლანის, როგორც ცოცხალი ადამიანის, შესვლა საიქიოში არალეგიტიმურია, რადგან მეკარე ამინონი მას არ აძლევდა მიცვალებულთა ქვეყანაში ცოცხლად შესვლის უფლებას, სოსლანმა ძალით შეგლიჯა კარები და საიქიოში მაინც შეაღწია (ნართები 1988: 148).

ბახფალდისანი, ანუ ცხენის კურთხევის ტექსტი, მთლიანად იზიარებს ნართების ეპოსის გამოცდილებას. ისევე როგორც სათანამ, საიქიოში მიმავალმა მხედარმაც ლოცვა უნდა ნარმოთქვას, რომ მთებზე მზის სხივი გამოკრთეს. სოსლანივით ქუსლი უნდა ჰკრას საიქიოს კარებს, რომ ის გაიღოს:

„მზე ჩავიდაო“, – ასე გეტყვიან. ლოცვა ნარმოთქვი:
„ღმერთო მაღალო, იყავ მოწყალე, მთის წვერებზე
მზის ნათელი გამოაბრწყინე!“

მთებზე მზის სხივი გამოკრთება,
ქუსლი ჰყარ კარებს და გაიღება.“

(ოსური სიტყვიერება 2005: 47.)

ოსების რწმენით, ამინონი ბარასთირის დავალებით მოქმედებს. ის დგას საიქიოს კარებთან ან ბეწვის ხიდთან. ამინონი მასთან მისულ თითოეულ გარდაცვლილს ეკითხება, თუ რა ბოროტება ჩაუდენია ან რა სიკეთე გაუკეთებია სიცოცხლეში. ამინონი ამის მიხედვით აფასებს მიცვალებულის მიწიერ ცხოვრებას და უჩენს ადგილს ძანათში (ძვალ) ან ზინდონში (ზინდონ).

ცხენის კურთხევის ა. შიფნერის გამოქვეყნებული ვარიანტი სრულად ეთანხმება მიცვალებულის საიქიოში შესვლის ოსურ რწმენა-ნარმოდგენებს. ბახფალდისაგი მიმართავს საიქიოსკენ მიმავალ მხედარს:

„ბეწვის ხიდს გალმა, როცა მიხვალ შენ ამინონთან, ის გვითხავს: „რა სიკეთე გიქმნია და რა – ბოროტება?“ უპასუხე: „მე არ ვყოფილვარ არც ბოროტი და არც კეთილი, მაგრამ მიწაზე მე ვცხოვრობდი მუდამ სიმართლით“. გეტყვის: – „მაშ შენ გექნება პირდაპირი გზა სამოთხისკენ.“ შეჯდები ცხენზე, წახვალ იქით და მიაღწევ კარებს სულეთის. მაგრამ ის კარი შენ წინაშე დაიკეტება. დაინევ უკან, დაბრუნდები კვლავ ამინონთან და ჰკითხავ ახლა საიქიო ქვეყნის მექარეს: „სად წავიდე, წინ კარები გამომიკეტეს, თუ შენ გზაში დიდხანს მე არ შემაჩირებდი შენი კითხვებით, უფრო ადრე მივიდოდი სულეთის კართან.“ „წადი, იჩქარე, – გეტყვის სულთა ქვეყნის მექარე, – შესთხოვე მზეს, მცირე სხივი მიანათოს მთათა მწვერვალებს“. უმაღვე მთაზე გამოჩნდება მზისა ნათელი და გაგელება საიქიოს მძიმე კარები“ (შიფნერი 1868: 37).

სულეთში მიმავალი მგზავრის საუბარი საიქიოს მექარე ამინონთან ცხენის კურთხევის ტექსტში აუცილებელი სტრუქტურული ერთეულია, თუმცა ზოგიერთ ვერსიაში ამინონთან

მგზავრის დიალოგი გამოტოვებულია. შოგრენისეულ ვარიანტში ამინონი დგას ბეწვის ხიდის ნინ, მდინარესთან. ის საიქიოში მიმავალ მგზავრს ბეწვის ხიდზე ისე არ გაატარებდა, სანამ არ დაკითხავდა. ოსების რწმენით, ამინონმა გამოკითხვის გარეშეც იცოდა ყველაფერი გარდაცვლილთა შესახებ, თუ ცოცხალთა ქვეყანაში ვინ როგორ იცხოვრა. ახლა მხოლოდ სურდა გაეგო, ბეწვის ხიდთან მოსული მგზავრი იცრუებდა თუ წრფელი გულით მოინანიებდა ჩადენილ შეცდომებს. თუ მიცვალებული სიმართლეს იტყოდა, ამინონი მას ბეწვის ხიდზე გაატარებდა და უშუამდგომლებდა ნართების წინაშე. მაგრამ თუ ის იცრუებდა, მას საშინელი განსაცდელი დაატყდებოდა: ამინონი მას სისხლით მოსვრილი ცოცხით სცემდა ტუჩებში. მართალია, ამის შესახებ არაფერია ნათქვამი ცხენის კურთხევაში, მაგრამ, სავარაუდოდ, ამინონი ტყუილის მთქმელს მდინარეში ჩაგდებდა. ტექსტის მიხედვით, სწორედ ამინონის დასმულ კითხვებზე მიცვალებულის გაცემული პასუხების სისწორე განსაზღვრავდა ბეწვის ხიდზე მის წარმატებას, შექლებდა თუ არა მის გადალახვას: „და აი, ჰკითხა ამინონმა საიქიოსკენ მიმავალ მხედარს: რა ნახა და რა სიკეთე გააკეთა იმ ქვეყანაში? მიცვალებულმა ყველაფერი უამბო, არაფერი შეალამაზა. როცა ამინონი დარწმუნდა, რომ ის სიმართლეს უყვებოდა, ნება დართო გადასულიყო ხიდზე. ამინონმა მას თან გააყოლა მეგზური, რომელიც ნართების მინამდე მიაცილებდა. ხოლო სხვებს, რომლებიც ცრუობდნენ, ჯოვოხეთში აგზავნიდა. მიცვალებულმა როგორც კი მიიღო ნებართვა, პირდაპირ წავიდა ხიდისკენ, რომელიც ისე ირყეოდა მის ქვეშ, თითქოს აი და უნდა ჩაქცეულიყო. რადგან მიცვალებული იყო მართალი ადამიანი და გაბედულად მიდიოდა, ხიდი უფრო ფართო და მაგარი ხდებოდა... (შიფნერი 1868: 27).“

როგორც წესი, ტექსტში წარმოსახული მიღმა სამყარო, თავისი უცნაური საგნებითა და მოვლენებით ადამიანში თავზარდამცემ შიშს უნდა იწვევდეს. ბეწვის ხიდთან მისულ საიქიოს

მგზავრს, რომლის შესახებაც ბახფალდისაგი მოგვითხრობს, გარდაუვალი მომავლის წინაშე არ ეუფლება შიში და ძრწოლა. მას რწმენა და ამ ქვეყნად განეული მადლი ამარჯვებინებს. ის უკუაგდებს ყოველგვარ შიშს, თავისი სიმართლით უყოყმანოდ გაივლის ბენვის ხიდზე და გადალახავს საიქიოს ზღურბლს.

შენიშვნა: ხიდი სხვადასხვა მითოლოგიაში ერთმანეთთან აკავშირებს ორ განსხვავებულ სამყაროს. ცხენის კურთხევის ოსურ დედაზი (შიფნერი 1868: 26) საიქიოს ხიდს ჰქვია არა ბენვის, როგორც ქართულ მითოლოგიაში, არამედ ხის, მორის (დიორე, ქანდარა) ხიდი. სომხურ ენაში კი სიტყვასიტყვით არის ვიწრო ხიდი. უ. დიუმეზილის აზრით, საიქიოში გადასასვლელი ხიდის მაზდეანიზმიდან მომდინარეობა ეჭვს არ უნდა იწვევდეს, ხოლო თვითონ ხიდი, როგორც მითოლოგიური ელემენტი, გვხვდება ისეთ მითებში, რომლებიც დაკავშირებულია დაკრძალვის რიტუალთან (დიუმეზილი 1976: 78). თუმცა ვერ გამოვრიცხავთ ქართულ გავლენასაც. ოსურმა ენამ სიტყვა «ხიდ» შეიძლება ქართულიდან ისესხა. შოგრენის ვარიანტის მიხედვით, საიქიოში გადასასვლელ ყველა სახის ხიდს, ვიწროს, მორის თუ ბენვის ხიდს, მართალი სულის წინაშე აქვს გაფართოვების თვისება, ხოლო თუ მასზე ცოდვილი გაივლიდა, ის კიდევ უფრო მეტად განვრილდებოდა და მახვილის პირივით ბასრი გახდებოდა. ქართული ხალხური ლექ-სის მიხედვით, „კუპრზე ძეს ბენვის წიდაა, შავეთში ამბობდიანო: „ცოდვიანნ გადიყრებიან, მადლიანნ გადმოდიანო“ (შანიძე 1931: 230).

ბენვის ხიდის გადალახვის შემდეგ, მდინარის გალმა, ცოცხალთა ქვეყნიდან მისული მგზავრი ხედავს სრულიად უცხო სამყაროს – მიცვალებულთა საუფლოს. სულის ცხენზე ამხედრე-

ბული მგზავრის თვალწინ საიქიოს გზაზე ერთმანეთს ენაცვლება ცოდვილთა მარადიული ტანჯვისა და მართალთა ნეტარების პარალელური სცენები. მეტაფორული სურათები მგზავრში იწვევს გაოცებას და აღძრავს ცნობის წადილს, გაიგოს სულეთის პინადართა დასჯისა თუ დაუსრულებელი ბედნიერების კონკრეტული მიზეზები.

სასულიერო მწერლობა იცნობს აპოკრიფულ ნაწარმოებს „ღვთისმშობლის მიმოსვლა ჯოჯოხეთში“. იგი მოგვითხრობს ანგელოზთა თანხლებით წმინდა მარიამის მოგზაურობას იმ სასტიკ და პირქუშ სამყაროში, სადაც გარდაცვლილებს ამ ქვეყნად ჩადენილი ცოდვების გამო სასჯელად მარადიული სატანჯველი ერგოთ. ჩრდილოეთ ოსეთში ზეპირი გზით გავრცელებულ ქრისტიანულ ლიტერატურას შესაძლებელია გავლენა მოეხდინა და ცალკეული ელემენტები შეეტანა ცხენის კურთხევის ტექსტში. ორივე ნაწარმოები, „ღვთისმშობლის მიმოსვლა ჯოჯოხეთში“ და „ცხენშენირვა“, ცოდვილთა ტანჯვის მიზეზს კითხვა-მიგების საშუალებით გადმოგვცემს.

სულეთში სტუმრად მისულ სოსლანს მიცვალებულთა იმქვეყნიური სასჯელისა თუ მარადიული ნეტარების საიდუმლოს უხსნის ბედუხა, მისი გარდაცვლილი მეუღლე. „ცხენშენირვის“ ვარიანტების მიხედვით, მიცვალებულს საიქიოს მოხილვაში მეგზურობას ხან მზის ვაჟი მახამათი უნევს, ხან ამინონის შერჩეული გამცილებელი, ხანაც – ტექსტის მთხრობელი, ლირიკული გმირი. ცხენის კურთხევანში საიქიოს სცენები წარმოდგენილია მომავალ დროში. ბახფალდისაგი წინასწარ ამზადებს გარდაცვლილს და უამბობს, თუ მიცვალებულთა საიქიო ყოფის როგორი სურათები გადაიშლება მის თვალწინ და რა პასუხს მიიღებს იგი თავისი მეგზურისგან. კითხვა-პასუხი ლაკონიურად, მოკლე პოეტური ფრაზებით გადმოგვცემს ადამიანთა ნაკლზე, აგრეთვე სასჯელზე, რომელიც მიცვალებულთა სულებს დაატყყდათ საიქიოში ამ ქვეყნად ჩადენილი ცოდვების გამო. გამ-

ცილებლის პასუხები გაჯერებულია სახარებისეული პათოსით: „უკეთუ ვინმე იყოს ბოროტი, არა მიიღოს კეთილი“.

ცხენის კურთხევის სხვადასხვა ვარიანტში მიცვალებულთა ტანჯვისა და ბედნიერების ამსახველი მეტაფორული სცენების რაოდენობა იცვლება. ზოგში მეტია, ზოგში – უფრო ნაკლები. საიქიოს მგზავრი ხედავს უცნაურ სურათებს: ყელზე გველისა და თავზე ბაყაყის ტყავით შემოსილ ქალს; მახათით კლდების მკერავ დედაკაცს; აგრეთვე ქალს, რომლის მკერდზეც წისქვილის ქვები ბრუნავენ და კლდის ქიმებს ფქვავენ; ძუკნა ძალლს, მუცელში მოწკავწკავე ლეკვებით; რამდენიმე მგლოვიარე ქალს, რომლებსაც ძალლები და ვირები აწამებენ; ძირგავარდნილი გოდრით მთაზე ქვიშის მზიდავ მამაკაცს; კაცს, რომელსაც ხარი ულვაშს ულეჭავს; ყინულებში მჯდარ და ცალი ფეხით ხიდზე დაკიდულ მამაკაცებს. აგრეთვე, კაცს, რომელსაც სახლად კვერცხის ნაჭუჭი აქვს, კარებად – ნემსი, გზად კი – დანის პირი. ბაზფალდისანის მიხედვით, სულეთის ბინადართა ამქვეყნიური ცოდვა და საიქიო სასჯელი განონასწორებულია ერთმანეთთან. საიქიოს მოხილვის ეპიზოდში მოქმედება სწრაფად ვითარდება. თითქოს დროც არ ყოფნის სულეთის მეგზურს ვრცელი ახსნა-განმარტებების მისაცემად, რადგან ცოდვილთა საიქიო სამყოფელიც ისევე სწრაფად უნდა გაიაროს სულეთის მგზავრმა, როგორც ბენვის ხიდი. გამცილებელი მოუწოდებს სულის ცხენზე ამხედრებულ მგზავრს: „გზა განაგრძე, შეიძლება მათმა ცოდვამ გზა გაგიმრუდოს!“ (მილერი 1881: 109).

სოსლანის მოგზაურობა საიქიოში ცოდვილთა ტანჯვის გაცილებით მეტ ეპიზოდს გადმოგვცემს. ზემოთ მოყვანილი სცენების გარდა, სოსლანი ხედავს ჯოჯოხეთის სულისშემძრველ სურათებს: ფეხით, მკლავით, ენით და კისრით დაკიდულ ადამიანებს, რომელთა ქვეშ ცეცხლმოდებული რიყის ქვები გიზგიზებდა; ტბაში ბაყაყებთან, გველებთან და სხვა ქვენარმავლებთან ჩაყრილ ხალხს, რომლებიც ხან ჩაყვინთავდნენ, ხან ამოყ-

ვინთავდნენ; მწოლარე ქალს, რომელსაც ცხვირის ნესტოები-დან შალისა და ჩითის ნაჭრები გამოსჩროდა, მარჯვენა მკლავზე კი ცეცხლი ეკიდა; ტანზე ყინულმოდებულ მოხუცებს, რომლებიც ყინულის სამართებლით წვერს იპარსავდნენ, უფრო მეტად კი იწინენიდნენ; ქალს, რომელსაც ხვლიკები ძუძუებს უწოვდნენ; გულალმა მწოლარე ქალს, რომლის მკერდზეც წისქვილის ქვები გამალებით ბრუნავდნენ, საფქვავი კი არსად ჩანდა; აკლდამაში ჩამომჯდარ დედიშობილა ბიჭს, რომელსაც ცხვირიდან სისხლნარევი ლეზვი სდიოდა, პირიდან კი სისხლი გადმოსჩქეფდა. ყველა შველასა და გადარჩენას ითხოვდა (ნართები 1988: 148-152). მიცვალებულთა სულების საიქიო სასჯელის ანალოგიური სცენები გვხვდება ფალაური ეპოქის სპარსულ ნაწარმოებში „არდა ვირაფას წიგნში“ (არდა ვირაფა 1977: 98-111). როგორც ჩანს, მასში ასახული საიქიო ტანჯვის სცენები ზეპირი სიუჟეტებით ვრცელდებოდა აღმოსავლეთსა და დასავლეთში. მოვიანებით იტალიელმა პოეტმა დანტე ალიგიერმა დანერა ვრცელი პოემა „ღვთაებრივი კომედია“, რომელშიც ავტორმა შთამბეჭდავად დახატა საიქიო ცხოვრების სურათი.

ცხენის კურთხევის ტექსტში განსაკუთრებულ მხატვრულ და ემოციურ ეფექტს ქმნის კონტრასტული სცენები: ერთგან ხარის დიდ ტყავზე ცოლ-ქმარი ვერ იყოფს სარეცელს, ხოლო მეორეგან კურდღლის მომცრო ტყავზე ცოლ-ქმარს ჰყოფნის ადგილი და კიდევაც რჩებათ. მიზეზი მარტივია: პირველ წყვილს იმ ქვეყნად ერთმანეთი არ უყვარდა და საიქიოშიც გრძელდება სიძულვილით გამოწვეული მათი ტანჯვა-წამება, მეორე წყვილს კი „ერთმანეთი ძლიერ უყვარდა, როცა იქ იყვნენ და ასეა აქაც“ (ოსური სიტყვიერება 2005: 48). ერთგან რძის მწურავ ქალს მხოლოდ კვერცხის ზომა ყველი ამოჰყავს, მეორეგან კი ქალი პანაწინა კოჭობიდან ისეთ დიდ ყველს აკეთებს, რომ ჯოხით ძლივს აბრუნებს. ტექსტის მიხედვით, სიცოცხლე-ში ერთი ძუნნი იყო, მეორე – ხელგაშლილი, გულუხვი. საიქიო-

შიც შესაბამისად მიეზღოთ. ერთგან სამი კაცი ზის ყინულის სკამებზე, ყინულის მაგიდები უდგათ და ყინულის ხელჯოხები უპყრიათ, სწორად კი სხედან, მაგრამ მრუდედ ლაპარაკობენ. მეორეგან კი ვერცხლის მაგიდასთან, ვერცხლის ხელჯოხებით, ვერცხლის სკამებზე გვერდულად ზის სამი კაცი, რომლებიც სწორად მსჯელობდნენ. ტექსტის მიხედვით, ყინულის ხელჯოხიანი კაცები მოსამართლეები იყვნენ მიწიერ ცხოვრებაში, ქრთამს იღებდნენ და დამნაშავეებს ამართლებდნენ. ვერცხლის ხელჯოხიან მოსამართლეებს კი ყოველთვის სამართლიანი განაჩენი გამოჰქონდათ. საიქიოშიც შესაბამისი ხვედრი ერგოთ.

მიცვალებულის სამოთხეში დამკვიდრება ბახფალდისანის ფინალურ ნაწილს წარმოადგენს. ახალი სტატუსით მარადიული ცხოვრების გასაგრძელებლად საიქიოს მხედარმა კიდევ ერთხელ უნდა გამოავლინოს თავისი ღირსება და განსაკუთრებული უნარი. შოგრენის ვარიანტის მიხედვით, საიქიოს ბინადართა იმქვეყნიური ყოფის მოხილვის შემდეგ სულის ცხენზე ამხედრებული საიქიოს მგზავრის წინაშე კიდევ ერთი დაბრკოლება, კიდევ ერთი გზაჯვარედინი გამოჩნდება: ერთი გზა ცაში მიდის, წმინდანებთან; მეორე – დაბლა, ჯოჯოხეთში, ბოროტ სულებთან; მესამე – შუა გზა, პირდაპირ სამოთხისკენ. სამოთხე, როგორც ყველაზე ჰარმონიული ადგილი, მითოლოგიურ ტექსტებში გამოხატული არის შუაგულით. ამიტომ სულის ცხენზე ამხედრებული მგზავრი, რომელიც სასუფევლისკენ ილტვის, შუა გზას ირჩევს. შუა გზა მას მიიყვანს ნართების სამკვიდრებელში, რომელიც ცხენის კურთხევის ვარიანტებში სამოთხედ არის მოაზრებული, სადაც მიცვალებულს, თუკი ის იმსახურებს, აქვს შანსი, ურუზმაგის (ან ბარასთირის) გვერდით დაიკავოს საპატიო ადგილი.

ბახფალდისანის თითქმის ყველა ვარიანტის ფინალურ ნაწილში სხვადასხვა ასპექტით ვლინდება ქრისტიანული ელემენტები და სახარებისეული პარადიგმები. ეჭვგარეშეა, რომ სახა-

რების ეპიზოდები ხალხში ზეპირად ვრცელდებოდა და ცალკე-ული მოტივების სახით აისახებოდა ოსურ ხალხურ ტექსტებში. სასუფევლის ვიწრო და ფართო გზის არჩევის სახარებისეულ მოტივს ვხვდებით ცხენის კურთხევის შიფნერისეული ვარიანტის ფინალურ ნაწილში. საიქიოს მკვიდრთა იმქვეყნიური ყოფის მოხილვის შემდეგ მხედარი კვლავ არჩევანის წინაშე აღმოჩნდება. ბახფალდისაგი კვლავ შემწის ფუნქციას ითავსებს და მგზავრს მიმართავს: „იქიდან წახვალ და შენ წინაშე ორი გზა გამოჩნდება: ერთი – ვიწრო, მეორე – ფართო. დაადექი ვიწრო გზას და ის მოგიყვანს სასუფეველში“ (შიფნერი 1868: 38). წუთისოფლის ვიწრო („იწროების“, „შეჭირვების“) გზის ანტონი-მი და სასუფევლის მეტაფორა ამ კონტექსტში შეიძლება იყოს ფართო, როგორც „რიგ-ვედას“ ერთ-ერთ ჰიმნშია ნათქვამი: „მითრამ მოუპოვა ადამიანებს ფართოება სივიწროვეში, სამ-კვიდრებელისკენ გასასვლელი“. ცხენის კურთხევის ტექსტში სასუფეველში მოსახეედრად ფართო გზის ნაცვლად ვიწრო გზის არჩევისას მგზავრი სახარების ცოდნით ხელმძღვანელობს: „შედით ვიწრო კარიბჭით, ვინაიდან ფართოა კარიბჭე და განიერია გზა, რომელსაც დალუპვისკენ მიჰყავს და მრავალნი დადიან მასზე. ვინაიდან ვიწროა კარიბჭე და ვიწროა გზა, რომელსაც სიცოცხლისაკენ მიჰყავს და მცირედნი ჰპოვებენ მას“ (მათე 7: 13-14).

ცხენკურთხევის პერსონაჟი – საიქიოს მგზავრი, როგორც ჩანს, იმ მცირედთა შორის აღმოჩნდა, რომელმაც არა მხოლოდ საიქიოს ვიწრო გზა აირჩია, არამედ მანამდეც მან წუთისოფლის ვიწრო, განსაცდელიანი გზით იარა. ბახფალდისაგი სულის მხედარს აუწყებს, რომ ის ამ არჩევანით სასუფეველს დაიმკვიდრებს. ნათქვამის ჭეშმარიტებას კი ბახფალდისაგი ქრისტიანული რელიგიის ავტორიტეტით ამყარებს: „თავისი კარიბჭის წინ შეგეგებება მარიამის ვაჟი ოქროს ქრისტე (მაირამი ფირთ

сыгъзәрин Чырысти) да Шеғиүүвәнс Шигенит. иј Шеңи სақуеңи ој-ңеңда тәттерин өрдө да үркөңиле Шаңарин“ (Шиғнәр 1868: 38).

Цеңенис күрттөшөвіс үркесінде ынтымадында та-
зисо үндиүүрсаңурун Сибірлік үндиңеңдіт. ил үйе-
ңаңарындың да миңгүлдүрүлсінде үй миңгүл, үйнендең үйдің га-
заңа да саңаңында үйнендең үйдің үйеңдүрүл, миңгүлдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.

Шеңидләрдә үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.

Шомаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.
Саңаңарында үйнендең үйдің үйеңдүрүл, миңгүлдің үйеңдің үйең-
діңдең үйнендең үйдің үйеңдүрүл. ынтымадында үйеңдүрүл.

„მე იმ ქვეყანაში ბევრი ვემსახურე ყველას და მეკავა უკანას-კნელი ადგილი (შიფნერი 1868: 29).“

სასუფეველში პირველი და უკანასკნელი ადგილის დაკავების მოტივს ცხენის კურთხევის ტექსტში საფუძვლად უდევს მაცხოვრის სიტყვები: „და აპა, ესერა, არიან უკანასკნელნი, რომელნი იყვნენ პირველ, და არიან პირველნი, რომელნი იყვნენ უკანასკნელ“ (ლუკა 13: 30). „ცხენშეწირვა“ სამოთხეში შესული მხედრის კიდევ ერთ გამოცდას კითხვა-მიგების საშუალებით გადმოგვცემს. პერსონაჟის პასუხებში ვლინდება ქრისტიანული რელიგიის ფუნდამენტური საკითხების ცოდნა, რომლის ცალკეული ელემენტები სახარებისეულ იგავებში იძებნება. „ცხენშეწირვის“ მიხედვით, ამ ცოდნით უნდა იხელმძღვანელოს მხედარმა წუთისოფლისა და საიქიოს გზაზე, ასეთია ინიციაციის ლოგიკა, სხვანაირად სასუფეველი მიუწვდომელი იქნება.

სასუფეველში შესული მხედარი, რომელმაც იქ დაასრულა თავისი განსაცდელებით სავსე მოგზაურობა, უარს აცხადებს როგორც პირველი, ისე უკანასკნელი ადგილის დაკავებაზე. პერსონაჟის ქცევა ქრისტიანულ ზნეობას ემყარება და სახარებისეული სიბრძნით საზრდოობს. მან წუთისოფელში ღირსეულად იცხოვრა, ის ნებაყოფლობით თავმდამბლად ემსახურა ყველას. მან იცის, რომ არ უნდა დაიკავოს სამოთხეში პირველი ადგილი, რადგან შეიძლება იქ მასზე უფრო საპატიო ადამიანი მოვიდეს. ქრისტიანულ ესქატოლოგიაში და მისი გავლენით ხალხურ ტექსტებში სამოთხეს გამოხატავს ქორწილი, ქორწილი სასუფეველის კონტაციას შეიცავს. ცხენის კურთხევის ტექსტში სასუფეველი, სადაც ბარასთვერი საიქიოს მხედარს პირველ და უკანასკნელ ადგილს სთავაზობს, წარმოადგენს საქორწილო ნადიმზე სტუმართა დაპატიჟების სახარებისეული იგავის პარადიგმას.

ლუკას სახარებიდან ცნობილია იგავი ქორწილში პირველი და უკანასკნელი ადგილის დაკავების შესახებ. როცა იესომ შე-

ამჩნია, რომ მიწვეულები პირველ ადგილებს ირჩევდნენ, უთხრა მათ იგავი: „თუ ვინმე ქორწილში მიგინვიოს, ნუ დაჯდები პირველ ადგილზე, რადგან შეიძლება შენზე უფრო საპატიო სხვა ჰყავდეს მოწვეული, რომ არ მოვიდეს შენი და მისი მაწვევარი და არ გითხრას: დაუთმე ამას ადგილი! მაშინ შერცხვენილმა უნდა დაიკავო უკანასკნელი ადგილი“ (ლუკა 14: 8-9). სამოთხე-ში შესული მგზავრი ბარასთვერის წინაშე უფლის მიერ განცხა-დებული სიბრძნით ხელმძღვანელობს, რომელიც მას ახალ პერ-სპექტივას გადაუშლის. სულის მხედარს, რომელსაც აქ, წუთი-სოფელში, ბოლო ადგილი ეკავა, იქ, ქორწილში ანუ სასუფეველ-ში ერგო ყველაზე საპატიო სამყოფელი, შუა ადგილი წრეში – მითოლოგემურად ყველაზე ჰარმონიული და სრულყოფილი ად-გილი. თავისი სიტყვითა და ქმედებით მან წარმოუდგენელი დი-დება მოიპოვა, როგორც საქორწილო სუფრის ბოლოში მჯდარ-მა სახარებისეულმა სტუმარმა, რომელსაც დამპატიუებელმა უთხრა: „მეგობარო, გადაბრძანდი უფრო მაღლა! მაშინ გექნება მეტი დიდება ყოველი თანამეინახის წინაშე“ (ლუკა 14: 10).

ნართების საზოგადოება იდეალურ მამაკაცად მიიჩნევდა იმას, ვინც გონიერებასთან ერთად, ყველაზე მამაცი და ზნეკე-თილი იქნებოდა, ვინც მუცელს არ ასდევდა, წრეგადასულ სმას ერიდებოდა, კაცობის უმძიმეს ტვირთს ბოლომდე წესითა და პატივით ზიდავდა, ვინც ქალთან ურთიერთობაში ყველაზე წე-სიერი გამოდგებოდა და თავის დიასახლის ყველაზე მეტს მო-უთმენდა. ეპოსის მიხედვით, ამ თვისებების მქონე ნართებს შო-რის ერთადერთი ბათრაძი აღმოჩნდა. ნართებმა მას გამოცდაც მოუწყეს: „კვირიდან კვირამდე წვეულებაზე ისხდნენ. სუფრა ისე გააწყვეს, რომ ბათრაძი ვერც ერთს ვერ მისწვდენოდა. მას კვირიდან კვირამდე პირში ლუკმა არ ჩაუდვია, მაინც დანარჩე-ნებზე უფრო მხიარულად მღეროდა და ყველაზე მოხდენილად ცეკვავდა“ (ნართები 1988: 257).

ქრისტიანული ესქატოლოგიის მიხედვით, ადამიანის სასუ-
ფეველში შესვლა დამოკიდებულია იმაზე, თუ როგორ იცხოვრა
მან ამქვეყნად და როგორ გაკვალა სასუფევლისკენ მისასვლე-
ლი გზა. ზ. კიკნაძის აზრით, „წუთისოფელში „დაგროვილი“
ლირსებები საიქიოში საგზლად მიჰყება ადამიანს და განსაზღ-
ვრავს მის მდგომარეობას“ (კიკნაძე 2008: 307). ცხენის კურთხე-
ვის ტექსტი ირიბად მიგვანიშნებს ამქვეყნიურ ცხოვრებაში გა-
მოვლენილ იმ ადამიანურ თვისებებსა და ქცევებზე, რომლებიც
უზრუნველყოფენ მიცვალებულის დამკვიდრებას სასუფეველ-
ში. სახარების მიხედვით, მხოლოდ მისთვის გაიღება სასუფევ-
ლის კარები, ვინც შეინარჩუნებს თავის თავში ბავშვურ სინმინ-
დესა და სისპეტაკეს. ამ თვალსაზრისით „ცხენშეწირვის“
ფინალური ნაწილი და სახარებისეული იგავები სრულ თანხმო-
ბაში არიან ერთმანეთთან. მათ შორის სიღრმისეული იდენტობა
ვლინდება. ოთხთავის სინოპტიკურ ნაწილში მოწაფეების კითხ-
ვაზე, ვინ უფრო დიდია ცათა სასუფეველში, „იესომ მოუხმო
ბავშვს, ჩააყენა მათ შუა და უთხრა: „ჭეშმარიტად გეუბნებით
თქვენ: თუ არ მოიქცევით და არ იქნებით, როგორც ბავშვები,
ვერ შეხვალთ ცათა სასუფეველში. ამრიგად, ვინც თავს დაიმ-
დაბლებს, როგორც ეს ბავშვი, ის იქნება უდიდესი ცათა სასუ-
ფეველში“ (მათე 18: 3-4). ნეტარი თეოფილაქტე ბულგარელის
აზრით, ბავშვების სახით მაცხოვარმა თავის მოწაფეებს სიმდაბ-
ლის გზა უჩვენა. ბახთალდისანის მიხედვით, საიქიოს მგზავრმა
ბავშვებს ზოგს ქუდი გაუსწორა, ზოგს – ფეხსაცმელი, ზოგსაც
ქამარი შემოარტყა, ყველას მოეფერა და გზა ისე განაგრძო. სა-
იქიოს მხედარმა ნებაყოფლობითი სამსახური უნდა გაუწიოს
ბავშვებს, უფროსი უმცროსის მსახური უნდა გახდეს, რათა
თვითდამდაბლებით ამაღლების ლირსი გახდეს.

სასუფეველში ბავშვების გართობა-თამაშსა და ქრიამულო-
ბას ქართული ხალხური ლექსიც წარმოგვიდგენს:

„ბალლების საფერებლადა წყალი გადმაჰყრის მძიესაო,
დაეხვევიან ბალლები, ურიამული დგა ცისაო.“

ცხენის კურთხევის სხვადასხვა ვარიანტების მიხედვით, სა-
მოთხეში, რძისფერ ტბასთან, ბავშვები თამაშობენ, სამოთხის
გზას ოქროსქოჩრიანი ბიჭი განაგებს. ის ღვთის ბავშვია, რისი
დასტურიც არის მისი თმის ფერი. ტბის რძის შეფერილობა და
ტბის რძესთან მსგავსებაც, რომელიც ოქროს, როგორც ღვთიუ-
რი ლითონის, შესატყვისს ნარმოადგენს, სამოთხის ერთ-ერთი
ნიშანია. სასუფევლის კარებთან საიქიოს მგზავრს ბავშვები
ეგებებიან: „ბიჭები მოირბენენ შენთან რძისფერი ტბიდან.
„დედა მოდის!“ – იტყვიან ისინი. „მამა მოდის!“ – იტყვიან ისინი.
„თქვენი მამა მოვა თქვენთან, თქვენი დედა მოვა თქვენთან“. ის
ჯიბიდან იღებს ვაშლებს და ყველას უნანილებს. – „მაჩვენეთ,
საით არის გზა?“ – „გზა არ არის ჩვენს გამგებლობაში, ჩვენ შო-
რის არის ოქროსქოჩრიანი ბიჭი, გზას ის განაგებს.“ ოქროსქოჩ-
რიანი ბიჭი მიირბენს მასთან, წინ გაუძლვება... სამოთხის კარი
ჭექით გაიღება“ (მილერი 1881: 115).

ცხენის კურთხევის სხვა ვარიანტებიც სასუფეველში შესას-
ვლელად ბავშვების დახმარებას უპირობოდ აცხადებს. საიქიოს
მხედრის მგზავრობაში ერთ-ერთ ყველაზე გარდამტეს მომენ-
ტში, სამოთხის კართან, ბავშვები მგებრის როლს ასრულებენ.
ბახფალდისანის ფინალური ნაწილი აცხადებს: ძნელია სამოთხ-
ეში შესვლა, ის მხოლოდ ბავშვების ხათრით გაიღება, რადგან
ბავშვები ღვთიური მადლის თანაზიარნი არიან. ცხენის კურ-
თხევის ტექსტში სასუფეველში დამკვიდრების მოტივი მთლია-
ნად სახარებისეული კონცეპტით საზრდოობს. საიქიოს მგზავ-
რისა და სამოთხის ბავშვების შეხვედრას ნ. ბეპიევისა და მ.
ცხოვრებოვას ქართული თარგმანი ემოციურად, მძაფრი ლი-
რიზმით გადმოგვცემს:

„კვლავ ივლი, ივლი, სამოთხის კარს მიაღწევ ბოლოს,
 მოგეგებება ბავშვების გუნდი,
 ზოგი – ქამარში ქუდგაჩრილი, სხვა – ხელში ქამრით,
 ზოგს ფეხთ ეცმევა, ალბათ, უკულმა.
 ზოგი მამიკოს დაგიძახებს, ზოგი – დედიკოს.
 უთხარი: – მე არც მამა ვარ და არც დედათქვენი.
 მაგრამ შენ მაინც მიეფერე –
 ზოგს ქუდი შეუსწორე, ზოგს ფეხსაცმელი,
 ზოგსაც ქამარი შემოარტყყი წელზე ლამაზად,
 გაგიჭირდება სამოთხეში შესვლა ძალიან,
 მაგრამ იმ ბავშვთა ხათრით მაინც კარს გაგიღებენ“.

(ოსური სიტყვიერება 2005: 49-50).

იგივე სურათი გადაეშალა საიქიოში სოსლანს, რომელმაც, ძლევამოსილ ნართებს შორის ერთადერთმა, მოახერხა ცოცხალი შესულიყო მიცვალებულთა ქვეყანაში. სოსლანს შეეცოდა ამნვანებულ ველზე მოთამაშე ბავშვები, რომლებსაც ქუდები წელში გაეჩარათ, ქამრები ყელზე გამოენასკვათ და ფეხსაცმელი უბეში ჩაეწყოთ. სოსლანმა ტანსაცმელი ყველას გაუსწორა, წესის მიხედვით ჩააცვა, მერე შეჯდა ცხენზე და გზა განაგრძო. ბავშვებმა კი ლოცვა გააყოლეს.

ცხენის კურთხევის ტექსტს აქვს ესქატოლოგიური დასასრული. ბახფალდისანი მთავრდება მიცვალებულის სამოთხეში დამკვიდრებით. ეს არის საბოლოო დასასრული. ვ. მილერისეულ ვარიანტში სამოთხეში შესული მხედრის დანახვისთანავე ხალხი ფეხზე დგება და ეგებება. – „სად ცხოვრობდი? როგორ ცხოვრობდი? – ეკითხებიან ისინი. – მე ვიყავი არზიმაიხა, ზიმაიხოს ვაჟი, დამით დავიბადე, დღისით სოსლანთან ერთად დავდიოდ სათარეშოდ, გორის ციხე-სიმაგრე გავტეხე, ცდაში მოვიპოვე სახელი, არა ასაკით და ასე მოვაღწიე ამ ადგილს“ (მილერი 1881: 115).

ზიმაიხოს ვაჟს – არზიმაიხას, ნართების ეპოსის ერთ-ერთ ეპიზოდურ პერსონაჟს, თავის უპირველეს ღირსებად და საზოგადოების წინაშე დამსახურებად ნადავლისთვის სოსლანთან ერთად სათარეშოდ სიარული და გორის ციხის გატეხა მიაჩნია, რაც, ტექსტის მიხედვით, კიდევაც განსაზღვრავს მის ადგილს სასუფეველში. ცხენის კურთხევის მილერისეული დიგორული ვერსია მთავრდება მოწოდებით: „დასვით თავში, რომ ის იყოს სოსლანის თანამგზავრი და იჯდეს ურუზმაგთან ერთად. სადაც მათი სულების სამყოფია, იქ იყოს ამ მიცვალებულის სული!“ (მილერი 1881: 115).

ბ. გატიევის მიერ ჩაწერილი ცხენის კურთხევის ტექსტის მიხედვით, რომელიც სამოთხის აღწერას შეიცავს, მიცვალებულის სულის საბოლოო ადგილსამყოფელს ბარასთირი განსაზღვრავს: „როცა სამართლიანმა და მოწყალე ბარასთირმა მოისმინა შენი გულწრფელი აღსარება, თავის სამყოფელში მიგიღო, სადაც მარადიულად დატკბები სამოთხის ყველა სიკეთით: შენი ცხენი შენს მახლობლად იბალახებს, ხოლო სანოვაგე და სასმელი, როგორიც არ ჰქონია არც ერთ მიწიერ მეფეს, დღითიდღე მოგემატება“ (გატიევი 1987: 156).

ცხენის კურთხევის თითქმის ყველა ვარიანტი მიცვალებულის სულის დალოცვით მთავრდება:

„იქ, სამოთხში, ბარასთირის მარჯვნივ იქნები.
ღმერთმა გამყოფოს ნათელში და
რაც პატივი გცა ხალხმა, ისიც ალალი იყოს.
ცხენი შენთვის შემოგვიწირავს
და როგორც ის ჩვენ აქ გვემსახურა,
შენც გემსახუროს. ნათელში იყავ!“
(ოსური სიტყვიერება 2005: 52).

ტექსტის დასრულების შემდეგ ბახფალდისაგი მიცვალებულის სულის სახელზე მოყვანილ ცხენს თავზე რამდენიმე წვეთ

ლუდს ასხამდა და აგემოვნებინებდა, რაც მიცვალებულისთვის ცხენის გადაცემას აღნიშნავდა. იმ თასს, რომლიდანაც ცხენს დაალევინა, მარჯვენა წინა ფეხით ატეხინებდა. თასის ნამტვრევებს, როგორც წესი, საფლავში ყრიდნენ, რასაც არქეოლოგიური გათხების მონაცემებიც ადასტურებს.

ამის შემდეგ ბახფალდისაგი მიცვალებულს მკერდზე პეშვით მიწას აყრიდა სიტყვებით: „ნათელში იყავ! დაე, შენი ცხენი იყოს შენთან ერთად იმ ქვეყნად! ახლა მოდით ახლობლებო, ნათესავებო, მეგობრებო, დაადინეთ ცრემლი და დაიტირეთ! (რახნო 2010: 218). რიტუალის შემადგენელი ნაწილი იყო ცხენის სამჯერ შემოტარება საფლავის გარშემო. პროცესს უეჭველად მიჰყვებოდა გარდაცვლილის ქვრივი, რომელიც თმას იჭრიდა და მიცვალებულს საფლავში ატანდა. რიტუალი მთავრდებოდა ცხენის სიმბოლური მსხვერპლშეწირვით. ბახფალდისაგი სულის ცხენს დანით ყურს უსერავდა. უ. დიუმეზილის აზრით, ამას აკეთებდნენ იმ მიზნით, რომ მიცვალებულს იმ ქვეყნად თავისი ცხენი ამოეცნო (დიუმეზილი 1976: 42). ზოგჯერ სულის ცხენს ყურის წვერს აჭრიდნენ და მიცვალებულს საფლავში ატანდნენ.

რიტუალის საბოლოო ნაწილს (ამ წესს ხევსურეთშიც იცნობდნენ) წარმოადგენდა მორთულ-მოკაზმული ცხენის გაჭენება, რომელიც მისი საიქიოში გაგზავნის იმიტაციას ქმნიდა. ცხენს ტარსიკონსა და კოლენკორს ხსნიდნენ და ღარიბებს აძლევდნენ. რიტუალის დამსწრე რომელიმე ახალგაზრდა სულის ცხენზე ჯდებოდა და იქამდე აჭენებდა, სანამ ოფლს არ გამოადენდა. იმ დღიდან ცხენი მიცვალებულის საკუთრებად ითვლებოდა და იკრძალებოდა მისი ყოფითი საჭიროებისთვის გამოყენება.

ცხენის კურთხევის ტექსტი ამავე დროს არის მაღალმხატვრული ფოლკლორული ნაწარმოები. მ. დარჩიევამ გამოიკვლია ცხენის კურთხევის მხატვრული თავისებურება და მიუთითებს ტექსტში პოეტური სიტყვიერი ფორმულების სიმდიდრეზე, მე-

ტაფორებზე, ეპითეტებზე, რეფრენზე, პარალელიზმზე, ქრისტიანულ ფრაზეოლოგიზმებზე, რომელიც ქმნიან ნაწარმოების მხატვრულ მთლიანობას (დარჩიევა 2012: 86-87).

ცხენის კურთხევის ტექსტის და მთლიანად ცხენშენირვის რიტუალს ოსების ტრადიციულ ყოფაში ჰქონდა განსაკუთრებული საზოგადოებრივი დანიშნულება და მაღალი საკრალური ავტორიტეტი. ტექსტი, რიტუალთან ერთად, სოციუმს განუმტკიცებდა რწმენას იმქვეყნიურ მარადიულ ცხოვრებაზე, თემის თითოეულ წევრს უმაღლებდა ღირსების გრძნობას, გადასცემდა ზნეობრივ სიბრძნესა და ცოდნას იმქვეყნიურ ცხოვრებაზე, უნერგავდა საღვთო შიშს. ის საზოგადოებას უმტკიცებდა პატივისცემას ადამიანის განვლილი ცხოვრების მიმართ. მართალია, ტექსტი და რიტუალი კონკრეტულ მიცვალებულს ეძღვნებოდა, მაგრამ ის გამიზნული იყო ხალხის გასაგონად. მიცვალებულის დაკრძალვის რიტუალზე შეკრებილ საზოგადოებას ცხენის კურთხევის ტექსტი შეასენებდა ზნეობრივი პრინციპების დაცვის აუცილებლობას, ადამიანურ მოვალეობას, აგრეთვე, პასუხისმგებლობას ღმერთისა და ხალხის წინაშე.

ცხენშენირვის ტიპოლოგია. სულის ცხენის კურთხევის წეს-ჩვეულებას იცნობენ ქართველი მთიელები, ვაინახები და აფხაზები, რომელთა ტრადიციაშიც რიტუალის თანმხლები ტექსტები თითქმის არ შემორჩა, ან თუ შემორჩა მცირე ფრაგმენტების სახით.

„ცხენშენირვის“ ტექსტთან ერთგვარ სიახლოვეს ამჟღავნებს თუშური „დალაი“. თუმცა, ოსური რიტუალისგან განსხვავებით, „დალაი“ მიცვალებულის წლისთავზე სრულდებოდა, როცა ეწყობოდა დოლი და მას მხედრები ასრულებდნენ. „დალაობის“ რიტუალში აუცილებლად მონაწილეობდა მიცვალებულის სახელზე მორთული ცხენიც. ოსური ცხენის კურთხევის მსგავსად „დალაის“ ტექსტში აღნიშნული იყო მიცვალებულის ღირსებები და მისი შესვლა საიქიოში, ვერცხლით გაწყობილ

სუფრასთან, საიქიოს ბინადარ მეღვინეებსა და ხუცეს-დიაკ-ვნებთან შეხვედრა. „დალაიში“ არ გვხვდება საიქიოს აღწერა, ცოდვილთა ტანჯვისა და მართალთა ნეტარების ამსახველი სცენები, დიალოგები, სიუჟეტიანი ეპიზოდები.

აღსანიშნავია, რომ თუშური „დალაი“ უფრო მეტ კანონიერ-რობას ამჟღავნებს და ყოველი სამგლოვიარო რიტუალის დროს თითქმის ერთი და იგივე ტექსტი სრულდებოდა, როცა პალ-ხფალდისაგი ცხენის კურთხევის წარმოთქმის დროს უფრო მეტი იმპროვიზაციისა და ინოვაციის უფლებას იტოვებდა. თუშური „დალაი“, ოსურ ცხენის კურთხევასთან შედარებით, არის გაცილებით მცირე ზომის ტექსტი, თუმცა სტრუქტურულად და კომპოზიციურად უფრო მყარი და პოეტური თვალსაზრისით უფრო მეტად მოწესრიგებული ნაწარმოები (ანთოლოგია 2010: 163-164).

ხევსურული და ოსური ცხენის კურთხევის რიტუალი მსგავსი სტრუქტურული ელემენტებისგან შედგება. ხევსურული ტრადიციის თანახმად, „მიცვალებულთან დააყენებენ მის „სულის ცხენს“, რომლის აღვირი მიცვალებულს მარცხენა ხელში ჰქონდა გამობმული“ (მაკალათია 1935: 202). მიცვალებულის პატივსაცემად და მისი სულის საცხონებლად ხევსურები, ისევე როგორც სხვა კავკასიელი მთიელები, დოლს მართავდნენ. „სულის ცხენს“ თავ-კისერზე მძივ-ლილით გამართული საფაფრე და საშუბლე ეკეთა. მისი წინამძღვრობით რიგში დაწყობილი მხედრები სამჯერ შემოუვლიდნენ ფარდაგზე გაშლილ მიცვალებულის ტალავარს და მიემართებოდნენ მიცვალებულის ნათესავის სოფლისკენ. ცხენები დოლში, როგორც წესი, შეუკაზმავი გამოჰყავდათ. „ჭირის პატრონის“ ნათესავი მხედრებს ტაბლას უდგამდა. ბოლო ტაბლიდან მხედრები „ჭირის პატრონის“ სოფელში ბრუნდებოდნენ და იწყებოდა ნამდვილი შეჯიბრება. რომელი ცხენიც პირველი მივიდოდა ფინიშთან, გამარ-

ჯვებული ის იქნებოდა. რიგის მიხედვით აჯილდოებდნენ და-ნარჩენ ცხენებსაც.

ქართველ მთიელთა წარმოდგენით, მამაკაცს ცხენი საიქი-ოშიც სჭირდება. ერთ-ერთ ლექსში მიცვალებული თავმომწო-ნედ აცხადებს: „გვერდით გვიპავის ცხენები, დაყავრულები, ლაგმითა“. ფშავები ჩაწერილი ტექსტის მიხედვით კი, საიქიოში მოხვედრა მხოლოდ სულის ცხენით იყო შესაძლებელი:

„სულეთში სადამ ჩავედი, ჩემის მიმინოს ცხენითა,
შემომყვნენ მოქიშპეები, მოღალატენი ენითა“

(მაკალათია 1934: 157).

ხევსურულმა ზეპირსიტყვიერებამ შემოგვინახა ცხენის კურთხევის ტექსტის მხოლოდ ფრაგმენტი, რომელსაც მიცვა-ლებულის სახელზე საგანგებოდ შეკაზმულ-მორთული ცხენის შესანირად სულის ხუცესი აღავლენდა. პახფალფისაგის მსგავ-სად, სულის ხუცესიც ხევსურული კურთხევის ტექსტში მიცვა-ლებულს მიმართავდა: „ეს ცხენივ შენიმც საწმარ იქნებავ, შე-ნიმც საფერკე იქნებავ, დიაციმცავ შენ საწმარ იქნებავ, ნაბდია-ნიმც მაგივავ, ლაგამ-ავშარაიანივ, ნალლურსმანიანივ, სან-თელ-დაკრულიმც მაგივავ...“ შემდეგ გრძელდება ჩვეულებრივი სულის ხუცობა (სადიდებლები 1998: 60).

სულის ხუცესი, ცხენის კურთხევის გარდა, წარმოთქვამდა სულის ხუცობის, სულის წყაროს დალოცვისა და მიცვალებუ-ლის სახელისდების ტექსტებსაც. ამ ტექსტებით უშუალოდ მიცვალებულს მიმართავდნენ და ცოდვების მიტევებას, საიქი-ოში უხვ სუფრასა და „იაღში“ ანუ სამოთხეში ყოფნას უსურვებ-დნენ. სულის ხუცობის ტექსტის მიხედვით, ღმერთმა შექმნა მიცვალებულთა სამუდამო ადგილსამყოფელი, რომელსაც ჰქვია სულეთი. ხუცესი მიცვალებულის სულს ღმერთს ავედ-რებდა: „სულეთის გამჩენ ღმერთმ მაგახმარასთ ეს ტაბლაა“;

„რასაც ჩემის უენპირობით დაგაკლებთ, სულეთის გამჩენ ღმერთიმც დაგიმატებსთ“; „ღმერთო, სულიც შენ გებარების და, კაციც შენ გეხვეწების“; „ღმერთო, გეძახს წიქაი (გარდაცვლილის სახელი), ღმერთო, გეხვეწების, ღმერთო, შაიხვეწე, ღმერთო, იხვაიშნე!“ „სულეთის გამჩენ დალოცვილ ღმერთმ შენ ენა-პირ დიდხანს აუბნას!“ – მიმართავენ სახელისდების წარმოთქმის შემდეგ სულის ხუცესს ჭირისუფლები. სამოთხეს ხევ-სურულ სახელისდების ტექსტში ჰქვია იაღი. ხოლო „საიალოა“ არის სამოთხეში გასამწესებელი მიცვალებული: „შენამც საიალოა სწორ-ამახანაგჩიამც ზდგეხარ!“ – ამბობს სულის ხუცესი და გარდაცვლილს დაუბრკოლებლად, გახსნილი გზით (როგორც ოსურ ცხენის კურთხევის ტექსტში) უსურვებს სასუფეველში შესვლას: „იაღში გზაიმც ხსნილ გაქვ, სულიმც იაღი, გზათამც ინათებ, ბნელშიამც ნუ დასჩები“ (სადიდებლები 1998: 96). იაღი და ბნელი ტექსტში ისეთივე ანტონიმურ წყვილს წარმოადგენს, როგორსაც სამოთხე და ჯოჯოხეთი. მიცვალებულის დალოცვის ხევსურული ტექსტები სრულად შეესაბამება ქრისტიანულ წარმოდგენას სასუფეველზე, „სადა იგი არა არს ჭირი, მწუხარება, არცა ურვა, არამედ სიხარული და ცხოვრება იგი დაუსრულებელი“. იაღი ხევსურულ ტექსტებში, სამოთხის გარდა, ზოგადად არის ბედნიერების, სიხარულის აღმნიშვნელი სიტყვა. „ეს წვერის არყიან ბოთლანი შენამც გაიაღებს!“ – მიმართავს ხუცესი მიცვალებულის სულს სახელისდების ტექსტში.

ხევსურული სახელისდებანი ფრაგმენტულად წარმოგვიდგენს საიქიოს სურათს. ხალხური რწმენით, სულეთში ქრისტიანებისთვის სუფრა აქვთ გაშლილი, იქ ანგელოზები ხარობენ და სულიწმინდას ადიდებენ, მადლისმქმნელი ხალხი ნეტარებს, ცოდვილები კი იტანჯებიან და თავიანთ შეცდომებს ინანიებენ. სახელისდების მიხედვით, საიქიოში „ქრისტიან პურობენ, ანგელოზ ჟამობენ, ცოდვიან ნანობენ, მადლიან განისვენებენ, სულიწმინდა მოიხსენების“ (სადიდებლები 1998: 94).

შენიშვნა: საიქიოში, ე.წ. სულეთ-შავეთში მოგზაურობენ და საიქიოს ამბებს გადმოგვცემენ მესულთანეები. ბიბლია მოგვითხრობს ყენდორელი მესულთანე ქალის შესახებ, რომელმაც საული გარდაცვლილ შამუელს შეახვედრა. სამუელმა მეფეს გარდაუვალი დაღუპვა უწინასწარმეტყველა (1 მეფ. 28: 8-19).

ცხენის კურთხევისა და ცხენშეწირვის ნიშნებს ატარებს ხევსურთა ყოფასა და ზეპირსიტყვიერებაში დადასტურებული ზოგიერთი სხვა ტრადიცია. ცნობილია, რომ ცხენის „მისამბარეო“ რიტუალი ტარდებოდა ხახმატის ჯვარში, სადაც ცხენის სამეშვლოს მსხვერპლად სწირავდნენ. ალ. ოჩიაურს დამონმებული აქვს ამღის ჯვრის ნაქადაგარი, რომელშიც ღვთისშვილი აცხადებს: „ძალი და შაძლება მაშინ მქონდა, როცა სამის წლის რემათ მიხოცდნენო“ (ოჩიაური 1988: 91).

სკვითურ-სარმატული და ალანური ეპოქის კატაკომბებში არქეოლოგებმა აღმოაჩინეს მიცვალებულთან ერთად დაკრძალული ცხენები სრული აღჭურვილობით. ამიტომ მკვლევარები მიცვალებულის სახელზე ცხენის კურთხევის ოსური რიტუალის ძირებს სკვითურ-სარმატულ ტრადიციებში ეძებდნენ. ზოგიერთი ჩანაწერი, რომელიც დაგვიტოვა ჰეროდოტემ სკვითების შესახებ, მართლაც, ცალკეული ეპიზოდებისა და მოტივების დონეზე სიახლოვეს ამჟღავნებს ოსურ ხალხურ ტექსტებსა და ტრადიციებთან. ჰეროდოტეს ისტორიიდან ცნობილია, რომ სკვით მეფებს იმ ქვეყნად საუკეთესო ცხენების რიტუალური მსხვერპლშენირვით აცილებდნენ. მეფის გვამს 40 დღის განმავლობაში დაატარებდნენ მთელ სკვითიაში, ოლქიდან ოლქში და მას ყველგან დასტიროდნენ. ისინი მწუხარებას თვალსაჩინოდ გამოხატავდნენ: ყველა სკვითი იჭრიდა ყურის წვერს, იჭრიდნენ აგრეთვე თმას, ისერავდნენ ხელებს, იკანრავდნენ შუბლსა და ცხვირს. სკვითები მეფესთან ერთად მარხავდნენ მის ცოლს, მსახურს, ცხენს, იარაღსა და ჭურჭელს (ჰეროდოტე IV, 73).

ჟ. დიუმეზილი, არცთუ უსაფუძვლოდ, სკვითური დაკრძალვის რიტუალის გამოძახილს ხედავს ოსურ წეს-ჩვეულებებში. ესენია: 1. მიცვალებულის სახელზე ნაკურთხი ცხენისთვის ყურის წვერის მოქრა. 2. გარდაცვლილის ქვრივის მიერ თმის მოქრა. 3. გლოვის ნიშნად სახის დაკანვრა. 4. საოჯახო ნივთებისა და ჭურჭლის საფლავში ჩატანება (დიუმეზილი 1976: 43).

ჰეროდოტეს ცნობით, მეფის გარდაცვალებიდან ერთი წლის შემდეგ სკვითები მეფის 50 ყველაზე ბეჯით მსახურსა და 50 საუკეთესო ცხენს ახრჩობდნენ. შემდეგ შიგნავდნენ და ასუფთავებდნენ მათ შიგთავსს, ბოლოს ბზით გამოტენიდნენ, შეკერავდნენ და საფლავის ირგვლივ მათ მარგილებზე დგამდნენ. ცხენებზე დამაგრებული შენირული მსახურები მხედრებივით გამოიყურებოდნენ (ჰეროდოტე IV, 72). რასაკვირველია, შენირულ ცხენებს ჰქონდათ მიცვალებულის მომსახურებისა და მისი საიქიოში წაყვანის დანიშნულება. ჟ. დიუმეზილის აზრით, საიქიოდან მომავალი სოსლანის ბზით გატენილი ცხენის ეპიზოდი ინახავს სკვითურ „საიქიოს ცხენებზე“ ზუსტ მოგონებას (დიუმეზილი 1976: 43).

შენიშვნა: აღსანიშნავია, რომ ინდური აშვამედხას (asva-medha) რიტუალიც ითვალისწინებდა ერთწლიანი ხეტიალის შემდეგ, ისევე როგორც სკვითებში, სამსხვერპლო ცხენის დახრჩობას.

ძველი ინდური ტრადიცია იცნობს რიტუალს, რომლის სახელწოდებაც არის აშვამედხა, იგივე ცხენშენირვა, asva – ცხენი (შდრ. ქართ. აჩუა), medha – შენირვა. ვედების რელიგიაში ის იყო ერთ-ერთი უმთავრესი სამეფო მსხვერპლშენირვა, რომელსაც დეტალურად აღწერს „იაჯურვედა“, ხოლო ფრაგმენტულად გადმიგვცემს „რიგვედა“ (X, 56). აშვამედხა ტარდებოდა გაზაფხულზე სამყაროს განახლების მიზნით. რიტუალი დაკავშირებული იყო სამეფო ხელისუფლების ლეგიტიმაციასთან და მიზნად

ისახავდა ძლიერებისა და დიდების დაუფლებას, ასევე სამეფოში ნაყოფიერების, ბარაქიანობისა და კეთილდღეობის დამყარებას.

ოსური და ინდური ცხენშენირვის რიტუალის მიზნები სრულიად განსხვავდებოდა ერთმანეთისგან, მაგრამ მათ ჰქონდათ საერთო ელემენტები. ისევე როგორც ოსური ცხენის კურთხევის რიტუალი, აშვამედხას ცერემონიებში მნიშვნელოვანი ადგილი ეკავა სარიტუალო ცხენის მორთვა-მოკაზმას. მთავარი დედოფალი მეფის ორ ფოლთან ერთად ულაყს უსვამდა გხის – არომატულ გამდნარ კარაქს. მეფის ცოლები რთავდნენ ცხენის თავს, კისერსა და კუდს ოქროს სამკაულებით. როგორც ოსური ცხენშენირვის რიტუალი ტარდებოდა კურთხევის ტექსტის თანხლებით, ასევე ინდური აშვამედხა მიმდინარეობდა მანტრის ლოცვების დეკლამაციით. ვეძურ რიტუალში საზეიმოდ მორთულ ცხენს სამჯერ შემოატარებდნენ სამსხვერპლო ბოძის ირგვლივ, რომელიც სამყაროს ღერძს განასახიერებდა. ოსებთან ცხენს ასევე სამჯერ შემოატარებდნენ საფლავის ირგვლივ, რომელიც, კ. რეხნოს აზრით, განასახიერებდა მოდელირებულ ცენტრს (რეხნო 2010: 218). ოსური ცხენის კურთხევის რიტუალში შენირვის აქტი გამოიხატებოდა ცხენის ყურის გასერვით ან ყურის წვერის წაჭრით, რომელსაც მიცვალებულს თავქვეშ უდებდნენ და სამარეში ატანდნენ. ინდური ცხენშენირვის ცერემონია კი ითვალისწინებდა სარიტუალო ცეცხლის მახლობლად სამსხვერპლო ცხენის რიტუალურ შენირვას 609 შინაურ და გარეულ ცხოველთან ერთად. დედოფლები კი ასობით მსახურის თანხლებით და მანტრის ლოცვების დეკლამაციით ულაყს გარშემო უვლიდნენ. ამის შემდეგ იწყებოდა ცერემონიის ყველაზე მნიშვნელოვანი ნაწილი, რომელიც რიტუალური ნეკროფილიისა და ზოოფილიის ელემენტებს შეიცავდა: მეფის მთავარი ცოლი მთელი ღამის განმავლობაში მკვდარ ულაყთან კოპულაციის იმიტაციას ეწეოდა. ამავე დროს სხვა დედოფლები

იქვე, შორიახლოს, აღავლენდნენ რიტუალურ ბილწისტყვაობასა და წარმოთქვამდნენ უწმაწურ ფრაზებს (კეიტი 1914: 615-616).

აშვამედხა მთავრდებოდა ცხენის დანაწევრებით. იგი გამოხატავდა ხელახალ შესაქმეს, სამყაროს რიტუალურ განახლებას, რომელიც ძველი ინდური ტრადიციის მიხედვით, პურუშას სხეულის ნაწილებისგან შეიქმნა. თავისი მითოლოგიური სტატუსით აშვამედხა შეესაბამებოდა პურუშას მსხვერპლშენირვას.

მიუხედავად იმისა, რომ ოსური „ცხენშენირვა“ მიცვალებულის საიქიოში გასამგზავრებელ რიტუალს წარმოადგენდა და აშვამედხასგან სრულიად განსხვავებული მიზნები ჰქონდა, ვფიქრობ, უფრო უნდა გავითვალისწინოთ მ. ელიადეს მოსაზრება ცხენშენირვის რიტუალის ინდოევროპული წარმოშობის შესახებ. შედარებითი მითოლოგიის არაერთი მონაცემი ცხენშენირვის ინდოევროპული წარმოშობის თვალსაზრისს გვიდასტურებს.

ოსური ცხენის კურთხევის ტექსტს ინდოირანული მოდგმის ხალხთა მითოლოგიასთან, ცხენის შენირვის რიტუალის გარდა, საიქიოში მოგზაურობის მოტივიც აახლოებს.

ოსურ ხალხურ ტექსტებში საიქიოს ბარასთირის სამეფო-საც უწოდებენ. ბარასთირის ეპითეტებია: საიქიოს გამრიგე, სამოთხის მბრძანებელი. ზოგიერთი მკვლევარი მიცვალებულთა მეუფე ბარასთირის სახეში ზოროასტრიზმის გავლენის პირდაპირ კვალს ხედავდა. ფალაურ ენაზე შექმნილ არდა-ვირაფის წიგნში შემონახულია ზოროასტრისტთა მოგზაურობა ცაში და ჯოჯოხეთში. თუმცა მკვლევართა უმეტესობა ბარასთირს საკუთრივ ოსური მითოლოგის პერსონაჟად მიიჩნევს.

უ. დიუმეზილი პარალელს ავლებს საიქიოში მოგზაურობის ამსახველ ოსურ ტექსტებსა და ბრაჟმანთა ისტორიებს შორის. ძველმა ინდურმა მითოლოგიამ, მართალია, ცოტა იცის ჯოჯოხეთის შესახებ, მაგრამ ვედებიდან ცნობილია ღმერთ ვარუნას ვაჟის ბპრიგუს ექსტატიური მოგზაურობა საიქიოში. ღმერთი

ვარუნა ფიქრობს, რომ ბპრიგუს დაეუფლა ამპარტავნობა, ამიტომ მის სულს ჯოჯოხეთში აგზავნის. ბპრიგუ იქ ესწრება კი-დეც ზოგიერთ რიტუალურ დანაშაულში ბრალდებულთა დასჯას. ბპრიგუს თვალწინ გადაიშლება საიქიოს ბინადართა ცხოვრების ისეთივე საიდუმლოებით მოცული და ამოუხსნელი სცენები, როგორსაც ვხვდებით ცხენის კურთხევის ოსურ ტექსტება და საიქიოში სოსლანის მოგზაურობის ეპიზოდში. ბპრიგუ ვერ აცნობიერებს საიქიოში დანახულ-განცდილსა და მათ ასახ-სნელად მიმართავს მამას – ვარუნას ზუსტად ისე, როგორც სოსლანი, რომელმაც ვერ შეძლო ამოეცნო საიქიოს „ჭკუის სასწავლი“ შეხვედრების აზრი და მათი ახსნა სთხოვა თავის გარდაცვლილ მეუღლეს – ბედუხას. უ. დიუმეზილმა პირველმა დაუკავშირა ერთმანეთს სოსლანისა და ბპრიგუს მოგზაურობა საიქიოში. მისი აზრით, ორივე მითს შეიძლება საერთო არქეტიპი ჰი ჰერონდა საფუძვლად (დიუმეზილი 1976: 79).

ბპრიგუს, არდა ვირაფის, ოსური „ცხენშენირვისა“ და სოსლანის საიქიოში მოგზაურობის ტექსტებს შორის, რა თქმა უნდა, არის განსხვავებაც. ზოგიერთი მათგანი უფრო სრულად წარმოგვიდგენს საიქიოში მოგზაურობას, ზოგიც შემოიფარგლება იმქვეყნიური სურათების მხოლოდ განსაზღვრული რაოდენობის წარმოდგენით. ყველა მათგანში ცოდვილთა დანაშაული ძირითადად ზნეობრივ-ეთიკურ ხასიათს ატარებს. ამ ტიპის ტექსტებს ჰერონდა დიდაქტიკურ-აღმზრდელობითი ფუნქციაც.

არავითარ ეჭვს არ იწვევს, რომ მიცვალებულის სახელზე ცხენის კურთხევის ოსური ხალხური ტექსტი და წეს-ჩვეულება წარმოადგენს ცხენშენირვის ძველი რიტუალის ტრანსფორმირებულ სახეს. როგორც ჩანს, უძველესმა ინდოევროპულმა მითმა უნივერსალური სახე მიიღო და მას კავკასიის ხალხებიც იცნობდნენ. ცხენშენირვის რიტუალზე გავლენა მოახდინა მსოფლიო რელიგიებმა და მან სხვადასხვა ტრადიციაში განსხვავებული დანიშნულება შეიძინა.

ლიტერატურა

- აბაევი 1990:** Абаев В.И., Избранные труды в 4-х т. Т.1. Владикавказ, 1990.
- ალავერდაშვილი 2013:** ქ. ალავერდაშვილი, საწესო ფერხულების შესწავლისათვის, საერთაშორისო სამეცნიერო კონფერენციის მოხსენებათა კრებული, ვერა ბარაველიძე – 100, გამომც. „უნივერსალი“, თბ., 2013.
- ანთელავა 2012:** ნ. ანთელავა, ოსური მითები და რიტუალები, თბილისის უნივერსიტეტის გამომცემლობა, თბ., 2012.
- ანთოლოგია 2010:** ხალხური პოეზის ანთოლოგია, შედგენილი ზ. კიკნაძისა და ტ. მახაურის მიერ, „მემკვიდრეობა“, თბ., 2010.
- არდა ვირაფა 1977:** არდა ვირაფ ნამაკ, „არმალანი“, აღმოსავლური მწერლობის ნიმუშები, თბ., 1977.
- ბარდაველიძე 1957:** Барделидзе, В. В., Древнейшие религиозные верования и обрядовое графическое искусство грузинских племен. Тб., Изд. АН ГССР, 1957.
- ბეკოევი 2012:** Бекоев В., Народная поэзия в системе традиционной культуры осетин, автореферат, диссертации на соискание ученой степени доктора филологических наук, Махачкала, 2010.
- გატიევი 1987:** Гатиев Б., Суверия и предрассудки у осетин//ППКОО. кн. З. Цхинвали, 1987.
- დარჩიევა 2012:** Дарчирова М. В., Верbalnyy kod osetinskogo obriadovogo teksta, Vladikavkaz, 2012.
- დიუმეზილი 1976:** Диумезиль Ж., Осетинский эпос и мифология, „Наука“, Москва, 1976.
- ელიადე 2000:** Элиаде М., Шаманизм и архаическая техника экстаза, изд. „София“, 2000.

- ელიადე 2009:** მ. ელიადე, მითის ასპექტები, ილიას უნივერსიტეტის გამომცემლობა, თბ., 2009.
- ვარზიათი 1987:** Уарзиати В., *Народные игры и развлечения осетин*, Конь в обрядах и играх, Орджоникидзе: Ир, 1987. <http://www.anaharsis.ru/biblio/Vilen/Uarz-51.htm>
- ვარზიათი 1995:** Уарзиати В., Праздничный мир осетин, Северо-Осетинский институт гуманитарных исследований, Владикавказ, 1995. <http://www.iriston.com/nogbon>
- ვახუშტი 1973:** ბატონიშვილი ვახუშტი, აღნერა სამეფოსა საქართველოსა, ქართლის ცხოვრება, ტ. IV, ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ, გამომც. „საბჭოთა საქართველო“, თბ., 1973.
- ვირსალაძე 1964:** ე. ვირსალაძე, ქართული სამონადირეო ეპოსი (დაღუპული მონადირის ციკლი), გამომც. „მეცნიერება“, თბ., 1964.
- კავკასიის ფოლკლორი 2008:** კავკასიის ხალხთა ფოლკლორი, პროექტის ავტორი და მთავარი რედაქტორი ნაირა გელაშვილი, გამომც. „კავკასიური სახლი“, თბ., 2008.
- კეიტი 1914:** Keith A. B., The Veda of the black Yajus school entitled Taittiriya sanhita. – Cambridge: Harvard University Press, 1914. <http://archive.org/details/vedablackyajuss02keitgoog>
- კიკნაძე 2005:** ზ. კიკნაძე, მონადირის ორმაგი ცხოვრება, მასალები საქართველოს ეთნოგრაფიისათვის, XXV, ეძღვნება პროფესორ ვერა ბარდაველიძის დაბადებიდან 100 წლისთავს, თბ., 2005.
- კიკნაძე 2008:** ზ. კიკნაძე, ქართული ფოლკლორი, თსუ გამოცემლობა, თბ., 2008.

- Мақаլаатыа 1934:** Һ. Мәқаләттыа, ғұмбағи, 1934.
- Мақаләттыа 1935:** Һ. Мәқаләттыа, Եгемендерге ти, 1935.
- Мақашына 1982:** Макашина Т. С., Ильин день и Илья-пророк в народных представлениях и фольклоре восточных славян, Сб., Обряды и Обрядовый фольклор, издательство „Наука“, Москва, 1982.
- Мәмісімегеңішвили 2009:** Һ. Мәмісімегеңішвили, Қазар-ხатынды სა-კულтур үйеңсітие өмірі, „Университетская“, тә., 2009.
- Мәкәүрі 2009:** Ә. Мәкәүрі, ფოლკლორულ-ეтноғұрағынұллі ңаңғызығы, Ңигеби II, გамомұғ. „Университетская“, тә., 2008.
- Міллєрі 1881:** Миллер В., Осетинские этюды, Ч. 1-3, М. 1881.
- Нарынеки 1988:** Нарынеки, өсүрніздан таңғымна Ә. Қебіржебомба, „Иринеосимонови“, Қебінбағы, 1988.
- Оңдағы 2009:** Ә. Оңдағы, құлғұлғұрұллі ғәміріл პропедевтика ქартულ ფолклооры, თсұу ғағамдар мәдениеті, тә., 2009.
- Осьруи سئلیقیزیئرےدا 2005:** Өсьруи ۋەپىرلىقىقىزىئرەدا, Ңигеби شەذғынەس და ქارتულ ეնاثە თаңғымнەс ნاიրა ڈېپىرە და მېرۇ Қебіржебомба, ғамомცემләрда „қағыда сиңүри სახли“, тә., 2005.
- Оғизаүрі 1988:** Әл. Оғизаүрі, ქартულ ხაлқынри յағында, өз-სүрети (археология тәжіри), „Мәғниндерге да“, тә., 1988.
- Рағбет 2010:** Рахно К., Посвящение коня в погребальном обряде осетин и его украинские паралели; Материалы международной юбилейной научной конференции „Россия и Кавказ“ (6-7 октября 2009 г., Владикавказ) – Владикавказ, 2010.
- Садидеңдеңде 1998:** Қазар-ხатында садидеңдеңде, үйеңсітие შეკрібес, შესағағы, ლექსикони და სадидеңдеңде

- დაურთეს ზ. კიკნაძემ, ხ. მამისიმედიშვილმა და
ტ. მახაურმა, „ნეკერი“, თბ., 1998.
- სიხარულიძე 2006:** ქ. სიხარულიძე, კავკასიური მითოლოგია,
გამომც. „კავკასიური სახლი“, თბ., 2006.
- სოკაევა 2010:** Сокаева Д. А., Обозначение сакрального центра в
осетинском обряде и несказочной прозе (устные
рассказы), *Вестник Челябинского государственного
университета, № 17 (198). Филология. Искус-
ствоведение. Вып. 44. 2010.*
- შანიძე 1931:** ა. შანიძე, ქართული ხალხური პოეზია, I, ხევსურუ-
ლი, სახელმწიფო გამომცემლობა, ტფილისი, 1931.
- შიფნერი 1868:** Шифнер А., Осетинские тексты, собранние Д. Чон-
кадзе и В. Цораевым, Императорская академия
наук, С-Петербург, 1868.
- შოგრენი 1843:** Шегрен: А., Религиозные обряды осетин, ингушей
и пр. // Маяк, Т. 7. 1843.
- შტიოდერი 1967:** Штедер, А. О., Дневник путешествия из погра-
ничной крепости Моздок во внутренние местности
Кавказа, предпринятого в 1781 году // Осетины
глазами русских и иностранных путешественников.
Орджоникидзе: Северо-Осетин. книж. изд-во, 1967.
- ჩიბიროვი 2008:** Чибиров Л. А., Традиционная духовная культура
осетин, РОССПЭН, Москва, 2008.
- ჩიქოვანი 1959:** მ. ჩიქოვანი, ქართული ეპოსი, წიგნი I, საქ. მეც-
ნიერებათა აკადემიის გამომცემლობა, 1959.
- ჩიქოვანი 1971:** მ. ჩიქოვანი, ბერძნული და ქართული მითოლო-
გიის საკითხები, თბ., 1971.
- ხალხური ანთოლოგია 2010:** ხალხური პოეზიის ანთოლოგია,
შედგენილი ზ. კიკნაძისა და ტ. მახაურის მიერ,
გამომცემლობა „მემკვიდრეობა“, თბ., 2010.



ନୀତିଲାକଣ୍ଡ ପ୍ରକଳ୍ପ

ଏହାକୁ ମାତ୍ର ଏକ ପରିବାରଙ୍କ ପ୍ରକଳ୍ପ ହେଉଥିଲା ।

ზღაპარი ხალხური მხატვრული პროზის ერთ-ერთი ყველაზე გავრცელებული და პოპულარული ჟანრია. მისი უძველესი დადასტურება გვხვდება ჯერ კიდევ ძველეგვიპტურ მწერლობაში. ზღაპარი, ისევე როგორც ყველა სახის ხალხური შემოქმედება, მკაფიოდ გამოხატავს ერის ნაციონალურ თავისებურებას. მართალია, ზღაპარი ღრმად ეროვნული ნაწარმოებია, მაგრამ მსოფლიოს ხალხთა ზღაპრების ძირითადი ფონდი მსგავს სიუჟეტებზეა აგებული.

ოსურ ენაზე ზღაპარს ჰქვია არღაუ (аргхав). ოსური ზღაპრების ნაციონალურ სპეციფიკას ქმნის მთხოვნელის ენა, პერსონაჟთა ცხოვრების სტილი, ტრადიციული ელემენტები და სიტყვიერი ფორმულები, აგრეთვე, სოციალური ურთიერთობები და მთავარი გმირის სახე, რომელიც განასახიერებს ოსი ხალხის წარმოდგენებს ადამიანის საუკეთესო თვისებებზე.

ზღაპრების კლასიფიკირების სხვადასხვა ვერსიები არსებობს. ტრადიციულად ზღაპრებს სამ ტიპად ყოფენ: ა) ცხოველთა ზღაპარი; ბ) საყოფაცხოვრებო-ნოველისტური ზღაპარი და 3) ჯადოსნური ზღაპარი. თითოეულ მათგანს აქვს განსხვავებული სტრუქტურა, შინაარსი და საზრისი. ამდენად, ხალხური პროზის ამ სამივე სახეობის ზღაპრის სახელწოდებით მოხსენიება ფორმალურ ხასიათს ატარებს.

ოსური ზღაპრების შეკრება და გამოქვეყნება დაიწყო XIX საუკუნის 70-იანი წლებიდან. ჯანტემირ და გაცირ შანაევების შეკრებილი ჯადოსნური და ცხოველთა ზღაპრები პირველად 1870 წელს დაიბეჭდა თბილისში, „კავკასიის მთიელთა შესახებ ცნობების კრებულში“ (Сборник сведений о кавказских горцах). ვ. მილერმა ოსური ჯადოსნური ზღაპრები შეიტანა თავის „ოსურ

ეტიუდებსა“ (1881 წ.) და „დიგორულ თქმულებებში“ (1902 წ.). ოსური ზღაპრები ქვეყნდებოდა, აგრეთვე, XIX საუკუნის 80-90-იანი ნლების რუსულ გაზეთებში („Терские ведомости“, „Казбег“, „Кавказ“, „Тифлисский листок“, „Новое обозрение“ და სხვ.), რომ-ლებიც იმ დროს გამოდიოდა თბილისა და ვლადიკავკაზში. ოსურ ზღაპრებს ხშირად ბეჭდავდნენ ქართული ჟურნალ-გაზე-თები: „აკაკის კრებული“ (1890 წ.), „ივერია“ (1880-1890 წწ.), „დროება“ (1880), „ნობათი“ (1880), ოსური ზღაპრები ქვეყნდე-ბოდა XX საუკუნის დასაწყისის ოსურ გაზეთებშიც.

საბჭოთა პერიოდში მშობლიურ ენაზე ოსური ზღაპრების რამდენიმე კრებული გამოქვეყნდა. მათ შორის აღსანიშნავია: ს. მამიევის „ზღაპრები და გადმოცემები“ (1930 წ.), „სამხრეთ ოსე-თის ფოლკლორი“ (1936 წ.), „ოსური ზღაპრები“ (1956 წ.) და „ოსური ხალხური ზღაპრები“ ოთხ ტომად (1959-1962 წწ.).

ოსურ ზღაპრებს იწერდნენ და კრებდნენ ა. შიონერი, ვ. მი-ლერი, ვ. წორავი, დ. ჭონქაძე, დ. შანაევი, გ. შანაევი, გ. ჩოჩიშ-ვილი, გ. ერისთავი, გ. გურიევი, დ. ბეგიზოვი და სხვები.

საბჭოთა პერიოდში ქართულ ენაზე ხშირად ქვეყნდებოდა ოსური ზღაპრები. 1957 წელს ცხინვალში ალ. ლლონტის რედაქ-ტორობით, შესავალი წერილითა და შენიშვნებით დაიბეჭდა დუ-დარ ბეგიზოვის მიერ შეკრებილი „ოსური ზღაპრები და ლეგენ-დები“, რომელიც კიდევ ერთხელ გამოიცა ცხინვალში 1972 წელს. 1974 წელს ცხინვალში გამოქვეყნდა „ოსური ზღაპრები“, რომელშიც შევიდა ჯადოსნური ზღაპრები. 1975 წელს ქართულ ენაზე გამოქვეყნებულ „ოსურ ზღაპრებში“ კი, რომელიც გიორ-გი ბესთაუთის რედაქტორობით დაიბეჭდა, ძირითადად შესუ-ლია ცხოველთა არაკები და საყოფიერო ნოველები. ქართულ ენაზე გამოცემული ყველა საზღაპრო კრებული ოსურიდან თარგმნა მერი ცხოვრებოვამ.

ჯადოსნური ზღაპარი

ოსური ზღაპრების კლასიფიკაციის პირველი ცდა ეკუთვნის ა. ბიაზიროვს. პოსტსაბჭოთა პერიოდში დაიწერა დისერტაცია „რუსული და ოსური ჯადოსნური ზღაპრების ისტორიულ-შედარებითი შესწავლა“ (სოკაევა 1999). გამოქვეყნდა, აგრეთვე, ოსური ჯადოსნური ზღაპრების საძიებელი აარნე-ანდრეევის სისტემის მიხედვით (სოკაევა 2004). თუმცა ოსური ჯადოსნური ზღაპრები ყველაზე მეტ სიახლოვეს ამჟღავნებს არა რუსულ, არამედ კავკასიის ხალხთა საზღაპრო სიუჟეტებთან, მათ შორის ქართულ ტექსტებთან.

ზღაპარი ადვილად გადადის ერთი ხალხის საზღაპრო ფონ-დიდან მეორეში და ყოველთვის იქნება ნაციონალურ თავისებურებას. ამას მკაფიოდ ადასტურებს „აარნეს სისტემის“ მიხედვით შედგენილი საერთაშორისო საზღაპრო სიუჟეტების კატალოგი.

უნივერსალურ ელემენტებსა და მოდელზე აგებულ სიუჟეტებში პერსონაჟს აქვთ ოსური ყოფისთვის დამახასიათებელი ნიშნები. ოსურ ჯადოსნურ ზღაპრებში გვხვდება საერთაშორისო სიუჟეტები:

გმირის შეხვედრა და ბრძოლა დევებთან (ვაიგებთან), აგრეთვე, სხვადასხვა ბოროტ არსებებთან.

მალიქს სურს წაართვას გმირს მზეთუნახავი ცოლი და მას ძნელ დავალებას აძლევს. მზეთუნახავი ცოლის დახმარებით გმირი შეასრულებს ყველა დავალებას და იმარჯვებს („მალიქ და მისი მონადირე“).

გაქცევა კუდიანისგან. გმირი თავს დააღწევს კუდიანს (ან დევს) ჯადოსნური საგნების გადაგდებით, რომლებიც დაბრკოლებად გადაექცევა ანტაგონისტს გზაზე („ბატონი და შვიდი ძმა“, „ორი ძმა“, „სამი ძმა და ერთი და“).

მზეთუნახავს აქვს ჯადოსნური სარკე. საქმროებს, რომლებიც ვერ შეძლებენ დამალვას, მზეთუნახავი აკვლევინებს და მათ თავებს მარგილზე წამოაგებენ. გმირი სამჯერ დაემალება მზეთუნახავს სხვადასხვა ცხოველების (მგელი, არწივი, მელია, თევზი) დახმარებით. ბოლოს გმირი იმალება სარკის უკან, მზეთუნახავი მას ვეღარ იპოვის და ჭაბუქს მისთხოვდება („ციური სარკის ზღაპარი“).

გმირი მოიპოვებს ჯადოსნურ ნივთებს – მფრინავ ხალიჩას, უჩინმაჩინის ქუდს და სიუხვის სუფრას, მათი დახმარებით ძლევს ანტაგონისტს და მზეთუნახავზე ქორწინდება („ოცი ძმის ზღაპარი“).

სიუჟეტის წინ მამამ დაუბარა ვაჟებს, რომ სამი ღამე ედა-რაჯათ მისი საფლავისთვის. მამის დავალება მხოლოდ უმ-ცროსმა ძმამ შეასრულა. მამის საფლავზე ის კლავს გველეშაპს და ცოლად ირთავს მზეთუნახავს. ეს ნაწილი კონტამინაციაშია სხვა სიუჟეტთან: დევი იტაცებს გმირის მზეთუნახავ ცოლს, რომელსაც ქმარი ათავისუფლებს სიძე-ფრინველებისა და გრძნეული რაშის დახმარებით („ნაცარქექია ალიბეგი“). იგივე სიუჟეტი არის გამოყენებული ზღაპარში „ბრმა და მისი ვაჟები“. გმირს მოტაცებული მზეთუნახავი ცოლის დაბრუნებაში ეხმა-რება ჯადოსნური თევზი და გრძნეული რაში.

უცნაური ამხანაგები (ბელტიყლაპია, ტბის მხვრეპავი, წისქვილის ქვებით მორქენალი) მთავარი გმირის ნაცვლად ასრულებენ ძნელ დავალებას („დედისერთა“).

ჭაბუქი ნადირობისას დაინდობს ირემს, რომელიც სანაცვლოდ გმირს ძნელი დავალების შესრულებაში ეხმარება. საბოლოოდ ვაჟი ქორწინდება მზეთუნახავზე („ვერცხლისრქება ირემი“).

მადლიერი გველი ნატვრისთვალს გაატანს ვირს თავის პატრონთან, რომელიც შეიცნობს ცხოველთა ენას და გამდიდრდე-

ბა. ცოლს სურს გამოსტყუოს საიდუმლო. კაცს ვირი და მამალი გადაარჩენენ („მადლიერი ვირი“).

უმცროსი ძმა დებს მიათხოვებს ყვავს, არწივსა და ყორანს, რომლებიც შემდეგ ეხმარებიან მას მოტაცებული ცოლის დაპრუნებაში („ნაცარქექია ალიბეგი“).

მელიას დახმარებით გმირი ქორწინდება ხელმწიფის ასულზე. მელია გაურიგდება მწყემსებსა და მიწის მუშაკებს, რომ აღიარონ თავი გმირის მსახურებად. მელია მას მოუპოვებს დევის (ვაიგის) სასახლეს და სიუჟეტი გრძელდება („ჩერთიმხანი“).

მზეთუნახავი-ბაყაყი: ბიჭი ეძებს საცოლეს იქ, სადაც მისი ნატყყორცნი ისარი დაეცა, ჭაობთან. მისი საცოლე აღმოჩნდება ჭაობის ბაყაყი, რომელიც მზეთუნახავად გადაიქცევა. მასთან კონტამინაციაშია სხვა სიუჟეტი. ვაჟი არღვევს აკრძალვას და კარგავს ცოლს. ბოლოს ჯადოსნური ნივთების საშუალებით მას იბრუნებს („ბაყაყის ტყავი“).

დედინაცვალს სძულს გერი გოგონა და ქმარს ტყეში გაატანს. მამა ტოვებს ქალიშვილს ცარიელ ქოხში, რომელშიც ცხოვრობს დათვი. გოგონა აჭმევს და უვლის დათვის ბელს. დათვი მას გამოცდის. ბელის დახმარებით ქალიშვილი ასრულებს დათვის დავალებას. დათვი უხვად ასაჩუქრებს ობოლ გოგონას და სახლში დააბრუნებს. დედინაცვალი ახლა თავის ქალიშვილს აგზავნის იმ ქოხში. გოგონა არ აჭმევს ბელს და ბელიც არ ეხმარება. საბოლოოდ მას დათვი შეჭამს („ობოლი ქალიშვილი“).

დედინაცვლისგან დევნილი ობოლი და-ძმა ტყეს შეაფარებს თავს. ძმა ირმის ნაფეხურიდან დალევს წყალს და გადაიქცევა ირმად. დას ბატონიშვილი წაიყვანს ცოლად. კუდიანი თვითონ ჩაენაცვლება გოგონას, რომელსაც ტბაში ჩააგდებს და ბატონიშვილს თავს ცოლად წარუდგენს. ის ირმის დაკვლასაც მოითხოვს. ყველაფერი გაცხადდება. ბატონიშვილი ტბიდან ამოიყვანს ნამდვილ ცოლს, მას გააცოცხლებს, ირემს კი მათრახს

გადაჰკრავენ და ის კვლავ ვაჟად გადაიქცევა. კუდიანს დასჯი-ან, მას ცხენის ძუაზე გამოაბამენ.

ქმარი ჭაკ ცხენად და ძუკნა ძალლად გადაიქცევა. ის ნაბ-დის მათრახით სჯის მოღალატე ცოლს („ცოფანის საკვირველი ამბავი“).

ნაბდის მათრახი: მზე მისცემს უფროს ძმას ნაბდის მათ-რახს, რომლითაც დებისგან დაკულულ უმცროს ძმას გააცოცხ-ლებს, ხოლო დებს გააქვავებს („მზის საკვირველება“). სხვა ზღაპარში ჯადოქარი ნაბდის მათრახით ჭაბუქს გადააქცევს მე-ძებრად, ხოლო ვაჟი დაბერებულ მშობლებს, იმავე მათრახის გადაკვრით, გააახალგაზრდავებს („ციური სარკის ზღაპარი“). ნაბდის მათრახის დარტყმით ნახშირი ოქროდ იქცევა, ხოლო დაუნდობელი მალიქი – ქეციან თხად („მალიქი“). ნაბდის მათ-რახი გვხვდება ოსური ტარიელიანის სიუჟეტშიც. უფროსი ძმა სტარეჯანს ნაბდის მათრახს გადაჰკრავს და მისი სხეულიდან ეშმაკებს განდევნის, ხოლო როცა სტარეჯანი დაიღუპება, მას ნაბდის მათრახით აცოცხლებენ. ნაბდის მათრახი დასტურდება ცარციათულ თქმულებებსა და ნართების ეპოსშიც.

ასეთი მაგალითების მოყვანა მრავლად შეგვიძლია. ოსური ხალხური ზღაპრები სრულ შესაბამისობაშია სიუჟეტთა ევრო-პულ საძიებლებთან, მათ შორის, აარნე-თომმპსონის კატალოგ-თან. ოსურ ზღაპრებზე დიდი გავლენა მოახდინა ფოლკლორის სხვა ჟანრებმა, კერძოდ, საგმირო-საისტორიო ტექსტებმა და ნართების ეპოსმა, აგრეთვე, არასაზღაპრო პროზამ, თქმულე-ბებმა.

ოსურ ზღაპრებში ზოგჯერ გვხვდება ნართული ეპოსის გაზღაპრებული სიუჟეტები: ზღაპარში „ალდარის რძალი“ ჩარ-თულია ურუზმაგის ტყვეობის გაზღაპრებული ვერსია, როცა ალდარი ჭკვიანი რძლის გონიერებითა და სიმარჯვით თავს და-აღწევს ტყვეობას. ზღაპარში „ბოროტი კაცი და მისი ვაჟი“ გა-მოყენებულია სოსლანის საიქიოში მოგზაურობის სიუჟეტი.

ზოგიერთი ოსური ზღაპარი ასე იწყება: „ნართების სოფელში ცხოვრობდა ერთი ცოლ-ქმარი...“ ნართების ეპოსსა და ოსურ ჯადოსნურ ზღაპრებს შორის მსგავსება უფრო ხშირად მუღლავნდება მოტივებისა და ეპიზოდების დონეზე. ნართულმა ელე-მენტებმა ორიგინალური ელფერი შესძინა ოსურ ზღაპრებს.

ზღაპრებში აისახა ოსური ყოფის რეალიები: მამის განსაკუთრებული უფლებები შვილების მიმართ, ძმებს შორის უფროსუმცროსობის ტრადიცია, რძლის მოვალეობა ქმრის ოჯახში და სხვა. ოსურ ზღაპრებში სხვადასხვა პერსონაჟის როლისა და ფუნქციის შემსრულებლად გვევლინება თეთრი და შავი ალდარი, თეთრი მთის თეთრი დევი, ხან ხარბი და ხანაც მოხერხებული ალდარი, სასტიკი მალიქი.

ოსური ჯადოსნური ზღაპრების რეპერტუარში ერთსიუჟეტიანი ტექსტები არ არის ბევრი. უმრავლეს შემთხვევაში გვხვდება ორი და მეტი სიუჟეტის შეერთება ანუ სიუჟეტური კონტამინაცია. იქიდან ერთი არის ცენტრალური, ძირითადი სიუჟეტი, ხოლო სხვები – მასზე დამოკიდებული, რომლებიც ავსებენ და ავითარებენ ძირითად სიუჟეტს.

სამოქმედო სივრცე ჯადოსნურ ზღაპარში არის განუსაზღვრელი. იმ ქვეყანას, სადაც ზღაპრის პერსონაჟები მოქმედებენ, არა აქვს სახელწოდება. ზღაპარში არ გვხვდება ტოპონიმები. ზღაპრის ქვეყანა არ არის კონკრეტული. ზღაპარი განსხვავდება მითისგან, რომელშიც მოქმედება ხდება განსაზღვრულ გეოგრაფიულ სივრცეში, ხოლო დედამიწის ზედაპირზე დარჩენილია მითოლოგიურ ქმედებათა კვალი, რომელიც ადამიანებს ოდესლაც მომხდარ მითიურ მოვლენებს ახსენებს. ზღაპარში მოთხრობილი ამბების ნაკვალევი კი არ მოიპოვება რეალურ სამყაროში. მას შეხება არა აქვს ჩვენს სივრცესთან.

როგორც ზღაპრული ქვეყნის სახელწოდებაა უცნობი, ისე მთავარ გმირს არა აქვს საკუთარი სახელი, რადგან ის ერთია და ყველას განასახიერებს. ამიტომ ჯადოსნური ზღაპრის მთავარი

გმირი შეიძლება იყოს, უბრალოდ, ახალგაზრდა მონადირე, ჭკვიანი სასიძო, ღარიბი ბიჭი, ობოლი ქალიშვილი, დედისერთა, მალიქის უმცროსი ვაჟი, მეჯინიბე, ნაბოლარა, შავი ალდარის ვაჟი. ზოგჯერ მთავარ გმირს ჰქვია სახელი, მაგრამ ის უფრო მეტსახელს წარმოადგენს, რომელიც გმირის უნარსა და თვისებას გამოხატავს. ქართულ და ოსურ ზღაპრებში პერსონაჟის სახელი ნაცარქექია – ფახნიკების (ფანკუზ) მთავარი გმირის საქმიანობაზე მიანიშნებს. ოსურ „რვა ძმის“ ზღაპარში მთავარი გმირი, თიხივზარი, ხუთეუნჭულას ორეულს წარმოადგენს. პერსონაჟის სახელს (თიხივზარი) აქვს ძალის, ფიზიკური ძალის გამოცდის სემანტიკა (← თყავავარან).

ზღაპრის დასაწყისში მთხრობელი ზოგჯერ პერსონაჟთა მოქმედების ასპარეზად წარსულს ასახელებს: „დიდი ხნის წინათ ცხოვრობდა ერთი შავი ალდარი“. მიუხედავად ამისა, შეუძლებელია ზღაპარში ასახული მოვლენების დათარიღება, რადგან ის არ წარმოადგენს ისტორიულ დროს, ჩვენს წარსულს.

ზღაპრის დრო განსხვავდება, აგრეთვე, მითოსური დროისგან, რომელიც ისტორიამდელ, მითოსურ წარსულში მომხდარ რეალობას ასახავს და შეხება აქვს აწმყოსთან.

ზღაპრის მოქმედება მთხრობელს ზოგჯერ აწმყოში გადმოაქვს და პერსონაჟის ამჟამინდელ მდგომარეობას გადმოგვცემს: „შავი ალდარის ვაჟი თავისი ოთხი ცოლით დღესაც ბედნიერად ცხოვრობს“. მონათხრობი ნამდვილად აწმყოს წარმოგვიდგენს, მაგრამ ზღაპრის პერსონაჟთა ასპარეზი არ არის ის აწმყო, რომელშიც ჩვენ, ადამიანები, ვცხოვრობთ. ისინი თითქოს სადღაც, პარალელურ დროსა და სივრცეში, მარადისობაში განაგრძობენ სიცოცხლეს. ჯადოსნურ ზღაპარში მოქმედების დრო განუსაზღვრელია.

ზღაპარში ჯადოსნური სამყაროს მხატვრულ წარმოსახვაში მნიშვნელოვანი როლი ენიჭება როგორც პერსონაჟთა სამოქმედო განუსაზღვრელ ქრონოტოპს, ისე ჯადოსნურ ნივთებსა და

უცნაურ მოვლენებს. მფრინავი ხალიჩა, ციური სარკე, უჩინმა-ჩინის ქუდი, ნაბდის მათრახი, ადამიანის გადაქცევა სხვადასხვა ცხოველად, ჩვეულებრივი ნივთების (სავარცხელი, წყალი, შავი ქვა) სასწაულმოქმედი ძალა, გმირის სტუმრობა ქვესკნელსა და ზესკნელში, ჯადოქარი და კუდიანი დედაბერი, ანთროპომორ-ფული და ზოომორფული არსებები, მზის ვაჟი, მთვარის ასული, შვიდთავიანი და ცალთვალა დევი, მოლაპარაკე ცხოველები, ყველანი ერთად ქმნიან ზღაპრის თავისთავად და განუმეორე-ბელ სამყაროს.

დანიელი მეცნიერის აქსელ ორლიკის აზრით, „ფოლკლორუ-ლი მონათხრობი ფორმალურად უფრო მოწესრიგებულია, ვიდრე წარმოგვიდგენია“. მისი აზრით, ხალხური ტექსტის ძირითადი ეპიკური კანონებია დასაწყისისა და დასასრულის კანონი, განმე-ორების კანონი, კონტრასტის კანონი, ფინალური ვითარების მნიშვნელობა და თავმოყრა მთავარი გმირის გარშემო.

ქართული ჯადოსნური ზღაპრისგან განსხვავებით, რომე-ლიც ხშირად ვრცელი სიტყვიერი ფორმულით იწყება, ოსურ ზღაპარს აქვს მარტივი დასაწყისი, რომელიც უმეტესად მთავა-რი გმირის ან მისი მშობლების წარმომავლობას, სოციალურ სტატუსსა და ოჯახურ მდგომარეობას გვაუწყებს: „იყო ერთი ლარიბი კაცი“, „იყო ერთი უშვილო ცოლ-ქმარი“, „იყო ერთი მალიქი“. ზღაპრის დასაწყისში პერსონაჟის ხასიათის, თვისების ან გარეგნობის გამომხატველი ეპითეტი აზუსტებს გმირის ვი-ნაობას: „იყო ერთი განთქმული მონადირე“, „იყო ერთი ხარბი ალდარი“, „იყო ერთი ბრმა კაცი“, „იყო ერთი ზარმაცი და უქნა-რა კაცი.“

ოსურ ზღაპარში არ გვხვდება არც ვრცელი დასასრული სიტყვიერი ფორმულები, რომლითაც მდიდარია ქართული ხალ-ხური ზღაპრები („ჭირი იქა, ლხინი აქა...“, „ელასა, მელასა...“, „ციდან სამი ვაშლი ჩამოვარდა“, „ქორნილში მეც ვიყავი..“ და სხვ.). ოსურ ზღაპარს აქვს მოკლე, ტრადიციული დასასრული

ფორმულები: „მათ მოსვლამდე ნურაფერი დაგაკლდებათ“, „მათ მოსვლამდე კარგად იყავით“, „იმათ მოსვლამდე ნურაფერი გეტკინოთ“.

ზღაპრის აგებულების შესახებ ფუნდამენტური ნაშრომი შექმნა რუსმა მეცნიერმა ვ. პროპმა, „ჯადოსნური ზღაპრის მორფოლოგია“ („Морфология волшебной сказки“, Ленинград, 1928). ვ. პროპმა შედარებით-ტიპოლოგიური მეთოდის გამოყენებით შეისწავლა 100 რუსული ზღაპარი. რადგან ზღაპარი უნივერსალურ ჟანრს წარმოადგენს, პროპის დასკვნები ვრცელდება ყველა ხალხის ჯადოსნურ ზღაპრებზე. ვ. პროპმა ზღაპარი დაყო შემადგენელ ნაწილებად და აღწერა მთლიან ტექსტთან მათი ურთიერთკავშირი (პროპი 1928). ზღაპარში ერთი და იგივე მოქმედება ხშირად სხვადასხვა პერსონაჟებს მიეწერებათ, რამაც მკვლევარს საშუალება მისცა ზღაპარი შეესწავლა მოქმედ პირთა ფუნქციების მიხედვით. აღმოჩნდა, რომ ჯადოსნურ ზღაპარში ფუნქციათა რაოდენობა იყო ცოტა, ხოლო პერსონაჟები, რომლებიც ამ ფუნქციებს ასრულებდნენ – ბევრი. სწორედ ამით აიხსნება ზღაპრის ორმაგი თვისება. ფუნქციების შემსრულებელ პერსონაჟთა სახეები მრავალფეროვანია, ხოლო მათ მიერ შესრულებული ფუნქციები კი ძირითადად ერთფეროვანი. ამრიგად, ზღაპრის ხერხემალს ქმნის მოქმედ პირთა ფუნქციები, რომლებიც წარმოადგენენ ზღაპრის მუდმივ, უცვლელ ელემენტებს. ჯადოსნური ზღაპრის შესწავლის საფუძველზე პროპმა ჩამოაყალიბა რამდენიმე დებულება: 1. ზღაპარში ფუნქციათა რიცხვი არის განსაზღვრული და ის არ აღემატება 31-ს. 2. ფუნქციათა თანამიმდევრობა ყველა ზღაპარში არის უცვლელი. 3. აგებულების მიხედვით ყველა ჯადოსნური ზღაპარი არის ერთი ტიპის.

ვ. პროპმა ფოლკლორული ტრადიციის სტრუქტურული ფორმების ანალიზით შეძლო ჯადოსნური ზღაპრის ფუნდამენტური პრინციპების შესწავლა.

ზღაპარში სიუჟეტი ვითარდება დასაწყის და დასასრულ ფორმულებს შორის. ძირითადი ამბავი იწყება გმირის სახლიდან გასვლით და მთავრდება მისი შინ დაბრუნებით. სახლიდან გასვლა არის პირველი მოქმედება, პირველი ფუნქცია, ხოლო გმირის შინ დაბრუნება – ბოლო მოქმედება, უკანასკნელი ფუნქცია. დანარჩენი ფუნქციები, რომელთა რაოდენობა არ უნდა აღემატებოდეს 29-ს (შეიძლება იყოს ნაკლები), მოთავსებულია ამ ორ სვლას შორის. ზღაპარში ძირითადი მოქმედება ხდება გარეთ. პირველ სვლას, გმირის შინიდან გასტუმრებას, მოსდევს აკრძალვა, რომელიც ყოველთვის ირღვევა. გმირი სახლიდან გაჰყავს რაღაცის ნაკლებობას (არ ჰყავს ცოლი, არ აქვს საჭირო ნივთი ან საგანი), ოჯახის ერთ-ერთ წევრს რაღაც აკლია ან გმირი გაიგებს, რომ ანტაგონისტმა მისი ოჯახის ერთ-ერთ წევრს ავნო. საძიებელი საგნის მოსაპოვებლად წასული გმირი ხიფათებით აღსავსე გზაზე იცდება და მას ჩუქნიან ჯადოსნურ ნივთს. გმირს დახმარებას სთავაზობენ. ის მიაღწევს ან მას გადაიყანენ დანიშნულების ადგილამდე, სადაც უეჭველად აღმოჩნდება საძიებელი საგანი. გმირი და ანტაგონისტი უშუალოდ უპირისპირდებიან ერთმანეთს და იწყება მათ შორის ბრძოლა. ანტაგონისტი იმარჯვებს, თუმცა დროებით. საძიებელ საგანს გმირი სხვადასხვა საშუალებით მაინც მოიპოვებს და ბრუნდება. ანტაგონისტი გამოედევნება გმირს, რომელიც თავს დააღნევს მდევნელს. ამ მოქმედებით მთავრდება ზოგიერთი ზღაპარი. თუმცა ზღაპრების უმრავლესობა გმირს ახალ განსაცდელს უმზადებს: ცრუ გმირი ისაკუთრებს (ან იტაცებს) გმირის მონაპოვარს. გმირი ხელმეორედ მიდის საძიებელი საგნის მოსაპოვებლად და მას ახალი დაბრკოლებების გადალახვა უხდება. გმირი შინ უცნობი სახით, უცხო გარეგნობით ბრუნდება. ცრუ გმირი წამოაყენებს უსაფუძვლო მოთხოვნას. გმირს აძლევენ რთულ ამოცანას, რომელსაც იგი ამოხსნის. ნამდვილ გმირს ამოიცნობენ, ხოლო ცრუ გმირს თუ ანტაგონისტს ამხელენ.

გმირს ეძლევა ახალი გარეგნობა. მტერი ისჯება. გმირი ქორნინდება და მეფედება. ამით მთავრდება ზღაპარი.

ზღაპარში ერთი ფუნქცია მეორისგან, როგორც მხატვრული აუცილებლობა, ლოგიკურად გამომდინარეობს და მათი თანამიმდევრობა ქმნის ზღაპრის სამყაროს, მის შინაარსს.

თ. ქურდოვანიძის აზრით, მზა ფორმულები, სტერეოტიპული აღწერილობები და მაგიური ქმედებები, თავისი ტიპობრიობით ყველა ზღაპრის კუთვნილებაა და თავისუფლად გადადის ერთი სიუჟეტიდან მეორეში, ერთი ტექსტიდან მეორეში (ქურდოვანიძე 2001: 173).

ზღაპრის ერთ-ერთ სტილურ თავისებურებად უნდა მივიჩნიოთ რეტარდაცია, იგივე თხრობის გაჭიანურება ანუ მოქმედების შეფერხება, რასაც მეზღაპრე ნათქვამის სამგზის გამეორებით აღწევს. საგნის, მოვლენის ან მოქმედების გასამმაგება ზღაპრის დამხმარე ელემენტს წარმოადგენს. გასამმაგებული შეიძლება იყოს როგორც ატრიბუტული ხასიათის ზოგიერთი დეტალი (სამი წელი, სამი ძმა, სამთავიანი დევი), ისე ცალკეული ფუნქციები და მთელი სვლები (სამი დავალება, სამი წლით სამსახური, სამი ცდა ანტაგონისტის დასამარცხებლად). მოქმედების გამეორების დროს გმირს ორჯერ აქვს უარყოფითი შედეგი, ხოლო მესამედ აღწევს წარმატებას, დადებით შედეგს.

მოქმედ პირთა ფუნქციები ზღაპრის მუდმივ და უცვლელ მორფოლოგიურ ერთეულებს წარმოადგენენ. ვ. პროპის აღმოჩენამ ზღაპრის პერსონაჟთა უსაზღვრო რაოდენობა მინიმუმადე დაიყვანა. ზღაპარში ხშირად ერთსა და იმავე ფუნქციას სხვადასხვა პერსონაჟი ასრულებს. მავნე ზღაპარში შეიძლება იყოს კუდიანი დედაპერიც, დევიც და ბოროტი დედინაცვალიც. მნიშვნელობა არა აქვს, გმირს ვინ დაასაჩუქრებს ჯადოსნური ნივთით, მეფე, ჯადოქარი თუ მწყემსი, ამით მჩუქებლის ფუნქცია არ იცვლება. ზღაპრის სტრუქტურის გასააზრებლად არანაირი მნიშვნელობა არა აქვს მოქმედებას ვინ ასრულებს – მო-

ნადირე თუ სოვდაგარი, ალდარი თუ ლარიბი გლეხის ბიჭი. ამ-დენად, მნიშვნელობა ენიჭება არა პერსონაჟთა საზღაპრო ვინა-ობას, არამედ რაობას, თუ რა ამოცანას ასრულებს იგი, რა ფუნ-ქცია ეკისრება. ზღაპარში პერსონაჟის სტატუსი მისი სამოქმე-დო ფუნქციით უნდა განისაზღვროს და არა ვინაობით (ზ. კინა-ძე). ზღაპარში არსებითია, თუ რა ფუნქციას ასრულებს პერსო-ნაჟი. ფუნქციები ზღაპარში განაწილებულია შვიდ პერსონაჟს შორის. ესენია:

1. მთავარი გმირი.
2. გამსტუმრებელი.
3. მავნე.
4. შემწე.
5. მჩუქებელი.
6. ანტიგმირი (ცრუგმირი).
7. მეფის ასული.

შეიძლება ზღაპარში იყოს შვიდ მოქმედ პირზე ნაკლებიც, როდესაც ორ ფუნქციას (დავუშვათ, შემწისა და მჩუქებლის როლს), ერთი პერსონაჟი ითავსებს, მაგრამ ზღაპარში არასო-დეს არ გვხვდება შვიდ პერსონაჟზე მეტი.

მთავარი გმირის სახიფათო თავგადასავალზე მოგვითხ-რობს ზღაპარი. დანარჩენი 6 პერსონაჟი თავის ფუნქციას ას-რულებს მთავარ გმირთან მიმართებაში. მათ სხვა დანიშნულება არა აქვთ. ზღაპრის ერთ-ერთი ძირითადი კანონია პერსონაჟთა თავმოყრა მთავარი გმირის გარშემო. მთავარ გმირს ხშირად გა-ნასახიერებს უმცროსი ძმა, ობოლი ან სასწაულებრივად შობი-ლი ყმაწვილი.

გამსტუმრებელი შინიდან აგზავნის გმირს რთული დავა-ლების შესასრულებლად. მისი როლი ზღაპარში მხოლოდ ამ ფუნქციით შემოიფარგლება.

მავნე ხვდება გზაზე საძიებელი საგნის მოსაპოვებლად ნა-სულ გმირს, რომელსაც ის აბრკოლებს და საფრთხეს უქმნის.

მავნის როლს ოსურ ზღაპრებში ასრულებს დევი (ვაიგი), კუდი-ანი დედაბერი, ბოროტი ალდარი და სხვ.

შემწე ზღაპარში მაშინ გამოჩნდება, როდესაც გმირს საფრთხე დაემუქრება. ის შეიძლება იყოს როგორც ადამიანი, ისე ჯადოსნური ცხოველი ან ფრინველი: ფასკუნჯი, ოქროს თევზი, არწივი, რაში, მგელი და სხვ. შემწე ეხმარება მას ძნელი დავალების შესრულებაში. შემწის გარეშე გმირი ვერ გადალახავდა დაბრკოლებას.

მჩუქებელი აწვდის გმირს ჯადოსნურ საგანს, რომელიც ეხმარება მიზნის მიღწევაში. ზოგჯერ ზღაპრებში შემწისა და მჩუქებლის როლს ერთი და იგივე პერსონაჟი ასახიერებს, რომელიც გამოცდის მთავარ გმირს და, როცა დარწმუნდება მის ღირსებაში, გადასცემს ჯადოსნურ საგანს.

ანტაგონისტი ან ცრუ გმირი ჯადოსნურ ზღაპარში წარმოადგენს მთავარ მონინააღმდეგეს. ის უზურპატორია, რადგან ითვისებს იმას, რაც მას არ ეკუთვნის. ცრუგმირი ისაკუთრებს გმირის უმთავრეს მონაპოვარს. ის გამართავს ცრუქორნილს და იმ დროს, როცა ცრუგმირი თავზე სამეფო გვირგვინს იდგამს, დაბრუნდება მთავარი გმირი. იქ ხდება განკითხვა, დასჭა და იმართება ნამდვილი ქორწილი.

მეფის ასული, რომელსაც ოსურ ზღაპრებში ალდარის ქალიშვილი ენაცვლება, აქვს ერთადერთი ფუნქცია, ის უნდა გაათავისუფლოს ან მოიპოვოს მთავარმა გმირმა და მასზე იქორწინოს.

მთავარი გმირი გამოხატავს ზღაპრის ძირითად საზრისს, მის იდეოლოგიას. მას წარმოუდგენლად რთული დავალების შესასრულებლად უხდება შორეულ მოგზაურობაში წასვლა. მიზნის მიღწევა ზეადამიანურ ძალისხმევას მოითხოვს. გმირი გზაჯვარედინზე უყოყმანოდ ირჩევს ყველაზე სახიფათო გზას, რომელზეც ჯერ არავის გაუვლია, ან იქიდან ცოცხალი ჯერ არავინ დაბრუნებულა. მარტოდმარტო, მაგრამ გამარჯვების რწმენით აღვსილი, ის დაადგება უცხო გზას, რათა თავისი მისია

შესასრულოს, თავისი შესაძლებლობები ამონტუროს, თავისი ადა-მიანური ვალი მოიხადოს. გმირის სულიერი სიძლიერე და გამ-ბედაობა თავდაპირველად დაფარულია მისი მოჩვენებითი სი-სუსტითა და ბავშვური გულუბრყვილობით. თუმცა დაბრკო-ლებების გადალახვისას თანდათან ვლინდება მთავარი გმირის ღირსება, მისი უჩვეულო უნარები და მანამდე დაფარული კე-თილშობილური თვისებები. ის არის თვემდაბალი, მიმტევებე-ლი, კეთილი, უანგარო, მამაცი, მიზანმიმართული, უხვი, უშიშა-რი, ერთგული, ოპტიმისტი. სწორედ ამ თვისებების წყალობით, ყველაზე უნუგეშო სიტუაციაშიც კი, მდგომარეობა მის სასარ-გებლოდ შემოტრიალდება. ის თავგანწირვით მიიწევს და ილ-ტვის სანატრელი მიზნისაკენ. ერთ-ერთ ეპიზოდში გმირი მოიჭ-რის საკუთარ ხორცს და კვებავს ჯადოსნურ ფრინველს. ამ ქმე-დებით ის მსხვერპლს გაიღებს ქვესკნელიდან ზესამყაროში მო-სახვედრად. თანდაყოლილი ღვთაებრივი სიბრძნით ის უძლებს გამოცდას, ამიტომ მას ეხმარებიან და ჩუქნიან ჯადოსნურ სა-განს, რომელიც მიზნის მიღწევაში ეხმარება. გმირი გადალა-ხავს წუთისოფლის ყველა დაბრკოლებას, ის „ცხოვრების გზა-ზე“ ძლევს მტრულ ძალებს, იმარჯვებს და ვალმოხდილი ბრუნ-დება შინ, სადაც არის ქორწილი, რომელიც დღესაც გრძელდე-ბა. ზ. კიკნაძე ჯადოსნურ ზღაპარს უწოდებს ესქატოლოგიურ ეპოსს, რადგან, მისი აზრით, „ზღაპრის დასასრული არ არის მხოლოდ სიუჟეტური დროის დასასრული, ის აბსოლუტური და-სასრულია, რომლის საუკეთესო სიმბოლო ქორწილია“ (კიკნაძე 2008: 91).

მთავარი გმირი განასახიერებს ხალხის იდეალს ისეთ ადა-მიანზე, რომელმაც წარმატებით გადალახა ცხოვრების ყველა დაბრკოლება და ღირსეულად განვლო წუთისოფლის გზა. მსოფლიო ხალხთა ფოლკლორში ჯადოსნური ზღაპრის პოპუ-ლარობას მისი აბსოლუტური, ბედნიერი დასასრული და მთავა-რი გმირის მხატვრული სახე განაპირობებს.

ცხოველთა ზღაპარი

ცხოველთა ზღაპრებს აქვთ მარტივი კომპოზიცია. ამ ტიპის ტექსტებში მთავარ როლს ასრულებენ ცხოველები და ფრინველები. თუ მასში ადამიანიც მონაწილეობს, მას აქვს მეორეხარისხოვანი ფუნქცია. ოსური ცხოველთა ზღაპრების პერსონაჟები არიან მელია, მგელი, დათვი, მწყერი, თაგვი, ხარი, ცხენი, თხა, ლორი და ა. შ. მთავარი პერსონაჟის მიხედვით შესაძლებელია ცხოველთა ზღაპრების თემატური კლასიფიკაცია, ხოლო ფორმალური მახასიათებლების გათვალისწინებით ხერხდება მათი სტრუქტურული და სემანტიკური კლასიფიკაცია.

ოსური ფოლკლორი იცნობს ისეთივე არაკებს ცხოველებზე, რომლებიც მოიძებნება საერთაშორისო იგავურ ფონდში. ერთი და იგივე სიუჟეტები ხშირად მეორდება ქართულ და ოსურ ზღაპრებში.

ცხოველთა ზღაპრებს ზოგიერთი მკვლევარი მითოლოგიურ საფუძველს უძებნიდა და მათში ტოტემისტური მსოფლმხედველობის ანარეკლს ხედავდა. ცხოველთა ზღაპრების პერსონაჟებში შეუძლებელია დავინახოთ ადამიანთა წინაპარი ტოტემები, რომლებმაც არ ისურვეს ადამიანებად ყოფნა და ცხოველებად დარჩნენ. ცხოველთა ზღაპრები განსხვავდება ასევე ეტიოლოგიური მითებისგან, რომლებშიც ხშირად ცხოველები მონაწილეობენ, მაგრამ, ეტიოლოგიური მითებისგან განსხვავდებით, ცხოველთა ზღაპრები არ ინახავენ ცოდნას საგანთა და მოვლენათა წარმოშობის შესახებ.

ცხოველთა ზღაპრებში დრო და სივრცე განუსაზღვრელია, ის საერთოდ მოწყვეტილია ადამიანურ ქრონოტოპს, თუმცა მასში პერსონაჟები ადამიანებივით საუბრობენ, მოქმედებენ და მათი ურთიერთობა ხშირად გადმოცემულია დიალოგებით.

ოსური ცხოველთა ზღაპრებშიც ძირითადი მოქმედება ხდება გზაზე. სიუჟეტი ხშირად იწყება საჭმლის საშოვნელად გამო-

სულ ცხოველთა შეხვედრა-დამეგობრებით და მთავრდება კონფლიქტით, ურთიერთმტრობითა და გაუტანლობით. არცთუ იშვიათად ცხოველები ერთმანეთს ატყუებენ და ღუპავენ. დაპირისპირებულ მხარეებს წარმოადგენენ ძლიერები და სუსტები, გარეული და შინაური ცხოველები, ცხოველები და ფრინველები. როგორც წესი, მათ შორის იმარჯვებს ყველაზე მარჯვე და მოხერხებული პერსონაჟი.

მტრობითა და გაუტანლობით აღსავსე სივრცეში, სადაც, ზღაპრის მიხედვით, ცხოველები მოქმედებენ, ხშირად ვაწყდებით კომიკურ სცენებს. ოსურ ზღაპრებშიც კომიკურ სიტუაციას ქმნის მელია, რომელიც ტრიქსტერის თვისებებს ავლენს სხვა პერსონაჟებთან ურთიერთობაში. მელიას მსხვერპლი ხშირად ხდება ბრიყვი პერსონაჟი. ოსურ ზღაპარში, რომლის სახელწოდებაც არის „როგორ დაღუპა თავისმა უჭკუობამ აქლემი“, მელია აბრიყვებს და ღუპავს აქლემს, შეცდომაში შეჰყავს მაჩვი, ატყუებს მგელსა და დათვს, ბოლოს კი, ონბაზობით, ეშმაკობითა და მახვილგონივრული ნათქვამით აიცილებს ნადირთა რისხვას (ოსური ზღაპრები 1975: 5-6). მელიას მოქმედება ზღაპარში ქმნის კომიკურ სიტუაციას და მისი საძრახისი საქციელი მსმენელში მხოლოდ ღიმილს იწვევს. ამის გამო, ცხოველთა ზღაპარს ვერ მივიჩნევთ მორალისტურ ნაწარმოებად, რადგან ცხოველები პასუხს არ აგებენ თავიანთ გაუმართლებელ საქციელზე. მას არა აქვს მორალის გაგება.

ჭკუის სასწავლელი და მორალისტური მოტივი შეიძლება მხოლოდ ისეთ არაკებში დავინახოთ, რომლებშიც კონტრასტული პერსონაჟები მოქმედებენ. მართალია, მელია ატყუებს და ღუპავს თავისზე ძლიერ მგელსა და დათვს, მაგრამ თავისზე სუსტთან ის ყოველთვის მარცხდება. ოსური ზღაპარი „მელია და მწყერი“, რომლის ანალოგი გვხვდება ქართულ ფოლკლორშიც, ცხოველისა და ფრინველის დამეგობრებით იწყება, რაც ნამდვილად მათი თანაცხოვრების სურვილით არის ნაკარნახე-

ვი. მწყერი მსუნაგ მელიას ქათმის ხორცს, ხაჭაპურსა და ქადას აშოვნინებს. ამის მიუხედავად, ცბიერი მელია გაუმართლებლად იქცევა და „მეგობარ“ მწყერს შეჭმას დაუპირებს, თუმცა მელიაზე სუსტი, მაგრამ გონიერი მწყერი საბოლოოდ მოახერხებს მის მოტყუებას და განსაცდელს თავს დაალწევს (ოსური ზღაპრები 1975: 4-5).

ზღაპარში „ბებერი მგელი“ ასევე კონტრასტული პერსონაჟები მონაწილეობენ: ერთ მხარეზეა დაუნდობელი მგელი, მეორე მხარეს კი ისეთი უწყინარი შინაური ცხოველები, როგორებიც არიან ცხენი, ერკემალი და დეკეული, რომლებსაც შეჭმას უპირებს მტაცებელი ნადირი. თუმცა გარეული ცხოველი თავისივე სიხარბის მსხვერპლი ხდება. გაუმაძლრობა გონებას უკარგავს მგელს. ცხენი მას წიხლით შუბლს ჩაუმტვრევს, ერკემლები ფერდებს შეულენავენ, ბოლოს კი დეკეულის შეჭმის სურვილით აყმუვლებულ მგელს ხალხი „მიასიკვდილებს“ (ოსური ზღაპრები 1975: 3).

მართალია, მგელს ცემით ლამის სული ამოხადეს, მაგრამ, სიხარბის გამო, ის კვლავ ბრიყვდება ოსურ არაკში „დედა ღორი და მგელი“. წყლის მოსატანად მდინარეზე ჩასულ დედა ღორს მგელი ზურგზე შეახტა და შეჭმა დაუპირა. საფრთხეში ჩავარდნილი ღორი არ დაიბნა და შესაჭმელად მოსულ მგელს თავისი ნორჩი შვილებიდან ერთ-ერთის მიცემას შეპირდა.

მაგრამ დედა ღორმა მოატყუა შეპირებული გოჭის მისაღებად მოსული ნადირი, რომელსაც კარი არ გაუღო. მშიერი და გაბრაზებული მგელი ახლა ყვავმა გააბრიყვა. მეორედ მოტყუებამ კიდევ უფრო გაამნარა ცხოველი და ჯავრისგან გული გაუსკდა (ოსური ზღაპრები 1975: 10-11).

ცხოველთა ზღაპრებში პერსონაჟები ავლენენ ადამიანურ თვისებებს. მელია არის ცბიერი და ოინბაზი, დათვი – ბრიყვი, მგელი – ხარბი, აქლემი – უგუნური, ცხენი – ჭკვიანი. ისინი არ იცვლიან თავიანთ ზნეს და ყოველ ზღაპარში ერთსა და იმავე

თვისებას ავლენენ და ამ სახით გადადიან არაკიდან არაკში. ზ. კიკნაძის აზრით, ამიტომაც ეს არაკები მთლიანობაში შეიძლება ჩაითვალოს ცხოველთა ერთიან ეპოსად (კიკნაძე 2008: 92-101).

ცხოველთა ზღაპრები განსხვავდებიან იგავებისგან, რომელიც მონაწილეობენ ცხოველები და იგულისხმებიან ადამიანები. ცხოველთა ზღაპრებში არ არის ალეგორია, მისი პერსონაჟები ცხოველებად რჩებიან იმ სამყაროში, სადაც მოქმედებენ, სადაც ერთმანეთს ხვდებიან და ბოლოს შორდებიან.

ცხოველთა ზღაპრები განსაკუთრებით პოპულარულია ბავშვებში. თ. ქურდოვანიძის აზრით, „ბავშვების ინტერესი მათდამი განპირობებულია არა მარტო მოთხრობათა შინაარსის უბრალოებით, არამედ იმითაც, რომ ყმაწვილებს უყვართ ცხოველები, რომლებიც ზღაპარში ადამიანებივით ფიქრობენ და ლაპარაკობენ“ (ქურდოვანიძე 2001: 160-161). ამ ტიპის ზღაპრებში მთხრობელი თანაუგრძნობს სუსტს, რომელიც თავისი გონიერებითა და სიმარჯვით ძლევს განსაცდელს.

საყოფიერო-ნოველისტური ზღაპარი

საყოფიერო-ნოველისტური ზღაპარი არის მხატვრული პროზის შედარებით მცირე ფორმის ნაწარმოები, რომელშიც მოქმედება ხდება რეალურ სოციალურ-ყოფით გარემოში და მასში მონაწილეობს პერსონაჟთა შეზღუდული რაოდენობა. ტექსტი აგებულია ძირითადად ერთ ან იშვიათად რამდენიმე სიუჟეტზე. საყოფიერო-ნოველისტური ზღაპარი, რომელიც მხატვრულ გამონაგონს ემყარება, გადმოგვცემს სხვადასხვა ფენის ადამიანთა სრულიად რეალურ სოციალურ პრობლემებს. მასში ჯადოსნური ელემენტები მინიმუმამდეა დაყვანილი. ნოველისტური ზღაპრის მთავარი გმირი ხშირად არის დაბალი სოცია-

ლური წრის წარმომადგენელი, რომელსაც აქვს კონკრეტული ყოფითი მიზნები. ის კომიკური ოინებით, მოხერხებულობითა და სიმარჯვით აღწევს მიზანს, ატყუებს და ამარცხებს ბრიყვ მოწინააღმდეგეს.

ზოგიერთი მკვლევარის აზრით, საყოფიერო ზღაპარი ჩამოყალიბდა ანეკდოტური მონათხობების გაშლა-განვითარებით.

საყოფიერო-ნოველისტურ ზღაპარს, რადგან ის თავისი ფორმით, სამოქმედო სივრცით, პერსონაჟთა ფუნქციებითა და საზრისით არსებითად განსხვავდება ჯადოსნური ზღაპრისა და ცხოველთა ეპოსისგან, უწოდებენ ხალხურ ნოველას. მკვლევართა ნაწილს ცხოველთა ეპოსის, საყოფიერო ნოველისა და ჯადოსნური ზღაპრის გაერთიანება ერთი სახელწოდების ქვეშ გაუმართლებლად მიაჩინა. ჯადოსნური ზღაპრისაგან განსხვავებით, საყოფაცხოვრებო ზღაპარი არის ირონიული, დამცინავი. მასში ირონია გამსჭვალავს მთელ თხრობას. როგორც ჩანს, საყოფიერო ზღაპრები უფრო გვიან გაჩინდა, ვიდრე სხვა ტიპის ზღაპრები, ამიტომ ის გამოიჩინება ჯადოსნური ელემენტების სიმცირითა და ოინბაზური სიუჟეტების სიმრავლით. ნოველისტურ ზღაპრებში იშვიათად საუბრობენ ცხოველები. თ. ქურდოვანიძის აზრით, „ნოველების შემქმნელთა მთელი ყურადღება იქითკენაა მიმართული, რომ სიუჟეტური მოქმედება თავშესაქცევი იყოს, აიყოლიოს მსმენელი და გაართოს“ (ქურდოვანიძე 2001: 189).

ისევე როგორც ქართულ ზეპირსიტყვიერებაში, ოსურ ფოლკლორშიც ხალხური ნოველების სიუჟეტური რეპერტუარი მრავალფეროვანია. მათი უმრავლესობა დადასტურებულია საერთაშორისო საზღაპრო ფონდში.

ოსური ხალხური ნოველის პერსონაჟი არის რეალური სოციალური წრის წარმომადგენელი: მასში მონაწილეობს ბრიყვი კარისკაცი, ხარბი ალდარი, ჭკვიანი პატარძალი, მოხერხებული მოჯამაგირე, გაიძვერა ქოსატყუილა, მართალი გლეხი, ეშმაკი

ქურდი, ოინბაზი ბიჭი, ზარმაცი კაცი, გაბრიყვებული მიკიტანი და სხვ.

საყოფიერო ნოველისტური ზღაპრის მთავარი პერსონაჟი ძირითადად არის ტრიქსტერი, რომელიც სხვადასხვა ხრიკებით მყისიერად რეაგირებს ნებისმიერ სიტუაციაზე და იმარჯვებს.

ოსური ხალხური ნოველა გამოირჩევა ტრიქსტერული მოტივების სიმდიდრით. ტრიქსტერი პერსონაჟი გვხვდება ოსურ ნართების ეპოსშიც, სახელდობრ, სირდონი. მასზე საგანგებოდ სხვა თავში გვექნება საუბარი. ახლა კი გავარკვიოთ, რა ფენომენის მატარებელია ტრიქსტერი, რომელიც ხშირად საყოველ-თაოდ დადგენილი წესების სანინააღმდეგოდ იქცევა და ზოგ-ჯერ ქაოსის ელემენტებიც შეაქვს საზოგადოებაში.

ტრიქსტერი (*tricster*) ინგლისური სიტყვაა და აღნიშნავს მატყუარას, ოინბაზს, გაქნილს. ტერმინი ტრიქსტერი სამეცნიერო ლიტერატურაში 1956 წელს შემოიტანა ამერიკელმა მეცნიერმა პოლ რადინმა. ტრიქსტერში გამოყოფენ რამდენიმე ფუნქციას, მას აქვს სხვადასხვა რიტუალებში უწყინარი გამრთობის, ხუმარას ფუნქცია, რომელიც ნიღაბაფარებული განასახიერებს მეფეს, ყაენს, მფარველ წმინდანსა და სხვა ზებუნებრივ არსებას. მითოლოგიურ ტექსტებში მას მორგებული აქვს კულტურული გმირის როლი და მონაწილეობს მსოფლიოს მოწყობაში. ის ზოგჯერ ებრძვის სამყაროს სტიქიურ ძალებს.

ტრიქსტერის კომიკური ონები მის მიერ გაბრიყვებულ და გონებაშეზღუდულ მოწინააღმდეგესთან ურთიერთობაში არ-ცოუ იშვიათად ვლინდება ცხოველთა ეპოსში და ანეკდოტებში. ევროპულ ცხოველთა ეპოსში ტრიქსტერის როლს ასრულებს მელია, ხოლო აფრიკულ ზღაპრებში – კურდლელი. ტრიქსტერული მოტივებით მდიდარია, აგრეთვე, ანეკდოტური მოთხოვნები მოლა ნასრედინზე.

საყოფიერო ზღაპრებში პერსონაჟთა მიზნები არის პრაგმატული, რომლებიც ყოველდღიური ყოფითი საჭიროებით არის

ნაკარნახევი. ისინი, მართალია, რეალურ სამყაროში მოქმედებენ, მაგრამ მათ აქვთ განსხვავებული ჩანაფიქრი და ქცევის უცნაური წესები, რომლებსაც საკუთარი გეგმის რეალიზაციის-თვის იყენებენ.

ოსურ ხალხურ ნოველაში მთავარი გმირის რამდენიმე ტიპი გამოიყოფა. ერთ-ერთი მათგანი არის დაბალი ფენიდან გამოსული ღარიბი ახალგაზრდა, რომელიც ტყუილებით აპრიყვებს ძუნწ ალდარს და ხელთ იგდებს მის ქონებას. ოსურ ხალხურ ნოველაში „ღარიბი კაცის ბიჭი და ხარბი ალდარი“ მთავარ გმირად გვევლინება ტრიქსტერი. მოჯამაგირე ბიჭმა დაარწმუნა ალდარი, რომ ჭამას გადაეჩინა და მისი მიწვდილი საკვები აღარ სჭირდებოდა. ხარბ ალდარს შეშურდა, იფიქრა, თუ თვითონაც შიმშილს გაუძლებდა, უფრო მდიდარი გახდებოდა. ბიჭის წაქეზებით ძუნწმა ალდარმა შიმშილი დაიწყო, ბოლოს ისე დაუძლურდა, სიკვდილის პირამდე მივიდა. ემაკამა ბიჭმა მღვდელი მიუყვანა საზიარებლად. მღვდელმა ალდარს ჰქითხა: – ვის უტოვებ შენს ქონებასო? ალდარს ეგონა, მღვდელი ეკითხებოდა, თუ ვის აპრალებდა მის სიკვდილს და ხელი მწყემსი ბიჭისკენ გაიშვირა. ალდარი მოკვდა, ხოლო მღვდელმა მთელი მისი ქონება ღარიბ ბიჭს დაუმტკიცა (ოსური ზღაპრები 1975: 94). მთავარი გმირი ანადგურებს მოწინააღმდეგეს. ეს ქმედება ტექსტში განეიტრალებულია იუმორით. მთხოვთ ისე გადმოსცემს ნოველას, რომ მოჯამაგირე ბიჭის სიმარჯვემ და ალდარის სიბრიყვემ მსმენელში მხოლოდ ღიმილი გამოიწვიოს.

საყოფაცხოვრებო ზღაპრებში ირონია მიმართულია ძუნწი, ხარბი და უსამართლო ადამიანების წინააღმდეგ. ნოველაში „საჩივრები ღარიბ კაცზე“ პატიოსან გლეხს ყველა უსამართლოდ ეპყრობა. მან მთელი წელი მოჯამაგირედ იმუშავა მდიდართან და მხოლოდ ერთი დღე გააცდინა. უმაღურმა ბატონმა ღარიბ კაცს აღარც პური აჭამა და თან ხელმწიფესთან ჩივილით დაემუქრა. წავიდნენ ხელმწიფესთან. გზაში გლეხი ტალახ-

ში ცხენიანად ჩაფლულ ალდარს მიეხმარა. მოეჭიდა ცხენს კუდ-ში და ალდარი ტალახიდან ამოათრია, მაგრამ ცხენის კუდი კი ხელში შერჩა. უმაღური ცხენის პატრონიც ღარიბ კაცს ხელმწიფესთან ჩივილით დაემუქრა. საწყალი კაცი ახლა წყაროზე გამოსულ ქალს მიეხმარა ჭურჭლის მხარზე შედგმაში, მაგრამ ქალიც აყვირდა: – მხარი მატკინე, ჩემი მოკვლა გინდოდა, ხელმწიფესთან გიჩივლებო. ქალმა თავისი ქმარი გაგზავნა საჩივ-ლელად. თითქოს მთელი სამყარო დაირაზმა ღარიბი კაცის წინააღმდეგ.

ბოლოს ძონძებით შემოსილი კაცი შეხვდათ, როცა მან გაიგო რაშიც იყო საქმე, ტანსაცმელი გამოიცვალა, მომჩივან დამქირავებელს, ალდარსა და უმაღურ ქალს ხელმწიფის მოსამართლედ გაეცნო და ღარიბი კაცის სასარგებლოდ გამოიტანა განაჩენი. მან ქალიც ღარიბ კაცს არგუნა, ცხენიც და ბატონის სიმდიდრეც. სამართალმა პური ჭამა. ტრიქსტერის როლში აქ ძონძებში გამოწყობილი კაცი გვევლინება, რომელიც იცვლის ტანსაცმელს, ძველ იერს და მომჩივანთა წინაშე ხელმწიფის მოსამართლის სტატუსით წარსდგება (ოსური ზღაპრები 1975: 70-73).

ნოველაში მაქციობის ნაცვლად, რომელიც დამახასიათებელია ჯადოსნური ზღაპრებისთვის, ვხედავთ გმირის სახისა და ჩაცმულობის შეცვლას, ტანსაცმლის გამოცვლას, მისი გარეგნული იერისა და ცხოვრების ყაიდის უფრო რეალურ ცვალებადობას. ძონძებით შემოსილი ღარიბი კაცი მომჩივანთა მზაკვრულ ხრიკებს წინ აღუდგება ჭკუითა და მოხერხებულობით.

ტრიქსტერის მოქმედება საყოფიერო ნოველაში მოულოდნელობის ეფექტს ემყარება. ის ზოგჯერ საკმაოდ ახალგაზრდა ვაჟის ან ქალიშვილის იერით გვევლინება, თუმცა იგი ფლობს ბრძენი მოხუცის გამოცდილებას. მას შეუძლია ამოიცნოს იგავური თხრობის საიდუმლო, რომელიც წარმატებასა და დიდებას მოუტანს. ოსურ ნოველაში „აღმოსავლეთის ალდარი და დასავლეთის ალდარი“ ტრიქსტერის თვისებებს ავლენს ყმაწვილი,

რომელსაც შუა სიცხეში ცეცხლი გაეჩაღებინა და გამვლელ-გა-მომვლელს გათბობას სთავაზობდა. ის დასავლეთის ალდარის შუაკაცებს იგავებით პასუხობს, რომლის მიხედვით, მამამისი დილაუთენია ჩხუბის დასათესად წასულა, დედამისი – ცრემ-ლის გასასესხებლად, ხოლო უმცროსი ძმა – სახლის უკან ხრი-ოქზე სანადიროდ. ალდარის შუაკაცებმა უცნაურ ბავშვში, ცხოვრებისეული გამოცდილებით აღჭურვილი მოხუცის სიბ-რძე ამოიცნეს და მას დასავლეთის ალდარის დახმარება სთხო-ვეს, რომელსაც აღმოსავლეთის ალდარი ავიწროვებდა. აღმო-სავლეთის ალდართან შუამავლად მისულმა ყმაწვილმა მეტა-ფორული საუბრითა და იგავური ქცევებით ამხილა მისი უსა-მართლობა, უხერხულ მდგომარეობაში ჩააყენა ახირებული ბა-ტონი. უცნაური ახალგაზრდის სიბრძნითა და სიმარჯვით აღ-ფრთოვანებულმა ალდარმა ჭაბუკს საკუთარი ასული მიათხოვა და უთხრა: – „ამდენი წელია ჩემი მოსაწონი სასიძო ვერ ვნახე. სამოყვროდ ივარგებ, ისეთი ჩანხარ. მომიცია ჩემი გოგო, ღმერთმა ტკბილად შეგაბეროთო“ (ოსური ზღაპრები 1975: 64).

როგორც ვხედავთ, ხალხურ ნოველაში ბრიყვი და სულელი პერსონაჟის პარალელურად მოქმედებს ჭკვიანი და ბრძენი გმი-რი, რომელიც ყველაზე რთულ და უნუგეშო სიტუაციას თავის სასარგებლოდ შემოატრიალებს. ხალხურ ნოველაში „ალდარის რძალი“ ვერავინ ამოხსნა დატყვევებული ალდარის იგავური დანაბარები. ერთმა ერთი თქვა, მეორემ – მეორე. ბოლოს ახალ პატარძალს ჰქითხეს რჩევა. ჭკვიანი პატარძალი ამოხსნის დატყვევებული ალდარის შემოთვლილი იგავის საიდუმლოს თვრამეტჯერ თვრამეტი ცალრქიანი ხარისა და თვრამეტჯერ თვრამეტი წყვილრქიანი ხარის შესახებ. საზრიანი რძალი ტყვე-ობიდან იხსნის მამამთილს. „ამის შემდეგ, – მოგვითხრობს ნო-ველა, – ჭკვიან, გონიერ რძალს გვარში ყოველთვის დიდი პატი-ვისცემა და დაფასება ჰქონდა“ (ოსური ზღაპრები 1975: 120).

ნოველაში მთავარი გმირი მეტაფორული ქცევებისა და იგავური თხრობის ამოცნობით აღწევს წარმატებას.

დატყვევებული ალდარისა და გონიერი რძლის სიუჟეტი გვხვდება ნართების ეპოსშიც. ნართულ თქმულებაში თვრამეტჯერ თვრამეტი ცალკეიანი ხარისა და თვრამეტჯერ თვრამეტი წყვილრქიანი ხარის იგავის ავტორად ურუზმაგი გვევლინება, ხოლო ბრძენი ქალის როლს ეპოსში, როგორც წესი, სათანა ასრულებს, რომელიც ამოხსნის იგავის საიდუმლოს და ბრძოლით გაათავისუფლებინებს ნართების დატყვევებულ უხუცესს.

ხალხური ნოველის ერთ-ერთი მთავარი პერსონაჟი არის მატყუარა, მის ერთადერთ მიზანს, ყოველგვარი მოტივაციის გარეშე, წარმოადგენს სხვების მოტყუება. ის, მართალია, ატყუებს განურჩევლად ყველას, ვისი გაბრიყვებაც შეიძლება, მაგრამ იგი არ მოქმედებს ბოროტი განზრახვით, ანგარებით და ამიტომ არც ჩადენილ საქციელზე მოეკითხება პასუხისმგებლობა. მისი ოინები მხოლოდ ღიმილს იწვევს მსმენელში. ოსური საყოფიერო ნოველა „მატყუარა“ მოგვითხრობს ისეთ კაცზე, რომლის ონბაზობით შენუხებული მეზობლები იძულებული გახდნენ მისთვის მახლობელ სოფელში მცხოვრებ ალდართან ეჩივლათ. მატყუარამ გააცურა თორმეტი კაცით მის დასაჭერად მოსული ალდარი და მას ცხენი დასცინცლა, რომელიც თითქოს ტყუილის ხელსაწყოების მოსატანად სჭირდებოდა. ალდარის დედას კი საიქიოდან მცირე ხნით გამოშვებულ მგზავრად გაეცნო, თუმცა სასახლეში მიპატიუებაზე უარი განუცხადა, რადგან მალე დაღამდებოდა და საიქიოს მეკარე სულეთში აღარ შეუშვებდა, აღარც ბენვის ხიდზე გაატარებდნენ. სამაგიეროდ მატყუარამ საწყალ დედაკაცს გარდაცვლილი შვილის საიქიოში ცხოვრების შესახებ უამბო: – შენ შვილს სულ ატლასის ტანსაცმელი აცვია, თეთრ ცხენზე ზის და ბარასთირს ეთამაშება, იმაზე სახელოვანი საიქიოში არავინ არისო. ბოლოს მატყუარა მთავარ სათქმელს მიადგა და უთხრა: – შენმა შვილმა საიქი-

ოში უზარმაზარი სახლები აიშენა, მაგრამ ასი თუმანი დააკლდა და იმასლა ნაღვლობსო. ალდარის დედამ, რომელიც ენდო მგზავრის სიტყვებს, მაშინვე გამოუტანა ასი თუმანი და მატყუარამაც იმ წუთშივე მოუსვა (ოსური ზღაპრები 1975: 229-232). ტრიქსტერი პერსონაჟი ყველაზე დიდი საფრთხისა და განსაცდელის ჟამს ინარჩუნებს ენთუზიაზმს, ხალისსა და მხიარულობას. მას მხოლოდ ადამიანების მოტყუება შეუძლია. ის არ იცნობს სხვა სახის ურთიერთობას. ნოველა დაუსრულებელ შთაბეჭდილებას ტოვებს, რადგან თვითონ მატყუარას ოინბაზობას არა აქვს საზღვარი და დასასრული.

საყოფიერო ნოველაში სამოქმედო ასპარეზზე გამოსული ღარიბი და უქნარა კაცი ცდილობს ეშმაკური ხრიკებით გამდიდრებას. მის სამიზნეს ალალი და გულუბრყვილო ადამიანები შეადგენენ, რომლებსაც ტყუილითა და ოინბაზობით ასულებს. გაიძვერა პერსონაჟის მთელი ქმედება ასოციალურია და საბოლოოდ ის აღმოჩნდება სამარცხვინო სიტუაციაში და ახლა თვითონ ხდება სხვების დასაცინი.

ხალხური ნოველის ცბიერი პერსონაჟის სიეშმაკე და გონიერება ზოგჯერ დაფარულია მისი მოჩვენებითი სისუსტითა და უმწეობით. ტყუილისა და სიეშმაკის დემონსტრირება ხდება იქ, სადაც საკმარისი სიბრიივეა. ოსურ ნოველაში „ტყუილს მოკლე ფეხები აქვს“, რომელსაც საერთაშორისო საზღაპრო ფონდში გავრცელებული სიუჟეტი უდევს საფუძვლად, გაიძვერა და ოინბაზი პერსონაჟის როლში ზარმაცი და უქნარა კაცი გვევლინება. მან ეშმაკობით ცხოვრება, თავისზე სულელის მონახვა და მისი მოტყუება გადაწყვიტა. ერთ დღეს აიღო გუდა, შიგ მარცვალ-ნახევარი ქერი ჩააგდო, გაპერა, ზურგზე მოიგდო და ალდარის სოფლისკენ გასწია. იქ ერთ ეზოში შევიდა, გუდა ეზოში დააგდო, თვითონ კი მასპინძლებთან მუსაიფი გააბა. ქათმებმა გუდა გამოკენკეს და მარცვალი შეჭამეს, სანაცვლოდ, ეშმაკმა კაცმა მოტყუებული მასპინძლებისგან საუკეთესო ქათამი მიი-

ლო. სხვაგან ცხვრებს ქათამი ფეხქვეშ გაათელინა და სამაგიეროდ „დაზარალებულმა“ მასპინძლებს მსუქანი ყოჩი შეაწერა. სხვა სახლის ეზოში ერკემალი გათამამებულ ხარებს შუა გამოაბა, რომ რქებზე წამოეგოთ. მართლაც, ცბიერმა სტუმარმა გაპრიყვებულ მასპინძლებს რქებზე წამოცმული ყოჩის სანაცვლოდ ხარი დასცინცლა. სიხარბემ და პატიოსანი ადამიანების მოტყუების აზარტმა ონბაზი ალდარის სახლთან მიიყვანა. გაიძვერა კაცი მსახურებმა შეიპატიუეს, ხარი ბოსელში დაუბეს, თვითონ კი სასტუმრო ოთახში დააბინავეს. სტუმარი მალე ალდარის შვიდ ასულს გაუშინაურდა, მიეხმატკბილა, გააცინა, ხან კენჭაობა ეთამაშა, ხან – წკიპურტი და აცქაცუცქა. სინამდვილეში კი ბოროტი განზრახვა ამოძრავებდა. ღამით ალდარის ულამაზეს ქალიშვილს, დუდუს, დანა მოჰპარა, თავის ხარს ყელი გამოსჭრა და სისხლიანი დანა ისევ დუდუს ჩაუდო ჯიბეში, რათა ხარის სანაცვლოდ ახლა ალდარის ქალიშვილი ჩაეგდო ხელში. ასეც მოხდა. რადგან სისხლიანი დანა ლამაზ დუდუს აღმოაჩნდა ჯიბეში, გაბრიყვებულმა ალდარმა სტუმრის შეურაცხყოფა ვერ აიტანა და თავისი ქალიშვილი მას გაატანა.

ნოველაში „ტყუილს მოკლე ფეხები აქვს“ წინა პლანზე წამოწეულია მთავარი მოქმედი პირის დაბალი ინსტინქტები, მსუნაგობა და ავხორცობა, მაგრამ მისი საქციელი სულაც არ ხდება მორალური განსჯის საგანი. ტექსტში ერთმანეთს ენაცვლება მთავარი პერსონაჟის სიეშმაკე და ხალხის სიბრიყვე.

თითქოს ალდარის ქალიშვილზე დაქორწინებით უნდა დამთვრდეს ონბაზის სიცელქე, მაგრამ ხალხს სულაც არ მოსწონს უქნარა და გაიძვერა ადამიანი. ხალხური ნანარმოები მთავარ პერსონაჟს თავისივე ტყუილების მსხვერპლად წარმოგვიდგენს. მატყუარა, რომელიც აქამდე ეშმაკური ხრიკებით ცდილობდა ხალხის გაბრიყვებასა და მიზნის მიღწევას, თვითონ ხდება დაცინვის ობიექტი. მწყემსებმა ალდარის სახლიდან წამოსულ თაღლითს უმასპინძლეს, ავახშმეს და დააძინეს. შემდეგ

კი, მისი გუდიდან ალდარის ქალიშვილი ამოიყვანეს და მის მა-გივრად ძალლის ლეკვი ჩაუსვეს, რომელმაც მეორე დღეს იღ-ბლიანი მოგზაურობითა და ხალხის მოტყუებით გახალისებულ ოინბაზს, საკოცნელად მიშვერილი ტუჩები მოაჭამა (ოსური ზღაპრები 1975: 48-51). ნოველის უქნარა და ცბიერ პერსონაჟს სურდა სხვებისთვის ქონების წაგლეჯა, გემრიელად მირთმევა, გამდიდრება, ალდარის ქალიშვილებთან გართობა. აქედან მომ-დინარეობს მისი ყველა ჩანაფიქრი და საქციელი. ნაწარმოების საზრისი ასეთია: სხვისი გაბრიყვებით, სიცრუითა და გაიძვე-რობით მოპოვებული წარმატება ეფემერულია, ადამიანს არ შერჩება, ტყუილს მოკლე ფეხები აქვს.

ოსური და ქართული საყოფიერო ზღაპრები გამოირჩევა საერთო ელემენტების სიმდიდრით, სიუჟეტებისა და პერსონა-ჟების მსგავსებით, თითქმის იდენტურია მათში ასახული სოცი-ალური ფონი და პრობლემატიკაც, რაც ქართველებისა და ოსე-ბის მჭიდრო ურთიერთკავშირით არის გამოწვეული. ამ ორი ხალხის ფოლკლორულ შემოქმედებას მსგავსი ზნეობრივი და მორალური პრინციპები, სიკეთესა და ბოროტებაზე ერთი და იგივე მენტალური შეხედულებები უდევს საფუძვლად.

ქართული საზღაპრო ეპოსის პოპულარული ნაწარმოები „ნაცარქექია“ ცნობილია ოსურ ფოლკლორშიც. „ნაცარქექიას“ (ფახსიკება) ქართული და ოსური ტექსტი ერთმანეთის იდენ-ტურია (ოსური ზღაპრები 1975: 55-59). მთავარი გმირის გონიე-რება და გამჭრიახობა შენილბულია ისეთი უცნაური საქმიანო-ბით, როგორიც არის კერიასთან ნაცრის ქექვა და ფიქრი. ნა-ცარქექია ავლენს ტრიქსტერული პერსონაჟის თვისებებს. ხალ-ხურ ნოველაში ერთმანეთს უპირისპირდება, ერთი მხრივ, ფი-ზიკურად სუსტი და მოხერხებული, ხოლო, მეორე მხრივ, ფიზი-კურად ძლიერი და ბრიყვი პერსონაჟი. ნაცარქექიას სახლიდან მიაქვს არა საბრძოლო იარაღი ან რამე ჯადოსნური ნივთი, არამედ ყოველდღიური ყოფისათვის განკუთვნილი საგნები:

ჭყინტი ყველი, ნაცარი და სადგისი. წუთისოფლის გზაზე დაბრკოლების გადასალახად მდინარის პარას მისული პერსონაჟის ხელში ამ, ერთი შეხედვით, უმნიშვნელო საგნებმა თითქოს ჯადოსნური ძალა შეიძინეს. ჭყინტი ყველის, ნაცრისა და სადგისის გამოყენებით ნაცარქექია მოიპოვებს უპირატესობას მეტოქეზე, ხოლო შემდეგ ჭყუითა და გონებით, ტყუილითა და ოინბაზობით იმორჩილებს თავისზე გაცილებით ძლიერ, არაადამიანურ არსებებს – დევებს, ვაიგებს. ნაცარქექია, ჯადოსნური ზღაპრის მთავარი გმირის მსგავსად, შინ გამდიდრებული და სახეცვლილი ბრუნდება. ზ. კიკნაძის აზრით, „ნაცარქექიას ნარმატება არის არა დროებითი, როგორც ქოსატყუილასი ან მის მსგავსთა, არამედ საბოლოო“ (კიკნაძე 1988: 108).

საყოფიერო ზღაპრების მთელი სამყარო და პერსონაჟთა სამოქმედო სივრცე შევსებულია ბრიყვი, სულელი და მატყუარა ადამიანებით. ისინიც კი, რომლებიც ნარმატებას აღწევენ, გამოირჩევიან უცნაური ჩანაფიქრით, სასაცილო ქცევებითა და განსხვავებული აზროვნებით. ხუმრობა, ტყუილი და სიბრიყვე, ეს მათი ცხოვრების სტილია. მოულოდნელობის ეფექტი და ლალი იუმორი კიდევ უფრო აძლიერებს ნოველებში გადმოცემული ამბის მხატვრულ ჩანაფიქრს. ის მუდამ იზიდავდა სეირების მოყვარულ მსმენელს, რამაც განაპირობა ფოლკლორული შემოქმედების ამ სახალისო ჟანრის განსაკუთრებული პოპულარობა.

ლიტერატურა

კიკნაძე 1988: ზ. კიკნაძე, ქართული ფოლკლორი, თსუ გამომცემლობა, თბ., 1988.

ლეგენდები 1972: ოსური ზღაპრები და ლეგენდები, თარგმნა მ. ცხოვრებოვამ, გამომცემლობა „ირისთონი“, ცხინვალი, 1972.

ოსური ზღაპრები 1975: ოსური ზღაპრები, თარგმნა მ. ცხოვრე-
ბოვამ, გამომცემლობა „ირისთონი“, ცხინვა-
ლი, 1975.

პროპი 1928: Пропп В. Я., Морфология волшебной сказки, изд-во
ЛГУ, Ленинград, 1928

ქურდოვანიძე 2001: თ. ქურდოვანიძე, ქართული ფოლკლორი,
გამომცემლობა „მერანი“, თბ., 2001.



ნამთების ექოსი



ჟანრული თავისებურება და ციკლები

ნართების ეპოსი წარმოადგენს ოსური ზეპირსიტყვიერი შე-მოქმედების ყველაზე მნიშვნელოვან ძეგლს, რომელმაც დიდი გავლენა მოახდინა ოსური ფოლკლორის სხვა ჟანრებზეც. ნართები არიან ეპიკურ თქმულებათა ლეგენდარული გმირები, მეომრები და მათი ამბავი ოსურმა ფოლკლორმა ეპოსის სახით შემოინახა.

ეპოსი ფართო გაგებით არის კომპოზიციურად შეკრული და მყარი სტრუქტურის მქონე თხრობითი ჟანრის ნაწარმოები, რომელიც პოეტურად ან პროზაულად გადმოგვცემს მითოლოგიურ ამბავს, პერსონაჟთა საგმირო ან სამიჯნურო თავგადასავალს, ხალხის წარსულს. ამიტომ ეპოსის თემატიკა მრავალფეროვანია. მსოფლიო ფოლკლორში გვხვდება მითოლოგიური, ისტორიული, სამიჯნურო-რომანტიკული და საგმირო-სათავგადასავლო ეპოსები. ეპოსი შეიძლება წარმოდგენილი იყოს როგორც ვრცელი ნარატივებით, ისე შედარებით მოკლე ეპიკური ტექსტებით.

ნართების ეპოსი არის მითოლოგიური მოტივებით მდიდარი საგმირო-სათავგადასავლო ჟანრის ნაწარმოები. ის მოგვითხრობს ნართი გმირების ცხოვრების შესახებ. ეპოსის მთავარ გმირებს, რომლებიც ნათესაურ კავშირში არიან ერთმანეთთან, ჰქვიათ ნართები, ისევე როგორც გერმანული ეპოსის გმირებს აქვთ საერთო სახელი – ნიბელუნგები.

ნართების ეპოსი წარმოადგენს მრავალსიუჟეტიან ნაწარმოებს, რომელშიც ჩართულია სხვა ჟანრის ტექსტები და ლექს-სიმღერები. გმირების დაბადება და წრთობა, ზეციურ არსებებთან ურთიერთობა და საზოგადოებაში ცივილიზაციის საწყისების შემოტანა, ბოროტ ძალებთან ბრძოლა და საცოლის მოტა-

ცება, ღმერთთან დაპირისპირება და, ბოლოს, გმირების დალუპვა შეადგენს ნართების ეპოსის ძირითად სიუჟეტურ ქსოვილს. ნართების ეპოსში აისახა ოსი ხალხის ფუნდამენტური შეხედულებები გარესამყაროსა და ცხოვრებაზე, ადამიანის დანიშნულებაზე, ცხოვრების საზრისზე, ღმერთთან ურთიერთობასა და გმირობის იდეალზე.

მკვლევართა ვარაუდით, თავდაპირველად უნდა შექმნილიყო ცალკეული სიუჟეტები რომელიმე გმირის ან რაიმე მოვლენის შესახებ. საერთო სიუჟეტებსა და მოტივებზე აგებული ტექსტები, როგორც წესი, ქმნიან ერთ ციკლს. რამდენიმე ციკლის შეერთების შედეგად კი თქმულებებმა ნართებზე ერთ მთლიან ეპოსში მოიყარეს თავი, რომელსაც აქვს დასაწყისი და გარდაუვალი დასასრული.

ნართების ეპოსის ოსურ ვერსიაში პერსონაჟები ქმნიან ოთხ თანამიმდევრულ თაობას, მკვეთრად გამოხატული გენეალოგიური ციკლიზაციით. კერძოდ, ეპოსში ისახება რამდენიმე ცენტრალური ციკლი: 1. ახსარისა და ახსართაგის ციკლი; 2. ურუზმაგისა (ურიზმაგი) და სათანას ციკლი; 3. სოსლანის (სოზირიყო) ციკლი; 4. ბათრაძის ციკლი; ოსურ ნართების ეპოსში მნიშვნელოვანი ადგილი უკავია, აგრეთვე, თქმულებათა ციკლს ციკერ სირდონზე.

მთავარი ციკლების გარდა ოსურ ნართების ეპოსში მოიძებნება ათობით ტექსტი სხვადასხვა გმირებზე, როგორიცაა: აცამაზი, არახძავი, სავაი, თოთრაძი, სიბალცი, აისანა და სხვ. ზოგიერთი მკვლევარი ამ „მცირე ციკლებს“ ოდესლაც არსებულ ვრცელთა ნამსხვრევებად მიიჩნევს.

ოსურ ფოლკლორში ნართების ეპოსი სიმღერისა და თხრობის სახით დასტურდება. ტექსტების ის ნაწილი, რომლებიც სიმღერით სრულდებოდა ხალხი „ნართულ ქადაგებს“ უწოდებდა. თქმულებათა დიდ ნაწილს პროზაულად, თხრობით გადმოსცემ-

დნენ. მოიძებნება ისეთი ტექსტებიც, რომლებშიც ნართების ამ-ბავი შერეულად, თხრობითა და სიმღერით გადმოიცემოდა.

შენიშვნა: სიტყვა ქადაგს ოსურ ენაში აქვს ქართულისაგან განსხვავებული სემანტიკა. ქადაგი (კადაგ) მომ-დინარეობს ინდოირანული ენებიდან და ოსურ ენაზე ჰქვია მითოებიკურ პოეტურ სიმღერას, გადმოცემას, თქმულებას, რომელსაც მუსიკა-ლურ აკომპანემენტზე ასრულებდნენ. მაგ., Нар-თы კადჯытæ – ნართული თქმულებები, Нарты Үырызмæджы კადაგ – ნართი ურუზმაგის თქმუ-ლება (ქადაგი).

ნართების ეპოსი გავრცელებული იყო თითქმის მთელ ჩრდილოეთ კავკასიაში. ხალხურ ტექსტებს ნართებზე იცნობ-დნენ ისები, აფხაზები, ყაბარდოელები, ჩერქეზები, აბაზები, ალილელები, ყარაჩალები, ბალყარელები, ჩეჩინები და ინგუშე-ბი. ნართები მოიხსენიებიან საქართველოს მთიანეთის (სვანე-თი, რაჭა, ხევსურეთი) ზეპირ ტექსტებში. ნართების ეპოსის ცალკეული სიუჟეტები და გაზღაპრებული ვერსიები გვხვდება ზოგიერთი დაღესტნელი ხალხის (ლაკები, ხუნძები, თურქულე-ნოვანი ყუმუხები...) ფოლკლორში. ეპოსის აფხაზური ვერსიის გაზღაპრებული ტექსტები დასტურდება სამეგრელოშიც. ნარ-თების ეპოსის ფრაგმენტები ცნობილი იყო XIX საუკუნეში კავ-კასიიდან თურქეთში ერთიანად გადასახლებული მუპაჯირი უბისებისათვის. ვ. აბაევის აზრით, ჩვენ წინაშეა, საკმაოდ იშვი-ათი შემთხვევა, როცა ეპოსი არ იფარგლება კონკრეტული ნა-ციონალური ჩარჩოებით და ეკუთვნის სხვადასხვა ხალხს. მარ-თალია, ნართების ეპოსის ნაციონალური ვერსიები მეტ-ნაკლე-ბად განსხვავდებიან ერთმანეთისგან, მაგრამ ისინი ზოგადად მაინც ერთი ტიპისაა.

გამოცემები. ტექსტების შემკრები და მკვლევარნი

ნართული თქმულებების პირველი ჩანაწერები ეკუთვნის ქართველ მწერალს დანიელ ჭონქაძესა და ხალხური ტექსტების ოს შემკრებს ვ. წორაევს. დ. ჭონქაძე შესანიშნავად ფლობდა ოსურ ენას და მას სასულიერო აკადემიაშიც ასწავლიდა. დ. ჭონქაძეს რუსეთის მეცნიერებათა აკადემიის დავლებით შეუდგენია რუსულ-ოსური ლექსიკონიც. თუმცა ნაშრომის დასრულება მას არ დასცალდა. 1960 წელს დ. ჭონქაძე 30 წლის ასაკში გარდაიცვალა. რუსულ-ოსური ლექსიკონის ის ნაწილი, რომელიც მწერალს შეუდგენია, ამჟამად დაცულია საქართველოს მუზეუმის ხელნაწერთა ფონდში.

აკადემიკოსმა ა. შიფრერმა დ. ჭონქაძისა და ვ. წორაევის ჩანერილი ნართული თქმულებები რუსულ ენაზე თარგმნა, კომენტარები დაურთო და დაბეჭდა 1868 წელს „ოსური ტექსტების“ სახელწოდებით კრებულში „Записки Академии наук“. გამოქვეყნებულმა ტექსტებმა ოსური ფოლკლორის მიმართ მკვლევართა განსაკუთრებული ინტერესი გამოიწვია.

ნართული თქმულებების შეკრებას დიდი ამაგი დასდო ოსური ყოფისა და ისტორიის დაუღალავმა მკვლევარმა ვ. პფაფმა, რომელმაც ხალხური ტექსტები ნართებზე 1871 წელს გამოაქვეყნა ქალაქ თბილისში, რუსულენოვან კრებულში „Сборник сведений о кавказских горцах“. ამავე კრებულში გამოქვეყნდა XIX საუკუნის 80-იან წლებში ჯანტემირ და გაცირ შანა-ევების მიერ ჩანერილი ნართული თქმულებები, რომლებიც გამოირჩევა მაღალი მეცნიერული დირებულებით.

ოსური ფოლკლორის შესწავლის საქმეში უდიდესი ღვანლი მიუძღვის ცნობილ რუს მეცნიერს, აკადემიკოს ვ. მილერს. მან რუსულ ენაზე გამოაქვეყნა მრავალი ნართული თქმულება ვრცელი კომენტარებით. ეს მასალები მკვლევარმა ძირითადად

მოათავსა თავის ცნობილ „ოსურ ეტიუდებსა“ (1881 წ.) და „დიგორულ თქმულებებში“ (1902 წ.).

ვ. მილერის შრომებმა ოსი ინტელიგენცია დააინტერესა მშობელი ხალხის ისტორიით, ეთნოგრაფიითა და ფოლკლორით. XIX საუკუნის 80-90-იან წლებში გამოჩნდა ოსური ფოლკლორის შემკრებთა ახალი ჯგუფი: ა. ყაითმაზოვი, ი. სობიევი, ს. ტუკაევი, მ. გორდანოვი, გ. გურიევი და მ. ტუგანოვი. მათ მრავალი ნართული ზეპირი ტექსტი გამოაქვეყნეს ჩრდილოეთ კავკასიის პერიოდულ გამოცემებში.

XX საუკუნის 40-იან წლებში ნართების ეპოსის სრულყოფილი ტექსტის გამოსაცემად შეიქმნა „ნართული კომიტეტი“. თქმულებათა ვარიანტების გამოსავლენად და ადრე ჩაწერილი ტექსტების სისტემაში მოსაყვანად ჩატარდა მნიშვნელოვანი სამუშაო. მოეწყო ექსპედიციები ოსებით დასახლებულ სოფლებში. ექსპედიციებმა გამოავლინა არა მხოლოდ ახალი ვარიანტები, არამედ შეგროვდა ეპოსთან დაკავშირებული მუსიკალური ფოლკლორიც.

ნართების ეპოსის ერთ-ერთი ყველაზე სრულყოფილი და თვალსაჩინო კრებული ოსურ ენაზე პირველად საქართველოში, ქალაქ ცხინვალში ჯერ კიდევ 1942 წელს დაიბეჭდა. ცოტა მოგვიანებით იგი რუსულ ენაზე პოეტურად ითარგმნა და მოსკოვში საბჭოთა კავშირის მეცნიერებათა აკადემიის გამომცემლობამ 1957 წელს გამოაქვეყნა. ამ გამოცემას აქვს ნაკლიც, რადგან იგი წარმოადგენს თავისუფალ ლიტერატურულ თარგმანს.

მოგვიანებით, 1946 წელს, ნართების ეპოსი ოსურ ენაზე დაიბეჭდა ჩრდილოეთ ოსეთშიც. მისი პირველი რუსული თარგმანი ეკუთვნის ი. ლიბედინსკის, რომელიც ჯერ 1948 წელს ძალიყაუში გამოიცა, ხოლო მომდევნო 1949 წელს დაიბეჭდა მოსკოვშიც (ლიბედინსკი 1948).

ნართების ეპოსის მრავალ გამოცემას შორის აღსანიშნავია 2003-2012 წლებში ვლადიკავკაზში ოსურ ენაზე გამოქვეყნებუ-

ლი ნართების თქმულებები შვიდ ტომად, რომელიც შეადგინეს და კომენტარები დაურთეს თ. ხამიცაევამ და შ. ჯიქვაითმა.

ქართულ ენაზე ნართების ეპოსი პირველად 1947 წელს თარგმნეს გ. ლეონიძემ, ვ. გორგაძემ და ს. ფაშალიშვილმა, მაგრამ ის ითარგმნა არა ორიგინალიდან, არამედ პწკარედიდან. ნართების ეპოსის ქართულ ენაზე ამეტყველებაში უდიდესი ღვანწლი მიუძღვის ოს მწერალსა და მთარგმნელს ქალბატონ მერი ცხოვრებოვას. უშუალოდ დედნიდან მერი ცხოვრებოვას მიერ ქართულ ენაზე შესანიშნავად თარგმნილი ნართების ეპოსი ორჯერ – 1977 და 1988 წლებში გამოქვეყნდა. თუმცა ამ გამოცემებს აქვთ ერთგვარი ნაკლიც, რადგან ტექსტებს არ ახლავთ პასპორტი, მითითებული არ არის მთქმელისა და ჩამწერის ვინაობა, აგრეთვე ტექსტის ჩაწერის დრო და ადგილი. უფრო სრულყოფილი სახით ნართული თქმულებები 2014 წელს თბილისში გამოქვეყნდა ორ წიგნად, ქართულ და ოსურ ენებზე. წიგნებს ერთვის შესაბამისი სამეცნიერო აპარატი: ტექსტების ინდექსი, პასპორტი, შენიშვნები და ლექსიკონი. წიგნი შეადგინა და ქართულ ენაზე თარგმნა ნ. ბეპიევმა (ნართები 2014). თბილისში გამოქვეყნებულ აკადემიურ ორნიგნეულში შესულია რჩეული ხალხური ტექსტები ვლადიკავკაზში ოსურ ენაზე დაბეჭდილი ნართების ეპოსის შვიდტომეულიდან.

6. ბეპიევის „ნართები“ ძირითადად ემყარება ადრე გამოცემული კრებულების ციკლიზაციის პრინციპს, მეტიც, მასში გვხვდება ნართ გმირებზე ზოგიერთი ისეთი ციკლის თქმულებები, რომლებიც თვით მერი ცხოვრებოვას ქართულ ენაზე თარგმნილ კრებულშიც კი ვერ მოხვდა, მათ შორის სავასა და ბორას ციკლის თქმულებები, გადმოცემები ვარხთანაგებზე. 6. ბეპიევმა წიგნი გაამდიდრა ქართულ ენაზე ადრე თარგმნილი ტექსტების ახალი ვარიანტებით, მათ შორის პოეტური ტექსტებით. მართალია, ნართების ეპოსმა ოსური ფოლკლორის თითქმის ყველა ჟანრზე მოახდინა გავლენა, მაგრამ, ვფიქრობ, კრე-

ბულში მოხვდა ზოგიერთი ისეთი ნარატივი და ლექს-სიმღერა, რომელიც ნაკლებად ან საერთოდ არ უკავშირდება ნართ გმირებს.

ჟორჟ დიუმეზილი – ნართების ეპოსის მკვლევარი

ნართების ეპოსის კვლევაში განსაკუთრებული წვლილი მიუძღვის ფრანგ მეცნიერს ჟორჟ დიუმეზილს. მან შექმნა ფუნდამენტური შრომები რამდენიმე მიმართულებით: შედარებით მითოლოგიასა და ფოლკლორისტიკაში, რელიგიის ისტორიასა და კავკასიონლოგიაში. მისი ერთ-ერთი საუკეთესო ნაშრომია „ოსური ეპოსი და მითოლოგია“ (ფრანგულიდან ითარგმნა და რუსულ ენაზე გამომცემლობა „ნაუკამ“ დაბეჭდა 1976 წელს მოსკოვში).

ჟ. დიუმეზილი (Georges Edmond Raoul Dumezil) დაიბადა 1898 წლის 4 მარტს ქ. პარიზში. 1924 წელს ის გახდა მეცნიერებათა დოქტორი. 1925 წლიდან 1931 წლამდე სტამბულის უნივერსიტეტში კითხულობდა ლექციების კურსს რელიგიის ისტორიაში. 1931-1933 წლებში იყო უპსალეს (შვედეთი) უნივერსიტეტის ლექტორი. 1935 წლიდან დაპრუნდა პარიზში და სათავეში ჩაუდგა ინდოევროპელი ხალხების შედარებითი მითოლოგიის კათედრას. 1937-1948 წლებში კითხულობდა სომხური ენის კურსს. 1948-1968 წლებში College de France-ში ხელმძღვანელობდა ინდოევროპული ცივილიზაციების კათედრას. 1968 წელს ის გავიდა პენსიაში საპატიო პროფესორის წოდებით.

მითოლოგიის შესასწავლად ჟ. დიუმეზილმა მოიმარჯვა სრულიად ახალი და სწორი მეთოდოლოგია. ის თვლიდა, რომ მითის გაგება და ახსნა შეუძლებელი იქნებოდა, თუ მას მოვწყვეტდით იმ ხალხის ყოფა-ცხოვრებასა და ტრადიციას, სადაც

წარმოიშვა და ჩამოყალიბდა კონკრეტული მითოლოგიური ნარატივი თუ რიტუალი.

მითოსი, გარკვეული არსით, ინახავს, ირეკლავს საზოგადოების სოციალურ სტრუქტურას. უ. დიუმეზილის აზრით, მხოლოდ სოციალური სტრუქტურის შესწავლის შედეგად შეიძლება მასზე დაფუძნებული რელიგიური და მითოლოგიური წარმოდგენების სწორად გაგება და ამოცნობა.

უ. დიუმეზილის ვარაუდით, უძველეს წარსულში ინდოევროპელ ხალხებში უნდა ყოფილიყო სამი ფუნქციის მქონე სოციალური ჯგუფი: 1) რელიგიური, კულტმსახურობა; 2) სამხედრო, მეომრების; 3) სამეურნეო, მშრომელების. ეს სამნაწილიანი სოციალური დაყოფა, დიუმეზილის აზრით, აღიბეჭდა ინდოევროპელი ხალხების რელიგიურ და მითოლოგიურ სისტემაში. ხალხური ეპიკური ტექსტების პერსონაჟებში, გმირებსა და ღვთაებებში, რომლებიც სულაც არ წარმოადგენდნენ ხალხის უსარგებლო ფანტაზიის ნაყოფს.

ოსურ ეპოსში ნართი გმირები დაყოფილი არიან სამ გვარად. ეს გვარებია: ალაგათები, ახსართაგები და ბორათები. ალაგათებს, რომელთა სახლშიც ნართები იკრიბებიან საკულტო ნადიმზე, უ. დიუმეზილის აზრით, ეპოსში აქვთ პირველი, კულტმსახურობა ფუნქცია; ახსართაგები, რომლებიც გამოირჩევიან მეომრული სულისკვეთებით, წარმოადგენენ მეორეს, მეომრების ფუნქციას; ბორათები, განთქმული სიმდიდრით, განასახიერებენ მესამეს, სამეურნეო ფუნქციას.

უ. დიუმეზილი სამი სოციალური ფუნქციის განაწილების არქეტიპს ხედავს პეროდოტეს „ისტორიაში“ მეფობის წარმოშობის სკვითურ მითში. პეროდოტეს მიხედვით, ტარგიტაოსის ვაჟებმა: ლიპოქსაისმა, არპოქსაისმა და ყველაზე უმცროსმა კოლაქსაისმა – იხილეს ციდამ საგნების ცვენა. ზეციდან სკვითების ქვეყანაში ჩამოვარდა ოქროს გუთანი, ოქროს ცული და ოქროს თასი. პირველად ოქროს ნივთებთან ახლოს მივიდა უფ-

როსი ძმა, უნდოდა დაუფლებოდა, მაგრამ როცა მიუახლოვდა, ცეცხლი წაეკიდა ოქროს. შუათანა ძმამაც ვერ შეძლო განძის აღება, ისიც ცეცხლმა უკუაქცია. მესამედ მივიდა მათთან სულ უმცროსი ძმა და ცეცხლი ჩაქრა, ისე რომ მან წაილო ეს ნივთები თავის სახლში. სასწაულის შემდეგ უფროსმა ძმებმა უმცროსს გადასცეს მთელი ძალაუფლება და მეფობაც მასზე გადავიდა (ჰეროდოტე, IV. 5).

უ. დიუმეზილის აზრით, თასი არის საკრალური ჭურჭელი და მის საკულტო-რელიგიურ დანიშნულებაზე მიუთითებს; ცუ-ლი არის საომარი იარაღი და მას აქვს სამხედრო-საბრძოლო დანიშნულება, ხოლო გუთანი არის სამინათმოქმედო იარაღი და მის სამეურნეო ფუნქციაზე მიუთითებს. შესაბამისად, კოლაქ-საისი, რომლისგანაც დასაბამი დაედო სკვითების სამეფო დი-ნასტიას, თავის თავში აერთიანებს სამივე ფუნქციას, როგორც უზენაესი ქურუმი, მთავარსარდალი და მინათმოქმედი. უ. დიუ-მეზილის აზრით, თასი, რომელსაც აქვს საკულტო-რიტუალური მნიშვნელობა, ასიმბოლოებს პირველ ფუნქციას, ცული – მეო-რეს, ლაშქრობის ფუნქციას, გუთანი და უღელი – მესამეს, სამე-ურნეო დანიშნულებას.

„სამი ფუნქციის თეორია“ დიუმეზილმა ჩამოაყალიბა ნარ-თების საზოგადოებაში სამი გვარის (ახსართაგები, ალაგათები, ბორათები) სოციალური სტრუქტურის ანალიზზე დაყრდნო-ბით. ნართული თქმულებების ზოგიერთი ვარიანტი, მართლაც, გვაძლევს საფუძველს, ვიფიქროთ, რომ ამ სამ გვარს შორის გა-ნანილებული საზოგადოებრივი ფუნქციები (კულტმსახურება, ბრძოლა, სიმდიდრე) შეესაბამება სხვა ინდოევროპელი ხალხე-ბის რელიგიასა და მითოლოგიაში „სამფუნქციონალობის“ პრინციპს. ალაგათებთან ნართები იკრიბებოდნენ საკულტო სუფრაზე და მათი ფუნქცია იყო კულტმსახურება. ახსართაგები განთქმულნი იყვნენ სიმამაცითა და განასახიერებდნენ მეომ-რულ კლანს, ხოლო ბორათები, რომლებიც ცნობილი იყვნენ

სიმდიდრით, წარმოადგენდნენ მესამე ფუნქციას. ეს თემა განსაკუთრებით დეტალურად არის დამუშავებული ჟ. დიუმეზილის წიგნის „Mythe et epopee“ (1968) ერთ-ერთ თავში, რომელსაც ჰქვია „Trois familles“.

ეპიკურ თქმულებათა ვარიანტების მიხედვით, ახსართაგების გვარს მიეკუთვნებოდნენ ცნობილი ნართი გმირები: ურუზმაგი, ხამიცი, სოსლანი და ბათრაძი. ახსართაგებთან დაპირისპირებულ ბორათების გვარს ეპოსში წარმოადგენს ბურაფარნიგი თავისი შვიდი ვაჟით. ალაგათების გვარის გმირებზე ნართულ თქმულებათა ვარიანტები ბუნდოვან ცნობებს გვაწვდის და მათზე ერთიანი ჩამოყალიბებული პოზიცია არ არსებობს. ვ. აბაევის აზრით, ცალკეული გმირების ამა თუ იმ გვარისთვის მიკუთვნებაში მთქმელთა დიდი გაურკვევლობა იგრძნობა.

ჟ. დიუმეზილის „სამმაგ თეორიას“ ჰყავდა როგორც მომხრეები, ასევე მოწინააღმდეგეები.

XIX საუკუნის 60-იან წლებში ჩრდილოეთ კავკასიის მთიელების მნიშვნელოვანი ნაწილი, რუსეთის დაპყრობითი ომების შემდეგ გადასახლეს „ერთმორწმუნე“ თურქეთში, სადაც კავკასიელმა მთიელებმა მეტ-ნაკლებად შეინარჩუნეს თავიანთი ენა, წეს-ჩვეულებები და ტრადიციები. ეს „მეორე კავკასია“ გახდა დიუმეზილის შესწავლის ობიექტი. პირველად 1930 წელს და 1954 წლიდან მოყოლებული, თითქმის ყოველწლიურად ის სამეცნიერო მივლინებით ჩადიოდა თურქეთის კავკასიელებში. ფრანგი მკვლევარი იქ იწერდა ხალხურ ტექსტებს, სწავლობდა მათ ყოფასა და ფოლკლორს. გადაუჭარბებლად შეიძლება ითქვას, რომ ჟ. დიუმეზილს თურქეთში მცხოვრები კავკასიელი ხალხების ფოლკლორისა და მათი ენების შესწავლის საქმეში უდიდესი დამსახურება მიუძღვის.

ჟ. დიუმეზილი ოსურ ნართების ეპოსში გამოჰყოფს ძირითად ციკლებს: „ურუზმაგი და სათანა“, ხამიცი და ბათრაძი“,

„სოზირიყო (სოსლანი)“, აგრეთვე მეორეხარისხოვან ციკლებს – „სირდონი“, „აცამაზი“ და სხვა. ავტორი ოსური ნართების ეპო-სის თითოეული ციკლის ტექსტებს უდარებს შესაბამის ყაბარ-დოულ, ადილურ, ბალყარულ და სხვა ვარიანტებს. ვ. მილერის კვალდაკვალ, კიდევ უფრო მტკიცე არგუმენტებით, უ. დიუმე-ზილმა დაამტკიცა ნართების ეპიკური ტრადიციების მსგავსება სკვითებისა თუ დღევანდელი ოსების წეს-ჩვეულებებთან.

1948 წელს ფრანგულ, ხოლო 1959 წელს გერმანულ ენაზე უ. დიუმეზილმა გამოაქვეყნა წიგნი „ლოკი“, რომელშიც ავტორმა გაავლო შორს მიმავალი პარალელები ნართ სირდონსა და სკან-დინავიურ ღვთაება ლოკს შორის, თუ როგორ მტრობს ნართი სირდონი სოსლანს და ასევე სკანდინავური ღვთაება ლოკი მზის ღმერთს – ბალდრის, რის შედეგადაც იღუპება როგორც სოსლანი, ასევე ბალდრიც.

ნართების ეპოსთან დაკავშირებით დიუმეზილის თვალსაზ-რისი და იდეები ახალი მასალის გამოვლენისა და თეორიული პოზიციის გაღრმავების შემდეგ ზოგჯერ იცვლებოდა, მაგრამ, როგორც ვ. აბაევი აღნიშნავს, ფრანგ მეცნიერს ერთ საკითხზე, თავისი მოღვაწეობის მთელი ორმოცი წლის მანძილზე, არ შე-უცვლია თვალსაზრისი: მან შეინარჩუნა ურყევი რწმენა, რომ კავკასიის ხალხთა ნართულ ეპოსებს შორის უძველესი და ორი-გინალური იყო ოსური ნართული თქმულებების ძირითადი ფონდი, რომელიც მემკვიდრეობით უნდა მიეღოთ ოსებს სკვი-თურ-სარმატული და ალანური ეპოქის ტრადიციებიდან.

უ. დიუმეზილმა ფრანგულ ენაზე გამოსცა ოსური ნართების ეპოსი, სხვადასხვა ნაციონალური თქმულებების პარალელური ეპიზოდების თარგმანითა და თხრობით, ტექსტებს დაურთო გა-მოკვლევა და მნიშვნელოვანი კომენტარები (დიუმეზილი 1965).

ქრონოტოპი

კავკასიის ხალხთა თქმულებების მიხედვით, ნართები ცხოვრობდნენ „გოლიათების ეპოქაში“. ნართები კავკასიის ხალხთა ზეპირ ტექსტებში წარმოადგენენ მითიურ ხალხს, რომელიც ცხოვრობდა არა ისტორიულ დროში, არამედ წინარეის-ტორიულ, მითოსურ დროში. ეპოსში, ერთი შეხედვით, მოქმედება ვითარდება პირველებულის დროში. ნართების ეპოქა თითქოს წინ უსწრებდა ჩვენს ისტორიულ დროს, რის შთაბეჭდილებასაც სხვადასხვა წარმოდგენები აძლიერებს: თითქოს ნართები იყვნენ იმ ხალხების წინაპრები, რომლებიც მათზე თქმულებებს მოგვითხრობენ.

არც თუ იშვიათად ნართების მოქმედებათა არეალი ტოპონიმიზებულია. ნართები იღაშექრებენ გურის ან ხიზის ციხე-სიმაგრეზე, რომლის დასაცავად ალდარები ძუარებსა და ანგელოზებს უხმობენ. ოსურ ნართებში მოქმედება ხშირად ხდება სავხოხის მთაზე (შავი მთა) ან ზილახარის ველზე, მაგრამ ეს სახელწოდებები ნაკლებად მიუთითებენ კონკრეტულ ადგილზე. ისინი ტექსტებში საკრალური ცენტრის მნიშვნელობას იძენენ, სადაც ეპოსის განსაკუთრებული მოვლენები ხდება და სადაც ნართი გმირები სპორტულ ასპარეზობებსა და გრანდიოზულ სიმდის მართავდნენ.

ოსური ნართების ეპოსში მოქმედება დიდი მდინარეების, ტბებისა და ზღვების მახლობლად, ან თვალუწვდენელ ტრამა-ლებზე ხდება. ახსართაგი ჩადის ზღვის ფსკერზე, სადაც ცხოვრობს დონბეთირების ასული ძერასა და მასზე ქორწინდება. თქმულებებში ხშირად არის ნახსენები შავი ზღვა (cay დენჯყავ). სკივრი, რომელშიც ურუზმაგი იჯდა და მდინარეს გაატანეს, წყალმა შავი ზღვის ნაპირზე გამორიყა. ნართები ხან შავი და ხან თეთრი ზღვის სანაპიროებს მიუყვებიან სათარეშოდ.

ნართების ეპოსის „დრო-ჟამული მდინარება“ (ზ. კიკნაძის ტერმინით) და მასში ასახული სივრცე განუსაზღვრელია და ჩა-კეტილი. ის ზღაპრულ დროსა და სივრცეს მოგვაგონებს, მაგრამ ნართების ეპოსი არ არის ზღაპარი. თავისი სტრუქტურით, პერსონაჟთა რაობითა და, რაც მთავარია, დასასრულით ის არ-სებითად განსხვავდება ზღაპრისაგან, რომლის საბოლოო ფინალიც არის გმირის შინ დაბრუნება და ქორწილი. ოსური ეპოსი მთავრდება ნართების ღმერთთან დაპირისპირებით, გმირებისა და ზოგადად ნართი ხალხის დაღუპვით.

ნართების ეპოსის წარმოშობა და ჩამოყალიბება

სიტყვა „ნართის“ წარმოშობასთან დაკავშირებით მკვლევარებს არა აქვთ საერთო თვალსაზრისი. უ. დიუმეზილი მიიჩნევს, რომ ტომობრივი სახელწოდება ნართი მომდინარეობს სკვითური სიტყვიდან „uiri“ და აღნიშნავს გმირს. უ. დიუმეზილის აზრით, სკვითური „uiri“ უკავშირდება სანსკრიტულ-ირანულ „nar“-ს (uiri ← nar), რომლის სემანტიკაც არის „კაცი“, „მებრძოლი“.

მკვლევართა ვარაუდით, ნართების საკუთარი სახელები: ვარხაგი, ახსარი, ახსართაგი, ურუზმაგი, ქალის სახელი აცი-რუხსი, საკრალური თასის ვაცამონგას სახელწოდება ირანული წარმოშობისაა.

ვ. აბაევის აზრით, მართალია, ალან-ოსებში ათასწლობით არსებობდა ეპიკური სიმღერები გმირებზე, მაგრამ მათი საერთო სახელწოდება „ნართ“ უნდა გაჩენილიყო ალანური ეპოქის დასასრულს, ეს კი მონღოლთა ბატონობის პერიოდს (XIII-XIV სს) უკავშირდება. სხვა მკვლევართაგან განსხვავებით, ვ. აბაევი სიტყვა „ნართის“ არ აკავშირებს ირანულენოვან სამყაროსთან. ისევე როგორც მონღოლურიდან არის ნასესხები რუსული ბილინების მთავარ გმირთა საერთო სახელწოდება „ნიგათიწ“

(გოლიათი), ვ. აბაევის აზრით, სიტყვა „ნარ“, ასევე მომდინარე-ობს მონღოლური ფუძიდან ნარა – „მზე“, მასზე -თ (თა) სუფიქსის დამატებით (ნარ-თ), რომელიც ოსურ ენაში ნარმო-ადგენს არსებითი სახელების მრავლობითი რიცხვის მაჩვენე-ბელს. ალსანიშნავია, რომ ამავე პრინციპით იწარმოება დღემდე ოსური გვარები. ვ. აბაევის აზრით, სიტყვა „ნართი“ კავკასიის სხვა ხალხებში ოსური ფორმით შევიდა, რომელიც ნარმოქმნი-ლია ოსური საგვარეულო სახელების ტიპის მიხედვით და ალ-ნიშნავს მზის შვილებს, მზის შთამომავლობას (აბაევი 1988: 24).

უ. დიუმეზილი წერს: „სწორედ ოსებთან და უეჭველად, კი-დევ მათ შორეულ წინაპრებთან ჩამოყალიბდა ეპოპეის ბირთვი, მისი მთავარი პერსონაჟები. ვიცი, რომ ამ მსჯელობის დაბეჭ-დვით გულს ვატყენ ჩემს ჩერქეზ და აფხაზ მეგობრებს, მაგრამ *magis amica verutas* (ჭეშმარიტება უფრო ძვირფასია), თავის სა-ფუძველში ნართული ეპოსი ოსურია. იგი ბევრ მეზობელ ხალ-ხთან იყო ადაპტირებული, მრავალფეროვნად ტრანსფორმირ-დებოდა, დანაკარგებითა და გამდიდრებებით, განსაკუთრებით სხვადასხვაგვარი მორალური ელფერის შეძენით“.

ნართების ეპოსი შექმნეს ჩრდილოეთ კავკასიის ხალხებმა შორეულ წარსულში და ის ყალიბდებოდა მრავალი საუკუნის განმავლობაში. ნართების ეპოსის წარმოშობისა და განვითარე-ბის ეტაპების აბსოლუტური სიზუსტით დადგენა შეუძლებელია. ნართების ეპოსის ონომასტიკის, ცალკეული ციკლების, მოტი-ვებისა და სიუჟეტების ყოველმხრივი ანალიზის საფუძველზე ვ. აბაევი მიიჩნევს, რომ ნართების ეპოსი ყალიბდებოდა ორ თა-რიღს შორის, ძველი წელთაღრიცხვის VII-V საუკუნეებიდან ახა-ლი წელთაღრიცხვის XIII-XIV საუკუნეებამდე. შემდეგ საუკუნე-ებში, ვ. აბაევის აზრით, ნართების ეპოსში არსებითი ცვლილე-ბები აღარ უნდა მომხდარიყო.

სკვითების წეს-ჩვეულებების ასახვა ნართების ეპოსში

ნართები მხოლოდ ეპიკურ თქმულებათა პერსონაჟები არიან. ისტორია არ იცნობს ხალხს ნართების სახელწოდებით. თუმცა მკვლევარები ნართების ამბავს დიდი ისტორიული მოვლენების ანარეკლად მიიჩნევენ. ნართების ეპოსში დასტურდება სტეპებში მცხოვრები ხალხის ტრადიციები და წეს-ჩვეულებები.

ვს. მილერმა და ჟ. დიუმეზილმა აჩვენეს, რომ ნართების ეპოსის ზოგიერთ სიუჟეტს მსგავსება-ანალოგიები დაეძებნება ოსების შორეული წინაპრების სკვითურ-სარმატული ტომების იმ ყოფასა და ჩვეულებებთან, რომელთა შესახებაც ჰეროდოტემ შემოგვინახა ცნობები ჩვ. წ-მდე V საუკუნის ქრონიკებში.

ნართების ეპოსში სკვითურ-სარმატული და ალანური ეპოქის ტრადიციების ერთგვარ გამოძახილს წარმოადგენს სკალპებისგან შეკერილი ქურქი, რომელსაც სოსლანი ატარებდა.

ტექსტი: სოსლანმა გადაწყვიტა ნართებს შორის ყველაზე გამორჩეულად ეცხოვრა. ამ მიზნით კაცის თავისა და პირსახის ტყავებით ქურქის შეკერვა მოისაზრა. ასეთი ქურქის შეძენა მანამდე ვერავის მოეხერხებინა. სოსლანი კაცს რომ მოკლავდა, პირზე ტყავს წვერულვაშიანად აძრობდა და მთელი ქურქის სამყოფი ტყავი მოაგროვა (ნართები 1988: 114).

უბეებში ჩასაყენებელი თავ-პირის ტყავის მოსაპოვებლად სოსლანმა საყოლას მინდორზე ოქროსქოჩრიან ელთაყანს კოჭის თამაში შესთავაზა, თან უთხრა: – თუ შენ მომიგებ, თავი მომჭერი; ხოლო თუ მე მოვიგე, თავი უნდა მოგკვეთო...

საბოლოოდ სოსლანმა ელთაყანს ჯადოქრობით აჯობა, თავზე ტყავი გადააძრო, წამოიღო და ქა-

ლიშვილებმა სოსლანის ქურქს ეს ტყავი ჩაუყენეს უბეებად (ნართები 1988: 115-116).

ვს. მილერის აზრით, ნართების ეპოსში სკალპებისგან შეკერილი სოსლანის ქურქის მოტივი სკვითური დროიდან მომდინარეობს და სკვითების წეს-ჩვეულებას ასახავს, რომელსაც ჰეროდოტე აღნიერს:

ტექსტი: [სკვითებს] ბრძოლაში დახოცილების თავები მეფესთან მიაქვთ, რადგან თავს რომ მიიტანენ, ნადავლშიც წილს იღებენ, ხოლო თუ არ მიიტანეს თავი, არაფერს მიიღებენ. თავს ისინი ასე ატყავებენ: შემოსერავენ მას ირგვლივ, ყურებთან, შემდეგ იღებენ ხელში და თავს კანიდან გამობერტყავენ, მერე ხარის ნეკნით კანს ხორცს აცლიან და ხელებით ქინან, რომ დაარბილებენ, ხელსახოცად ხმარობენ. ჩამოჰკიდებენ იმ ცხენის ლაგამზე, რომელსაც თვითონ დააჭენებენ და ამაყობენ, რადგან ყველაზე დიდ ვაჟკაცად ის ითვლება, ვისაც ყველაზე მეტი აქვს ასეთი კანის ხელსახოცი. ბევრი მათგანი იცვამს ასეთი გატყავებული კანებისაგან გაკეთებულ მოსასხამს, რაც ისევეა შეკერილი, როგორც ქურქი“ (ჰეროდოტე IV, 64).

სკალპების ძვირფას ნადავლად მიჩნევის ტრადიცია, როგორც ჩანს, დიდხანს გაგრძელდა. ცნობილია, რომ, ალანები, ოსთა უშუალო წინაპრები, დახოცილთა თავებიდან აგლეჯილ ტყავებს საომარ ცხენთა სამკაულად იყენებდნენ.

მტრისათვის სკალპის აძრობის ჩვეულებით არ შემოიფარგლება ნართების ეპოსის სიუჟეტების მსგავსება სკვითურ ადათ-წესებთან. მკვლევარები პარალელს ავლებენ ნართების საკრალურ თას ვაცამონგასა (ნართამონგა) და სკვითი მეომრე-

ბისთვის განკუთვნილ ღვინით სავსე თასს შორის. ორივე თასი გმირობის წარმოჩენას ისახავდა მიზნად.

ტექსტი: წელიწადში ერთხელ თითოეული ოლქის მმართველი სასმისში შეაზავებდა ღვინოს და ასმევდა მხოლოდ იმ სკვითებს, რომელთაც მტერი ჰყავდათ დახოცილი, ხოლო ვისაც არ ჩაედინა ეს საქმე, არც კი გაასინჯებდა ამ ღვინოს და ისინი ცალკე ისხდნენ ხოლმე შერცხვენილები: რადგან ეს მათვის უდიდესი სირცხვილია. ხოლო ისინი, ვისაც ძალიან ბევრი ჰყავდა დახოცილი, ორ თასს ღებულობენ ერთად და ორივედან ერთბაშად სვამენ (ჰეროდოტე IV, 66).

ამავე ტრადიციას ადასტურებს სკვითებში არისტოტელეც თავის „პოლიტიკაში“, რომლის მიხედვით, სკვითების ერთ-ერთი დღესასწაულის დროს მას, ვისაც ჯერ ერთი მტერიც არ ჰყავდა მოკლული, ნება არ ჰქონდა ჩამოტარებული თასიდან დაელია.

სკვითი მეომრების სარიტუალო-სადღესასწაულო თასი გვაგონებს ოსურ ეპოსში წარმოდგენილ ვაცამონგას, რომელიც ნართების დიდ საგანძურები ერთ-ერთ ძვირფას განძად იყო მიჩნეული. მას ასეთი თვისება ჰქონდა: თუ ადამიანი თავის მიერ ჩადენილ ვაჟუაცობაზე სიმართლეს იტყოდა, ვაცამონგა ხელის მოუკიდებლად, თავისთავად აინევდა და მთხოვნელის პირთან გაჩერდებოდა; ხოლო თუ მთხოვნელი ტყუოდა, ვაცამონგა ადგილიდანაც არ დაიძვროდა. ამით ვაცამონგა საშუალებას აძლევდა ნართებს გაერჩიათ ნამდვილი გმირები.

შენიშვნა: აღმოსავლეთ საქართველოს მთიანეთში მეტად ფასობდა და ჯვარ-ხატთა ერთ-ერთ ძირითად განძს წარმოადგენდა საკრალური თასი – სახუცო კოჭობი, რომელიც მფარველი ღვთისშვილის უმ-

თავრეს სიწმინდეს განასახიერებდა. სახუცო კოჭობით ადიდებდა საკულტო რიტუალზე მფარველ ჯვარ-ხატებს ხუცესი და შესთხოვდა საყმოს მფარველობას. ხუცეს-ხევისბრების გარდა, არავის ჰქონდა სახუცო კოჭობთან, ჯვრის უმთავრეს სიწმინდესთან, მიახლოებისა და სადიდებლის აღვლენის უფლება. ფშავის ზოგიერთ თემში მამაკაცები ჯვარ-ხატის კარზე გამართულ დღესასწაულზე დადგმული საყინო თასიდან რიგრიგობით, ხელისმოუკიდებლად, სვამდნენ ლუდს და „კაი ყმის“ შესანდობარს წარმოთქვამდნენ.

ნართები ვაცამონგას გმირების გამოსავლენად და გმირობის განმსაზღვრელად იყენებდნენ, სკვითებში ღვინით სავსე თასი გმირობისთვის ჯილდოდ გამოიყენებოდა, ქართველ მთიელებში კი ძირითადად საკულტო დანიშნულება ჰქონდა. მას საჯვარხატო დღესასწაულზე, მფარველ წმინდანთა განდიდების გარდა, გმირების დასალოცადაც იყენებდნენ. აღსანიშნავია, რომ მეფობის წარმოშობის სკვითურ მითში, ციდან ჩამოვარდნილ ოქროს ნივთებს შორის, ერთ-ერთ სიწმინდეს ოქროს თასი წარმოადგენდა.

სოსლანის საიქიოში მოგზაურობის ეპიზოდი შეიცავს ზოგიერთ ელემენტს სკვითური ცხენშეწირვის რიტუალიდან, რომელიც ცნობილია ჰეროდოტეს ისტორიიდან. ნართების ეპოსის მიხედვით, საიქიოდან მომავალმა სოსლანმა თავისი მომავდავი ცხენი ტიკად ამოიღო, ნამჯით გამოტენა, უნაგირი დაადგა და გზა გააგრძელა. ანალოგიურ მოტივს ვხვდებით სკვითურ რიტუალშიც. სკვითები გარდაცვლილ მეფეს საიქიოში გასამგზავრებლად ცხენებს სწირავდნენ, რომლებსაც შიგნეულობას აცლიდნენ, უნმენდნენ მუცელს, ტენიდნენ თივით და შემდეგ კერავდნენ. ჟ. დიუმეზილის აზრით, საიქიოდან მომავალი სოსლანის ცხენის თივით გამოტენა აშკარად სკვითური რიტუალის ანარეკლს წარმოადგენს (დიუმეზილი 1976: 43).

მარჯვენა მკლავის მოკვეთის სკვითური ტრადიციის ტრანსფორმირებულ სახეს ვხვდებით ნართების ეპოსში, კერძოდ, ბათრაძის შურისძიების ეპიზოდში. ჰეროდოტეს ისტორიიდან ცნობილია, რომ სკვითები ტყვეებიდან გამოარჩევდნენ ყოველ მეასეს და მას ომის ღმერთს მსხვერპლად სწირავდნენ. სკვითები მსხვერპლად შეწირულ მტერს მარჯვენა მკლავს სჭრიდნენ და ჰერში ისროდნენ.

ბათრაძმა შურისძიების მიზნით, მამის სისხლის ასაღებად საინაგ-ალდარი მოკლა. ნართების დასარწმუნებლად ბათრაძმა მას მარჯვენა მკლავი მოაჭრა და სათანას მიართვა. სათანამ, მართალია, შეაქო ბათრაძი შურისძიების აღსრულების გამო, მაგრამ სთხოვა, მკლავი პატრონისთვის დაებრუნებინა და მიცვალებული საიქიოში დამცირებული არ გააშვა. ეპოსის მიხედვით, „ბათრაძმა მოჭრილი მკლავი, დააბრუნა, საინაგ-ალდარს გულზე დაადო და წარმოთქვა: „შენმა წილმა მიწამ ხალვათად მიგილოს! შენი ცოდვა წუ მომწევა, მამა მომიკალი და მეც ვალი გადაგიხადე. აი, შენი მკლავი დაგიბრუნე“ (ნართები 1988: 265).

მტრისათვის მარჯვენა მკლავის მოკვეთის ტრადიცია ხევსურებში ბოლო დრომდე, XX საუკუნის დამდეგამდე შემორჩა. ხევსური მეომრები ბრძოლაში მოკლული მტრის მოჭრილ მარჯვენას ქავის კარზე ჰკიდებდნენ და მათი რაოდენობა ვაჟკაცობის ერთ-ერთ საზომად ითვლებოდა.

დამარცხებულ, მოკლულ მტერს მარჯვენა მკლავის მოკვეთა პატივითა და ღირსებით დაკრძალვის უფლებას ართმევდა.

ნართების საზოგადოება და მათი საქმიანობა

ნართების ეპოსი წარმოადგენს მნიშვნელოვან წყაროს ტრადიციული საზოგადოების ყოველდღიური ყოფის, მართვა-გამგეობის, სოციალური სტრუქტურისა და საქმიანობის შესახებ.

ოსურ ტექსტებში ნართები წარმოდგენილია სამი გვარით, რომლებიც განაწილებული არიან ტერიტორიული პრინციპით სამ უბნად: ზემო ნართები დასახლებული იყო ალაგათებით, შეუა ნართები – ახსართაგებით, ქვემო ნართები კი ბორათებით. უ. დიუმეზილის აზრით, თითოეულ გვარს ჰქონდა თავისი სახე, ერთგვარი „სპეციალობა“, გამორჩეული უნარი: ბორათები გან-თქმული იყვნენ სიმდიდრითა და ქონებით, ალაგათები – ჭკუა-- გონებით, ახსართაგათები კი მამაცობითა და ფიზიკური სიძლი- ერით, მაგრამ ბორათებიც ახსართაგებზე არანაკლებ მამაცი მეომრები იყვნენ. ალაგათების სახლში ნამდვილად იმართებო- და გრანდიოზული ნადიმები. ომებს შორის პერიოდში, ნართებს თუ არ ჰქონდათ შეხვედრები ნიხასში, მაშინ ისინი იკრიბებოდ- ნენ ალაგათების სახლში, ლუდით საესე თასებს ცლიდნენ და გატაცებით ცეკვავდნენ მაგიდაზე. თუმცა სალხინო სუფრა ბო- რათებთანაც დიდი პატივით სარგებლობდა.

საზოგადოების მართვა-გამგეობის უმაღლეს ორგანოს ნართების ეპოსში წარმოადგენს ნიხასი, იგივე მამაკაცთა კრე- ბა, რომელზეც განიხილავდნენ მნიშვნელოვან საკითხებს. მას- ზე დასწრება შეეძლო ყველა ნართ მამაკაცს. ისინი ნიხასში ად- გილებს ინაწილებდნენ ასაკისა და დამსახურების მიხედვით. თანამედროვე ოსურ ენაზე ნიხასი აღნიშნავს საუბარს, მამა- კაცთა სათათბირო ადგილს.

შენიშვნა: ნიხასი მნიშვნელოვან როლს ასრულებდა ოსურ ტრადიციულ საზოგადოებაში. ის გვხვდება ჩრდი- ლოეთ ოსეთისა და ისტორიული დვალეთის თით- ქმის ყველა სოფელში. ნიხასი იმართებოდა შემო- ლობილ ადგილზე, ღია ცის ქვეშ და მას ჰქონდა ერთგვარი სათათბირო დარბაზის სახე, რომელიც გაწყობილი იყო რამდენიმე რიგად ჩამნკრივებუ- ლი ქვის სკამებით ოვალურ მოედაზე. ქვებზე ადგილებს, როგორც წესი, მამაკაცები უფროსუმ-

ცროსობის მიხედვით ინაწილებდნენ. აღსანიშნავია ქურთათის ხეობაში სოფელ ლაცის ნიხასი, სადაც ქვები გაწყობილი იყო სამ რიგად, პირველ რიგში იყო 3 სკამი, მეორეში – 11 და მესამე რიგში – 20 სკამი. ცენტრალური ადგილი ეკავა ურუზმაგის სავარძელს. ოსურ სოფლებში ყოველი ნიხასის არქეტიპს ნარმოადგენდა ნართების ნიხასი.

ისტორიულ დვალეთში, კერძოდ, აულ ქალაქ-ში (Калаки) (მამისონის ხეობა), სადაც სალოცავის კედლებზე გვხვდება ძველი ქართული წარწერები, საბრძოლო კოშკის გვერდით შემორჩენილია ნიხასის ფრაგმენტები. ქვის სკამებზე გამოსახულია საიდუმლო ნიშნები და ადამიანის ფორმის მსგავსი სქემატური ფიგურები (გუგნოვი 2013).

ე. მელეტინსკის აზრით, ნართებში ნიხასს უნდა ჰქონოდა მამაკაცთა საიდუმლო ორგანიზაციის ფუნქცია (მელეტინსკი 1963: 163). ამას მკვლევარი შემდეგი გარემოებებით ხსნიდა: მაშინაც კი, როცა ნართებს მტერი კარს ჰყავდათ მომდგარი, ნიხასში იმართებოდა არა მარტო მამაკაცთა თათბირი, არამედ საიდუმლო ცეკვები და ასპარეზობანი. ნიხასში დასწრებისა და თათბირში მონაწილეობის მისაღებად ნართ ახალგაზრდებს ჯერ უნდა გაევლოთ ინიციაცია, გამოცდა, გადაეტანათ ერთგვარი განსაცდელი. ნიხასში დასწრება ეკრძალებოდათ ქალებს.

შენიშვნა: ნიხასს ოსურ ტრადიციულ საზოგადოებაში ჰქონდა საკანონმდებლო, სასამართლო და აღმასრულებელი ორგანოს დანიშნულება. იქ იმართებოდა სასამართლო სხდომები, განიხილავდნენ მიწათსარგებლობისა და თავდაცვის საკითხებს, სამხედრო თარეშის გეგმებს. თუმ-

ცა, გვიან შუა საუკუნეებში ნიხასს მხოლოდ სა-
თათბირო ფუნქციალა შემორჩა, რადგან თით-
ქმის ყველა ძირითად საკითხს იქ ადგილობრივი
ფეოდალები – ალდარები, ბადელიათები და
ცარგასათები წყვეტდნენ.

ნართები ცხოვრობდნენ ინდივიდუალური ოჯახებისგან
შემდგარ, საოჯახო თემში. მათ საცხოვრებელ სახლს ჰქვია ხა-
ძარი, სადაც ანთია კერია და მზადდება სადილი.

შენიშვნა: ოსური სიტყვა ხაძარი, მართალია, აღნიშნავს
საცხოვრებელ სახლს, მაგრამ იგი, პირველ
რიგში, ეწოდებოდა ტრადიციულ საცხოვრე-
ბელს, სადაც იყო კერია, ენთო ცეცხლი და ეკი-
და რახისი – ჯაჭვ-საკიდელი. ამ თვალსაზრი-
სით, არ არის გამორიცხული ოსური ხაძარი
(ხაძვარ) მომდინარეობდეს ქართული სიტყვი-
დან „ხანძარი“.

ოსურ ეპოსში საოჯახო ურთიერთობის თემას მნიშვნელო-
ვანი ადგილი უკავია. ამ თვალსაზრისით საყურადღებოა ურუზ-
მაგისა და სათანას, ხამიცისა და ბიცენონის ქორწინება, აგრეთ-
ვე, აცამაზის დაქორწინება მზეთუნახავ აგუნდაზე და სოსლა-
ნის დაქორწინება ჯერ ჩელებსართაგის ქალიშვილ ბედუხაზე,
ხოლო შემდეგ – მზის ასულ აცირუხსზე.

ოსური ნართული თქმულებებიდან ძნელია დასკვნის გამო-
ტანა, ენდოგამიურ თუ ეგზოგამიურ ქორწინებაზე იყო დაფუძ-
ნებული ნართების ოჯახი. ურუზმაგი თავდაპირველად დაქორ-
წინებული იყო ალაგათების მზეთუნახავ ელდაზე, ხოლო შემ-
დეგ ის გახდა თავისი დის სათანას ქმარი. ვ. აბაევის აზრით,
ღრმა არქაიკა იგრძნობა თქმულებაში ურუზმაგსა და სათანაზე,
როგორც პირველ ადამიანურ ან ღვთაებრივ წყვილზე (აბაევი
1988: 8).

შ. ინალ-იფას აზრით, ოსურ ნართების ეპოსში აისახა ლევი-რატის ნიშნები (ინალ-იფა 1969: 36). ამის დასტურია ძერასას დაქორწინება ვარხაგზე. თუმცა, ვ. აბაევის აზრით, ძერასას თავისავე მამამთილზე – ვარხაგზე გათხოვება გამოძახილია ჯგუფური ქორწინების, რომლის დროსაც ერთი ჯგუფის ყველა მამაკაცს მეორე ჯგუფის ყველა ქალზე ჰქონდა უფლება.

ოსურ ნართების ეპოსში აისახა, აგრეთვე, ურვათის გადახდის ტრადიცია. თქმულებების მიხედვით, ნართები მართავდნენ დიდებულ ქორწილს, რომელსაც ზეცის ბინადრებიც ესწრებოდნენ. ისინი იხდიდნენ მიცვალებულთა სულის მოსახსენებელ აღაპებსაც.

ნართების ძირითადი საქმიანობა იყო ბრძოლა, თარეში და ნადირობა. მათი მხიარული შეკრებები ნადიმით, გრანდიოზული სიმდით, ცეკვა-თამაშითა და ასპარეზობებით მთავრდებოდა.

ნართები, პირველ რიგში, იყვნენ მეომრები. მთელ ცხოვრებას ისინი საქონლის გამოსარეკად ლაშქრობებსა (ბალცები) და თარეში (ხათანები) ატარებდნენ. თარეშით, ნადირობით ან სხვა გზით მოპოვებული ქონება ყველა ნართზე თანაბრად ნაწილდებოდა. ნართებს ჩამოყალიბებული ჰქონდათ სამხედრო დემოკრატიაზე დაფუძნებული მეომრული საზოგადოება. მტერთან ბრძოლაში, საერთო სამხედრო ოპერაციებში ისინი ავლენდნენ გვაროვნული სოლიდარობის გრძნობას და ერთმანეთს ეხმარებოდნენ განსაცდელში, სასიკვდილო საშიშროების წუთებში. ნართებში მოქმედებდა სისხლის აღების წეს-ჩვეულება, რომელზეც ეპოსის არაერთი ეპიზოდი მოგვითხრობს.

ნართების შრომითი საქმიანობის შესახებ ეპოსი ნაკლებად ინტერესდება. ნართები იყვნენ საუკეთესო მონადირეები. ნართი გმირების ცხოვრებაში ყველაზე სახიფათო ეპიზოდებს, როგორც აუცილებლობა, წინ უძღვის ნადირობა. ისინი მისდევდნენ მიწათმოქმედებას. მიწის დამუშავება ნართებს ზეცის ბინადრებმა ასწავლეს. ნართებს მოჰყავდათ პურეული მოსავალი

და ქერი, რომელიც მათ ლუდის მოსადუღებლადაც სჭირდებოდათ. ნართები ეპოსში ხშირად გამოყვანილი არიან როგორც მწყემსები. ისინი თავიანთ საქონლის ჯოგებს თვალუწვდენელიალალებზე აბალახებდნენ. საძოვრების ხელში ჩაგდების მიზნით მათ ხშირად უხდებოდათ ბრძოლა გოლიათებთან და უძლიერეს ალდარებთან.

ნართები ამუშავებდნენ რკინასაც და მისდევდნენ მჭედლობას. ეპოსში ხშირად არის ნახსენები ზეციური მჭედელი ქურდალაგონი. ნართები იყენებდნენ რკინის იარაღებს. ბათრაძის ეპითეტი არის ფოლადოვანი.

ნართები გამოირჩეოდნენ ზებუნებრივი თვისებებით. ისინი ფლობდნენ ჯადოსნურ იარაღს, გრძნეულ თასს – ვაცამონგას და მაგიურ ჯაჭვის პერანგს – ცერესის რვალს, რომელიც ომის ხსენებაზე პატრონს თვითონ მოერგებოდა ტანზე, მასში ისარი ვერ ატანდა და ვერც ხმალი ჭრიდა. ნართებს ჰყავდათ გრძნეული, გულთმისანი რაშები. ისინი გადაადგილდებოდნენ თვალუწვდენელ სივრცეში, მათ შორის ზეცაში და სულთა სამეფოში. ეპოსის პერსონაჟები არიან და ნართ გმირებთან მეგობრობდნენ ზეცის ბინადრები: მზე და მზის ასული, მგზავრთა და მეომართა მფარველი ვასთირჯი, პურეული მოსავლისა და დარ-ავდრის გამგებელი ელია, კერიის მფარველი საფა, მგლების მწყემსი თუთირი, წვრილფეხა საქონლის მფარველი ფალვარა, მიცვალებულთა სულების მბრძანებელი ბარასთირი, საიქიოს მეკარე ამინონი, ზეციური მჭედელი ქურდალაგონი, ნადირთ მწყემსი აფსათი, წმინდა ნიკოლა, თარანჯელოზი, დაუაგები, ვაცილები და ძუარები.

ნართების ეპოსში მოიხსენიება ერთი ღმერთი ხუცაუ, რომელსაც უნდა ემორჩილებოდეს ყოველი მიწიერი არსება და ზეცის ბინადარი. თქმულებაში ვხვდებით კულტმსახურებას ლუდიანი თასითა და სამი ხაჭაპურით. მას ნართების დედა სათანა

ვაზეკიფის მთაზე ძუარებს სწირავდა და ლოცვა-ვედრებას აღავლენდა.

ნართების ეპოსში აისახა ოსი ხალხის სოციალური სტრუქტურა, სოციუმის შიგნით და მის გარეთ მიმდინარე კონფლიქტები, ტრადიციული ყოფა და წარმოდგენები გარესამყაროზე. ეპოსი ტიპოლოგიური სიუჟეტებით გადმოგვცემს მეომრული საზოგადოების ცხოვრებას, ბრძოლებს, ფასეულობებს, რომლებიც ოსი ხალხის ისტორიულ გამოცდილებას ემყარება.

ტრადიციული გმირის ცხოვრების ეპიკური მოდელი

ნართების ეპოსი მრავალპერსონაჟიანი ნაწარმოებია. მასში გმირების ოთხი თაობა მონაწილეობს, მაგრამ ეპოსის მთავარ საზრისს რამდენიმე პერსონაჟი გამოხატავს და ძირითადი გმირობები მათ მიეწერებათ. ნართი გმირები ერთმანეთისგან განსხვავდებიან თავიანთი ხასიათით, თვისებებითა და ფუნქციებით, თუმცა მსოფლიოს ხალხთა ეპოსები გმირთა თავგადასავალს მსგავსი მოდელებით წარმოგვიდგენს.

მკვლევართა აზრით, ეპიკური გმირის თავგადასავალი ასახავს რიტუალების თანამიმდევრობას, რომელსაც ექვემდებარებოდნენ ადამიანები ტრადიციულ საზოგადოებაში. როგორც წესი, გადასვლის რიტუალები ტარდებოდა შობის, ინიციაციის, ქორწილისა და სიკვდილის შემთხვევებში. ისინი სხვადასხვა სიუჟეტითა და მოტივით აისახებოდა ნებისმიერი გმირის ეპიკურ თავგადასავალში. ინიციაციის ძირებს შეიძლება მივაკვლიოთ პრაქტიკულად ყველა ხალხის შორეულ ტრადიციებში. ინიციაციის ელემენტები სხვადასხვა საზოგადოებაში თანდათანობით ყოფიდან ამოვარდა და დაიკარგა. თუმცა ყოფიდან გამქრალი

ძველი ადათები და რიტუალები ფოლკლორული მოტივებისა და სიუჟეტების სახით შემორჩია ხალხურ ეპოსებში.

ნართების ეპოსი ნაწილობრივ მისდევს იმ მოდელს, რომელიც საერთოა მრავალი ეპიკური გმირისათვის. ზ. კიკნაძე ამ ეპიზოდებს უწოდებს ზღურბლებს, რომლებიც აღნიშნავენ გმირის გადასვლებს მისი ყოფიერების ახალ-ახალ ვითარებაში (კიკნაძე 2001: 13).

ნართების ეპოსში მეტად მნიშვნელოვანია ესქატოლოგიური მომენტი. ეპოსის თითქმის ყველა ძირითადი ნაციონალური ვერსია ნართების დაღუპვით სრულდება. იღუპება არა მხოლოდ მთავარი გმირი ან რომელიმე მეორეხარისხოვანი პერსონაჟი, რაც, შეიძლება, ბუნებრივად მოგვჩვენებოდა, არამედ – მთელი ნართული საზოგადოება. ესქატოლოგიური მოტივი განსაკუთრებით მძაფრად ვლინდება ნართების ეპოსის ოსურ ვერსიაში. მასში მნიშვნელოვანი ფუნქცია ენიჭება ეპიზოდებს ნართი ხალხის ცხოვრების უკანასკნელ მოვლენებსა და მათ დაღუპვაზე.

ნართების ეპოსი, ისევე როგორც ქართული „ამირანიანი“, ჰუბრისზეა აგებული. ზ. კიკნაძე ტრადიციული გმირის ტრაგედიას ჰუბრისთან აკავშირებს. ამირანის აღზევებას მოსდევს დაცემა, უფალთან შერკინება და მიჯაჭვა (კიკნაძე 2001: 7-55). ნართოლოგიაში მკვლევარები დღემდე ამ საკითხით არ დაინტერესებულან და ნართების დაღუპვასაც სხვაგვარ ახსნას უძებნიან (ფორმაციათა ცვლილება, ძველი და ახალი რელიგიების დაპირისპირება და სხვა).

ის გზა, რომელსაც ნართები გადიან თქმულებებში, თითქოს ნაცნობია ძველი ეპოსების გმირებისთვის, თუმცა მათ აქვთ უნიკალური თვისებებიც. ნართი პერსონაჟების თავგადასავალში გვხვდება როგორც ტიპური ეპიზოდები, გმირის სასწაულებრივი შობა, წრთობა, სოციუმთან ზიარება, საგმირო საქმეები, საცოლის მოტაცება, აღზევება და სიკვდილი, ისე განსხვავებუ-

ლი ელემენტებიც, რომლებიც მხოლოდ ნართი გმირებისთვის არის დამახასიათებელი. თითოეული ეპიზოდი, როგორც გარდამტეხი მომენტი და განსაცდელი, მნიშვნელოვან გავლენას ახდენს გმირის მომავალ ცხოვრებაზე.

გმირის სასწაულებრივი ჩასახვა და შობა

ნართების ეპოსის თითქმის ყველა მთავარი გმირი სასწაულებრივად იბადება, რაც მათ არაჩვეულებრივ ნარმოშობაზე მიუთითებს. მათ მოვლინებაში ხშირად ზეცის ბინადრები მონაწილეობენ. ასეთი ეპიზოდი, როგორც წესი, არ გვხვდება რეალური ადამიანების ცხოვრებაში. ნართ გმირებს დაბადებისას საოცარი ამბები გადახდებათ. მათ შობას ხშირად წინ უძლვის სასწაულებრივი ჩასახვის ეპიზოდი.

სათანა, ნართი გმირების დედა და აღმზრდელი, მიცვალებულთა აკლდამაში დაიბადა. მისი მშობლები იყვნენ დონბეთორების ასული ძერასა და მამაკაცთა მფარველი ვასთირჯი. ძერასას დაკრძალვიდან მესამე დამეს, აკლდამა, რომელშიც მიცვალებული ესვენა, განათდა და შიგ ვასთირჯი გაჩნდა. გადასცხო ნაბდის მათრახი მიცვალებულს და ძერასა, როგორიც სიცოცხლეში იყო, შვიდჯერ იმაზე უკეთესად გადაიქცა. ვასთირჯიმ როცა აისრულა წალილი, კვლავ გადასცხო ნაბდის მათრახი ძერასას და ქალი ისევ მიცვალებულად გადაიქცა. ცხრა თვის შემდეგ აკლდამის წინ ნართების ჭირად დაბადებულმა სირდონმა ჩაიარა. აკლდამიდან მას ბავშვის ტირილი შემოესმა და ნიხასში შეკრებილ ნართებს აცნობა. ამბის გასაგებად ძერასას უფროსი ვაჟი ურუზმაგი წავიდა, გააღო აკლდამის კარი, შევიდა შიგ და გამოიყვანა პატარა გოგონა. ბავშვს სათანა დაარქვეს (ნართული თქმულებები 1948).

სასწაულებრივად მოვლენილ და არაჩვეულებრივი წარმომავლობის სათანას თან დაჲყვება ღვთაებრივი უნარები, რომლითაც იგი ნართ გმირებს წარმატების მიღწევაში ეხმარება.

წართების ეპოსის მთავარი გმირის სოსლანის შობაც საერთო მოდელის ნაწილის წარმოადგენს. სოსლანი ჩაისახა ქვაში. სათანას უებრო სილამაზით, მისი სხეულის უჩვეულო სითერით, მწყემსი ისე მოიხიბლა, რომ გული აუჩქროლდა, იქვე ქვაზე დაეშვა და გაანაყოფიერა.

სათანა მიხვდა ამ ამბავს და დღეების გამოთვლა დაიწყო. როცა დრო შესრულდა, სათანამ იმ ქვის დასამსხვრევად ნართი ყმაწვილები წაიყვანა. ქვა შუაგულამდე რომ დაიყვანეს, ყმაწვილები შინ დააბრუნა, თვითონ კი ქვას გული გაუპო და იქიდან ბიჭი ამოიყვანა. წამოიყვანა ბავშვი და ზრდიდა; სახელად სოსლანი უწოდა (წართები 1988: 101) სოსლანის ქვიდან შობაც ახალშობილის არაჩვეულებრივ წარმოშობაზე მიუთითებს. ეპოსში სოსლანის შობის ეპიზოდი უძველეს მითოლოგიურ ტრადიციას ეფუძნება. როგორც ცნობილია, ქვიდან იშვა მზისა და სინათლის ღვთაება მითრა.

ნართების უშიშარი, მამაცი და ზნესრული ვაჟკაცი, ფოლადოვანი ბათრაძი მამამისის ბეჭებშუა ამოზრდილი მუწუკიდან დაიბადა. მისი მშობლები იყვნენ არყიზისკბილიანი ნართი ხამიცი და ბიცენთების ასული ბიცენონი. ბიცენონი იყო მაქცია. როგორც დონბეთირების შთამომავალი, ის დღისით ბაყაყის ტყავში (ზოგიერთი ვარიანტით, კუს ბაკანში) იჯდა, ღამით კი მზეთუნახავი ხდებოდა. ბიცენონი ფლობდა ქალლმერთის თვისებებს, მაქციობისა და ბარაქის მინიჭების უნარს: რასაც ხელს შეახებდა, ის აღარ გამოილეოდა. ნართების ჭირად გაჩენილი სირდონის მიზეზით, ბიცენონმა ნართების ქვეყანა დატოვა და სამშობლოში, ბიცენთების იდუმალ ქვეყანაში გადაიხვენა. განშორების წინ კი ხამიცს დაუბარა:

„ – შენგან ბიჭზე ფეხმძიმედ ვარ. ჩემი ძუძუთი რომ გამეზარდა, დედამიწაზე ცალი და ბადალი არ ეყოლებოდა: ვერცდანა გაჭრიდა, ვერც ისარი გაატანდა. მაგრამ ახლა რაღა! მომიშვირე ბეჭები და ჩანასახს შიგ ჩაგიპერავ.

ბიცენონმა ჩანასახი ორივე ბეჭებშუა ჩაასუნთქა და ხამიცს ბეჭებშუა მუწუკი ამოებურცა. ბიცენონმა ხამიცი დაარიგა, რომ სათანასთვის ყველაფერი მოეყოლა და ის ეტყოდა, მუწუკი როდის გაეკვეთა.

მართლაც, სათანამ დღეებისა და თვეების გამოთვლა დაიწყო და დრომ რომ მოაწია, ხამიცს მუწუკი გაუკვეთა, საიდანაც გავარვარებული ბიჭი ამოხტა. ბიჭი წელს ზემოთ ფოლადისა იყო, წელს ქვემოთაც – ფოლადისა. ამოხტა ფოლადის ბიჭი და ზღვაში მოადინა ტყაპანი.

ცისფრად მოკამკამე ზღვის წყალი ერთიანად ნისლად იქცა, ცას მისწვდა და ზღვა დაშრა. მაგრამ ნისლი თანდათან გაცივდა, წვიმა თქეშად წამოვიდა, ზღვა კვლავ აივსო და ნაპირიდან გადმოვიდა“ (ნართები 1988: 211).

ბათრაძს დაბადებიდან თან დაჲყვა ლვთაებრივი უნარები. მას შეუძლია ამინდზე ზემოქმედების მოხდენა, ქარიშხლის გამოწვევა. ზოგიერთი მკვლევარი ბათრაძის თვისებებში დარ-ავ-დრის, ჭექა-ქუხილისა და ომის ლვთაების ნიშნებზე მიუთითებს.

ბათრაძის შობას ერთგვარი პარალელები დაეძებნება ქართული ეპოსის გმირ ამირანთან. ამირანის დედა არის ქალღმერთი დალი. ქალღმერთის თვისებებით არის დაჯილდოებული ბათრაძის დედა ბიცენონიც. ამირანის მამა არის უცნობი მონადირე. ნადირობის დროს გაიცნო ხამიცმაც ბიცენთები. არც ამირანს და არც ბათრაძს დედის საშოში ყოფნა თავის დრომდე არ დასცალდათ, რისი მიზეზიც ორივე შემთხვევაში გახდა ქალღმერთის შეურაცხყოფა და აკრძალვის დარღვევა. როგორც დალი, ასევე ბიცენონიც დარწმუნებულია: მათ ნაშიერებს რომ დედის საშოში დასცლოდათ, დედამიწის ზურგზე ვეღარავინ

მოერეოდათ. ამირანი დანაკლის დღეებს კურატის თუ ხბოს ფაშვში ატარებს, ბათრაძი კი – თავისივე მამის, ხამიცის ბეჭებ-შუა ამოზრდილ მუწუქში.

ნართები თავისი წარმომავლობით ზეციურ ძალებს ენათესავებიან. ნართები დედის ხაზით დაკავშირებული არიან წყალთან და წყალქვეშა სამეფოს მპრძანებელ დონბეთირებთან. ძერასასა და წყალთა მფლობელ გათავის შეულლების შედეგად დაიბადა ნართების ბოროტი გენია (нарты ғылдырылыш) სირდონიც.

ნართი გმირების დრამატულ თავგადასავალში შობა ერთ-ერთი ყველაზე მთავარი და მნიშვნელოვანი ეპიზოდია, რომელიც მათ დიდებულ მომავალზე მიანიშნებს.

წრთობა-ინიციაცია

არქაულ საზოგადოებაში განსაკუთრებული მრავალფეროვნებით გამოირჩევა სოციუმთან ზიარების რიტუალი, რომელსაც განსხვავებულ ტრადიციებშიც კი ტიპოლოგიური ელემენტები და სიმბოლოები მოეპოვება.

ინიციაცია გულისხმობს რომელიმე სოციალურ ჯგუფსა თუ საიდუმლო საზოგადოებაში ინდივიდის გადასვლას განვითარების ახალ საფეხურზე, ახალ სტატუსში. ინიციაციის დროს ინდივიდი ეზიარება სამყაროს სასიცოცხლო ძალებს. ეპოსებში ეს გამოიხატება განსაკუთრებული ფიზიკური ძალ-ღონის მინიჭებით. განდობის რიტუალით ის შეიმეცნებს ტომის საიდუმლოს, ძველ მითებსა და ხალხურ სიბრძნეს. საიდუმლოს ჩატარების დროს ხდება მისი ერთგვარი შენირვა, კურთხევა და ხელ-დასხმა.

წართების ეპოსში სოსლანისა და ბათრაძის წრთობა ინიციაციის მკაფიოდ გამოხატულ ელემენტებს შეიცავს.

სოსლანი რომ გახდეს სოციუმის სრულუფლებიანი წევრი, ასაკობრივი ცვლილების ზღვარზე მან უნდა გაიაროს წრთობა-ინიციაცია, რომელიც ტრადიციულ ყოფაში ამავე დროს გუ-ლისხმობს დაქორწინების უფლებისა და მეომრის ფუნქციის მი-ნიჭებას.

სასწაულებრივად მოვლენილმა სოსლანმა იცის, რომ თუ ზეციურმა მჭედელმა ქურდალაგონმა მგლის რძეში არ აწრთო, სრულყოფილი გმირი ვერ გახდება.

ქურდალაგონი ეპოსში ნართების თითქმის ყველა თაობის გამოჩენილ გმირთა ნათლიად გვევლინება. ვარხაგის ვაჟებსაც მან დაარქვა სახელები: ახსარი და ახსართაგი.

ქურდალაგონმა სოსლანის საწრთობად ასი ტომარა მუხის ნახშირი და ასი ტიკი მგლის რძე მოითხოვა.

სოსლანის წრთობა ორი ნაწილისაგან შედგება. თავდაპირველად მას ერთ ტაფობში ასი ტომარა ნახშირი დააყარეს და ასი ქურიდან დაუბერეს. ცნობილია, ფინიკიური რიტუალი, რომლის დროსაც მამა ვაჟს მსხვერპლად სწირავდა მოლოქს და მას წვავდნენ. ნართების ეპოსში სოსლანისა და ბათრაძის ინიციაცია კვდომა-აღდგომის ელემენტებსაც შეიცავს. ძველ ხალხებში ინიციაცია სხვადასხვაგვარად სრულდებოდა, თუმცა ამ ადათს ყველგან ყმაწვილის სქესობრივი მომწიფების დროს ასრულებდნენ.

სოსლანის ინიციაციის მეორე საფეხური, ყმაწვილის მგლის რძეში განბანა, არქაულ მოტივს წარმოადგენს. ისევე როგორც სოსლანის ქვიდან შობა, რძეში განბანაც გმირის მზიურ ბუნებაზე მიუთითებს. როცა ნახშირში გავარვარებულმა ვაჟმა სიცილი დაინყო, ქურდალაგონმა სოსლანი ცეცხლიდან გამოიღო და მგლის რძით სავსე გობში მოისროლა. გობი ოთხი თითის დადებით მოკლე აღმოჩნდა. როცა სოსლანის სიგრძე-სიგანის გობს აკეთებდა, ქურდალაგონი შეცდომაში შეიყვანა სირდონის სიტყვებმა: – იცით, გობს ვისთვისაც ამზადებთ და მაინც ოთხი

თითის დადებით გრძელს აკეთებინებთო. ქურდალაგონი სირ-დონის ნათქვამა დააეჭვა და გობი ოთხი თითის დადებით მოკულე დაიჭირა. მგლის რძით სავსე გობში სოსლანი მთლად წმინდა ფოლადისად გადაიქცა. რადგან გობი ოთხი თითის დადებით მოკულე იყო, სოსლანს ფეხების გაშლის საშუალება არ ჰქონდა, მგლის რძემ მუხლის თავები ვერ დაუფარა და სხეულის ეს ნაწილი ჭაბუქას უწრობი დარჩა, რაც მომავალში საბედისწერო როლს შეასრულებს გმირის ცხოვრებაში.

შენიშვნა: ერთ-ერთი ნართული თქმულების მიხედვით, ახ-სარი, დონბეთირების რჩევით რძის ტბაში აბანა-ვებს მოკლულ ახსართაგს და აცოცხლებს.

ბათრაძის წრთობაც სოსლანის ინიციაციის მსგავს ელემენტებს ემყარება. ბათრაძიც ქურალაგონმა აწრთო. სოსლანისგან განსხვავებით, ბათრაძის ცეცხლში წრთობა თვეზე მეტ ხანს გრძელდებოდა. ერთი თვე რომ მიიწურა, ქურდალაგონმა გულში თქვა: „აქამდე ხამიცის ვაჟი, ალბათ, დანახშირდებოდა, წავიდე ჩინჩხის ძვლები გარეთ გამოვყარო.“ ქურდალაგონი მაშით ხელში მივიდა, მაგრამ ნახა, რომ ჭაბუქას ცეცხლი არ ეკარებოდა. ქურდალაგონის რჩევით ბათრაძმა ურჩხულები დახოცა და ზეციურმა მჭედელმა ყმაწვილი ურჩხულების დანახშირებული ნაწილებით გამოაწრთო. ინიციაცია იგივეა, რაც მეორედ დაბადება. ინიციაციის დროს მეორდება ბათრაძის შობის ელემენტები. როგორც ახალშობილი ბათრაძი ზღვაში გადახტა, ახლაც, ქურიდან გამოღებული ბათრაძი ქურდალაგონმა ზღვაში მოისროლა. როგორც პირველი შობის შემდეგ, ახლაც ზღვა ადუღდა და დაშრა – ორთქლად ავარდა ცაში. ამჯერად ბათრაძი სოსლანივით მთლიანად ფოლადად იქცა. რადგან წყალი დაშრა, ერთი ნაწლავი უწრობი დარჩა. საბოლოოდ უწრობი ნაწლავი ბათრაძის დაღუბვის მიზეზი გახდება მისი ცხოვრების ყველაზე დრამატულ წუთებში.

მ. ელიადეს აზრით, „ინიციაციის წყალობით ყმაწვილი გარდაიქმნება სოციალურად პასუხისმგებელ და კულტურულად გაღვიძებულ პიროვნებად“ (ელიადე 1963: 100). სოსლანისა და ბათრაძის წრთობა აუცილებელი სტრუქტურული ერთეულია ნართების ეპოსში. ინიციაციის რიტუალის გავლის შემდეგ ნართი გმირები იძენენ ზებუნებრივ ძალ-ღონეს, იცვლიან ასაკობრივ თუ სოციალურ სტატუსს, მათ ენიჭებათ დაქორწინების, საზოგადოების მართვა-გამეობასა და ბრძოლაში მონაწილეობის უფლება, მათ აღიარებდნენ ტრადიციული საზოგადოების სრულუფლებიან წევრებად.

ზეციერთა მფარველობა

ნართები დავლათიანი და ძლევამოსილი გმირები არიან. ზეცის ბინადრებმა ნართ გმირებს განსაკუთრებული ძალ-ღონე და ზეადამიანური თვისებები დაამადლეს. ეს მოტივი ამირანის ქართულ ეპოსშიც მკაფიოდ არის გამოხატული. ამირანი იესო ქრისტეს ნათლულია. ქვეყანაზე სიკეთის დასამკვიდრებლად და დევების გასანადგურებლად მას ძალა ღმერთისგან აქვს მინიჭებული.

ნართების ეპოსში ზეცის ბინადრები გმირებს მფარველობდნენ და მათთან მეგობრობდნენ. გაჭირვების უამს ნართები ღმერთს შესთხოვდნენ დახმარებას. „ნართებს ღოცვა ყოველთვის აუხდებოდათ ხოლმე,“ – გადმოგვცემს ეპოსი (ნართები 1988: 125). თქმულებების მიხედვით, მფარველი წმინდანები განსაკუთრებულად ზრუნავდნენ ნართებზე. მათ გაანდეს ოჩეულ გმირებს ცივილიზაციის საწყისების საიდუმლოება.

ნართების ეპოსის ზოგიერთი პერსონაჟი კულტურული გმირის ნიშნებს ატარებს. კერიის მფარველ საფასთან სტუმრად შეკრებილ ზეცის ბინადრებთან ერთად მიპატიუებული იყო

სოსლანიც, რომელსაც ღვთაებებმა ნართების საზოგადოებაში ცივილიზაციის საწყისების შეტანის მისია დააკისრეს. ღვთაებებმა სათითაოდ ადღეგრძელეს სოსლანი და ნართებს შეძლება და იღბალი დაამადლეს. მამაკაცთა მფარველმა ვასთირჯიმ სოსლანი საბრძოლო იარაღით, თავისი ბასრი ხმლით დააჯილდოვა; ნადირთ მწყემსმა აქსათმა ნართებს თავისი საქონლიდან ნადირის მოკვლა უწილადა; წვრილფეხა საქონლის მფარველმა ფალვარამ ცხვრის ფარების მგლებისგან დაცვა აღუთქვა; ქურდალაგონმა თავის სამჭედლოში გამოჭედილი გუთანი აჩუქა, რომლითაც ნართებს გაზაფხულზე მიწა უნდა მოეხნათ. დარავდრის გამგებელმა ვაცილამ სოსლანს ხორბლის მარცვლები გადასცა, რომელიც ნართებს გაზაფხულზე უნდა დაეთესათ და წლიდან წლამდე საჭირო სარჩო მოეწიათ. ქართა მბრძანებელმა გალაგონმა ხორბლის გასანიავებლად, ბზისა და ჩენჩოსგან გასასუფთავებლად ნართებს ქარის გაგზავნა აღუთქვა; დონბეთირი სოსლანს თავისი ქალიშვილების გაფრთხილებას შეჰპირდა, რომლებიც წისქვილის ბორბლებს ხორბლის დასაფქვავად შეუფერხებლად დაატრიალებდნენ.

ნართი ბათრაძი ხშირად სტუმრობს ზეცაში მფარველ წმინდანებს ან წყალქვეშა სამეფოში დონბეთირებს. სათანას ლოცვის შემდეგ კი, ღვთის ბრძანებით, ის მიწაზე ბრუნდება.

ნართი გმირები ფლობენ საიდუმლო ხატიაგურ (ხატის) ენას, რომლის საშუალებითაც აღებენ რკინის სკივრს, ეუფლებიან წინაპართა დანატოვარ საგანძურს, საბრძოლო იარაღს, ჯაჭვის პერანგს, ბასრ ორლესულსა და სხვ.

შენიშვნა: გამოითქვა თვალსაზრისი, რომ ხატიაგური ენა უნდა მომდინარეობდეს ქართული სიტყვიდან „ხატის ენა“, „ჯვართენა“, რომელზეც აღმოსავლეთ საქართველოს მთიანეთში კულტმსახურნი საჯვარხატო რიტუალებს აღავლენდნენ. ჯვარხატთა მსახურების მრავალი ელემენტი დაედო

საფუძვლად ოსებში ძუართა თაყვანისცემას. შე-საბამისად, ხატიაგური ენა ხატის (ჯვრის) საი-დუმლო ენის ანალოგიით უნდა გაჩენილიყო ოსურ ხალხურ ტრადიციაში.

ბოროტ ძალებთან ბრძოლა

ნართი გმირების ერთ-ერთი მთავარი საქმიანობა იყო ბრძოლა. ეპოსი მოგვითხრობს ნართების შორეული ლაშქრობების შესახებ. მტერთან შერკინება, რომელიც უმეტესად ორთაბრძოლის სახეს ატარებს, კონკრეტულ მიზანს ისახავდა. ნართი გმირები იბრძვიან ტერიტორიების, კერძოდ, საძოვრების, ხელში ჩასაგდებად, საცოლის მოსატაცებლად და სისხლის ასაღებად. ისინი მიდიან სათარეშოდ პირუტყვის გამოსარეკად. ნართები თავს არ ზოგავდნენ ტყვეობაში ან გასაჭირში ჩავარდნილი მოძმის გადასარჩენად.

ნართი გმირები თითქმის არასოდეს ებრძვიან ჩვეულებრივ ადამიანებს. ეპოსში ნართების მტრებს განასახიერებენ ბოროტი საწყისის მატარებელი გოლიათები, დევები (ვაიგები), ქაჯები (კადვი) და სხვა დემონური ძალები.

ურუზმაგის ბრძოლა ცალთვალა დევთან ოდისევსისა და პოლიფემის სიუჟეტის ანალოგიურია. ურუზმაგმა გავარვარებული შამფურით დევს ერთადერთი თვალი გამოთხარა, მეორე დილით კი, თხის ტყავში გახვეული, გამოქვაბულიდან გამოეპარა და თან დევის ცხვრის ფარები გამოირეკა ნართების სოფლისაკენ.

ეპოსის მიხედვით, გოლიათები ფლობდნენ უზარმაზარ ფარებსა და თვალუწვდენელ იალაღებს, სადაც ზამთრობითაც მუხლამდე ბალახი იზრდებოდა. გოლიათებსა და ვაიგებს აქვთ კოლოსალური ძალა და მათი დანახვა ნართ ძალგულოვანებშიც

კი შიშს იწვევს, მაგრამ მათ არა აქვთ ჭკუა-გონება და ნართებ-თან ბრძოლაში სრულ სიბრიყვეს იჩენენ. ნართები უმეტესად ჭკუითა და გონებით ძლევენ დემონურ არსებებს.

გოლიათებთან ბრძოლაში უნიკალურ, გმირი-გრძნეულის თვისებებს ავლენს სოსლანი. ბევრად ძლიერ მონინააღმდეგეს-თან გამართულ ორთაბრძოლაში ის ახერხებს სიტუაციის მარ-თვას, ანტაგონისტის გაპრიყვებას და სრულ გამარჯვებას. სოს-ლანი ჯადოსნურ გამარჯვებებს ზოგჯერ ამინდზე ზემოქმედე-ბით (ყინვის მოვლინებით) აღწევს.

სოსლანის საგმირო თავგადასავალში ერთ-ერთი ცენტრა-ლური ეპიზოდია გოლიათ მუქარასთან ბრძოლა, რომელიც ზამ-თრის საძოვრების დაუფლების მიზნით გაიმართა. სოსლანის ბრძოლა მუქარასთან ერთგვარი შეჯიბრების სახეს ატარებს. სოსლანმა ეშმაკობითა და მოხერხებით დაამარცხა მუქარა, რის შემდეგაც ნართებმა ხელში ჩაიგდეს საზამთრო საძოვრები.

სოსლანმა მარტოდმარტომ დაამარცხა ხიზის მთაზე ვარ-ბის ჯარები, წაართვა მათ ქონება, განძეული, რაც კი რამ გააჩ-ნდათ და ნართებს მიუტანა.

ბათრაძი ნართებს უბრუნებს დევებისგან მიტაცებულ ტე-რიტორიას და იმ დღიდან თვალუწვდენელ იალაღებზე ნართე-ბის პირუტყვის ჯოგები თავისუფლად ბალახობდნენ (ნართები 1988: 219). ბათრაძის ბრძოლას დევებთან, შეიძლება ითქვას, დასასრული არა აქვს. მან მოკლა ჭრელნვერა დევი, ცალთვალა დევი ავსარონი და მისი ვაჟი ალეფი, ბათრაძმა შემუსრა ხიზის ციხე, რომელსაც ალდართან ერთად დუაგები და ანგელოზებიც იცავდნენ. მან დედაბუდიანად გაწყვიტა ბოროტი საწყისის მა-ტარებელი ქაჯები და გაათავისუფლა ნართების ქალ-რძალი, რომლებიც თეხის ვაჟ მუქარას ჰყავდა დატყვევებული. ბათ-რაძმა იხსნა ქაჯების მიერ კედელზე გაკრული სოსლანი და ბო-რათებისგან სასიკვდილოდ გამეტებული ურუზმაგი.

ვაიგებისა და გოლიათების დამარცხებაში მნიშვნელოვან როლს ასრულებს ნართების დედა – ბრძენი სათანა, რომელსაც აქვს წინასწარმეტყველებისა და მოსალოდნელი სიტუაციის წინასწარ განჭვრეტის უნარი. სათანას რჩევის გათვალისწინებით მოიპოვეს ნართებმა არაერთი დიადი გამარჯვება.

შენიშვნა: სოსლანის თავგადასავალში ერთ-ერთ სამარცხევინო ეპიზოდს წარმოადგენს თოთრაძის ღალატით მოკვლა. სოსლანი თოთრაძთან ორთაბრძოლაში მოქმედებს არა ფიზიკური ძალით, არამედ მაგითა და ეშმაკობით. სახელგანთქმული ნართი ჭაბუკი, ფაქტობრივად, დამარცხდა, მაგრამ მან სათანას დახმარებით შეაშინა თოთრაძის ცხენი ეუვნებით, მგლის ტყავით, ათასგვარი ჯადოებითა და ავგაროზებით. სოსლანი კლავს კეთილშობილ და ძლიერ თოთრაძს. ე. მელეტინსკის შეფასებით, ნართების გმირი ქალი სათანა ამ ეპიზოდში გვევლინება კუდიანი დედაბრის როლში, როგორც ბოროტი და მშიშარა სოსლანის გრძნეული დედა. ე. მელეტინსკი ვარაუდობს, რომ სოსლანისა და თოთრაძის ორთაბრძოლის ეპიზოდი გვიანდელი ეპოქის იდეალებით საგმირო მითოსის ერთგვარ გადაფასებას გამოხატავს (მელეტინსკი 1963: 183).

ეპოსი ნართი გმირების წარმატებას მაინც ღვთის წყალობას მიაწერს. თქმულებების მიხედვით, ნართები ბოროტების შავბნელ ძალებზე გასამარჯვებლად ღმერთს შესთხოვდნენ დახმარებას. ღმერთს ესმოდა ნართების ლოცვა-ვედრება და მადლს არ იშურებდა.

საცოლის მოპოვება

ნართი გმირების ჰეროიულ თავგადასავალში ერთ-ერთ მნიშვნელოვან ეპიზოდს საცოლის მოპოვება წარმოადგენს. ეპოსის თითქმის ყველა ქალი ჰერსონაჟი არის მრავალი ღირსებით შეკული, არაჩვეულებრივი წარმოშობის მზეთუნახავი. ისინი გამოირჩევიან ღვთაებრივი უნარებითა და თვისებებით. მათ შეუძლიათ გარდასახვა. ნართების ბალში მტრედის სახით მოფრენილი ძერასა იტაცებს ოქროს ვაშლს. ძერასა არის წყალქვეშა სამეფოს მბრძანებლის დონბეთირის ასული. ახსართაგი წყალქვეშა სამეფოში ჩადის და ცოლად ირთავს მშვენიერ ძერასას.

ნართ გმირებს საცოლის მოსაპოვებლად დიდი ბრძოლების გადატანა უხდებათ. ისევე როგორც ქართულ „ამირანიანში“, ნართების ეპოსშიც საცოლის მამის დამარცხება ერთ-ერთი მნიშვნელოვანი ეპიზოდია.

ზოგიერთი ნართული თქმულების მიხედვით, მზეთუნახავის ხელში ჩასაგდებად გმირმა უნდა მოკლას საცოლის მამა. ბედუხას მოსატაცებლად სოსლანმა ალყა შემოარტყა ხიზის ციხეს, ეშმაკობით ძლია და მოკლა ხიზის ციხის მფლობელი ჩელებსართაგი.

საცოლის დასაუფლებლად საკმარისი არ არის მხოლოდ გმირის არაჩვეულებრივი წარმოშობა, ამისათვის მან უნდა გადაიხადოს ომები და გაიაროს ჭირსახდელი. აქულა მზეთუნახავის დავალებით ბათრაძი კლავს შვიდთავიან ფრთოსან დევს – ყანძარგისს და ათავისუფლებს თავის შორეულ წინაპარ ვონის, რომელსაც ურჩხული მეჯოგედ ამუშავებდა.

ნართების ეპოსის მზეთუნახავი მამის ერთადერთი ასულია და ის მაღალი მთის მწვერვალზე, განმარტოებით აგებულ კოშკში ცხოვრობს. სამოთხის სიმწვანით შემკული მთის მწვერვალი და იდუმალი კოშკი, სადაც მზეთუნახავი იმყოფება (აქულა, აცირუხსი, აგუნდა), ქალის არაჩვეულებრივ წარმოშობაზე მიანიშნებს. ზ. კიკნაძის აზრით, კოშკი, რომელშიც გამოკეტილია

ქალიშვილი, მისი საინიციაციო ადგილია და ინიციაციის პერიოდი მთავრდება მაშინ, როცა ვაჟს შეუძლია მისი მოპოვება [კიკ-ნაძე 2001: 26].

სოსლანს ნადირობის დროს მზის ასული აცირუხსი ოქროს-ბეწვიანი ირმის სახით ევლინება. ირემს გმირი საეხობის მთაზე აჰყავს გამოქვაბულში. მზის ასულიც განძს ასახიერებს, რომელსაც მზიური ბუნების მქონე, მგლის რძეში ნაწრთობი სოსლანი უნდა დაეუფლოს.

შენიშვნა: იგივე საკრალური ნიშნები: მზე, ნადირობა, ირემი, გამოქვაბული, განძი – ლეონტი მროველის „მეფეთა ცხოვრებაში“ ფარნავაზის მეფურ დიდებასა და მეფობის ნარმოშობის საიდუმლოს გვიცხადებს.

სოსლანს, აცირუხსზე რომ ექორნინა, დაევალა ურვათის გადახდა: ზღვის პირას რკინის შავი გალავნის აგება, გალავნის ოთხივე კუთხეში აზა მცენარის ფოთლების დარგვა და სამასი სული ნადირის მორეკა. აზა მცენარის ფოთლების საშოვნელად კი სოსლანმა გამოიჩინა ზეადამიანური გმირობა. მან იმოგზაურა საიქიოში, მიცვალებულთა სულების სამეფოში. გარდაცვლილი ცოლის, ბედუხას დახმარებით სოსლანმა მოიპოვა აზა მცენარის ფოთლები, დაბრუნდა საიქიოდან და ცოლად შეირთო მზის ასული.

ნართ გმირებს განსაცდელის გადალახვისა და გამარჯვებების მოპოვების შემდეგ მზეთუნახავი ცოლად მიჰყვებათ. ახსართაგი ცოლად ირთავს ძერასას, ურუზმაგი – ალაგათების ელდას, შემდეგ – სათანას, ხამიცი – ბიცენთების ასულ ბიცენნებს; ბათრაძი ქორნინდება აგუნდა მზეთუნახავზე, სოსლანი ჯერ ბედუხაზე, მისი გარდაცვალების შემდეგ კი – მზის ასულ აცირუხსზე, მაგრამ ნართების ამბავი ზღაპარი არ არის, რომ ქორნილით დასრულდეს. ნართ გმირებს წინ დიდი განსაცდელი ელოდებათ.

ნართების პუბრისი და დალუპვა

ნართების ეპოსი, სხვა პერსონაჟებთან შედარებით, უფრო რელიეფურად წარმოგვიდგენს ორი გმირის – სოსლანისა და ბათრაძის დაბადებიდან სიკვდილამდე განვლილ გზას, მათ თავგადასავალს. ძირითადი საგმირო საქმეებიც, თქმულებების მიხედვით, მათ მიეწერებათ.

საცოლის მოსაპოვებლად სოსლანმა და ბათრაძმა ზეადამი-ანური გმირობა ჩაიდინეს. საცოლის მოპოვების შემდეგ მათი მომრევი ქვეყანაზე თითქმის აღარავინ დარჩა. ეპიკურ თხრობას თავისი კანონები აქვს და გმირის თავგადასავალი უნდა დასრულდეს. როგორც წესი, ეპიკური გმირი აღზევების მწვერვალიდან თანდათანობით კი არ ეცემა, არამედ ის უეცრად, მყისიერად ჯადოსნურ შერკინებაში იღუპება. სოსლანი და ბათრაძი სასწაულებრივად დაიბადნენ და ბოლოს, ცხოვრების გარდამტეხი მომენტების გადალახვის შემდეგ, ისინი იღუპებიან საიდუმლო ვითარებაში. ამ ეტაპზე მათ აღარ ჰყოფნით ძალა დაბრკოლების გადასალახად. ლორდ რაგლანის აზრით, ტრადიციულ ეპოსებში ერთ დროს სახელმოხვეჭილი და უძლიერესი გმირი ღმერთს განარისხებს და ხალხს აიმხედრებს, რაც იწვევს მის გარდაუვალ დალუპვას (რაგლანი 1965). მსგავსი ელემენტები პირდაპირ თუ ირიბად გვხვდება ნართი გმირების თავგადასავალშიც.

სოსლანის დალუპვა. სოსლანის საბედისწერო ბრძოლას ბალსაგის ბორბალთან და მის დალუპვას წინ უძღვის ნადირობა, როგორც აუცილებლობა მნიშვნელოვანი ამბის წინ. ნადირობისას სოსლანმა ტბასთან წყლის დასალევად მისული ფურირემი შეამჩნია, „ისეთი ლამაზი, ისეთი სრულქმინლი, როგორც ამომავალი ვარსკვლავი“. სოსლანმა მშვილდი დაუმიზნა, მაგრამ ფურირემი ქალწულად იქცა. ის ბალსაგის ასული აღმოჩნდა და ვაჟს ცოლად წაყვანა სთხოვა: „ – სოსლან, მე შენთან შესახვედ-

რად ზეციდან აქ ჩამოვდივარ და ვერასოდეს კი ვერ გხვდები, სადა ხარ? ამდენი წელიწადია, შენ გელოდები, ახლა ცოლად უნდა შემირთო“ (ნართები 1988: 166).

შენიშვნა: სანადიროდ წასული სოსლანის შეხვედრა ბალ-საგის ასულთან თითქმის უცვლელად მეორდება მრავალ ვარიანტში და ეს ეპიზოდი ნართი ჭაბუკის თავგადასავალში მყარ სტრუქტურულ ერთეულს წარმოადგენს.

სოსლანმა არა მხოლოდ უარყო ქალიშვილთან სასიყვარულო ურთიერთობა, მას შეურაცხყოფაც კი მიაყენა. ზეციური ქალწული უცხო ფრინველად გადაიქცა და განრისხებული სოსლანს დაემუქრა: „ – ნართელო სოსლან, მე ბალსაგის ქალიშვილი გახლავარ და ვნახოთ, თუ არ განანო!“ (ნართები 1988: 166).

ზეციური ქალწული სოსლანს გაეცნო როგორც ბალსაგის ქალიშვილი (ზოგიერთი ვარიანტით – მზის ასული), თუმცა ნადირობისას ჯერ ირმის სახით მოვლენილი და შემდეგ უცხო ფრინველად გარდასახული ქალწული ნადირთ ღვთაების ყველა ნიშან-თვისებას ატარებს. ამ სახით ქართულ მითებში მონადირეს ტყაში მაფა ან დალი ეცხადება. ისინი რჩეულ მონადირებს სასიყვარულო ურთიერთობას სთავაზობენ და მათ, შესაბამისად, ან სიკეთესა და დიდებას სწევენ, ან დალუპავენ. სამეგრელოსა და სვანეთში გავრცელებული ზეპირი ტექსტების მიხედვით, რჩეული მონადირები დალისა და ტყაში მაფას საიდუმლო საყვარლები არიან. საიდუმლოს გათქმას ან ქალღვთაების სიყვარულის უარყოფას მუდამ მოსდევს ნადირთ მწყემსის რისხვა და მონადირის დალუპვა.

სოსლანის ზეციურ ქალწულთან შეხვედრა მონადირისა და ნადირობის ქალღმერთის ურთიერთობის მოტივზეა აგებული, რომელიც მრავალ ვარიანტად გვხვდება დალუპული მონადირის ციკლის სვანურ ხალხურ ტექსტებში. ნართების ეპოსში ზე-

ციური ქალწული ნადირობის მრისხანე ქალღმერთ დალის მსგავსად იქცევა. მან არ აპატია სოსლანს სასიყვარულო ურთიერთობაზე უარის თქმა, შეურაცხყოფა და ვაჟს სასიკვდილო განაჩენი გამოუტანა. შეურაცხყოფილმა ქალწულმა დახმარება სთხოვა თავის მამას – ბალსაგს, რომელმაც სოსლანის გასანად-გურებლად ციდან ბორბალი გამოგზავნა.

შენიშვნა: მსგავს სიუჟეტს ვხვდებით გილგამეშის ეპოსში, რომელიც მოგვითხრობს ქალღმერთ იშთარის სიყვარულზე. მან შესთავაზა გილგამეშს გამხდარიყო მისი ქმარი. გილგამეშმა უარყო ქალღმერთის სიყვარული. განრისხებულმა იშთარმა სთხოვა ცის ღმერთს ანუს, შეექმნა გიგანტური ხარი, რომელიც გმირს მოკლავდა. ამ შემთხვევაში გილგამეში და ენქიდუ ხარს ამარცხებენ.

ბალსაგი, ნართების ეპოსის მიხედვით, არის პერსონიფიცირებული ზეციური არსება. ჟ. დიუმეზილი ბალსაგის ბორბლის სოლიარულ სიმბოლიზმზე ამახვილებს ყურადღებას. ციდან გრიალ-გრიალით წამოსულმა ბორბალმა ჯერ შუბლზე დაარტყა სოსლანს, შემდეგ – მკერდზე, მაგრამ მან სოსლანის ფოლადისებურ სხეულს წაკანრიც ვერ დაამჩნია. სოსლანმა ბალსაგის ბორბლის შეპყრობა და დათრგუნვაც შეძლო, ორი ნეკნიც ჩაუმტვრია და ბრძოლაზე საბოლოოდ ხელიც ააღებინა, მაგრამ ბალსაგის ბორბალთან ბრძოლის ეპიზოდში დამღუპველ როლს ასრულებს სირდონი, უარყოფითი, მაგრამ კომიკური პერსონაჟი, რომელიც ბალსაგის ბორბლის წამქეზებლად გვევლინება. მან გადააფიქრებინა ბორბალს ბრძოლაზე ხელის აღება და მას გაანდო სოსლანის საბედისწერო საიდუმლო, რომ ჭაბუქს მუხლები ჰქონდა უწრთობი. ერთ დღეს, როცა სოსლანი ზილახარის ველზე წადირს მუცელზე ხოხვით ეპარებოდა, ბალსაგის ბორბალმა ქურდულად ზედ მუხლებზე გადაუარა, ფეხები წააცალა

და მუხლებმოკვეთილი ჭაბუკი იქვე დატოვა. ამდენად, სოსლანს, ისევე როგორც სვანური სიმღერების პერსონაჟ მონაძირეს, ზეციური ძალები ნადირობის დროს ღუპავენ.

შენიშვნა: სოსლანის თავგადასავალს თავიდან ბოლომდე გასდევს ცბიერ სირდონთან საბედისნერო დაპირისპირება. ერთ-ერთი ნართული თქმულება გადმოგვცემს, თუ როგორ აიმხედრა სოსლანმა სირდონი. ერთხელ სირდონმა თავისი ვაჟი სანიშნოზე დასვა და უთხრა: – ესროლეთ ჩემს ბიჭს, თუ მოარტყამთ და მოკლავთ, თქვენი არაფერი მინდა. ხოლო თუ ვერ მოახვედრებთ და ვერ მოკლავთ, კომლზე თითო ხარი უნდა მომცეთ.

ნართი ახალგაზრდები ყოველდღე ესროდნენ, მაგრამ ერთიც ვერ მოახვედრეს. სირდონი თავს მოგებულად თვლიდა, სიცილით კვდებოდა და კომლზე თითო ხარის ასაკრეფად ემზადებოდა. თან ყმაწვილებს მასხარადაც იგდებდა. სწორედ ამ დროს საიდანლაც სოსლანიც გამოჩნდა... სოსლანმა ესროლა სირდონის ვაჟს და ერთი სროლით გაათავა ბიჭი.

მივიდა სირდონი შვილთან, წაიღო, გაუთხარა სამარე და დაასაფლავა. იმ დღის შემდეგ სირდონი სოსლანს მტრად გადაეკიდა (ნართები 1988: 128).

ნართებმა სოსლანი დიდი პატივით დაკრძალეს: ბაჯალლო იქროს კუბო და აბრეშუმის სუდარა გაუმზადეს. საფლავი ხამიცმა და ურუზმაგმა გაუთხარეს, დაკრძალვის წინ სოსლანმა ითხოვა, მისი სისხლი აეღოთ და ბალსაგის ბორბალი მოეკლათ. როგორც დაიბარა, თავისი მშვილდ-ისარი თან ჩააყოლეს და სამარესაც სამი სარკმელი დაატანეს, აღმოსავლეთიდან, შუაში და დასავლეთიდან, რათა ყველა მხრიდან მისთვის მზეს დაეხედა.

ბალასაგის ბორბალი სოსლანის დისწულმა მოკლა და დე-დის ძმის სისხლი აიღო, ხოლო სირდონი, რომელიც შეურაცხ-ყოფდა მიცვალებულის საფლავს, სოსლანის სამარიდან ნას-როლმა ისარმა იმსხვერპლა.

ბათრაძის დაღუპვა. ერთხელ ნართებმა თავიანთ თავყრი-ლობაზე ბათრაძი ყველაზე ძლიერ, სრულყოფილ, ზნეკეთილ ვაჟკაცად აღიარეს. წინაპართა საპატიო და ძვირფასი განძი ჭა-ბუკს მათ ერთხმად მიაკუთვნეს. ბათრაძმა არაერთხელ იხსნა ნართები დაღუპვისგან, მან შემუსრა ბოროტი არსებები, რომ-ლებიც საფრთხეს უქმნიდნენ ნართებს. ყველა ბრძოლა და ასპა-რეზობა ბათრაძის ტრიუმფალური გამარჯვებით მთავრდებო-და. მის რჩეულობას ადასტურებდა ნართების საკრალური თასი ვაცამონგაც, რომელიც ბათრაძის საგმირო ამბების თხრობი-სას, ჭაბუკის გმირად აღიარების ნიშნად, თავისით აიწეოდა და მთხრობელის პირთან ჩერდებოდა.

ზეადამიანური უნარები, ფიზიკური სიძლიერე, გმირად აღიარება ბათრაძში თანდათან ბადებს ქედმაღლობისა და ამ-პარტავნობის განცდას, რომელიც ჭაბუკს უქმნის ეგზისტენცი-ალურ საფრთხეს. ბათრაძის ჰუბრისი დრამატულ სახეს იძენს ხამიცის სისხლის ასაღებად ჩადენილ ჰიპერაქტიულ ქმედებებ-ში. ამ დროს ბათრაძი იმყოფებოდა თავისი ძლიერების მწვერ-ვალზე. ის მამის დასაფლავებას ვერ დაესწრო, კვლავ შორეულ მხარეს იყო სათარეშოდ წასული. სათანა, როგორც ჩანს, წინას-წარ გრძნობდა, რომ შურისძიება ჭაბუკს უდიდეს საფრთხეს შე-უქმნიდა, ამიტომ ის უმალავდა ბათრაძს ხამიცის გარდაცვალე-ბის ნამდვილ მიზეზს. ჭაბუკმა აიძულა სათანა ეთქვა სიმარ-თლე და მისგან შეიტყო, რომ ბორათების ბურაფარნიგის წაქე-ზებით საინაგ-ალდარმა მოკლა მისი მამა – ხამიცი. საზღვარი არ ჰქონდა ბათრაძის მრისხანებას. ის შეიპყრო შურისძიების დაუკეტელმა წყურვილმა. მამის სისხლის ასაღებად ბათრაძი იჩენს გაუგონარ სისასტიკეს და ყველა შესაძლო მონაწილეს

ულმობლად უსწორდება. სათანას დახმარებით, მან შური იძია მამის მკვლელზე, ეშმაკობით სძლია საინაგ-ალდარს, ჯერ თავი გააგდებინა, შემდეგ მარჯვენა მკლავი მოჰკვეთა და, როგორც გამარჯვების უტყუარი ნიშანი, სათანას მიუტანა.

ბათრაძმა არ დაინდო ბურაფარნიგი, რომლის დავალებითაც მოკლა საინაგ-ალდარმა ხამიცი. ბათრაძმა არ აცალა ბურაფარნიგს ორლესურის ამოღება და თავი გააგდებინა. ჭაბუკის შურისძიების წყურვილი ამანაც არ დააცხრო. მან ბურაფარნიგის შვიდი ვაჟი სახლიდან გაიტყუა, ერთმანეთის მიყოლებით დადევნებულ ბიჭებს შემოუბრუნდა და შვიდივე დახოცა. გამძვინვარებულმა ბათრაძმა ბურაფარნიგის ვაჟებს დასჭრა თავები, რომლებიც ხურჯინში ჩაალაგა და ბორათების ეზოში წაილო. მოჭრილი თავები ჭაბუკმა ბურაფარნიგის ცოლსა და შვიდ რძალს წინ დაუყარა. ქალების ღრიალმა და წყევლაკრულვამ კიდევ უფრო გააცოფა ბათრაძი, სისხლისგან მთვრალმა ვაჟმა რვანივე შავი ზღვის პირას გაირეკა, ქალები უღელში შეაბა და მთელი დღე ფეხშიშველები ეკლის კალოზე არბენინა.

სისასტიკემ და შურისძიების წყურვილმა მარტოსულად აქცია ბათრაძი. მამისეული სამი რაშის გამო, მან ორთაბრძოლაც კი გამართა სოსლანთან, რომელიც მხოლოდ სათანას თხოვნით დაინდო და არ მოკლა. საბედისწერო წუთებში ბათრაძის გვერდით აღარ ჩანს ბრძენი სათანა, რომლის რჩევასაც ჭაბუკი მუდამ ითვალისწინებდა. ბათრაძი ჰუბრისმა მოიცვა, რომელიც უდიდეს საფრთხეს უმზადებდა ერთ დროს ყველაზე სრულყოფილ და ზნეკეთილ ვაჟკაცს.

როცა უცხო ვეღარავინ მოიძებნა შურისძიების რისხვის დასატეხად, ბათრაძი ახლა შინაურებს, თავისიან ნართებს – ახსართაგებს დაუპირისპირდა. მან კიდევ ერთხელ შეკრიბა ერთად ნართები და უსამართლოდ დასდო ბრალი ხამიცის სიკვდილში და დედამისის – ბიცენონის ნართების სოფლიდან გაგ-

დებაში. მამის სისხლისა და დედის შეურაცხყოფის სანაცვლოდ ის საფასურის ანაზღაურებას ითხოვდა და ნართებს აპსურდული მოთხოვნა წაუყენა: სახლის ასაშენებლად მათ უნდა მიეტანათ ბათრაძთან იელის ბოძები, ეხსიყადის თავხეები და ახსნარნისის კოჭები. ბათრაძმა, რა თქმა უნდა, იცოდა, რომ ამ სახეობის ბუჩქოვანი მცენარეებისგან ნართები ბოძებს, თავხეებსა და კოჭებს ვერ დაამზადებდნენ.

ბათრაძის ბრძანება უფრო ახირებას ჰქონდა და ჭაბუკის პატივმოყვარეობის დაკამაყოფილებას ისახავდა მიზნად. ნართებმა ვერ შეძლეს ბათრაძის დავალების შესრულება და ჭაბუკმა მათ ახალი მოთხოვნა წაუყენა: ხამიცის მათარა ნართებს ძვირფასი აბრეშუმის ნამწვით უნდა აევსოთ.

ნართებმა ცოლები და ქალიშვილები შიშვლები დაყარეს, რაც კი აბრეშუმის ტანსაცმელი ებადათ, ვირს ერთ საპალნედ აჰკიდეს, ვაზკვიფის მწვერვალზე აიტანეს და დაწვეს, მაგრამ ბათრაძმა ცეცხლს ქარბორბალა მოუვლინა და ნართებმა ნამწვით სათითის გავსებაც ვერ შეძლეს. ბათრაძის აგრესიული ქმედებები ნართების დამცირებასა და შევიწროებას ისახავდა მიზნად. მან წყალიც კი დაუწყვიტა ნართებს და ისინი წყურვილისგან ლამის სიკვდილის პირას მიიყვანა. მოხუცებისა და ბავშვების თხოვნით, მართალია, ბათრაძმა წყალი გამოუშვა, მაგრამ ნართებს ჭაბუკის მუდმივი აგრესიისა და მუქარის გადატანა უხდებოდათ. ბათრაძი არის სრულიად მარტოდმარტო, ფიზიკური ძალის ამარა. ის ერთი, ახლა უკვე როგორც ანტიგმირი, უპირისპირდება ნართების მთელ სოციუმს. თავისი საქციელით მან საზოგადოება აიმხედრა.

შენიშვნა: ამავე მოტივზეა აგებული რამდენიმე ქართული თქმულება საზოგადოებასთან დაპირისპირებულ ცხრა ძმაზე. რიცხობრივი სიმრავლითა და მატერიალური ფუფუნებით გაბუდაყებული ძმები თანასოფლელებს ქედმალურად უყურებდნენ, მათ

ავინწოებდნენ, ართმევდნენ პატარძალს, საქონელს, მინას. შედეგად, ცხრა ძმის ოჯახს, სადაც ცხრა აკვანი ირწეოდა და ცხრა რძალი ტრიალებდა, ღვთის რისხვა დაატყდა (ანდრეზები 2009: 262-263).

ნართებმა ბათრაძისგან თავის დასალწევად და საშველად ცბიერ სირდონს მიმართეს. ეშმაკმა სირდონმა შეძლო ბათრაძის დარწმუნება, რომ ხამიცი ანგელოზებისა და ძუარების ნაქეზებით მოკლეს. სირდონმა ბათრაძის მთელი აგრესია ზეციური არსებების წინააღმდეგ მიმართა. ბათრაძმა ახლა ანგელოზებსა და ძუარებს დაუწყო ცაში დევნა. ჭაბუკმა ზეციურ არსებათა რისხვა დაინია, მაგრამ ბათრაძს არც ხმალი და არც ტყვია არ ეკარებოდა, ის მხოლოდ თავისი დღით უნდა მომკვდარიყო. ამიტომ ღვთის ბრძანებით, როდესაც ბათრაძი ხაზმის ველზე ანგელოზებსა და ძუარებს ებრძოდა, მზემ მთელი წლის მანძილზე დასახარჯი სიცხე გამოუშვა. ბათრაძი რომ არ გაგრილებულიყო, ღმერთმა ყველა წყარო და მდინარე დააშრო. ჭაბუკი მზის სიმხურვალით გავარვარდა და ვერც წყალში გაგრილება შეძლო. ის მთლად ნაკვერცხლად გადაიქცა. ფოლადოვან ბათრაძს, რადგან წრთობისას ქურდალაგონის ქურაში ერთი ნაწლავი უწრობი დარჩა, ის გადაეწვა, დაეცა და მოკვდა.

ბათრაძი და ამირანი. ტიპოლოგიური მოტივები გვხვდება ბათრაძისა და ქართული ეპოსის გმირ ამირანის თავგადასავალში. ბათრაძიც და ამირანიც სასწაულებრივად დაიბადნენ. დევებთან და გველეშაპთან მებრძოლი ამირანი, რომელსაც იქ-სო ქრისტემ ზეადამიანური ძალ-ღონე დაამადლა, ბოლოს ისევე, როგორც ბათრაძი, ჰუბრისმა შეიძყრო. ბათრაძისა და ამირანის დაპირისპირება ცასთან, ზეცის ბინადრებთან, ღმერთთან, საბოლოოდ მარცხით მთავრდება. ბათრაძმა ყველა საშუალება ამონურა, რადგან ღმერთი ჭაბუკს მზის სიმხურვალით ანადგურებს, ხოლო ამირანის ორთაბრძოლა ნათლიასთან

კავკასიონის ერთ-ერთ მთაზე მიჯაჭვით მთავრდება. ღმერ-თთან მებრძოლი ბათრაძისგან განსხვავებით, ამირანს დრო ეძ-ლევა ცოდვების მოსანანიებლად (ზ. კიკნაძე). ამირანს მსგავ-სად, ბათრაძიც ტრაგიკული გმირია და ის თანაგრძნობას იმსა-ხურებს. ღმერთი არც ბათრაძს იმეტებს ჯოჯოხეთისთვის. ან-გელოზებმა ღვთის დასტურითა და წყალობით ბათრაძის დაკ-რძალვა სოფიოს აკლდამაში შეძლეს. ღმერთმა სამი ცრემლით დაიტირა ტანჯული გმირი. სადაც ღმერთის სამი ცრემლი დაე-ცა, იქ ცოდვების მოსანანიებლად სამი ტაძარი აღიმართა.

ბათრაძი და მეფე არტური. ნართულ თქმულებებს შორის მოიძებნება ბათრაძის დაღუპვის განსხვავებული ვერსიაც, რო-მელიც თავის დროზე ჟ. დიუმეზილმაც გამოაქვეყნა (დიუმეზი-ლი 1930: 69). ტექსტის მიხედვით, საზოგადოებასთან და ზეცი-ურ არსებებთან დაპირისპირებულმა ბათრაძმა, რომელიც ღვთისგან იყო დასჯილი და დასნეულებული, ნართებს სთხოვა თავისი ძლევამოსილი ხმლის ზღვაში ჩაგდება. ჭაბუკმა იცოდა განგების ნება, რომ ის, როგორც უკვდავი, მხოლოდ მისი კუთ-ვნილი ხმლის ზღვაში ჩაგდებით გათავისუფლდებოდა აუტანე-ლი ტანჯვისაგან, რომ ბოლოს და ბოლოს დადგებოდა მისი სიკ-ვდილის ჟამი. თავისი სიკვდილით კი ბათრაძი იხსნიდა ნარ-თებს, რომლებიც მისი გადამდები სნეულებისგან იხოცებოდ-ნენ.

ჟ. გრისვარი თავის წიგნში „ტბაში ჩაგდებული ხმლის მოტივი“ მიუთითებს ბათრაძის გარდაცვალებისა და არტურ მე-ფის დაღუპვის საერთო ელემენტებზე, რომელთა შორის უპირ-ველესი მნიშვნელობა ენიჭება ჯადოსნური ხმლის მითოლოგე-მას (გრისვარი). ჟ. გრისვარი არტურ მეფის დაღუპვის ეპიზოდს უდარებს ბათრაძის გარდაცვალების ერთ-ერთ ვერსიას.

სოლსბერის ბრძოლის შემდეგ სასიკვდილოდ დაჭრილმა მე-ფე არტურმა უბრძანა თავის ერთგულ ქვეშევრდომ გრიფლეტს მახლობელ ტბაში ჩაეგდო სამეფო ხმალი ესკალიბორი. ბათრაძ-

მაც და მეფე არტურმაც იციან, რომ ხმლის წყალში ჩაგდებას ჯერ სასწაული და შემდეგ მათი დაღუპვა მოჰყვება. ორივე შემთხვევაში ხდება სასწაული: ბათრაძის ხმლის ზღვაში ჩაგდების-თანავე ტალღები აიშალა, ამოვარდა ქარიშხალი, ზღვა აქაფდა და განითლდა, ხოლო არტურ მეფის ეპიზოდში, გრიფლეტმა დაინახა, ტბიდან ამოსული ხელი, რომელმაც აიღო ესკალიბორი, მათ სამ-სამჯერ მოუღერა და გაქრა. სასწაულის შემდეგ მაშინვე იღუპება ბათრაძი. მეფე არტურიც, რომელიც ფლობდა საიდუმლო ცოდნას, ხვდება, რომ მოახლოებულია მისი სიკვდილი. ის ემშვიდობება თავის ერთგულ თანამგზავრს – გრიფლეტს და საიდუმლო ვითარებაში უცნაური ხომალდით გაძლილ ზღვაში უჩინარდება. სამი დღის შემდეგ კი გრიფლეტი შავ სამლოცველოში აღმოაჩენს ძვირფასი მეფის საფლავს.

როგორც ირკვევა, მეფე არტურისა და ბათრაძის დაღუპვის ეპიზოდებს ერთი და იგივე მითოლოგიური მოტივი უდევს საფუძვლად.

ხალხური ტექსტის ეპიკური კანონის თანახმად, სულ ერთია, მთავარი გმირი არარეალური, გამოგონილი პერსონაჟი იქნებოდა თუ ისტორიული პირი, მისი ცხოვრების გარდამტეხი მომენტები მაინც ერთ მოდელს უნდა მისადაგებოდა. ამიტომ, ლ. რაგლანის აზრით, ძირითადი ყურადღება უნდა გამახვილდეს არა მხოლოდ გმირის ხასიათსა და თვისებებზე, არამედ იმაზეც, თუ რა მიეწერება ტრადიციულ გმირს ან რა ჩაუდენია (რაგლანი 1965). ნართების ეპოში გვხვდება გმირის დაღუპვის ორი ტრადიციული მოდელი და ორივე ჰუბრისზეა აგებული. სოსლანის დაღუპვის ეპიზოდს საფუძვლად უდევს უძველესი მითოლოგემა მითოსური მონადირის გარდაუვალი მარცხის შესახებ, რომელსაც ჰუბრისის მოტივი აძლიერებს. ხოლო ბათრაძის დაღუპვის ეპიზოდში ნართი ჭაბუკი, ისევე როგორც მრავალი ეპოსის ტრადიციული გმირი, ხალხს აიმხედრებს და ღმერთს განარისხებს, რასაც, შესაბამისად, მოსდევს მისი დაღუპვა.

ნართი ხალხის აღსასრული. ჰუბრისი, როგორც განსაც-დელი, შეიძლება გახდეს ცალკეულ ადამიანთა დაღუპვის მიზე-ზი. საკუთარ შესაძლებლობებზე აღმატებულმა წარმოდგენამ, ამპარტავნობამ და ქედმაღლობამ იმსხვერპლა ბათრაძი და სოსლანი. თქმულებების მიხედვით, ჰუბრისი შეიძლება დაატყ-დეს როგორც ერთ ადამიანს, ისე მთელ სოციუმს. ნართების სა-ზოგადოების დაპირისპირება ღმერთთან კულმინაციური ადგი-ლია ეპოსში.

ქედმაღლობისა და ამპარტავნების მსხვერპლი ჯერ ცალკე-ული გმირები ხდებიან, ხოლო შემდეგ ჰუბრისი ნართების მთელ საზოგადოებას მოიცავს. „დლევამოსილმა ნართებმა ცხოვრება სულ ომებში გალიეს. უამრავი მოძალადე დაუმარცხებიათ. ისე-თი ალარავინ გადარჩათ, ვისზეც ღონეს გამოსცდიდნენ,“ – გვი-ამბობს ოსური ეპოსი. ძალგულოვანი ნართები, რომლებსაც ძა-ლაც და ღონეც ზეციერებისგან ჰქონდათ მინიჭებული სულ იმის ცდაში იყვნენ, ვის შებმოდნენ, ღონე ვისთან ეცადათ. გან-საკუთრებულმა ფიზიკურმა ძალამ და მტრებთან ბრძოლაში მოპოვებულმა გამარჯვებებმა ნართებს გადაჭარბებული წარ-მოდგენა შეუქმნა საკუთარ თავზე. მათ წარმოიდგინეს, რომ მო-პოვებული ყველა წარმატების წყარო თავად იყვნენ და ღმერთი უარყვეს.

ნართებისთვის საბედისწერო აღმოჩნდა ეშმაკი სირდონის რჩევა: „ღმერთს რომ ლოცულობთ, ერთი ღონეც გაუსინჯეთ... ნუღარ ილოცებთ, დაივიწყეთ მისი სახელი. სახლებს ისეთი მა-ღალი კარები შეაბით, შიგ შესვლისას თავის დახრა რომ არ დაგ-ჭირდეთ, თორემ ღმერთი იფიქრებს, თაყვანს მცემენო. ასე მოი-ქეცით და იგი თვითონ მოგძებნით (ნართები 1988: 367). განსაც-დელის წინაშე დადგა ნართების მთელი საზოგადოება. მათ შე-ეძლოთ არ მიეღოთ რჩევა სირდონისა, რომლის ეპითეტიც ეპოსში არის „ნართების ბოროტი გენია“ („Нарты фылдыбылыз“). ის გახდება ნართი გმირებისა და ბოლოს მთელი საზოგადოების

უბედურების სათავე. სირდონმა, რომელიც ხიდის ყურთან ცხოვრობს მიწისქვეშა საიდუმლო სახლ-ლაბირინთში და ერთგვარ ხთონურ სამყაროს განასახიერებს, იცის, რას ფიქრობენ ნართები, იცის, თუ რა ხდება ახლა და ისიც იცის, თუ რა მოხდება მომავალში.

ვ. აბაევის შეფასებით, „სირდონი თავისებური „ანტიგმირია“, მისი საქციელი ხშირად ასოციალურია, ე. ი. მიმართულია მთლიანად კოლექტივის საზიანოდ“ (აბაევი 1988: 21).

ნართების დაღუპვის შესახებ თქმულებათა ერთი ვარიანტი ასე ინყება: „როცა ნართები ჯერ კიდევ სრულ ძლიერებაში იყვნენ, როცა მათთვის ლია იყო გზა ზეცისაკენ...“ სწორედ მაშინ, როცა მათ მოპოვებული ჰქონდათ უფლის მადლი და უკვდავება, როცა „ლოცვა ყოველთვის აუხდებოდათ ხოლმე“, ნართებმა მიიღეს მაქცია და ცბიერი სირდონის რჩევა.

ნართებმა უარყვეს ღმერთი, ზეცისკენ მიმავალი გზა და დაჰყვნენ ნებას სირდონისა, რომელსაც, როგორც ჯადოსნური უნარების მქონე ეშმაკეულს, შეეძლო ძველ ქუდად, კუდიან დედაბრად, ახალგაზრდა ქალად და მოხუცად გადაქცევა. სირდონის რჩევით, ნართებმა მიივიწყეს ღმერთის ლოცვა, სახლებსაც მაღალი კარები შეაბეს, რომ ღმერთს არ ეფიქრა, თაყვანს მცემენო.

ნართების მაღალი კარები, ისევე როგორც ბაბილონის ცამდე მაღალი გოდოლი, მიანიშნებს საზოგადოების უკიდურეს ამპარტავნებასა და ქედმაღლობაზე, ღმერთან დაპირისპირებაზე და „ჯანყზე ცის წინააღმდეგ“ (ზ. კიკნაძე).

შენიშვნა: ქართული თქმულება მოგვითხრობს სიმდიდრითა და შეძლებით გაბუდაყებული ცხრა ძმის შესახებ, რომლებსაც სოფელ გვიდაქეში (გუდამაყარი) უცხოვრიათ. ერთხელაც დიდი ციხის აშენება გადაუწყვეტიათ. როცა ციხე აუშენებიათ, საღვთო მაღალისთვის დაუძახიათ: „ეხლა კი დაგისწორ-

დით, საღვთოო!“. მათ ხატი გასწყრომია და ყველანი გაუწყვეტია (ანდრეზები 2009: 265).

ახლოვდება სასჯელი. ნართების დაპირისპირება ღმერთთან მათი აღსასრულის გარდაუვალობაზე მიანიშნებს. თუმცა ღმერთმა გადარჩენის შანსი მაინც მისცა ნართებს და შუამავლად მათი საყვარელი ფრინველი – მერცხალი – მიუგზავნა. ნართები არ ცხრებოდნენ: – გამოვიდეს ღმერთი, უნდა შევეჭიდოთო.

ღმერთმა ნართებს არჩევანის საშუალება მისცა: ან ძირფესვიანად განვყეტდა ყველას, ან ცუდ ნაშიერს დაუტოვებდა.

ნართებმა ითათბირეს და ბოლოს ურუზმაგის ნათქვამს დასთანხმდნენ: ცუდ ნაშიერს უძიროდ გადაშენება ამჯობინეს (ნართები 1988: 368).

ნართებმა დაკარგეს ქარიზმა და დავლათი. ღმერთმა მათ მოსავალს ბარაქა გაუქრო: გალენავდნენ ნართები რამდენიმე ბულულ ქერს და მხოლოდ ერთი ტომარა მარცვალი გამოდიოდა. ბოლოს მათ იხილეს შემაძრწუნებელი სასწაული: სამკალად რომ გადიოდნენ, მათი ყანები ნედლდებოდა და მწვანე ხდებოდა, ღამე – გავიდოდნენ, ყანა კვლავ გადამწვანდებოდა ხოლმე. ნართები მოსავალს ვეღარ იღებდნენ.

შენიშვნა: მსგავს სასჯელს იცნობს ლეჩეუმში, დეხვირის თემში გავრცელებული წმინდა მაქსიმეს თქმულება. იგი მოგვითხრობს, თუ როგორ გაუქრო წმინდანმა ქარეიშვილის მოსავალს ბარაქა. ღვთის ურჩი ქარეიშვილი თავის საქონელს კალოობის დროს, ღამლამობით, სხვის მამულში გასაძლომად ერეკებოდა და თანასოფლელთა ყანებს ანადგურებდა. ქარეიშვილი დაუპირისპირდა სოფელს და სანაცვლოდ წმინდანმა მას განსაცდელი მოუვლინა: იმ დროს, როდესაც სოფელში მზე აცხუნებდა და ყველა პურეულს ლენავდა, ქარეიშვილის კალოს თავზე ღრუბელი ჩნდებოდა

და გასალენად დაყრილ ძნებს ნამავდა, გაბუდა-
ყებული ქარეიშვილი ველარ ახერხებდა თავის კა-
ლოზე ძნების გალენვას და მარცვლეული მოსავ-
ლის დაბინავებას (ჩიქოვანი 1971).

ნართებმა დაკარგეს მინიჭებული უკვდავება და ღმერთმა
მათ შიმშილიც მოუვლინა, თუმცა ისინი თავთავთან ერთად ღე-
როსაც ფქვავდნენ და ერთი წელიწადი ასე გაატარეს. მერე
თქვეს: „ღმერთს ხომ ჩვენ თვითონ შეუუთვალეთ – მარადიულ
სიცოცხლეს მარადიული დიდება გვირჩევნიაო“. ამის თქმა იყო
და ყველამ თავისი საფლავის გათხრა დაიწყო და შიგ ცვი-
ოდნენ.

შენიშვნა: ქართული თქმულების მიხედვით, რიცხობრივი
და მატერიალური სიმდიდრით გაბუდაყებული
ცხრა ძმა თანასოფლელებს ავიწროებდა და საკუ-
თარი სიძლიერით ტკბებოდა. ერთ დღესაც მათ
სათიბში წყალი გაეყინათ, სახლში რძე, აკვანში
ბაგშვის შარდი. „უბედურებაა ჩვენს თავსო,“ –
უთქვამს დედას. ღამე ამდგარან და თორმეტი
დღე თავიანთი საფლავები უთხრიათ... თორმეტი
დღის შემდეგ სულ გაწყვეტილან, ერთიც არ დარ-
ჩენილა ცოცხალი (ანდრეზები 2009: 264).

ქედმაღლობამ, ამპარტავნობამ, ზეაღმატებულმა წარმოდ-
გენამ საკუთარ თავზე და ღმერთთან დაპირისპირებამ ნართები
სრულ განადგურებამდე მიიყვანა. სახელოვანმა ნართებმა ვერ
შეძლეს მათ ცხოვრებაში ყველაზე საშიში და საბედისნერო
დაპრკოლების გადალახვა. ნართები დაიღუპნენ. მათი განად-
გურება ცალკეული გმირების გაბუდაყებამ და სოციუმის შიგ-
ნით არსებულმა გარემოებებმა განაპირობა.

ლიტერატურა

აბაევი 1988: ვ. აბაევი, ოსთა ნართული ეპოსი, ნართები, ოსურიდან თარგმნა მ. ცხოვრებოვამ, გამომცემლობა „ირისთონი“, ცხინვალი, 1988.

ანდრეზები 2009: ზ. კიკნაძე, ანდრეზები, (აღმოსავლეთ საქართველოს მთიანეთის რელიგიურ-მითოლოგიური გადმოცემები), ილია ჭავჭავაძის სახელმწიფო უნივერსიტეტის გამომცემლობა, თბ., 2009.

გრისვარი 1969: Grisward J. H., Le motif de l'épée jetée au lac: la mort d'Artur et la mort de Batradz // Romania, revue trimestrielle consacrée à l'étude des langues et des littératures romanes fondée en 1872 par Paul Meyer et Gaston Paris, publié par Félix Lecoy. Paris: Société des amis de la Romania, 1969. t. 90, N 3-4, p. 289-340. t.91, p. 473-514.

გუტნოვი 2013: Гутнов Ф., Роль нихаса в структуре власти осетинских обществ позднего средневековья, "Даръял" (литературно-художественный и общественно-политический журнал), Владикавказ, №2, 2013.

დიუმეზილი 1930: Dumézil G., Légendes sur les Nartes, Paris, 1930

დიუმეზილი 1965: Dumézil G., Le Livre des Héros. Légendes sur les Nartes. Gallimard, Paris, 1965.

დიუმეზილი 1976: Дюмезиль Ж., Осетинский эпос и мифология, „наука“, М., 1976.

ინალ-იფა 1969: Инал-Ипа Ш. Д., Исторические корни древней культурной общности кавказских народов (Опыт сравнительного изучения нартского эпоса), Сборник „Сказания о нартах – эпос народов кавказа“, изд-во „наука“, М., 1969.

- კიკნაძე 2001:** ზ. კიკნაძე, ქართული ხალხური ეპოსი, „ლო-გოსი“, თბ., 2001.
- კიკნაძე 2008:** ზ. კიკნაძე, ქართული ფოლკლორი, თსუ გამომ-ცემლობა, თბ., 2008.
- ლიბედინსკი 1949:** Осетинские народные сказания, пер. Ю. Либединского, Дзауджиана., 1948.
- მელეტინსკი 1963:** Мелетинский Е. М., Происхождение героического эпоса, Ранние формы и архаические памятники, М., 1963.
- მილერი 1881:** Миллер Вс., Осетинские этюды, II, М., 1881.
- მილერი 1902:** Миллер Вс., Дигорские сказания, М., 1902.
- ნართები 1988:** ნართები, ოსურიდან თარგმნა მ. ცხვრებოვამ, გამომცემლობა „ირისთონი“, ცხინვალი, 1988.
- ნართები 2014:** ნართები, წიგნი შეადგინა და ქართულ ენაზე თარგმნა ნაირა ბეპიევმა, გამომცემლობა „უნივერსალი“, თბ., 2014.
- რაგლანი 1965:** L. Raglan, The Hero of Tradition, The Study of Folklore, ed. Dundes A., University of California and Berkley, 1965.
- შიფნერი 1868:** А. Шифнер, Осетинские тексты, собранные Д. Чондзэ и В. Цораевым, Императорская академия наук, С-Петербург, 1868.
- ჩიქოვანი 1971:** მ. ჩიქოვანი, ბერძნული და ქართული მითოლო-გიის საკითხები, თბ., 1971.



၁၂၃၆၉၁၇၁၀၀၈၂၅၁၇၁၇၁၇



მკვლევართა ნაკლები ყურადღება ხვდა წილად ოსურ თქმულებებს ცარციათებზე, რომელიც ოსურ ენაზე პირველად 2007 წელს გამოქვეყნდა (ცარციათების თქმულებები, ძაუჯიყაუ, 2007, წიგნი შეადგინა, წინასიტყვაობა და შენიშვნები დაურთო თემიურაზ თაყაზთიმ). სულ მალე ცარციათების თქმულებები ქართულ ენაზე თარგმნეს ნაირა ბეპიევმა და მერი ცხოვრებოვამ და 2009 წელს დაბეჭდა გამომცემლობა „უნივერსალმა“. „ოსურ თქმულებებს“ წინ უძლვის ზ. კიკნაძისა და ტ. გურიევის წინასიტყვაობა. ზ. კიკნაძე წიგნის წინასიტყვაობაში ყურადღებას ამახვილებს ცარციათების ტრაგიკულ აღსასრულზე და ეპოსის შემნახველი ხალხის მაღალ ზნეობრივ შეგნებაზე მიუთითებს: „განაჩენი, – წერს ზ. კიკნაძე, – რომელიც ღმერთმა ნართებსა და ცარციათებს ამპარტავნობის, ხოლო ხვირიმთებსა და ბილვილათებს სიხარბისთვის გამოუტანა, ამ ეპიკური თქმულებების შემქმნელი ხალხის მაღალ ზნეობრივ შეგნებას მოწმობს“.

ცარციათული თქმულებების ვერსიები

თქმულებები ცარციათებზე წარმოადგენს ერთ მთლიან ნარატივს თავისი დასაწყისითა და დასასრულით. მასში ასახულია ლეგენდარული ხალხის ტრაგიკული თავგადასავალი – ცარციათების მოუსვენარი, მშფოთვარე, სასტიკ ბრძოლებზე დაფუძნებული ცხოვრება, მითიური წინაპრიდან მოყოლებული სრულ განადგურებამდე. თუმცა ხალხურ ტექსტებს ცარციათებზე არ აქვთ ისეთივე მყარი სტრუქტურა და კომპოზიციური მთლიანობა, როგორიც ეპოსს სახელოვან ნართებზე.

მეცნიერთა შორის ცარციათებს პირველად ახსენებს დოქტორი ვ. პფაფი 1872 წელს ქ. ტფილისში რუსულ ენაზე გამოქვეყნებულ წიგნში „კავკასია“, რომელშიც ავტორი გადმოგვცემს ჩრდილოეთ ოსეთის მთიანეთში თავისი მოგზაურობის შთაბეჭდილებებს. „სოფელ გალიათისა და კამუნტას მცხოვრებლებმა, – წერს ვ. პფაფი, – ჩვენთან გასაყიდად მოიტანეს საუცხოო ძველი ნივთები, რომლებიც მახლობელი საფლავებიდან ამოელოთ. მათი აზრით, ეს ნივთები ეკუთვნოდათ ცარციათებს, რომლებიც იქ ოსების მოსვლამდე ცხოვრობდნენ“ (პფაფი 1872).

ცარციათების ეპოსი ჩვენამდე მოღწეულია, შეიძლება ითქვას, თითქმის მხოლოდ დ. ბეგიზოვის მიერ ჩანერილი ტექსტებით. სამწუხაროდ, ნაკლებად (ან თითქმის არ) მოგვეპოვება სხვა ვარიანტები, რომლებიც შეავსებდნენ დ. ბეგიზოვის მიერ შეკრებილ თქმულებებს. თუმცა, ფ. თაყაზოვის ცნობით, დ. ბეგიზოვის გარდა, თქმულებები ცარციათებზე თავის დროზე ჩაუწერია ვ. ცაბაევსაც, მაგრამ ვ. ცაბაევის ჩანაწერები დღემდე არსად გამოქვეყნებულა (თაყაზოვი 2009). ქართველი ფოლკლორისტებიდან ცარციათების ეპოსზე თვალსაზრისი პირველად გამოთქვა ი. მეგრელიძემ. მან გასული საუკუნის 50-იან წლებში ჯავის რაიონში მდიდარი ფოლკლორულ-ეთნოგრაფიული მასალა შეკრიბა, აგრეთვე, შეისწავლა ლიახვის ხეობის ეპიგრაფიკული ძეგლები, რომლებიც მოგვიანებით ერთად გამოქვეყნდა მონოგრაფიის სახით „სიძველეები ლიახვის ხეობაში“, თბ., 1984. ი. მეგრელიძის ცნობით, მას გადმოცემები ცარციათების შესახებ მოუსმენია ჯავის რაიონის სოფლებში, კერძოდ, მსხლებში, გუფთასა და ედისში. ამის შესახებ ი. მეგრელიძე წერს: „რაც ჩვენ ცარციათებზე გუფთასა და მსხლებში მოვისმინეთ, ისა და ზოგი ახალი მასალა ასახულია იმ 100 გვერდამდე ჩანაწერების შერწყმულ ვარიანტში, რომელიც ჩვენ ვასილ გიორგის ძე ცაბაევმა გაგვაცნო“ (მეგრელიძე 1984: 244). სამწუხაროდ, ვ. ცაბაევის მიერ ცარციათებზე ჩანერილი თქმუ-

ლებების ხელნაწერებს, რომლებსაც ი. მეგრელიძე და ფ. თაყაზოვი ახსენებენ, ჯერჯერობით ვერსად მივაკვლიე. როგორც ჩანს, ი. მეგრელიძე ცარციათების ცაბაევისეულ ვარიანტს იცნობდა. მას თავის ნაშრომში მოჰყავს ეპიზოდები თქმულებებიდან, რომლებიც სიახლოვეს კი ამჟღავნებენ ბეგიზოვის მიერ ჩაწერილ ტექსტებთან (ანუ თქმულებების იმ ვარიანტებთან, რომლებიც ქართულ ენაზე ნ. ბეპიევმა თარგმნა), მაგრამ განსხვავებაც არის. ნ. ბეპიევისეულ თარგმანში გვხვდება პერსონაჟი კავკაზი, რომელსაც ი. მეგრელიძისეულ ტექსტში ჰქვია ყაუგასი, რაც ოსურიდან ქართულად ითარგმნება, როგორც სოფლის მცველი (ყაუ – სოფელი, გას – დამცველი, მამასახლისი). ვ. ცაბაევის შეკრებილ თქმულებებში არ უნდა იყოს კოსმოგონიური და ანთროპოგონიური მოტივები, რომლებსაც ბეგიზოვის ვარიანტში, შესაბამისად, ნ. ბეპიევის თარგმანში, დიდი ადგილი აქვს დათმობილი. ვ. ცაბაევისეულ ვარიანტში, რომელიც ასევე ჯავის რაიონის სოფლებშია ჩაწერილი, ყურადღებას იპყრობს ქართული ან ქართული გზით შესული სახელების სიმრავლე, როგორიცაა შავლე, გუდარა და სხვ.

ჩრდილოეთ ოსეთში ვრცელი სიუჟეტური ნარატივები ცარციათებზე ნაკლებად დასტურდება. იქ მითიური ცარციათების მხოლოდ დაღუპვის ტექსტებს იცნობენ. როგორც ჩანს, ხალხური ცნობიერება ცარციათების ცხოვრების ყველაზე მნიშვნელოვან და შთამბეჭდავ ეპიზოდად მათ ტრაგიკულ აღსასრულს მიიჩნევს (მამისიმედიშვილი 2010: 243-244). ჩრდილოეთ ოსეთში შემონახულია მხოლოდ ცალკეული ნარმოდგენები და გამონათქვამები ლეგენდარულ ცარციათებზე. იქ ახლაც უჩვეულო სიტუაციასა თუ მოვლენაზე ამბობენ: ცარციათებივით სიკვდილი, ცარციათებივით მშეერი, ცარციათების საოცრება. გამოთქმებიდანაც ნათელი ხდება, რომ მოუსვენარ ცარციათებს თავს დასტყვლომიათ შიმშილი, გადახდენიათ საკვირველი ამბები, ჰქონიათ საოცარი ნივთები და სხვ.

ეპიკური ტექსტები ცარციათებზე, შედარებით სრული სიუ-
ჟეტებითა და, რაც მთავარია, თავისი დასაწყისითა და დასას-
რულით საქართველოში მცხოვრებმა ოსებმა შემოინახეს. თუ
როგორ იყო დაცული ჩვენში ოსური კულტურა, ყოფა და ფოლ-
კლორი, მკაფიოდ ადასტურებს საქართველოში მცხოვრები
ოსებისგან ჩანერილი ცარციათული თქმულებების შედარებით
სრული ვარიანტები. როგორც აღვნიშნეთ, ეპიკური თქმულებე-
ბი ცარციათებზე ძირითადად ჩანერილია ჯავის რაიონში. ცალ-
კეული ტექსტები კი შეუკრებიათ გორის, ქარელისა და ყაზბე-
გის რაიონის ოსებით დასახლებულ სოფლებში, აგრეთვე, სო-
ფელ გუჯარეთში. ცნობილია, რომ ოსებმა სამხრეთში, კერძოდ,
საქართველოში, უკეთესად შეინარჩუნეს მშობლიური ენა,
ეროვნული იდენტობა, ყოფითი და ზეპირსიტყვიერი ტრადიცი-
ები, ვიდრე ჩრდილოეთ ოსეთში.

გ. ჩურსინს ჯავის რაიონში ლევან ბეგიზოვისგან ჯერ კი-
დევ გასული საუკუნის 20-იან წლებში ჩაუწერია ცარციათების
აღსასრულის შესახებ გადმოცემები, რომლებიც ნართების და-
ლუპვის მსგავს სიუჟეტზეა აგებული. ჩურსინის მასალების მი-
ხედვით, ცარციათები გაამაყდნენ და ამის გამო ღმერთმა მათი
დაღუპვა გადაწყვიტა. ღმერთმა, ისევე როგორც მოუსვენარ
ნართებს, ცარციათებსაც ჯერ ბარაქა გაუქრო. მათი ყანები
ღამით მოსამკელი იყო, დღისით მწვანედ ბიბინებდა. მაშინ ცარ-
ციათებმა ორკაპიანი წვერი დაუმაგრეს ისარს და შორიდან ეს-
როდნენ თავთავებს. რასაც ისრებით მოწყვეტდნენ, იმით გადი-
ოდნენ იოლას. არაბუნებრივი, საშინელი აღსასრული ხვდათ წი-
ლად ცარციათებს. ამიტომაც ოსები ყველაფერს, რაც არაჩვეუ-
ლებრივია და ადამიანებში გაკვირვებას იწვევს, უნიდებენ
„ცარციათულ საოცრებას“, ცარციათების ამბავს ჰგავსო, ცარ-
ციათების საკვირველი საქმის გამეორებააო, ქართულად იგივეა,
რაც მეორედ მოსვლის (წარღვნის) დროის ამბავიაო. რაც მთა-
ვარია, თქმულებათა მთხრობელებს ცოცხლად წარმოუდგენი-

ათ ის საშინელი უბედურება, რომელიც ცარციათებს ოდესლაც, როგორც ღვთის სასჯელი, თავს დაატყდათ.

ბ. კუფტინი სოფელ ხვცეში მიუთითებს ტოპონიმზე „ცარციათების (შარშიათების) ბორცვი“. არქეოლოგიური გათხრების შედეგად ცარციათების ბორცვის ქვეშ აღმოჩენილ არტეფაქტებს მკვლევართა განსაკუთრებული ინტერესი მოჰყოლია (კუფტინი 1949: 36).

ცარციათების დაღუპვის შესახებ ტექსტები ჩაუწერიათ 1927 წელს ეთნოლოგიურ-ლინგვისტურ ექსპედიციაში ბ. ალბოროვსა და ბ. კარსანოვს. ამის შესახებ ბ. ალბოროვი წერს თავის გამოუქვეყნებელ ნაშრომში „ეთნონიმი „ცარციათი“ ოსურ ხალხურ თქმულებებში“ (ალბოროვი 1927). მისი აზრით, ცარციათების აღსასრულის შესახებ გადმოცემები შენახულია ქურთათის ხეობის მცხოვრებლებში და იქ თავის დროზე ფოლკლორული მასალები ჩაუწერიათ ს. ჯანაევს და გ. ხადიკოვს. უფრო მეტი ცნობები შემონახულია პროფესორ გ. ფ. კოკიევის შრომებში (კოკიევი 1928). მას ხალხური ტექსტები ცარციათებზე ჩაუწერია ს. ძივლისში (ჩრ. ოსეთი). მისი აზრით, იქ ოდესლაც, ოსების მოსვლამდე, ცარციათებს უნდა ეცხოვრათ. ტექსტების მიხედვით, ისევე როგორც დარეჯანიანები და ნართები, ცარციათებიც, სიამაყისა და ამპარტავნობის გამო, ღმერთს დაუსჯია.

დიგორის ხეობაში ჩაწერილი ტექსტების მიხედვით, ცარციათები ძლიერ გაამაყებულან. მათ უარი უთქვამთ ღვთისა და ძუარების სამსახურზე. ისევე როგორც ნართებს, ცარციათებსაც თავიანთი სახლების შესასვლელი აუმაღლებიათ, რომ ღმერთს არ ეფიქრა, თავს მიხრიან და თაყვანს მცემენო. ღმერთმა გაპუდაყებული ცარციათები ცეცხლში ამობუგა. გადარჩენილები იჯახის წევრებთან ერთად აკლდამაში შედიოდნენ და იქ იღუპებოდნენ. ხანძრის შემდეგ ღმერთმა წარდგნა მოავლინა, რომელმაც გადარეცხა გაუწმინდურებული მიწა, საიდანაც ოსეთის მთები და ხეობები წარმოიშვა.

ცარციათის ეტიმოლოგია. ცარციათების სამარხები

გ. კოკიევის განმარტებით, ტერმინი ცარციათი ხშირად ის-მის ოსურ ენაში, როგორც სიმრავლის გამომხატველი ფრაზეო-ლოგიზმი. მაგ., „ცარციათები მოდიან“ აღნიშნავს, რომ ბევრი ხალხი მოდის, ქვეყანა აყრილა.

ლ. მელიქსეთ-ბეკოვი ცარციათებს რამდენიმე განმარტებას უძებნის. მისი აზრით, სიტყვა „ცარციათი“ შესაძლოა მომდინარეობს გამოთქმიდან „ცარგასათი“, რომელიც აღნიშნავდა პრივილეგირებულ წოდებას დიგორიაში. ცარციათი ან ცარცა თითქოს განძს, მინაში დამარხულ მატერიალურ ძვირფასეულობას გამოხატავს; და ბოლოს, მელიქსეთ-ბეკოვი შესაძლებლად მიიჩნევს, რომ „ცარციათი“ იყოს ეთნონიმი იმ ტომისა, რომელიც ოდესლაც კავკასიის მთებში ცხოვრობდა, ახლა კი მათ საიდუმლოს მიწისქვეშა აკლდამები ან ყურღანები ინახავენ (მელიქსეთ-ბეკოვი 1924).

უცნობი ადამიანების ძვლებით ამოვსებული, მიტოვებული და საიდუმლოებით მოცული ძველი სამარხები ხალხში ახალი მითოსის აღმოცენების საფუძველს ქმნიდა. ამ ტიპის აკლდამები შემონახულია ჩრდილოეთ ოსეთში სოფელ ლაცის, ძივლისის, გალიათის, სანიბას მახლობლად, აგრეთვე, საქართველოში, კერძოდ, ზემო ლიახვის ხეობაში, სოფელ სთირფაზისა და ედისის სიახლოვეს. გ. კოკიევის ცნობით, ხალხში დაცული იყო გადმოცემები, რომ ძველი სამარხები არ არის ოსების და ოდესლაც ისინი ცარციათებს ეკუთვნოდათ (კოკიევი 1928: 47). ალაგირის, ქურთათისა და დიგორის ხეობებში შემორჩენილ მიცვალებულთა აკლდამებსა და კატაკომბებს ხალხური ტრადიცია ცარციათების კუთვნილებად აცხადებს. ასე რომ, აკლდამებმა, გამქრალი ხალხის – ცარციათების – მხოლოდ ჩონჩხადქცეული ძვლები შემოგვინახა, როგორც სასტიკი მოგონება.

ჩრდილოეთ ოსეთში სანიბის ხეობის მცხოვრებლებს დღემ-დე სწამთ, რომ სოფელ სანიბას ჩრდილოეთით, მთებზე, სადაც შემონახულია აკლდამები და კატაკომბები, მდებარეობდა ცარ-ციათების სოფელი. ცარციათებს ღმერთმა სასჯელად შავი ჭირის ეპიდემია მოუვლინა. უამიანობა მთელ ხეობას მოსდებია. გარდაცვლილების დამარხვას ისინი თურმე ველარ აუდიოდნენ. ამიტომ მათ გაუკეთებიათ კატაკომბები. დასალუპავად განწირულებს ყველაფერი: თავიანთი ქონება, სურსათი, საოჯახო ნივთები – მინისქვეშა აკლდამებში ჩაუტანიათ და იქ დალოდებიან სიკვდილს. გ. ჩურსინის ცნობით, ჩრდილოეთ ოსეთში აულ ჩიმის მახლობლად ერთ-ერთ მაღლობს ჰქვია „ცარცა“, სადაც არქეოლოგებმა აღმოაჩინეს ადამიანის ძვლები, ჭურჭელი, ბრინჯაოს იარაღები და სხვა საგნები (ჩურსინი 1925: 5).

ცარციათების ხსოვნა ასახულია ოსურ რიტუალებშიც. ე. ბარაქოვას ცნობით, სოფელ არხონის მცხოვრებლები დიდმარხვის დროს, მარტის თვეში, კვირა დღეს, ცარციათების მოსაგონებლად სუფრაზე აწყობდნენ საგანგებოდ გამომცხვარ სარიტუალო ქადებს, სასმელსა და ცარციათებს იხსენებდნენ, მათ შესანდობარს სვამდნენ (ბარაქოვა 1936).

ჯავის რაიონის სოფელ ედისისა და მის მახლობელ სხვა სოფლებში შემორჩენილია ძველი საფლავები. ადგილობრივი მცხოვრებლების რწმენით, ეს საფლავები ეკუთვნოდათ ცარციათებს, რომლებიც იმ ტერიტორიაზე ოსების მოსვლამდე ცხოვრობდნენ. გ. ჩურსინის ცნობით, ხანგრძლივი გვალვების დროს ოსები წვიმის მოსაყვანად მიმართავდნენ მაგიურ რიტუალებს. კერძოდ, ედისისა და სხვა მახლობელი სოფლების მცხოვრებლები თხრიდნენ ძველ, ე. წ. ცარციათთა საფლავებს, ძვლებს იღებდნენ და ასველებდნენ. წვიმის მოსვლას ევედრებოდნენ ვაცილას. შემდეგ ძვლებს ისევ იმავე სამარხში აწყობდნენ (ჩურსინი 1925: 77). წვიმის გამოთხოვის მიზნით ძველი საფლავიდან მიცვალებულის ძვლების ამოღება, მდინარეში ჩაკიდება და

დასველება, როგორც მაგიური ქმედება, გვხვდება კავკასიის სხვა ხალხებშიც (მამისიმედიშვილი 2008: 345-346).

ცარციათების ეპოსი მნიშვნელოვან ცნობებს გვაწვდის მიცვალებულთა დაკრძალვის შესახებ. თქმულებების მიხედვით, ცარციათები მიცვალებულებს აკლდამებში ათავსებდნენ. როდესაც ცარძოსა და ბონვარნონის ვაჟი – ახვი ევგვიპარებ-თან ბრძოლაში დაიღუპა, სადაც მისი დამწვარი ცხედარი იპოვეს, იმ ადგილას აკლდამა გააკეთეს: „დამწვარი ახვი შიგ შედეს, მყლავის კიდური კი აკლდამის კარებთან ააყუდეს“ (თქმულებები 2009: 52), „ცარციათებმა თავიანთ მიცვალებულებს აკლდა-მები გაუკეთეს, შიგ დაასვენეს ისინი და უკან გამობრუნდნენ“ (თქმულებები 2009: 56), „ნამოიღო დედამ თავისი შვილის ხათა-გოს გვამი ცარციათებთან. ააშენეს უზარმაზარი აკლდამა და იქ დაასვენეს. დედამაც იქვე დალია სული და ისიც მის გვერდით დაკრძალეს“ (თქმულებები 2009: 77), „სუამ თავისი ძმის ტანი წამოიღო. აკლდამა გააკეთა, იქ შედო“ (თქმულებები 2009: 91), ღმერთმა ცარციათებს ჭირი მოუვლინა... სანამ შეეძლოთ, თა-ვიანთი მიცვალებულები აკლდამებში შეჰქონდო, მაგრამ აკ-ლდამები გვამებით გაივსო“ (თქმულებები 2009: 121). ცარცია-თების თქმულებების მიხედვით, ყველას თავისი საგვარეულო აკლდამა ჰქონდა და დიდ სირცხვილად ითვლებოდა მიცვალე-ბულის სხვა აკლდამაში დატოვება.

აკლდამებში მიცვალებულთა დაკრძალვის წესი გავრცელე-ბული იყო კავკასიის მაღალმთიანეთში, მათ შორის, ვაინახებსა და ქართველ მთიელებშიც. მაღალმთიანეთში მიცვალებულთა აკლდამებში დაკრძალვის ტრადიციას მეცნიერები უტილიტა-რულ მიზეზებს უძებნიან, კერძოდ, მცირემინიანობას, მაღალ-მთიანეთის კლდოვან რელიეფსა და სტიქიურ უბედურებებს (ომი, ეპიდემია), როცა ადამიანებს დრო აღარ რჩებოდათ მიც-ვალებულთათვის საფლავების გასათხრელად.

გ. ჩურსინი წერს, რომ ცარციათების დაღუპვის შემდეგ ქვეყანა დაცარიელებულა და ტყედ ქცეულა. მისი აზრით, ამის შემდეგ იქ ჩრდილოეთიდან მოსულან ოსები და ცარციათების ნასახლარზე დამკვიდრებულან (ჩურსინი 1925: 7). ამრიგად, ცარციათების შესახებ ცალკეული გადმოცემები შენახული იყო ჩრდილოეთ ოსეთში – ალაგირის, ქურთათის და დიგორის ხეობებში, აგრეთვე, საქართველოში – ჯავის რაიონის სოფლებში, ანუ იმ გეოგრაფიმლ არეალში, სადაც საუკუნეების მანძილზე ცხოვრობდა დვალების ტომი (დვალები: ოსურად – თვალი, თვალთად).

ალსანიშნავია, რომ ჩრდილოეთ ოსეთის მთიანეთში დვალების ალსასრულის შესახებ ყვებოდნენ იმავე შინაარსის ტექსტებს, როგორსაც ნართებისა და ცარციათების შესახებ. გადმოცემების მიხედვით, დვალები ღმერთსა და ძუარებს უგულოდ ლოცულობდნენ, ამიტომაც განადგურდნენ (კოკიევი 1928: 43).

ვინ არიან ცარციათები? ასეთი სახელწოდების ხალხი ქვეყანაზე არსად ცხოვრობს, არც კავკასიაში და არც სხვაგან სადმე. დღემდე მოღწეული არც ერთი წერილობითი ისტორიული წყარო არ ადასტურებს ამ ეთნონიმს. ცარციათები მითიური ხალხია. ეპოსი მათ თითქოს სამყაროს პირველ მცხოვრებლებად წარმოგვიდგენს. თქმულებების მიხედვით, ცარციათები ღმერთისგან შექმნილი პირველი ადამიანის – ცარძოისა და ღმერთის დისმვილის – მითიური ბონვარნონის (ცისკრის ვარსკვლავის) შთამომავლები იყვნენ.

ალსანიშნავია, რომ ცარძოი სწორედ ცოლმა, ზეციურმა ბონვარნონმა აზიარა სიბრძნეს. მან ქმარს ზეციდან ჩამოგდებული ჯადოსნური ქვისგან ცეცხლის გამოყენება, აგრეთვე, ისრის წვერებისა და ხმლის გაკეთება ასწავლა. ძველი მითოსების მსგავსად, ცარციათების ეპოსშიც ქალის მეშვეობით ეზიარება პირველი მამაკაცი სიბრძნეს, მისი დახმარებით ხდება სრულყოფილი და სოციალურად მომწიფებული ადამიანი.

როგორც ნართებისა და დარეჯანიანთა ციკლის ოსური თქმულებები, ცარციათების ეპოსიც მდიდარია მითოლოგიური მოტივებით.

ცარციათების საცხოვრისი

ეპოსის მიზედვით, ცარციათები მთებსა და ხეობებში ცხოვრობდნენ. მათ ხუთ უბანს ხუთი მხრიდან ჰქონდა შესასვლელი. ცარციათების მაღალი კოშკები ცას წვერს აბჯენდნენ. კოშკებისთვის ისეთი მაღალი გალავანი შემოევლოთ, კაცს რომ თვალი აეწვდინა, თავიდან ქუდი ჩამოუვარდებოდა. მათი ვეებერთელა სახლები ვარსკვლავებივით ბრდვიალებდნენ. ცარციათების წვიმაგარი რაშების ფლობები ნაპერნკლებს ყრიდნენ, მათი მტვერი ცასა და მინას ფარავდა, მინას კი გვრგვინვა გაუდიოდა. ცარციათების ძროხების ბლავილი ხეობას აყრუებდა, ყოჩების რქების ჯახაჯუხი კაცს ომი ეგონებოდა, მათი ხეობები შავი წვრილფეხა და თეთრი საქონლის ჯოგებით იყო სავსე. ცარციათები მისდევდნენ მონადირეობას, მინათმოქმედებასა და მეცხოველეობას. ისინი ხშირად აწყობდნენ ყაჩაღურ თავდასხმებს.

ცარციათებსაც ჰქონდათ ბედნიერი ცხოვრების საარაკო ხანა. სუას ეპიზოდი ცარციათების ცხოვრების საუკეთესო დრო-- ჟამზე მოგვითხრობს: „შორს იყო განთქმული სუას სახელი. ორი ადამიანი რომ საუბრობდა, აუცილებლად სუას ახსენებდნენ, მის სახელს ფიცულობდნენ. სუას შვიდთვალიანი ციხე ჰქონდა, შვიდთვალიანი კოშკი. ღვთის მადლით, სუა სახელოვნად და ნამუსიანად ცხოვრობდა“ (თქმულებები 2009: 58). ღვთის წყალობა- მაც არ დააყოვნა და სუას ოჯახი ხვავითა და ბარაქით აავსო. მისი საქონელი შვიდ ხეობაში არ ეტეოდა. „ცხოვრობდა სუა თავის უამრავ მსახურთან ერთად. მაღლიდან ღმერთი სწყალობდა და დაბლა მინის მადლი ეწეოდა“ (თქმულებები 2009: 59). ცარცია-

თების სიმშვიდესა და სამოთხისებურ ყოფას გარესამყაროსგან ცამდე ასული ცეცხლის ენები იცავდნენ. ეპოსის მიხედვით, სუას სამყოფელი იდეალური ადგილია, სადაც თითქოს „ჰარმონიაშია მოქცეული ცისა და მიწის ძალები“.

ზ. კიკნაძის აზრით, „სუა სიკეთისა და კეთილგონიერების მაგალითი უნდა ყოფილიყო ცარციათებისთვის, მთელ მხარეში ბედნიერი ცხოვრება უნდა დამყარებულიყო, მაგრამ, როგორც ყოველთვის ხდება, ადამიანების შურმა და სიხარბემ სძლია სიკეთესა და უშურველობას“ (კიკნაძე 2009: 8).

ცარციათების აღსასრული

„შეიქმნა დიდი მტერობა...“

დ. გურამიშვილი

ცარციათების თქმულებებში მნიშვნელოვანი ადგილი უკავია ესქატოლოგიური და აპოკალიფსური შინაარსის ეპიზოდებს.

თქმულებების მიხედვით, ცარციათების ბედნიერ ცხოვრებასა და სამოთხისებურ ყოფას სიძულვილმა, შურმა და მტრობამ ბოლო მოუღო. ერთმანეთს დაუპირისპირდნენ მეზობლები: გაბრიყვებული ხვირიმთები და მცირერიცხოვანი წიბირთები, ხარბი ბიღვილათები და ამაყი ცარციათები.

ცარციათების ეპოსში აისახა სასტიკი და დაუნდობელი ბრძოლები. სამკვდრო-სასიცოცხლოდ დაპირისპირებული მტრები ერთმანეთს არ ინდობდნენ: მოჭრილ თავებს ისრის წვერზე წამოაცვამდნენ და მოწინააღმდეგის სოფლის შუაგულში ისროდნენ; დახოცილებს თავსა და ყბას თალგამივით ათლიდნენ; საცხოვრებლებს უბუგავდნენ, ხოცავდნენ დამარცხებულებს, უკლებლივ ყველა სულიერს, არ ინდობდნენ მოხუცებს, ქალებსა და ბავშვებს. ბუნებაც გაავებული იყო კაცთა სისასტიკით.

ცარციათების მიერ თვით საძულველი ფიდალიზის მიმართ გა-
მოტანილ სასტიკ განაჩენსაც ეპოსი ერთგვარი პროტესტით
გადმოგვცემს: „ცარციათებმა ფიდალიზი ერთი მაღალი მთის
მწვერვალზე აიტანეს, იქ ცეცხლი დაანთეს და შიგ ჩაუძახეს.
გაიმეტეს, ცოცხლად წვავდნენ ფიდალიზს და ცეცხლს სულ
ტკაცატკუცი გაჰქონდა. ცოცხლად დაწვეს საწყალი კაცი. მთა
გაავებული იყო. ამიტომ, სადაც დამწვარი ფიდალიზის ფერფლი
მოხვდა, იმ ადგილებში ბალახიც აღარ ამოიწვერა. მთას ავი ფე-
რი დაედო“ (თქმულებები 2009: 94).

ეპოსში გადმოცემულია სხვადასხვა ხალხების ურთიერ-
თმტრობისა და განადგურების შემზარავი სურათი: ცბიერმა
ბილვილათებმა, რომლებიც წიბირთების მამულს დაპატრონე-
ბოდნენ, წააქეზეს ისინი ცარციათების წინააღმდეგ. ცარციათებ-
მა ჯერ დაუშალეს წიბირთებს მტრობა, მაგრამ ვერაფერს რომ
გახდნენ, ღამით შეიპარნენ, თავიანთი დანებით ამოხოცეს და
ცეცხლი წაუკიდეს მათ საცხოვრისს. მიწას დახარბებული ბილვი-
ლათები და ხვირიმთები, თითქოს იმის გამო, რომ გული შესტკი-
ოდათ წვირიმთებზე, დაუპირისპირდნენ ცარციათებს. განდევ-
ნეს ისინი თავიანთი მიწა-წყლიდან და ერთ დროს სახელგან-
თქმული ცარციათები მანანნალა ბრძობად აქციეს. ერთმანე-
თის მიწების ხელში ჩასაგდებად ახლა ბილვილათები და ხვირიმ-
თები დაერივნენ, მათ შორის ისეთი სასტიკი ბრძოლები გაჩაღ-
და, რომ ორივეს შავი დღე გაუთენდა, სულიერის ჭაჭანება აღარ
დარჩა მათ სოფლებში. ასეთი წყევლაც სცოდნიათ ოსებს: „ისე
დაიქცნენ და ამოწყდნენ შენი ავად მახსენებელნი, როგორც –
ხვირიმთები და ბილვილათებიო!“ (თქმულებები 2009: 97).

წერილობითი წყაროებიდან ცნობილია, რომ ოსეთის მთია-
ნეთში, სადაც გავრცელებულია თქმულებები ცარციათების შესა-
ხებ, შუა საუკუნეებში სხვადასხვა ისტორიულ ხალხებს უცხოვრი-
ათ. ისინი ომებმა და სხვა სტიქიურმა უბედურებებმა იმსხვერ-

პლეს. ხალხთა ბრძოლის ერთ-ერთ ასეთ საარაკო სურათს, რომე-
ლიც უღელეს გამართულა, ქართული ბალადაც გადმოგვცემს:

„ – მაღლა მთას მოდგა
უცხო ფრინველი,
უცხო ფრინველი,
თეთრი ფრთიანი,
ბოლო წითელი.
- უღელეს ჩამოდგა დიდი ლშქარი,
დიდი ლაშქარი – ოსი და დგალი.
ომი შეიქმნა ცისკრისა ჟამსა,
ცისკრისა ჟამსა, გამთენიასა:
ქნევა ხმალისა, ძგერა შუბისა.
ხმალი ორპირი სისხლში ცურავდა,
შუბის ნალენი ზეცას ცვიოდა,
მესამე დღესა ჩამოცვიოდა.
ვაჟაცო ყვირილით მიწა იძროდა,
სისხლისა ღვარსა კაცნი მოჰქონდა“
(ძველი 1913: 115).

ქართული ბალადა ხალხთა უღეტისა და განადგურების ისეთი-
ვე აპოკალიფსურ სურათს წარმოგვიდეგენს, როგორსაც ოსური
თქმულებები ცარციათებისა და მათი მეზობელი ხალხების დალუპ-
ვის შესახებ. საგმირო ლექსში თითქოს დაპირისპირებული ყველა
მხარე იღუპება. რ. თოფჩიშვილის აზრით, ლექსში „მაღლა მთას
მოდგა“ აისახა დვალეთში შემოქრილი ოსების ბრძოლა ადგილობ-
რივ დვალებთან, რის შემდეგაც სწორედ მაშინ მოხდა მოსახლეო-
ბის ეთნიკური შეცვლა საქართველოს მთიანეთის ერთ-ერთ უძვე-
ლეს პროვინციაში – დვალეთში (თოფჩიშვილი 2009: 135).

შენიშვნა: ცარციათების თქმულებებში ყურადღებას იქ-
ცევს არა მხოლოდ ზოგიერთი საკუთარი სახე-
ლის ქართული უღერადობა, არამედ ეთნონიმ
„ცარციათის“ ერთგვარი ქართული შესატყვი-

სიც – ცერცეტი, რომელიც არის ბრიყვი, ჩერჩეტი, სულელი ადამიანის ეპითეტი. ხალხურ მეტყველებაში მეზობელი კუთხეების ეთნონიმები ზოგჯერ გამოიყენებოდა გროტესკული სემანტიკით. ცარციათთან სიახლოვეს ამჟღავნებს აგრეთვე სიტყვები: წერწეტი, კერკეტი და ჩერჩეტი. თუმცა ბ. კუფტინის აზრით, სიტყვა ცარციათში მოიაზრება ჩერქეზების ეთნიკური სახელწოდება. ის ვარაუდობს, რომ ქართულ ენაში დადასტურებული ჩერჩეტი, ცერცეტი, წერწეტი და კერკეტი ეთნონიმ ჩერქეზიდან მომდინარეობს (კუფტინი 1949: 40).

ცარციათების საგა მთავრდება ტრაგიკულად, მთელი ხალხის განადგურებით. შესაძლოა ოსურმა ფოლკლორმა ცარციათული თქმულებებით იმ რეგიონში ოდესლაც დაღუპული, ისტორიიდან გამქრალი რომელილაც ტომის ხსოვნა შემოგვინახა. მსოფლიო მითოლოგია იცნობს ამ ტიპის გადმოცემებს დაღუპული ხალხების შესახებ.

ცარციათები და ნართები

ნართებზე ოსებს შემორჩათ უამრავი თქმულება, ცარციათებზე კი გადმოცემების მხოლოდ მცირე ნაწილი. ნართებისა და ცარციათების ეპიკურ თქმულებებს შორის მსგავსება ტიპოლოგიურიც არის და გენეტიკურიც. ცარციათული ისტორიების გადმოსაცემად ოსურმა ხალხურმა შემოქმედებამ ისეთივე მოდელი გამოიყენა, როგორიც დადასტურებულია ნართულ ქადაგში. ნართებსა და ცარციათებზე ცნობები არ დასტურდება არც ერთ ისტორიულ წყაროში და მათი ამბავი შემონახულია მხოლოდ ხალხურ ტექსტებში, ამიტომ მათ ისტორიულ ხალხებად ვერ მივიჩნევთ. ცარციათების მითიურ არსებობას კი ადამიანთა ძვლე-

ბით ამოვსებული მდუმარე აკლდამები ადასტურებენ, რომლებიც, ხალხური გადმოცემებით, ცარციათებს ეკუთვნოდათ.

ოსური ხალხური ტექსტების მიხედვით იქმნება შთაბეჭდილება, თითქოს ნართები და ცარციათები ერთ ეპოქაში ცხოვრობდნენ. მართალია, მათ საცხოვრის ერთმანეთისგან მთა აშორებთ, მაგრამ ნართების ქვეყნიდან ცარციათებამდე მისვლა, ისეთივე ძნელია, როგორც მიღმა სამყაროში მოხვედრა. ცარციათების ქვეყანას ცამდე ასული ცეცხლის ენები იცავენ.

ნართების ეპოსი არ ახსენებს ცარციათებს, მაგრამ ცარციათების ეპოსი მოგვითხრობს ნართ ურუზმაგზე. ცარციათ სუას ქებამ მის ყურამდეც მიაღწია. ურუზმაგს სუას გაცნობა მთელ ქვეყნად ულირდა. ნართების უხუცესი ერთადერთი იყო ნართი დევგმირებიდან, რომელმაც ცარციათების საოცარ ქვეყანაში იმოგზაურა. ცარციათების ქვეყნამდე ცხენის სამი თავგანწირული ნახტომით მან ძნელად სავალი გზა განვლო. ცარციათ სუას სიბრძნე, სიმდიდრე და სტუმარმასპინძლობა აღაფრთოვანებს ნართ ურუზმაგს. როგორც ზ. კიკნაძე აღნიშნავს, „ერთმანეთს ხვდება ორი ღირსეული ადამიანი, უცხოობა დაძლეულია, უცხონი ძმები და ახლობლები ხდებიან. არავითარი მტრობა, არავითარი შური ურუზმაგისგან, რომელიც რწმუნდება სუას უპირატესობაში“ (ზ. კიკნაძე 2009: 7). ურუზმაგი თავის ქვეყანაში ბრუნდება სუას ნაჩუქარი ურიცხვი საქონლით, რომელიც ბრძენმა უხუცესმა თანაბრად გაუნანილა ნართებს, თავისი წილიდან კი დიდი საღვთო გადაიხადა, სუას სახელი ნართებსაც გააცნო, იქაც სანაქებო გახადა.

ნართებისა და ცარციათების ეპიკურ თქმულებებს შორის არის სიღრმისეული მსგავსება. ისევე როგორც ნართები, ცარციათებიც დევგმირები არიან. ისინი გამუდმებით იბრძვიან, გამოირჩევიან განსაკუთრებული ფიზიკური ძალითა და მოხერხებულობით.

ნართების ეპოსში გვხვდება ტყუპების მოტივი (ახსარი და ახსართაგი, ურუზმაგი და ხამიცი), რაც დამახასიათებელია აგრეთვე ცარციათული თქმულებებისთვის (ახვი და ნალვილა, ბურაბერდი და ბურანაგი).

ნართებიცა და ცარციათებიც ენათესავებიან დონბედთორებს, დონბედთირების ქალები მათ ცოლებად მოჰყავთ; ნართები და ცარციათები ხან მტრობენ და ხანაც მეგობრობენ ზეციურ არსებებთან.

ნართებშიც და ცარციათებშიც ცივილიზაციის საწყისების შემოტანა ქალს უკავშირდება, ნართებში – სათანას, ცარციათებში – ქალის სახით პერსონიფიცირებულ ბონვარნონს.

ცარციათებსაც ნართებივით ნადიმებისა და საღვთოების გადახდა უყვარდათ. ისინი უზარმაზარ სუფრებს შლიდნენ, რომელსაც კაცი ბოლოს თვალს ვერ მიაწვდენდა. ცარციათებმაც ნართებივით შეუდარებელი მოლენა, ცეკვა და სიმღერა იცოდნენ.

ნართი გმირების ცხოვრებაში საპედისნერო როლს თამაშობს „ნართების ბოროტი გენია“ – სირდონი, ცბიერი, ჯადოსანი და მაქცია. მას ეშმაკური რჩევებით დალუპვისაკენ მიჰყავს ნართები. ამ ფუნქციას ცარციათების თქმულებებში ასრულებს ქალი პერსონაჟი მიმი, ბუნებით ქაჯი და ეშმაკი, რომელსაც უბედურება მოაქვს ცარციათებისთვის.

ნართებისა და ცარციათების ეპიკურ ტექსტებს ყველაზე მეტად აახლოვებს ჰუბრისის მოტივი. ნართებმა და ცარციათებმა უარყვეს ზეცისკენ მიმავალი გზა, დაივიწყეს ღმერთი, სახლებსაც მაღალი კარები შეაბეს, რომ ღმერთს არ ეფიქრა, თაყვანს მცემენო. „მაღალი კარები“ მათ ამპარტავნობაზე მიგვანიშნებს.

„არ უნდოდა ღმერთს ცარციათების ამონყვეტა, მაგრამ ისინი ისე გათამამდნენ, ღმერთიც დაივიწყეს, თავიანთი სალო-ცავებიც მიატოვეს“, – მოგვითხრობს ხალხური ტექსტი (თქმულებები 2009: 58).

ნართების ეპოსიც და ცარციათული თქმულებებიც საზოგადოების ღმერთთან დაპირისპირებით მთავრდება. ორივე ხალხი ღვთის სასჯელით იღუპება: „ღმერთმა ცარციათებს ჭირი მოუვლინა და მაინც ვერ გატეხა. ჭირსაც გაუმაგრდნენ. მაშინ ღმერთმა ცეცხლის ღვთაებას სთხოვა და ცეცხლი წაუკიდა ცარციათებს. მათი უმეტესობა ამ ცეცხლში დაიწვა. სანამ შეეძლოთ, თავიანთი მიცვალებულები აკლდამებში შეჰქონდათ, მაგრამ აკლდამები გვამებით გაივსო... ვინც გადარჩა, ისინი მაინც არ ტყდებოდნენ. მაშინ ღვთის ნებით, მიწა გაიპო და დიდი ზვავი წამოვიდა. ზვავს კი ცხელი ამღვრეული მასა და დიდი ცხელ-ცხელი ქვები მოჰქონდა. ცარციათები, რომლებიც ომს გადაურჩნენ, ზვავის ქვეშ მოყვნენ... გაქრნენ ცარციათები“ (თქმულებები 2009: 121).

ნართებიც და ცარციათებიც ჰუბრისის მსხვერპლი გახდნენ. ღმერთმა ისინი დასაჯა და აღგავა პირისაგან მიწისა. ეს არ უნდა იყოს ფორმალური დამთხვევა. ჰუბრისის პრობლემა ნიშანდობლივია ოსი ხალხის ფოლკლორისთვის, რომელიც გმობს სისასტიკეს, მტრობას, ქედმაღლობასა და ამპარტაცნობას.

ლიტერატურა

ალბოროვი 1927: Алборов Б., Этноним „Царциате“ осетинских народских сказаний, www.darial-online.ru/.../alborov.shtml.

ანდრეზები 2009: ზ. კივნაძე, ანდრეზები (აღმოსავლეთ საქართველოს მთიანეთის რელიგიურ-მითოლოგიური გადმოცემები), თბ., 2009.

ბარაქოვა 1936: Баракова Е. Е., Этнографические записи в Уаджироне, 1936.

თოფჩიშვილი 2009: რ. თოფჩიშვილი, ეთნიკური პროცესები შიდა ქართლში, კრებულში „საქართველოში არსე-

- ბული კონფლიქტები და მშვიდობის პერსპექტი-
ვები**, თბ., 2009.
- კიკნაძე 2009:** ზ. კიკნაძე, ცარციათების აღსასრული, წიგნიდან „ოსური თქმულებები“, მასალები შეკრიბეს და წიგ-
ნი შეადგინეს ნ. ბეჭიევმა და ნ. პოპიაშვილმა, 2009.
- კოკიევი 1928:** Кокиев Г. Ф., Склеповые сооружения горной Осе-
тии, Владикавказ. 1928.
- კუფტინი 1949:** Куфтин Б. А., Археологическая маршрутная экспеди-
ция 1945 года в юго-осетию и имеретию, Тб., 1949.
- მამისიმედიშვილი 2008:** ხ. მამისიმედიშვილი, პანკისი, წარსუ-
ლი და თანამედროვეობა, თსუ გამომცემლობა,
თბ., 2008.
- მამისიმედიშვილი 2010:** ხ. მამისიმედიშვილი, ცარციათების
აღსასრული, ჰუმანიტარულ კვლევათა უურნალი
„კადმოსი“, 2, ილიას სახელმწიფო უნივერსიტე-
ტის გამომცემლობა, თბ., 2010.
- მეგრელიძე 1984:** ი. მეგრელიძე, სიძველები ლიახვის ხეობაში,
თბ., 1984.
- მელიქეთ-ბეკოვი 1924:** Меликшт-Беков Л., „К Археологии и этно-
логии Туальской Осетии“, ЗНА, вып. 1, Тифлис, 1924.
- ოსური თქმულებები 2009:** ოსური თქმულებები, მასალები შეკ-
რიბეს და წიგნი შეადგინეს ნ. ბეჭიევმა და ნ. პო-
პიაშვილმა, 2009.
- პფაფი 1872:** Пфаф В., Описание путешествия в Осетию, Кабарду
и Дигорию. В кн.: Кавказе. Т.2. Тифлис, 1872.
- თაყაზოვი 2009:** Таказов Ф., Южные осетины сохранили еще более
древний эпос, чем нартский (www.iriston.info).
- ჩურსინი 1925:** Чурсин Г.Ф., Осетины, Этнографический очерк,
Тиф., 1925.
- ძველი 1913:** ძველი საქართველო, II, ტფ., 1911-1913.



ପିଲାମୀଳ କର୍ମଚାରୀ



ფიზიკურ-გეოგრაფიულმა და კლიმატურმა პირობებმა მნიშვნელოვანი გავლენა მოახდინა კავკასიის მაღალმთიან ხეობებში მცხოვრები ოსი ხალხის სამეურნეო საქმიანობაზე. მეურნეობის წამყვან დარგებს ოსებში, მცირემინიანობის მიუხედავად, მიწათმოქმედება და მეცხოველეობა წარმოადგენდა. ოსურ ფოლკლორში მნიშვნელოვანი ადგილი უკავია ისეთ ლექს-სიმღერებს, რომლებიც შრომის პროცესში სრულდება და სრულად ასახავს ოსი ხალხის სამეურნეო საქმიანობას. მკვლევარებს შრომის პოეზია სიტყვიერი ხელოვნების ერთ-ერთ უძველეს ჟანრად მიაჩნიათ, რომლის მეტრსა და სტრუქტურას სწორედ შრომის რიტმული თანმიმდევრობა განსაზღვრავს. მუშაობის დროს სიმღერისა და შრომის რიტმი სრულად შეესაბამება ერთმანეთს, ამიტომ სიმღერა უადვილებთ ადამიანებს შრომის პროცესსა და ზრდის მის ნაყოფიერებას. შრომის გარეშე ადამიანის ამქვეყნიური არსებობა წარმოუდგენელია. სწორედ შრომის საშუალებით აღწევს ადამიანი ფიზიკურ და სულიერ სრულყოფას.

ბიბლიური და ბაბილონური ტრადიციის მიხედვით, ადამიანის უმთავრესი დანიშნულება იყო მიწის დამუშავება და ღმერთების სამსახური: „აიყვანა ადამი უფალმა ღმერთმა და დაასახლა ედემის ბალში მის დასამუშავებლად და დასაცავად“ (დაბადება 2: 15). მიწის დამუშავება გახდა ადამიანის ძირითადი საქმიანობა წუთისოფელშიც. სამოთხიდან გამოდევნის შემდეგ უფალმა ადამს მიწის მუშაკობა დააკისრა: „გაუშვა იგი უფალმა ღმერთმა ედემის ბალიდან, რომ დაემუშავებინა მიწა“ (დაბადება 3: 23). სხვადასხვა ხალხთა მითები მიუთითებენ მიწათმოქმედების ზებუნებრივ წარმოშობაზე, განსაკუთრებით თვალსაჩინოა ეს ბერძნულ სამყაროში, სადაც მიწათმოქმედება ქალ-

ლმერთ დემეტრას მიერ აღმოჩენილად და დაარსებულად არის მიჩნეული.

ოსური ზეპირსიტყვიერება სრულ თანხმობაშია ბიბლიასა თუ ძველ მითოლოგიებში გამოხატულ თვალსაზრისთან, რომ ადამიანებმა შრომა და მიწის დამუშავება ზეციური არსებების დახმარებით ისწავლეს. ამიტომ, ოსური ხალხური ტექსტების მიხედვით, ადამიანთა საქმიანობის არაერთი დარგი: მიწათმოქმედება, ლუდის დუღება, მეცხოველეობა – საკრალურ სფეროს განეკუთვნება. შრომის ლექს-სიმღერებში ხშირად მონაწილეობენ ან ხსენდებიან ცის ბინადრები, რომლებსაც ოსები უხვ მოსავალს, საქონლის გამრავლებას და ნაწველ-ნადლვების ბარაქიანობას შესთხოვდნენ.

ოსური ხალხური შრომის ლექს-სიმღერები დაკავშირებულია ამ ხალხის მეურნეობის ტრადიციულ დარგებთან. ლექსებში აისახა შრომის პროცესი, სამეურნეო საქმიანობასთან დაკავშირებული რწმენა-წარმოდგენები და წეს-ჩვეულებები.

მეურნეობის ზოგიერთი დარგი ხანგრძლივ და მძიმე ფიზიკურ შრომას მოითხოვდა, ამიტომ მასში რამდენიმე ადამიანისა-გან შემდგარი ჯგუფი მონაწილეობდა. შესაბამისად, კოლექტიური შრომის პროცესში სიმღერაც გუნდურად სრულდებოდა. თუ ერთი ადამიანი მუშაობდა, მაშინ მისი თანხმელები სიმღერაც ინდივიდუალურ შემოქმედებას განეკუთვნებოდა.

ოსურ ტრადიციულ საზოგადოებაში შრომითი საქმიანობა განაწილებული იყო ქალებსა და მამაკაცებს შორის. ამიტომ ზოგიერთი შრომის სიმღერა მიეკუთვნებოდა ქალთა რეპერტუარს და ზოგსაც მხოლოდ მამაკაცები ასრულებდნენ. საქმიანობის სფეროების განაწილებისა და მათი შესრულების პრაქტიკის მიხედვით ოსური შრომის ლექს-სიმღერები ორ ჯგუფად იყოფა: ა) ქალთა გუნდური და ინდივიდუალური შრომის ლექს-სიმღერები და ბ) მამაკაცთა გუნდური და ინდივიდუალური შრომის ლექს-სიმღერები.

პურეული მოსავლის სიმღერა „დოვლათის ფრინველი“

ოსურ ფოლკლორში რამდენიმე ვარიანტად არის ცნობილი ხალხური სიმღერა „დოვლათის ფრინველი“, რომელიც მიწათ-მოქმედების ზეციურ წარმომავლობასა და მარცვლეულ კულ-ტურათა მოყვანის ტრადიციას გადმოგვცემს.

ქართულ ენაზე სხვადასხვა წყაროდან ამ ტექსტის ორი ვერსია უთარგმნიათ. ერთი სიმღერის – „ფეტვის უხვი მოსავა-ლი მოვიდა“ – პოეტური თარგმანი ეკუთვნის გიორგი კალანდა-ძეს (კავკასიური პოეზია 1959: 87-88), ხოლო მეორე – „დოვლა-თის ფრინველი“ ოსურიდან თარგმნეს ნაირა ბეპიევმა და მერი ცხოვრებოვამ (ოსური ზეპირსიტყვიერება 2005: 37-38). 6. ბეპი-ევისა და მ. ცხოვრებოვას მიერ ოსური ენიდან თარგმნილი ტექ-სტი, ბუნებრივია, დედანთან უფრო მეტ სიახლოვეს ამჟღავნებს (იქვე: 164-166). „დოვლათის ფრინველი“ გასული საუკუნის და-საწყისში დიგორიაში ხაძიმეთ ხადაევისგან ჩაუწერია ხალხური ტექსტების შეკრებს, სახალხო მასწავლებელს მიხაილ გორდა-ნოვს. ორივე ლექს-სიმღერა („ფეტვის უხვი მოსავალი მოსულა“ და „დოვლათის ფრინველი“) ერთი სიმღერის („Ec xyap“) სხვა-დასხვა ვერსიას წარმოადგენს. ისინი ავსებენ ერთმანეთს და ოსური მითოპოეტური შემოქმედებისა და მიწათმოქმედებას-თან დაკავშირებული ტრადიციების შესახებ მნიშვნელოვან ცნობებს შეიცავენ.

სიმღერა „დოვლათის ფრინველი“ სრულდებოდა პურეული მოსავლის მოყვანასთან დაკავშირებულ საკულტო რიტუალებ-ზე. ერთი იმართებოდა გაზაფხულზე, პირველი ხნულის გავლე-ბის დროს, როდესაც ოსები „ხორხორობას“ ან უბრალოდ პურე-ულის დღეს – „ხორ ბონს“ დღესასწაულობდნენ და, მეორე, შე-მოდგომით, პურეული მოსავლის აღების დროს, „ხორ სართ

ქუვდის“ (პირველად მოწეული მოსავლის ტრაპეზი) დღესასწაულზე, რომლითაც მთავრდებოდა წლის სამიწათმოქმედო სამუშაოები.

სასიმღერო ტექსტი „დოვლათის ფრინველი“, ისევე როგორც ზოგადად შრომის ლექს-სიმღერები, გამოირჩევა განსაკუთრებული რიტმული აღნაგობით და მის პოეტურ ორგანიზებაში მნიშვნელოვან როლს ასრულებს რეფრენი, რომელიც ყოველ სალექსო ტაქტს მოსდევს: „არის მარცვლეული, არის მარცვლეული“ (Ec xyap, Ec xyap). როგორც რეფრენიდან ირკვევა, ლექსში პურეულის უხვი მოსავლის აღების სურვილია გამოთქმული. მაგიური შეძახილით – „Ec xyap, Ec xyap“ – კოლექტიური შრომის მონაწილეებს რიტუალურად უნდა უზრუნველყოთ მოსავლის სიუხვე. შრომის პროცესში სოლისტი წარმოთქვამდა ძირითად ტექსტს, გუნდი კი მღეროდა რეფრენს, რომელიც ქმნის საზეიმო განწყობილებას. რადგან სიმღერა „Ec xyap“ კოლექტიური შრომის პროცესში გუნდურად სრულდებოდა, ტექსტი, ჟანრული თვალსაზრისით, შრომის პოეზიას უნდა მივაკუთვნოთ.

მაღალმთიანეთში მცხოვრებ ოსებს განვითარებული ჰქონდათ მეცხოველეობა, სამაგიეროდ, სახნავ-სათესი ფართობი არ ჰყოფნიდათ და საჭირო რაოდენობის მარცვლეული ვერ მოჰყავდათ. პანკისელ ოსებს ჰქონდათ ჩვეულება: როცა ხელებზე ბევრ წყალს ასხამდნენ, ამბობდნენ: „ხორ! ხორ! ხორ!“ სიტყვა „ხორ“ (xop) ოსურ ენაზე ჰქვია მარცვლეულს, რომლითაც მთის მოსახლეობა ვერ კმაყოფილდებოდა. ხელებზე ჭარბად დასხმული წყლის დროს ნატრობდნენ, მარცვლეულიც ამდენი იყოს (მამისიმედიშვილი 2008: 196). პურეულის მოსავალს, ოსების რწმენით, ხორვაცილა (მარცვლეულის ელია) მფარველობს. სასიმღერო ფორმულა „არის მარცვლეული, არის მარცვლეული“ (Ec xyap, Ec xyap), როგორც მაგიური ფორმულა, გვხვდება ოსუ-

რი ხალხური პოეზიის სხვა ნიმუშებშიც, სახელდობრ, ლუდის დუღების სიმღერის დიგორულ ვარიანტში:

«еси мæлгъæ үæд фæттахтæй, ес хуар, зæгъетæ!

Æхсæрæ қьотæрбæл – бор хумæллæг, ес хуар, зæгъетæ!

(ეს ფრინველი როცა მოფრინდება, „არის ხვავიო“, თქვით!

ბუჩქъ – ყვითელი სვიაა, „არის ხვავიო“, თქვით!).

ლექს-სიმღერას „დოვლათის ფრინველი“ („Ec xyap“) აქვს მითოლოგიური სიუჟეტი და გამოირჩევა საკრალური ელემენტების სიმდიდრით. მას საფუძვლად უდევს კოლექტიური წარმოდგენები. სასიმღერო ლექსის მიზანი არ არის მითიური ქმედებების ვრცელი ვარიაციებით წარმოდგენა, რადგან არქეტიპული მოვლენების ხსოვნა და ცოდნა ცოცხლობს საზოგადოებაში, ამიტომ ლექსი ძუნნად გადმოგვცემს ძირითად და არსებით მოვლენებს. მთელი ყურადღება გადატანილია ლექსის რიტმულ ორგანიზებასა და უხვი მოსავლის გამოწვევის მიზნით მაგიური ფორმულების წარმოთქმაზე. სარიტუალო სიმღერის მიზანია საწყისთან, სათავესთან დაბრუნება. „სათავე კი, – მ. ელიადეს სიტყვებით, – არის ენერგიის, სიცოცხლისა და ნაყოფიერების სასწაულებრივი ამოფრქვევა, რომელიც სამყაროს შესაქმის დროს მოხდა“ (ელიადე 2009: 31).

ტექსტი რამდენიმე მოქმედებისგან შედგება: 1. ციდან მოფრენილი დოვლათის ფრინველისა და კეთილი დიასახლისის შეხვედრა; 2. ლუდიანი თასითა და სამი კვერით ლოცვა-ვეძრების აღვლენა; 3. ზეციერთა თათბირი ვარფის მწვერვალზე; 4. ირმების შებმა უღელში ხნულის გასავლებად; 5. ზეციერთა მეორე შეკრება და თათბირი კურფის მთაზე; 6. პირველი გუთნის გამოჭედვა, თუთირის შავი ხარების შებმა უღელში და პირველი ხნულის გავლება; 7. უხვი მოსავლის მიღება და მოწეული მარცვლეულის დანიშნულება.

სიმღერა „დოვლათის ფრინველი“, მართალია, შრომის, კერძოდ, მოსავლის აღების პროცესში სრულდებოდა, მაგრამ ლექსში ჩართულია წარმოშობის მითი. ტექსტი აცხადებს, რომ მიწათმოქმედება და მარცვლეულის მოყვანის კულტურა ზეპუნებრივი, ზეციური წარმომავლობისაა. ხალხური რწმენით, მარცვლეულს ბარაქა რომ ჰქონოდა, მოსავლის ყოველი აღების დროს აუცილებელი იყო რიტუალურად თავდაპირველი, არქეტიპული ქმედებების გამოხმობა, გახსენება და გამეორება. ტექსტის მიხედვით, ოდესალაც მოხდა ისეთი მოვლენა, რის შემდეგაც ადამიანებმა მიწის დამუშავება და მარცვლეულის მოყვანა დაიწყეს. უხვი მოსავლის მისაღებად საჭირო იყო მისი წარმოშობის ცოდნა. ამიტომ სიმღერით „დოვლათის ფრინველი“ იხსენებდნენ, თუ როგორ მოიხნა სულ პირველად მიწა და როგორ მოიწიეს ადამიანებმა პირველი მოსავალი. სარიტუალო შრომის სიმღერა „დოვლათის ფრინველი“ („Ec xyap“) შეიცავს საწყისთა მითიურ ცოდნას. თუმცა ეს არ არის აბსტრაქტული ცოდნა, მხოლოდ თეორიული ცნობისმოყვარეობის დასაკმაყოფილებლად. მითი, როგორც სცენარი, ადამიანებს უხვი მოსავლის მისაღებად სთავაზობს სამაგალითო მოდელს, რომელსაც რიტუალი ეფუძნება. მ. ელიადეს აზრით, „საკმარისი არ არის ვიცოდეთ მხოლოდ „საწყისი“. საჭიროა ამა თუ იმ საგნის შექმნის მომენტის აღდგენაც. ეს კი სრულდება „უკან დაბრუნებით“, საწყისი, ძლიერი, საკრალური დროის აღდგენით“ (ელიადე 2009: 36).

ოსური გენეალოგიური სიმღერა ფოლკლორული სახე-სიმბოლოებით გაძმოგვცემს მარცვლეული მოსავლის თავდაპირველი, მითიური აღების „რიტუალურ განამდვილებას“. ტიპოლოგიური და შედარებითი ანალიზით შესაძლებელი ხდება ტექსტის მითოლოგიური პერსონაჟების ამოცნობა, რომლებიც სულაც არ წარმოადგენდნენ სიმღერის მთქმელ-შემსრულებელ-თათვის საიდუმლოს.

ლექსში მოქმედება ხდება საკრალურ დროში, არქეტიპების ხანაში, როცა პირველად იქმნებოდა საგნები და მოვლენები. ტექსტი ლვთაებრივი გამოცხადებით იწყება: ზეციდან ბედნიერების მომტანი ფრინველი ადამიანთა დასახმარებლად მოფრინდა. ოსურ სიმღერაში დოვლათის ფრინველი იგივე მფარველი ძუარია, რომელიც, აღმოსავლეთ საქართველოს მთიელთა ჯვარ-ხატების მსგავსად, მტრედის, წმინდა ფრინველის სახით ევლინება თავის რჩეულ მკადრეებს. ოსურ სიმღერაში მითიური ამბების გახსენებით თითქოს დოვლათის ფრინველს ხელახლა იწვევდნენ. დატკეპნილ კალოზე ფრინველის აღით მოვლენილ მფარველ ძუარს კეთილი დიასახლისი სამხვეწროთი ეგებება და სამ თაფლიან კვერსა და ლუდით სავსე თასს, როგორც ზეციური არსებებისთვის აუცილებელ შესანირს, წინ დაუდგამს. სიმღერის მთქმელი არ აკონკრეტებს კეთილი დიასახლისის ვინაობას. ვინაობის გამხელის გარეშეც კარგად იცის რიტუალის მონაწილე საზოგადოებამ, თუ ვინ შეიძლებოდა ყოფილიყო ის, ვინც ღირსი გახდა ზეცის ბინადარს შეხვედროდა. ასეთი, ოსური ტრადიციით, რა თქმა უნდა, მხოლოდ სათანა, ზეციერთა შთამომავალი და მოკვდავთა შორის ერთადერთი ქალი იქნებოდა, რომელსაც ნართების ეპოსი ლუდის გამოგონებასა და საზოგადოებაში ცივილიზაციის საწყისების შემოტანას მიაწერს. „კეთილი დიასახლისი“ ნართების ეპოსში სათანას განუყრელი ეპითეტია. როგორც ვ. აბაევი აღნიშნავს, „ოსურ ენაში ფრაზე-ოლოგიზმად ქცეული გამოთქმა: He' фсин Сатана – „ჩვენი დიასახლისი სათანა“ – ოსი ქალის მიმართ უმაღლესი საქებარი სიტყვაა“ (აბაევი 1988: 8).

სამხვეწროს მირთმევას ტექსტში მოსდევს ლოცვა-ვედრების აღვლენა. კეთილმა დიასახლისმა ფრინველის სახით მოვლენილ მფარველ ანგელოზს ჯეჯილის დასაპურებლად ცვარნამი შესთხოვა.

ნართების ეპოსის მიხედვით, განსაკუთრებული განსაცდე-ლის ჟამს მხოლოდ სათანა, ნართების კეთილი დიასახლისი, აცხობდა სამ თაფლიან კვერს, რომლებიც, რონგით ან ლუდით სავსე დოქტან ერთად, მთის მწვერვალზე შესაწირად მიჰქონდა. იქიდან კი რჩმენით აღვისილი ქალი ლმერთს მფარველობასა და დახმარებას, ზოგჯერ კი ამინდზე ზემოქმედებას ევედრებოდა. სათანას ლოცვის ეპიზოდი ნართების ეპოსში რამდენჯერმე მეორდება: „საქმე ცუდად რომ იყო, სათანა უმალ მიხვდა. სასწრაფოდ გამოაცხო სამი ცალი თაფლიანი კვერი, სალოცავ მთაზე ავიდა, ეს სამი თაფლიანი კვერი და რონგით სავსე დოქი აიტანა და ლოცვა აღავლინა: „ლმერთო გამჩენო. რაკი შემქმენი, ეს თხოვნა ამისრულე...“ (ნართები 1988: 223). როგორც წესი, ქალი მხოლოდ განსაკუთრებულ, გამოუვალ სიტუაციაში აძლევს თავს უფლებას ღვთისმსახურება აღასრულოს. ამ თვალსაზრისით საყურადღებოა ვაჟა-ფშაველას პოემა „ბახტრიონში“ პერსონაჟი სანათა, რომელიც საყოველთაო განსაცდელის ჟამს ტრადიციის წინააღმდეგ წავიდა და ხატში კულტმსახურება აღავლინა.

ოსურ სიმღერაში „Ec xyap“ დოვლათის ფრინველმა კეთილი დიასახლისის ვედრება შეისმინა და იქიდან ვარფის, წმინდა მთის, მწვერვალზე აფრინდა. იმ გზით უნდა აიტანოს მფარველმა წმინდანმა ხორციელთა აღვლენილი ლოცვა-ვედრება ზეცის ბინადრებთან.

„დოვლათის ფრინველი გაფრინდა,
უხვად გვაქვს ხორბალი, უხვად გვაქვს ხორბალი,
ვარფის მწვერვალზე ჩამოჯდა.
უხვად გვაქვს ხორბალი, უხვად გვაქვს ხორბალი,
მის ირგვლივ შეიკრიბნენ,
უხვად გვაქვს ხორბალი, უხვად გვაქვს ხორბალი,
ყველაფერზე ფიქრობენ,
უხვად გვაქვს ხორბალი, უხვად გვაქვს ხორბალი,

კაცს რითი შევეშველოთო.

უხვად გვაქეს ხორბალი, უხვად გვაქვს ხორბალი!“

(ოსური ზეპირსიტყვიერება 2005: 37).

სასიმღერო ტექსტი არაფერს გვეუბნება, თუ ვინ შეიკრიბ-ნენ დოვლათის ფრინველის ირგვლივ ვარფის მთის მწვერვალ-ზე, ლექსში ნაკლები ადგილი რჩება ეპიკური ამბების მოსათხ-რობად. ნართების ეპოსის შემქმნელმა ხალხმა კარგად იცის, რომ ადამიანთა დასახმარებლად მფარველი წმინდანები იკრი-ბებიან. ნართების ეპოსი მოგვითხრობს ზეციერთა ერთ-ერთი ამგვარი შეკრების შესახებ, როცა კერის მფარველ საფასთან სტუმრად შეკრებილი ლვთაებები ზებუნებრივი უნარებით აღ-ჭურვავენ სოსლანს და მას ჩუქნიან რკინის გუთანს მიწის დასა-მუშავებლად, წყალს – წისქვილის დასაბრუნებლად და ქარს – მარცვლის გასანიავებლად.

რა გადაწყვეტილება მიიღეს ვარფის მთის მწვერვალზე შეკრებილმა ძუარებმა? რა მოიმოქმედეს მათ კაცთა დასახმა-რებლად? ლექს-სიმღერა „დოვლათის ფრინველი“ მითიურ ამ-ბავს აცხადებს: მათ პირველი ხნულის გასავლებად პირველი კა-ვი გამოთალეს, რომელშიც ირმები შეაბეს, მაგრამ ირემს ვერ მოახვნევინეს. სიმღერის სხვა ვარიანტით, ირმების გარდა, უღელში ჯიხვების შებმაც უცდიათ:

„და გუთანში ხარიმები გაუბამთ.

გუთანს ტყისკენ ეწევიან ირმები.

ირემი ხომ საქონელი არ არის! –

ხატებს ტყეში გაუშვიათ ირმები.

დაუჭირავთ გრძელბეწვება ჯიხვები

და უღელი ახლა მათთვის დაუდგამთ.

გუთანს მთისკენ ეწევიან ჯიხვები.

ჯიხვებისგან აბა რა ხეირია! –

ხატებს მთაში გაუშვიათ ჯიხვები.“

(კავკასიური პოეზია 1959: 87-88).

ირემი და ჯიხვი გარეული ცხოველები არიან და, ბუნებრივია, ველურ ცხოველს ადამიანი მინას ვერ მოახვევინებს. ამიტომ მათ, როგორც ადამიანებისთვის უცხოს, ძუარები კაცთა საცხოვრისიდან უცხო, ველურ გარემოში, ტყეში ან მთაში უშვებენ. ზ. კიკნაძის აზრით, „მას შემდეგ, რაც ადამიანი, რომელიც, როგორც შესაქმის გვირგვინი, მთელი ცხოველთა სამყაროს პატრონად იყო განწესებული, მოწყდა ბუნებას და მასთან ერთად გაუუცხოვდა გარეულ პირუტყვს, დაკარგა მასზე გავლენა და პატრონობა, გარეულს სხვა პატრონი გაუჩნდა, რომელსაც თითქმის ყველა ტრადიციაში ერთი სახელი ეწოდება – „ნადირთ პატრონი“ ან „ნადირთ მწყემსი“ (კიკნაძე 2002: 215).

მიწა კვლავ მოუხვნელი რჩებოდა. ისევ გაფრინდა დოვლა-თის ფრინველი და ახლა კურფის თავზე შემოჯდა. მთქმელი-მომღერალი, როგორც მოკვდავი და ხორციელი არსება, იცავს მფარველ წმინდანებთან ურთიერთობის საკრალურ ეტიკეტს და ვერბალურად არ გადმოგვცემს კურფის წმინდა მთაზე ძუართა თათბირს. ის მხოლოდ შედეგს აღნიშნავს: ზეცის ბინადრებმა გამოჭედეს რკინის გუთანი, რომელშიც თუთირის შავი ხარები შეაბეს. ფართო ხნული გრძლად გაავლეს. „ – აი, მაშინ კი მოხნეს!“ – აცხადებს ტექსტი.

ლექსი „დოვლათის ფრინველი“ თითქოს სამყაროს საკრალურ შენებას უმღერის, რომელმაც, ფაქტობრივად, ეპოქალურ მოვლენას დაუდო სათავე და სამყაროს სტრუქტურა შეცვალა. ტექსტში ერთმანეთს უპირისპირდება ორი არსება: ირემი და ხარი, შინაური და გარეული ცხოველი. ხარს თუთირი პატრონობს, შინაურ ცხოველთა მფარველი წმინდანი. პირველი ხნული ზეცის ბინადრებმა თუთირის შავ ხარებს გაატანინეს.

„ჩვენ თუთირმა ხარი გამოგვიგზავნა, –
შავი ხარი, თეთრრქიანი, თეთრტუჩია.

და შეუბამთ შავი ხარი გუთანში.

სულ გადუხნავს იმ დალოცვილს მინდვრები“

(კავკასიური პოეზია 1959: 88).

თუთირის ხარებში იგულისხმება თუთირის დღეს დაბადებული ხარები, რომლებსაც მგელი (რადგან თუთირი მგლების პატრონად ითვლებოდა) ზიანს ვერ მიაყენებდა. თუთირის დღეს დაბადებულ ხარებს, ნართების ეპოსის მიხედვით, მინიჭებული ჰქონდათ განსაკუთრებული ძალა. გარდაცვლილი ნართი ბათ-რაძის ცხედრის სოფიოს აკლდამასთან მიტანა, ღმერთის რჩევით, მხოლოდ თუთირის დღესასწაულზე დაბადებულმა ორმა მოზვერმა შეძლო.

თუთირის დღეს დაბადებულ შავ ხარებს ჰქონდათ რჩეულობისა და სიწმინდის გარეგნული ნიშნებიც: თეთრი რქები და თეთრი ტუჩები. ოსების რწმენით, მიწა, რომელსაც თუთირის დღეს დაბადებული ხარები მოხნავდნენ, უხვ მოსავალს მოიწევდა. ამიტომ, ლექსის მიხედვით, შედეგმაც არ დააყოვნა: ისეთი უხვი მოსავალი მოვიდა, თავთავი ურემს სწვდებოდა, მწყრები კი თურმე სიხარულით სიმდს ცეკვავდნენ.

თემატური თვალსაზრისით, ოსური რიტუალური ლექსი „დოვლათის ფრინველი“ მნიშვნელოვან მსგავსებას ამჟღავნებს ქართულ ხალხურ სიმღერასთან „ორშაბათობით აშენდა.“ ამის შესახებ ლექსის თარგმანის კომენტარებში გ. კალანდაძემაც აღნიშნა (კავკასიური პოეზია 1959: 177). თუმცა მკვლევარი არც მსგავს მოტივებზე მსჯელობს და არც განსხვავებულ ელემენტებზე მიუთითებს. ოსურ ხალხურ ლექსში გვხვდება ქართული ტექსტისთვის ცნობილი სიმბოლოები, კერძოდ, მთა – ცისა და მიწის კავშირის გამოხატულება, ანგელოზები, ხარი და სხვ. „ორშაბათობით აშენდა“ ხარის ადამიანის სამსახურში ჩადგომას გადმოგვცემს. ქართული ხალხური ლექსის მიხედვით, უკი-

დურესი გაჭირვების ჟამს „პირნათლიერმა“ ხარმა ნებაყოფლობით იტვირთა ადამიანთა სამსახური:

„ადამიანის შენახვა ვერავინ იდვა თავზედა,
ხვნა-თესვა, ფარცხვა და ზიდვა გაჭირდა მეტად ძალზედა.
ხარმა თქვა, პირნათლიერმა: –მე დამაწერეთ რქაზედა.“
(კოტეტიშვილი 1961: 150).

ქართული ლექსი „ორშაბათობით აშენდა“ ხარის ადამიანის სამსახურში ჩადგომის მოტივს ზებუნებრივ ძალებთან აკავშირებს. პირუტყვის ნებაყოფლობითი არჩევანით გახარებულმა ანგელოზებმა ხარს ორივე თვალი დაუკოცნეს, რქებზე წყვილი სანთელი დაუნთეს, შვიდი სარტყელი უსახსოვრეს და ქვეყანაზე ადამიანთა დასახმარებლად გამოუშვეს:

„მიცვივდნენ ანგელოზები, დაჰკოცნეს ორთავ თვალზედა.
ჩამოქნეს წყვილი სანთელი, მიაკრეს ორსავ რქაზედა.
შვიდიც უბოძეს სარტყელი, გაგზავნეს ქვეყანაზედა:
ნადი, ხარო, იმუშავე, ერთგულად მთა და ბარზედა.“
(კოტეტიშვილი 1961: 150).

ქართული და ოსური ხალხური ტექსტებისთვის საერთოა ხარის ადამიანთა სამსახურში ჩადგომის ზეციური წარმომავლობის მოტივი. ოსური სიმღერა „დოვლათის ფრინველი“ რიტუალის თანხლებით სრულდება, ხოლო ლექსში „ორშაბათობით აშენდა“ – რიტუალის გარეშე. სამაგიეროდ ტექსტში გადმოცემული ანგელოზთა ქმედება-კურთხევა, ხარის რქებზე სანთლების დანთება დადასტურებულია საქართველოში პირველი ხნულის გავლების რიტუალში. გაზაფხულზე პირველ ხნულს აღმოსავლეთ საქართველოს მთიანეთში ჯვარის მამულში გაავლებდნენ. ხვნის დაწყებამდე კულტმსახური დაილოცებოდა და როგორც მაშინ, როცა ანგელოზები აგზავნიდნენ ხარს ადამიანთა სამსახურში, ხუცესი ახლაც მის რქებზე წყვილ სანთელს ანთებდა.

რიტუალური სიმღერა „დოვლათის ფრინველი“ გვიჩვენებს, თუ რამდენად მნიშვნელოვანია საწყისთა ცოდნა, ნაყოფიერებისა და ბარაქიანობის მიზნით წინაპართა და ზეპუნებრივ არსებათა ქმედებების „რიტუალური განამდვილება“. ლექსი, ისევე როგორც ზოგადად მოთოლოგიური ტექსტები, წინარენარსულში, ანუ მითოსურ დროში მომხდარ მოვლენას გადმოგვცემს, რომელიც რიტუალურად ხდება ახლაც, აწმყოშიც, სიმღერის შესრულების პროცესში და მოხდება მომავალშიც. რეფრენი – „უხვად გვაქვს ხორბალი, უხვად გვაქვს ხორბალი“ (Ec xyap, Ec xyap) – ვერბალურად და სტრუქტურულად სიმღერაში აწმყოს გამოხატავს. ტექსტში აქტუალურია საწყისი და აწმყო, ხოლო მათ შორის განვლილი დრო კი შეკუმშული. ამიტომ სიმღერა წარსულის მითიურ ამბებს პირდაპირ აწმყოსა და მომავლთან აკავშირებს, მომავალშიც უხვი მოსავლის აღების სურვილს გამოხატავს:

„წელს როგორი მოსავალიც დაგვიდგა,
უხვად გვაქვს ხორბალი, უხვად გვაქვს ხორბალი,
კვლავ ისეთივე მოგვივიდეს.
უხვად გვაქვს ხორბალი, უხვად გვაქვს ხორბალი!“
(ოსური ზეპირსიტყვიერება 2005: 38).

მოსავლის ყოველ აღებას სიმღერა მითიური პარადიგმების შესატყვისად აცხადებს. ოსური სიმღერა „დოვლათის ფრინველი“ თითქოს კულტმსახურების ნაწილია. იმის გამო, რომ შრომა, მარცვლეულის მოყვანა, ტექსტის მიხედვით, საკრალურ ქმედებად არის მიჩნეული, ტექსტი მთავრდება დაპირებით, აღთქმის დადებით:

„ამ პურს საღვთოში (ქუვდში) მოვიხმართ,
იყოს მარცვლეული, იყოს მარცვლეული“
(Они кувдән ку хуәрдзинан,

Ec xyap, ec xyap!)

აღსანიშნავია, რომ ლექსის დასასრულს განცხადებულია მოწეული მოსავლის ძირითადი საკულტო დანიშნულება. ზებუნებრივ არსებათა მიმართ მადლიერების ნიშნად ისინი საუკეთესო მარცვლეულს ძუარებში ლუდის მოსადუღებლად და წმინდანების სახელზე სარიტუალო კვერების გამოსაცხობად იყენებდნენ. რელიგიურ დღესასწაულზე სალოცავში ნაკურთხი ლუდი და კვერი კი საბოლოოდ ძუართა სადიდებლად გამართულ საერთო ტრაპეზს, როგორც ოსები უწოდებენ, ქუვდს დაამშვენებს.

მითი, რომელსაც ემყარება შრომის სიმღერა „დოვლათის ფრინველი“, ხელმეორედ აღადგენს პირველსაწყის რეალობას და ადამიანებს სთავაზობს პრაქტიკული ქცევის წესებს. ტექსტში ვლინდება ოსი ხალხის მითოპოეტური აზროვნება და რელიგიური გამოცდილება.

ლუდის მხარშველთა სიმღერა

„არ იცოდე ლუდი – არ იცი სიხარული.
შუმერული ანდაზა“

ლუდს ადამიანები უძველესი დროიდან მოიხმარდნენ რელიგიურ რიტუალებზე ღმერთების სადიდებლად. ლუდი ამშვენებდა სადღესასწაულო სუფრას ძეობებსა და ქორწილებში. მას იყენებდნენ მიცვალებულის დაკრძალვისა და წესის აგების დროს. ლუდი, როგორც ღმერთებისა და ადამიანების საყვარელი სასმელი, ხშირად მოიხსენიება შუამდინარულ და სკანდინავიურ მითებში.

სკანდინავიური მითოსის მიხედვით, ომში გმირულად დალუცულ მეომრებს ასგარდში ელოდებოდათ ოდინის სასახლე – ვალჰალა, სადაც ისინი ასების გვერდით დაიმკვიდრებდნენ ად-

გილს, ღმერთებთან ერთად მიუსხდებოდნენ გაშლილ სუფრას და ლუდს შეექცეოდნენ.

ერთ-ერთი ხევსურული ლექსის მიხედვით, სიკვდილი „ნარჩევ“ ვაჟებს საიქიოში ლუდით გამასპინძლებას ჰპირდება:

„სიკვდილმ თქვა: „სულეთ ჯარს დაესხამ ნარჩევის ვაჟებისასა, წინითი ჩხუჭსა ჩამუდგამ, კოშს ჩამურიგებ რვლისასა“

(შანიძე 1931: 214).

„ნარჩევ ვაჟებში“, ბუნებრივია, იგულისხმებიან ბრძოლაში გმირულად დაღუპული მოყმეები, რომლებსაც საიქიოში, ისევე როგორც ვალჲალას, ოდინის სასახლეში, ლუდით გაუმასპინძლდებიან.

ლუდი, ოსური ტრადიციის მიხედვით, სადლესასწაულო სუფრისა და რელიგიური რიტუალის განუყოფელ ნაწილს წარმოადგენს. ლუდით სავსე თასით ადიდებდნენ ძუარლაგები (კულტმსახურნი) ძუარებსა და მფარველ წმინდანებს. ლუდიანი თასით აცილებდა ბახფალდისაგი მიცვალებულს საიქიო გზაზე. ამიტომ ლუდს ოსურ საზოგადოებაში საკრალური ღირებულება ჰქონდა მინიჭებული. ლუდის ტრადიციული მოხმარების წესრიგეულება ოსებმა დღემდე შემოინახეს.

სხვადასხვა გადმოცემების მიხედვით, ლუდის მომზადება ადამიანებს ღმერთებმა ასწავლეს. ძველეგვიპტური მითის მიხედვით, ღმერთმა ოზირისმა ლუდის მომზადების საიდუმლო რეცეპტი ქურუმებს გაანდო. ლუდის ზეციურ წარმოშობას გვიდასტურებს ოსური სიმღერაც, რომელიც ლუდის გამოგონებას მფარველ წმინდანს – ვასთირჯის მიაწერს:

„ვოი, ლუდიო, ლუდი,
ვასთირჯის გამოგონილი ლუდი!“ "Уай, бағаңы, дам, бағаңы,
Уастырджийы фәлдисгә бағаңы!"
(ოსური სიტყვიერება 2005: 35)

სხვა ვერსით, ლუდი ვასთირჯისა და ძერასას ასულმა, გმირი ნართების გამზრდელმა სათანამ გამოიგონა: „ხეზე ერთი ჩიტი შემოჯდა და ხეზე შემოხვეული სვის სამი მარცვალი აკენკა. მერე გადმოფრინდა და გასაშრობად გაფენილ ხორბალზე დასკუპდა. ალაოს მარცვალს ჩაუნისკარტა და გადაყლაპა. სულ ცოტა ხანში ის ძირს გაგორდა და აფრთხილდა.

მიწაზე მოფართხალე ჩიტი ნართმა ურუზმაგმა დაინახა, აიყვანა ხელში და სათანას მიუყვანა. სათანამ ჩიტი ამბარზე დასვა. ამბრიდან ხორბალს იღებდნენ და მოკლების ნაცვლად უფრო ემატებოდა. გაბრუებული ჩიტი მალე მოსულიერდა. ამან სათანა დააფიქრა. ურუზმაგს ჩიტის ამბავი გამოჰკითხა. მანაც დაწვრილებით მოუთხრო, როგორ შეჭამა ჩიტმა სვის მარცვლები, მერე სველი ალაოს მარცვალი და როგორ გაგორდა მიწაზე.

დაფიქრდა გონიერი სათანა და ჩიტის გაბრუების მიზეზი გამოიცნო. გამოხადა ქერისაგან ლუდი, საფუარად სვის ყვითელი ფოთლები გამოიყენა და ამის შემდეგ ნართებს მშვენიერი, საამო სასმლით უმასპინძლდებოდა“ [ნართები: 98].

ოსური ნართების მსგავსად ფინურ ხალხურ ეპოსშიც ლუდის გამოგონება ქალს მიენერება. კაპომ (ანუ ოსმოთარმა), ფინულ გმირთა წინაპრის, კალევალას ასულმა, პირველად მოადუღა ლუდი ქერისა და თაფლნარევი ალაოსგან. ლუდის დუღების ღირსშესანიშნავ ამბავს ეძღვნება კალევალას მე-20 რუნა, რომელშიც მითიური წინაპრის მიერ ლუდის მომზადება აღქმულია როგორც არქეტიპული ქმედება. ეპოსის მიხედვით, კაპო (ოსმოთარი) ჯერ უნდა გასცნობოდა სასმელის წარმოშობის საიდუმლოს და მხოლოდ ამის შემდეგ უნდა შესდგომოდა ლუდის მომზადებას. მანამდე კი რუნა მოგვითხრობს სვისა და ქერის გაჩენის ისტორიას (კალევალა: 167).

ოსურ ენაზე ლუდს ჰქვია ბაგანი (ნაეგახი). როგორც ჩანს, ოსები უძველესი დროიდანვე იცნობდნენ ამ სასმელს, რადგან

გვხვდება ლუდის აღმნიშვნელი ოსური სახელის შესატყვისი ხორეზმული ფორმა *bakanin*, აგრეთვე, ირანული – *bagni*, რომელიც ბრინჯის, ფეტვის ან ქერისაგან მომზადებულ სასმელს ჰქვია. ფონეტიკურად ოსურ ბაგანთან (*ბაგანი*) დიდ სიახლოვეს ამჟღავნებს ძველი ინდური *bhangha*, *bangha*, რომელიც კანაფის-გან დამზადებულ ნარკოტიკს აღნიშნავს. ვ. აბაევის აზრით, ლუდის ზოგიერთი სახელწოდება (მაგ., ხორეზმული *bakan*) შესაძლოა მიღებულია *kanab* ფორმის (*ბაკან*—*კანაბი*) მეტათეზისით (აბაევი 1958: 244-245).

ისევე როგორც აღმოსავლეთ საქართველოს მთიანეთის ჯვარ-ხატებში, ოსეთშიც სათემო სადღესასწაულო ქუვდის-თვის ლუდი ძირითადად მზადდებოდა საკრალურ ადგილზე, სა-ლოცავის მახლობლად აღმართულ სამეურნეო დანიშნულების ნაგებობაში, რომელსაც ოსურ ენაზე ჰქვია ბაგანსტონი („ნაგანისტონ“) – სალუდე.

ბაგანსტონი, ჯვარ-ხატთა სალუდის მსგავსად, წარმოადგენს არცთუ დიდი მოცულობის დარბაზს. ბაგანსტონში ძირითადად ის ნივთები ინახებოდა, რომლებიც ლუდის მოსადუღებლად სჭირდებოდათ, მათ შორის, დიდი მოცულობის სპილენძის ქვაბები, უზარმაზარი ხის კოდი, რომლის სიმაღლეც ზოგჯერ ორ მეტრსაც აღწევდა. მას, როგორც წესი, ერთი მთლიანი ხისგან თლიდნენ და მას ლუდის დასაწმენდად იყენებდნენ.

ძუარში სამეურნეო საქმეებს უძღვებოდა რამდენიმე კონკრეტული ოჯახი, რომლებსაც ყოველი რელიგიური რიტუალის დასრულების შემდეგ წილისყრით ირჩევდნენ მომდევნო დღესასწაულის მოსამზადებლად და ჩასატარებლად. მათ ევალებოდათ სადღესასწაულო ტრაპეზის მომზადება, ლუდის გამოსახდელად შეშის მოტანა, ქერის შეგროვება, წყლის მოზიდვა, აგრეთვე, გამასპინძლება და სხვა დამსმარე სამუშაოების ჩატარება. აღმოსავლეთ საქართველოს მთიანეთში არჩეულ პირებს,

რომლებიც ხატ-სალოცავების სამეურნეო საქმეებს უძღვებოდნენ, ერქვათ დასტურ-ხელოსნები, ხოლო ოსეთში – ფსმთა (ფყისკიმთა), მასპინძლები. მათ მფარველი წმინდანის მსახურების პერიოდში მოეთხოვებოდათ განსაკუთრებული სინმინდის დაცვა და სიმშვიდის შენარჩუნება, ეკრძალებოდათ ბილნისიტყვაობა, ჩხუბი, ინტიმური ურთიერთობა.

შენიშვნა: თუ ქუარის დღესასწაულს მთელი ხეობა ან მთელი კუთხე აღნიშნავდა, მაშინ ფსმთა (ფყისკიმთა) შეიძლებოდა ყოფილიყო არა ერთი ან რამდენიმე ოჯახი, არამედ – მთელი სოფელიც, რომლის მცხოვრებლებსაც მოეთხოვებოდათ დღესასწაულის ორგანიზება.

პაგანსტონში ლუდის დუღებას უშუალოდ პაგანი განაგები – ლუდის მხარშველები (ნაეგანი განაეგ) უძღვებოდნენ, რომლებსაც სასოფლო და სათემო რელიგიური დღესასწაულისთვის ლუდის მოსამზადებლად კენჭისყრით ან მკითხავის მეშვეობით ირჩევდნენ. „პაგანსტონში მომზადებულ ლუდთან მიახლოება და მისი შეხედვაც კი, პაგანი განაგის გარდა, ყველას სასტიკად ეკრძალებოდა. ლუდის წაღება სალოცავში მხოლოდ მას ან მისი ოჯახის რომელიმე წევრს შეეძლო. არჩევის დღიდან პაგანი განაგს თავი „სუფთად“ უნდა შეენახა და არავითარ შემთხვევაში არ უნდა შეესრულებინა ისეთი სამუშაოც კი, როგორიც იყო ბოსლის ან თავლის გამოწმენდა“ (ანთელავა 201:39).

ლუდის მომზადებას პაგანსტონში დღესასწაულამდე ორი კვირით ადრე იწყებდნენ. ფისიმთები აგროვებდნენ ქერს. ყოველი ოჯახი ვალდებული იყო განსაზღვრული რაოდენობის მარცვლეული გაეღო სათემო-სადღესასწაულო ლუდის მოსამზადებლად.

შენიშვნა: რადგან, ნართების ეპოსის მიხედვით, ლუდის გა-
მოგონება სათანას მიეწერება, ჩვეულებრივი საო-
ჯახო სადღესასწაულო ნადიმებისთვის ოსებში
დამკვიდრდა ქალის მიერ ლუდის დუღების ტრა-
დიცია.

ლუდის, როგორც სასმელის, საკრალურ სტატუსს მისი სა-
კულტმსახურო გამოყენება განსაზღვრავდა. ოსური ტრადიცი-
ით, ისევე როგორც აღმოსავლეთ საქართველოს მთიანეთში,
ლუდს ამზადებდნენ რელიგიური რიტუალებისთვის, რათა ადა-
მიანებს სამსახური გაენიათ მფარველი წმინდანებისთვის. ლუ-
დის მოსამზადებლად კი საჭირო იყო სამინათმოქმედო პრო-
დუქტი – პურეული მარცვლეული.

ძველი აღმოსავლური მითორელიგიური თვალსაზრისის მი-
ხედვით, ადამიანის დანიშნულებასა და მისი ამქვეყნიური არსე-
ბობის მიზანს მიწის დამუშავება და ზეციური არსებების სამსა-
ხური წარმოადგენდა. ნართების ეპოსი სრულად იზიარებს შუ-
ამდინარულ შეხედულებას სამყაროში ადამიანის საზრისის შე-
სახებ.

ოსური ეპოსის მიხედვით, ნართებს ლუდი განსაკუთრებით
უყვარდათ. ლუდის მოსამზადებლად, სვიასთან ერთად, მათ აუ-
ცილებლად უნდა ჰქონოდათ მარცვლეული, რომლის მოყვანაც
მიწათმოქმედების ცოდნით იყო შესაძლებელი. საზოგადოებაში
მიწათმოქმედების საწყისების შემოტანა, ოსური მითოლოგით,
სოსლანს მიეწერება. ერთ-ერთ წართულ თქმულებაში მოთხრო-
ბილია, თუ როგორ დაჯილდოვეს ზეცის ბინადრებმა ღმერთე-
ბის ნადიმზე მიწვეული სოსლანი: ქურდალაგონმა წართ ჭაბუკს
მისცა რკინის გუთანი მიწის დასამუშავებლად, ვაცილამ – პუ-
რეულის მარცვლები, დონბეთირმა წყალი – წისქვილის დასაბ-
რუნებლად, გალაგონმა ქარი – მარცვლის გასანიავებლად. სა-
მაგიეროდ, მადლიერი სოსლანი ღვთაებებს დაჰპირდა, რომ

მარცვლეულით ლუდს გამოხდიდა და დღესასწაულებზე მათ სახელს განადიდებდა [წართები 1988: 105].

ოსურ ტრადიციაში იმდენად პოპულარულ სასმელად ითვლება ლუდი, რომ ოსურმა ზეპირსიტყვიერებამ დღემდე შემოგვინახა ლუდთან დაკავშირებული ლექს-სიმღერების მრავალი ვარიანტი. ოსი მკვლევარი ვ. ვარზიათი ლუდთან დაკავშირებულ ზეპირ პოეტურ ტექსტებს სუფრულ სასიმღერო ჟანრს მიაკუთვნებს. თუმცა გასათვალისწინებელია მისი შესრულების თავდაპირველი და უმთავრესი პრაქტიკა. ოსური სიმღერები ლუდზე სრულდებოდა ლუდის მომზადების პროცესში და ის რელიგიური რიტუალისთვის განკუთვნილი სასმელის საკრალიზაციას ისახავდა მიზნად. ამიტომ ეს ტექსტები, როგორც შრომის პროცესის, საკრალური საქმიანობის განუყოფელი ნაწილი, უნდა მივაკუთვნოთ შრომის პოეზიის ჟანრს.

ერთ-ერთი ხალხური ტექსტი „სიმღერა ლუდზე“ (Бæгæньяйы зарæ) გადმოგვცემს მითიურ ამბავს, როცა „მას ჟამსა“ პირველად ისწავლეს ადამიანებმა ლუდის მოდულება. როგორც წესი, ლუდის მომზადებას თან ახლდა მითიური მოვლენების გახსენება, რომლის დანიშნულებაც იყო რიტუალის მონაწილეთა ზიარება საწყისთან. დღესასწაულისთვის საკრალური სასმელის მოსამზადებლად არჩეული მამაკაცები ამ სიმღერით გადმოსცემდნენ ლუდის წარმოშობის საიდუმლოს: მაშინ, როცა ყველაფერი პირველად იქმნებოდა, მთიდან ველზე ჩიტი გადმოფრინდა, რომელმაც მსხმოიარე ხეზე შემოხვეული სვის მარცვლები აკენკა. ჩიტს თავბრუ დაეხვია და მიწაზე დაეცა, ის კაცმა იპოვა და სათანას მიუყვანა. სათანამ ჩიტი ცეცხლთან გაათბო. ჩიტმა არწყია და სვის მარცვლები გადმოყარა... როგორც ვხედავთ, სასიმღერო ტექსტი იმეორებს ნართების ეპოსში გადმოცემულ ამბავს ლუდის გამოგონების შესახებ. ორივე ტექსტი გვიჩვენებს, რომ სამყაროს ყოველ მნიშვნელოვან ობიექტს აქვს თავისი ისტორია, თავისი მითოსური წარსული. სიმღერაში გამოხა-

ტულია ადამიანების სიახლოვე გარემომცველ სამყაროსთან, ბუნებასთან, რომელიც არქაული საზოგადოებისთვის არ იყო მიუწვდომელი და უსაზრისო. ტექსტის მიხედვით, სათანასა და ურუზმაგს ესმით ბუნების ენა. კაცი, იგივე ნართების უხუცესი ურუზმაგი, არ ტოვებს უპატრონოდ ხიდან ჩამოვარდნილ ჩიტს, ხოლო სათანა ბუნებასთან განსაკუთრებული სიახლოვის უნარით სწვდება სამყაროს საიდუმლოებას, ახერხებს ჩიტის საქციელის ამოცნობას და ქმნის ლუდს, ადამიანების საყვარელ სასმელს.

თუმცა მხოლოდ ქერი არ არის საკმარისი ლუდის მოსადუღებლად და, ტექსტის მიხედვით, სათანა კაცს (იგულისხმება ურუზმაგი) გზავნის ოქროს ვასთირჯისთან ალაოს მარცვლების მოსატანად:

‘Уаелæ, дам, хохмæ арвиста
Æмæ сыгъзæрин Уастырджийæ
Зады нæмгуытæ æрхаста,
Уыдонæй бæгæны бантыдта.’

„კაცი აგერ, იმ მთაზე გაგზავნა,
და ჩვენი ოქროს ვასთირჯისგან
ალაოს მარცვლები მოატანინა,
იმით ლუდი მოადუდა.“
(ოსური სიტყვიერება 2005:35; 163).

ოსური სიმღერის მიხედვით, ლუდის მოსამზადებელი ალაოს მარცვლებიც ადამიანებს ოქროს ვასთირჯიმ გადასცა.

შენიშვნა: ცნობილია, რომ სვიის, როგორც აუცილებელი ინგრედიენტის, ლუდის მომზადების პროცესში გამოყენება ადამიანებმა გვიან, დაახლოებით VIII-IX საუკუნეებიდან დაიწყეს. მანამდე კი, ლუდს მის გარეშე ამზადებდნენ.

ერთ-ერთი ოსური ტექსტი, კერძოდ „სიმღერა ლუდზე“ (Бæгæныйы зарæ), როგორც სცენარი, საფუძვლად ედო ბაგანსტონში ლუდის გამოხდის რიტუალს. ლუდის მხარშველები მითიური ამბების გახსენებით, ინახავდნენ წინაპრებისგან ბოძე-

ბულ ცოდნას და „აღადგენდნენ“ იმ „საწყისს“, ანუ იმ დროს, როცა ყალიბდებოდა მათი ყოფის საფუძვლები“ (ელიადე). რიტუალურ სიმღერას, მითიური ამბების გახსენებასა და საწყისთან დაბრუნებას მიზნად ჰქონდა ლუდის როგორც საკულტო დანიშნულების სასმელის საკრალიზება. სასიმღერო ტექსტის შინაარსი ლუდის მითიურ წარმოშობას აცხადებს. რადგან მის შექმნაში ვასთირჯი მონაწილეობდა და ლუდში ვასთირჯის გამოგზავნილი ალაოს მარცვლები ერია, ამიტომ საუკეთესო ლუდი მომზადდა:

„Ой, бағәны, дам, бағәны! „ოი, ლუდიო, ლუდი!

Ой, бағәны, сой бағәны, ოი, ლუდი, სვиаңи ლუდი,

Сой бағәны, амонды бағәны სვиаңи ლუდი, ბედის ლუდი.

Уәдәй нырмә, дам, базыдтам.“ მას შემდეგ ვისწავლეთ მისი მომზადება.“
(ოსური სიტყვიერება 2005:35; 163).

„Сиимдәрә ლууди“ უკვდავყოფს ლუდის შემქმნელ მითიურ წინაპრებს. ტექსტი მათი დალოცვით მთავრდება:

„ოი, ლუდიო, ლუდი, ოი, ლუდი, სვиаңи ლუდი!

მას შემდეგ ვისწავლეთ მისი მომზადება.

Диодкаңи იცოცხლოს იმ ჩიტმა, უფრო დიდხანს კი – სათანამ!“
(ოსური სიტყვიერება 2005:35).

მითოლოგიური შინაარსი უდევს საფუძვლად ოსურ სიმღერას „როგორ ამზადებენ შავ ლუდს“ (Cay бағәны ცәмәй Вәй-йы). სასიმღერო ტექსტი, როგორც სათაურიდან ირკვევა, აღნერს ლუდისთვის საჭირო ინგრედიენტების მომზადებისა და გამოხდის პროცესს. მას, როგორც წესი, ბავანსტონში ლუდის მომზადების თანხლებით ბავანი განაგები (ლუდის მხარშველები) ასრულებდნენ და ეს ტექსტიც ლუდის საკრალიზებას ისახავდა მიზნად.

სიმღერის მიხედვით, ლუდისთვის საჭირო ხორბლეულის მოსაყვანად მინდორს თუთირის ხარებს ახვნევინებდნენ:

„თუთირის შობილი შავი ხარები,
ო, მათრობელა, სვიანო, შავო ლუდო!
მინდორში ხნულს გაავლ-გამოავლებენ,
თეთრწვერა კაცი მითეს-მოთესავს.“
(ოსური სიტყვიერება 2005:34).

პურეული მოსავლის მოყვანასთან დაკავშირებულ ლექს-
სიმღერებშიც ხშირად არის ნახსენები თუთირის თვეში დაბადე-
ბული თეთრტუჩა შავი ხარები, რომლებსაც ოსები საკრალურ
თვისებებს მიაწერდნენ. თუთირი, ოსური მითოლოგიის თანახ-
მად, მსხვილფეხა საქონელს მფარველობს. დიდმარხვის პირ-
ველ სამ დღეს ოსები თუთირის დღესასწაულის აღსანიშნავად
მყაცრად უქმობდნენ და მარხულობდნენ. სიმღერა „როგორ ამ-
ზადებენ შავ ლუდს“ ოსი ხალხის მითოსურ ცნობიერებას გამო-
ხატავს, რომლის თანახმად, თუ მინდორში პირველ ხნულს თუ-
თირის დღეს დაბადებული თეთრტუჩა შავი ხარები გაავლებ-
დნენ, უეჭველად უხვ მოსავალს მოიწევდნენ.

ხალხურ ტექსტში ფერთა გადანაწილებას აქვს მითოლოგი-
ური საფუძველი. სიმღერაში „როგორ ამზადებენ შავ ლუდს“ სა-
ლუდე ხორბლის მოყვანაში ორი პერსონაჟი მონაწილეობს,
თეთრწვერა კაცი და თეთრთმიანი ქალი. მათი თმა-წვერის
თეთრი ფერი ძუარის ხოდაბუნებში მოფუსფუსე მოხუცების
სიწმინდეზე მიანიშნებს. აღმოსავლეთ საქართველოს მთიანე-
თის ეთნოგრაფიული სინამდვილიდან ცნობილია, რომ რელიგი-
ური დღესასწაულისთვის სალუდე მარცვლეული ჯვარის მამუ-
ლებში ჯვარის დასტურ-ხელოსნებს მოჰყავდათ, რომლებსაც
განსაკუთრებული სიწმინდის დაცვა და თავშეკავება მოეთხო-
ვებოდათ. სიმღერა „როგორ ამზადებენ შავ ლუდს“ დაწვრილე-
ბით გადმოგვცემს თეთრწვერა კაცისა და თეთრთმიანი ქალის
საქმიანობას, რომელსაც რიტუალური ელფერი დაჰკრავს:

„თეთრწვერა კაცი და თეთრთმიანი ქალი
მიცელ-მოცელავენ, თავთუხის ძნებად მიდგამ-მოდგამენ,
უღელი ხარით მიათრ-მოათრევენ,
კალოს პირას დადგამენ,
მამლის ყიფილზე მიშლი-მოშლიან,
სადილობისას ააბულულებენ.“

(ოსური სიტყვიერება 2005:34).

სიმღერა სალუდე ხორბლის მოყვანაში თეთრწვერა კაცისა
და თეთრთმიანი ქალის განსაკუთრებულ წვლილზე მოგვითხ-
რობს და მათი საქმიანობის თითოეულ დეტალზე ამახვილებს
ყურადღებას, როგორიცაა: ხვნა-თესვა, მკა, ძნების დადგმა, კა-
ლოზე გალენვა, მარცვლის განიავება, გაშრობა, წისქვილში დაფ-
ქვა, ბრტყელძირა სპილენძის ქვაბში მოდულება, საფუარის მო-
კიდება, სხვა ჭურჭელში გადაღება და შავ კათხაში გადმოსხმა.

ვინ შეიძლება იყვნენ სიმღერის პერსონაჟები – თეთრწვერა
კაცი და თეთრთმიანი ქალი? თუ გავითვალისწინებთ, რომ ოსუ-
რი ფოლკლორის ყველა ჟანრის ტექსტებში ვხვდებით ნართუ-
ლი სიუჟეტებისა და მოტივების გავლენას, სიმღერის ორი იდეა-
ლური მოხუცი პერსონაჟი ნართების უხუცეს ურუზმაგსა და
კეთილ დიასახლის სათანას გვაგონებს. სიმღერა ლუდის არქე-
ტიპულ მზადებას გადმოგვცემს, ხოლო მისი ფინალური ნაწილი
ლუდის რიტუალურ სმას აღგვინერს:

„თეთრწვერა მოხუცი მიიღოც-მოიღოცება,
თვალებბრიალა ვაჟი ცოტას მოსვამს,
თეთრწვერა ბერიკაცები თავს მოიყრიან,
შავ კათხას ერთმანეთს მიაწვდ-მოაწვდიან.
ასე მზადდება შავი ლუდი,
ო, დიდებულო შავო ლუდო!“

(ოსური სიტყვიერება 2005:35).

ერთ-ერთი ოსური სასიმღერო ტექსტი, რომლის სათაურიც არის „ლუდის მხარშველთა სიმღერა“ (Бაგაны әнтауджыты ژәрәг), თვალსაჩინოდ გვიდასტურებს, რომ ლუდს რიტუალური სიმღერების თანხლებით ამზადებდნენ. ტექსტი 1936 წელს ჩაუნერია ოს საზოგადო მოღვაწეს ა. თიბილოვს. „ლუდის მხარშველთა სიმღერას“ აქვს მიმართვის ფორმა და ლოცვითი შინაარსი. ბავანი განავები ხოტბას ასხამენ და ლოცავენ ლუდს, როგორც საღვთო სასმელს:

„ნართების სათანას ხელი შეგხებოდეს,
სიდამონის მადლი გეწიოს,
იალლუზის ღონე მოგცეს,
ყუსაგონის – ბარაქა.“
(ოსური სიტყვიერება 2005:35).

ლუდის მხარშველები, პირველ რიგში, პატივს მიაგებენ ლუდის მითიურ გამომგონებელს – სათანას და სიუხვე-ბარაქიანობის მიზნით, მისი, როგორც იდეალური მასპინძლის, ხელის შეხებას უსურვებენ საღვთო სასმელს. სიმღერა შემდეგ ახსენებს ლეგენდარულ ოს გმირებს – სიდამონს, იალლუზსა და ყუსაგონს. ვ. ვარზიათის აზრით, სამი ოსი გმირი თავისი თვისებებით სიმღერაში სიმბოლურად ასახიერებს სოციალური მოწყობის სამფუნქციურ მითორელიგიურ სტრუქტურას (სულიერება, სიმამაცე, სიმდიდრე), რომელიც დამახასიათებელი უნდა ყოფილიყო ინდოირანული მოდგმის ხალხთა ყოფისთვის (ვარზიათი 1995). სიმღერის მიხედვით, სიდამონი ფლობს მადლს, ანუ სულიერებას, იალლუზი – ღონეს, ანუ გმირობას და ყუსაგონი – ბარაქას. რიტუალური სასმელის ამ ნიშან-თვისებებით დალოცვა, როგორიცაა მადლი, ღონე და ბარაქა, ოსების ტრადიციულ ყოფაში ლუდის საკრალურ დანიშნულებასა და განსაკუთრებულ პრესტიჟს ადასტურებს (ვარზიათი 1995).

სიმღერაში, რომელსაც აქვს დალოცვის ფორმა, არ ივიწყებენ ადრესატს, ვის სახელზეც ლუდი მოამზადეს და მას ღვთის შეწევნას უსურვებენ. რადგან ლუდის მომზადება, ოსების ტრადიციით, ზეციურ არსებათა სამსახურს წარმოადგენს, ლუდის მხარშველი განეული შრომისა და გარჯის სანაცვლოდ ასევე ღვთის მადლს მოელის.

„ვისთვისაც გამოგხადეს, იმას შეეწიოს.

ჩემი ხელი და ფეხი კეთილი ყოფილიყოს!

ვინც შესვამს, ერბოსავით შეერგე!

მე კი შენი მადლი მიწილადე!“

(ოსური სიტყვიერება 2005:35).

ოსური სიმღერები ლუდზე სრულდებოდა, როგორც ინდივიდუალურად, ასევე – გუნდურად.

აღმოსავლეთ საქართველოს მთიანეთში თოთხმეტი წლის ყმანვილი „მასმურად“ ითვლებოდა და ლუდის გამოხდის დროს ის საერთო მსმელთა სიაში შეჰვერდა. ნადირაძე ლუდის დალევით ახალგაზრდის სრულფასოვან მამაკაცად აღიარებას ინიციაციის უძველესი წესის გამოხატულებად მიიჩნევს (ნადირაძე 2010).

ლუდი, როგორც რიტუალური სასმელი, ხშირად მოიხსენიება აღმოსავლეთ საქართველოს მთიანეთის ზეპირსიტყვიერ ტექსტებში. ჯვარ-ხატთა ტრაპეზზე ის იმდენად პოპულარული სასმელია, რომ ლუდის სახელწოდება ხევსურულ ტრადიციაში მამაკაცის საკუთარ სახელად (ალუდა) ქცეულა.

ხევსურები ლუდიანი თასით წარმოთქვამდნენ ჯვარ-ხატთა სადიდებლებს, კოდის გახსნის, სულის ხუცობის, სახელისდებანის, დაფიცების, ძმადგაფიცვის, „ხარ-ქვაბით შაყრის“, სამანის ჩადგმის, დარისხებისა და სახლის განათვლის ტექსტებს. კულტმსახური, ასევე, საგანგებოდ ლოცავდა მესაფუვრეს, ლუდიან თასებსა და საწდეს.

ხევსურთა რწმენით, „მხოლოდ ლუდიან თასზე დანთებული სანთლები ანათებენ საიქიოს, ღმერთი მხოლოდ ლუდით იდიდების, სანთლები მარტო ლუდიან თასს ეკვრისო“ (შ. არაბული 2006).

ისევე როგორც ოსები, ხევსურებიც რამდენიმე სახეობის ლუდს ამზადებდნენ. ხევსურულ სიმღერებში შექებულია შავი ლუდი:

„მოსვლამც ქნა კათა სტუმართა, შინ წასვლა წესიმც არ იყვა!
ან დგომა შავის ლუდისა, გათავებაიმც არ იყვა!“
(შანიძე 1931: 198).

ზოგიერთი ხევსურული ლექსი კი ხოტბას ასხამს თეოზე მყეფარ ფხიზელ ძალლსა და მათრობელა ლუდს: „ეს ლუდი მათ-რობელა სჯობს, ძალლი – თეოზე მყეფარი“. თუშური ალუდიც იმავე მეთოდითა და დანიშნულებით მზადდებოდა, როგორც ოსური და ხევსურული ლუდი.

შენიშვნა: ჩრდილოეთ ოსეთის საზოგადოებებსა და აღმო-სავლეთ საქართველოს მთიანეთის საყმოებში ლუდის დუღებისა და გამოყენების ერთი და იგივე ტრადიცია არსებობდა. ოსი მეცნიერი ვ. აბაევი მიიჩნევს, რომ ქართველმა მთიელებმა ლუდი ოსებისგან შეითვისეს. ე. ნადირაძემ თავის მო-ნოგრაფიაში „ქართული ლუდი“ მკაფიოდ ჩამოა-ყალიბა თავისი არგუმენტები იმის შესახებ, რომ საქართველოში ლუდის წარმოებისა და საკრალუ-რი გამოყენების პრაქტიკა ჯერ კიდევ უძველეს პერიოდში, წინა აზიის ცივილიზაციებთან, ლუ-დის კულტურის ამ კლასიკურ ქვეყნებთან (შუმე-რები, ხეთები, ურარტუ) კულტურულ-სამეურნეო ურთიერთობის შედეგად ჩამოყალიბდა. საკუთა-რი თვალსაზრისის საილუსტრაციოდ მეცნიერს მოჰყავს მდიდარი არქეოლოგიური და ეთნოგრა-ფიული მასალა, მათ შორის, თრიალეთის ერთ-

ერთ ყორლანში აღმოჩენილი, ჩვენს წელთაღრიცხვამდე II ათასწლეულით დათარიღებულ ვერცხლის თასზე გამოსახული რიტუალური სცენები, რომლებიც მთავარი ღვთაებისადმი წმინდა სასმელის შეწირვას ასახავს. (ნადირაძე 2010: 9). საქართველოში მარცვლეული კულტურის მოყვანის ხანგრძლივი, შეუწყვეტელი და რთული სისტემის არსებობა კი, მკვლევარის აზრით, აქარნელებს ყოველგვარ თვალსაზრისს, რომ ქართველებმა ლუდის დუღება ჩრდილოეთ კავკასიელი მეზობელი ოსებისგან გადმოიღეს (ნადირაძე 2010: 35). ვფიქრობ, ალან-ოსების შორეული მომთაბარე წინაპრები იცნობდნენ ლუდს, როგორც სასმელს, მაგრამ მისი საკრალური გამოყენება, ისევე როგორც ძუართა თაყვანისცემის ტრადიცია და საკულტო რიტუალები, ოსებმა შუა საუკუნეებში ქართველ მთიელებთან უშუალო მეზობლობაში, მათთან კულტურულ-სამეურნეო ურთიერთობის შედეგად შეითვისეს.

ნაბდის მთელავთა სიმღერა „ონაი“

ოსები, ისევე როგორც მათი მეზობელი ქისტები და ლეკები, ნაბდის საუკეთესო ოსტატებად ითვლებოდნენ. შრომის პოეზიის ქალთა გუნდურ რეპერტუარს მიეკუთვნება „ნაბდის მთელავთა სიმღერა“ (Ныимает уаердджыты зардкытæ), რომლის მრავალი ვარიანტიც მოიძებნება ოსურ ფოლკლორში. ამ სიმღერის პირველი ქართული თარგმანი 1959 წელს გ. კალანდაძემ გამოაქვეყნა, 2005 წელს კი დაიბეჭდა ნ. ბეპიევისა და მ. ცხოვრებოვას მიერ უშუალოდ დედნიდან შესრულებული რამდენიმე ვარიანტის თარგმანი.

ნაბდის მოთელვა ხანგრძლივ და მძიმე ფიზიკურ შრომას მოითხოვდა, ამიტომ ნაბადს ამ საქმის მცოდნე ქალებისგან

შემდგარი ჯგუფი ამზადებდა. ნაბდის მოთელვის პროცესს თან ახლდა სიმღერა, რომელიც ქალებს შრომას უადვილებდათ. სიმღერის რიტმი დაკავშირებული იყო ნაბდის მთელავი ქალების ხელების მოძრაობასთან. სიმღერის რიტმს სოლისტი ხან აჩქარებდა, ხან ანელებდა. „ნაბდის მთელავთა სიმღერის“ ყოველი ტაეპი ტექსტის ყველა ვარიანტში იწყება ერთგვარი რეფრენითა და შეძახილით – „ეი, ონაი, ეი“, რომელიც ლექსის რიტმულ ორგანიზებაში მნიშვნელოვან როლს ასრულებს:

„ეი, ონაი, ეი, მოთელეთ, მთელავებო,
ეი, ონაი, ეი, მოთელეთ, ჩემნო მზენო.
ეი, ონაი, ეი, კარგი კაცის ნაბადია.“
(ოსური სიტყვიერება 2005:39).

შრომის ლექს-სიმღერებში სიუხვისა და ბარაქის გამოწვევის ან წარმატებული შედეგის მიღწევის მიზნით გვხვდება არაერთი მაგიური ფორმულა, რომელიც რეფრენის ფუნქციასაც ასრულებს და ტექსტის პოეტურ ფორმასაც აწესრიგებს. თანამედროვე ოსურ ენაში „ონაის“ მნიშვნელობა გაუგებარია. ვ. აბაევი „-აი“ დაბოლოებას ვოკატივის ნიშნად მიიჩნევდა. ვ. აბაევის აზრით, გამოთქმაში „ონაი“ შეიძლება წმინდა იოანე ნათლისმცემლის პაგანიზებული სახე მოიაზრებოდეს (აბაევი 1973: 228):

„ეი, ონაი, ეი, ჰეი, ღმერთო, ხელი მოგვიმართე,
ეი, ონაი, ეი, კარგი ნაბადი გამოსულიყოს!“
(ოსური სიტყვიერება 2005:39).

ტექსტის მნიშვნელოვანი ნაწილი ეთმობა მიმართვა-მოწოდებას, რომ მთელავებს მხარ-მკლავი არ მოდუნებოდათ და, შესაბამისად, შრომის რიტმი არ შეენელებინათ. სოლისტი ცდილობდა, მახვილგონივრული სიტყვიერი გამოთქმებითა და პოეტური შედარებებით მეტი სიხალისე შეეტანა ნაბდის თელვის პროცესში:

„ეი, ონაი, ეი, კატის ბეწვზე უფრო,
ეი, ონაი, ეი, კარგი მოსათელია,
ეი, ონაი, ეი, მარჯვეს ხელში,
ეი, ონაი, ეი, სისქე ემატება,
ეი, ონაი, ეი, ზარმაცის ხელში,
ეი, ონაი, ეი, უფრო იცრიცება,
ეი, ონაი, ეი, ხელი გაანძრიეთ,
ეი, ონაი, ეი, დაუჩქარეთ მთელავებო!“
(ოსური სიტყვიერება 2005:39).

„ონაის“ ციკლის ლექს-სიმღერებში განსაკუთრებულ ყურადღებას იმსახურებს იმ პერსონაჟის დახასიათება, ვისთვისაც ქალები ნაბადს ამზადებენ.

ტექსტის მიხედვით, ქალები სანეფო ნაბადს ამზადებენ, სანეფო კი თვალცეცხლა ბიჭია, რომელიც გოგოებს „მათრახის წვერით ირჩევს და გვერდზე მოქცეული ქუდქვეშიდან მათ ღიმილით შეჰყურებთ“. თუ მოთარეშე კაცის ნაბადია, მაშინ ის, სიმღერის მიხედვით, უმთვარო ღამეშიც ისე თარეშობს, როგორც – დღისით“. ტექსტში დახატულია კაი ყმის იდეალი, თუმცა „ონაის“ ეს ნაწილი მოთარეშე კაცის თვისებებსა და სიმამაცეს ჰიპერბოლიზირებულად წარმოგვიდგენს: ის კლდის ჰიტალოებს მკერდით ანგრევს, ხელმწიფის ციხე-სიმაგრეს ქუსლით ლენავს, უვალ ქედებზე გზებს იკვლევს, მისი მათრახის დარტყმა ცის ქუხილს ჰეგავს, ზურგიდან შეხედავ – კოშკი გეგონება, ცხენზე ამხედრებული მთას ედრება. სიმღერის სოლისტს ნაბდის მომავალი მესაკუთრის ხოტბა მთავარ საქმეს არ ავიწყებს და ნაბდის მთელავებს მიმართავს:

„ეი, ონაი, ეი, აი, ასეთი მოთარეშეა,
ეი, ონაი, ეი, აი, მოთელეთ, მოთელეთ,
ეი, ონაი, ეი, აი, მხარ-მელავი გაანძრიეთ!“
(ოსური სიტყვიერება 2005:40).

ტექსტი ზოგჯერ მთავრდება ნაბდის მთელავთა წინამძღვანის მოწოდებით: „ეი, ონაი, ვინც უმცროსია, წამოდგეს და ხომამსათი მოგვიმზადოს.“ ხანგრძლივი შრომა, ბუნებრივია, იწვევდა დალლას. შესვენების დროს სუფრის გაშლა მათ შორის უმცროსს ევალებოდა, რომელსაც, სიმღერის მიხედვით, ნაბდის მთელავი ქალებისთვის ხომამსათი – ყველის, ერბოსა და მოხალული ქერის ფქვილისაგან მომზადებული კერძი უნდა მიერთმია.

ნაბდის მთელავთა სიმღერა ცნობილია აფხაზურ ფოლკლორშიც. ხოლო ყარაჩაულ-ბალყარულ ტექსტებში მას ჰქვია „ინაი“.

ქალთა საოჯახო ინდივიდუალური სიმღერები

ოსურ ფოლკლორში მრავალ ვარიანტად გვხვდება ლექს-სიმღერები, რომლებიც ნაციონალური კერძების მომზადების პროცესს ასახავს. „ძიქას სიმღერა“ განეკუთვნება ქალთა რეპერტუარს და ინდივიდუალურად სრულდება, რომელსაც ოსი ქალები ყველის ფაფის – ძიქას მომზადების დროს მღეროდნენ:

„ციდაიონი ძიქას ხარშავს, ვერ ვეღირსეთ ცხიმის გაშლას,
წვიმა მოდის აქაც, იქაც, ცხიმს არ იგდებს ჩვენი ძიქა!
ჩვენი ძიქა, მოფაფავდი! გარეთ ისევ წვიმს,
ფაფავდება ჩვენი ძიქა და იკეთებს ცხიმს.“

(ოსური სიტყვიერება 2005:33).

ჩრდილოეთ ოსეთის მთიანეთში თითქმის ყველა ოჯახში ჰქონდათ ხორბლებულის ხელის საფქვავი დოლაბი, რომელსაც ოსები, როგორც საკულტო დანიშნულების ნივთს უვლიდნენ და უფრთხილდებოდნენ. დოლაბზე დაფქვა ქალთა საოჯახო საქმიანობის ერთ-ერთ სფეროს წარმოადგენდა. ფქვის დროს შესრულებული სიმღერები ოსურ ფოლკლორში სულ რამდენიმელა

შემორჩია. ეს სიმღერები ინდივიდუალიზმის ნიშნებს ატარებს, გამოირჩევა ემოციურობით და ქალის ფიქრებს ასახავს.

კარაქის დღვება ხანგრძლივ და მძიმე ინდივიდუალურ შრომას მოითხოვდა. შესაბამისად, „კარაქის დღვების დროს სამღერიც“ ინდივიდუალურ შემოქმედებას განეკუთვნება. სიმღერის რიტმი შეესაბამებოდა სადღვების მოძრაობას. ტექსტი თავისი შინაარსით მაგიურ პოეზიას უახლოვდება:

„იქეც ერბოდ, იქეც ერბო-კარაქად
და ამოდი ჩემი თავის ხელა.“

(ოსური სიტყვიერება 2005:33).

სხვა ვარიანტებში კარაქის მდღვებავი რძეს შემლოცველის მსგავსად მიმართავს და უბრძანებს ხარის თავზე უფრო დიდ ერბოდ და თაფლად გადაქცევას. დიასახლისი ცდილობს ნაყოფიერების გამოწვევას. ტექსტი მაგიური ფორმულების გამოყენებით, ფორმითა და დანიშნულებით შელოცვის ჟანრს უახლოვდება. სიმღერას აქვს სევდიანი ტონალობა:

„ერბოდ იქეც, თაფლად იქეც,
ხარის თავზე დიდი,
ცრემლზე უფრო კრიალა,
ბრძენთა დასალოცი.“

(ოსური სიტყვიერება 2005:33).

შრომის ლექს-სიმღერები გამოირჩევა მხატვრული უბრალოებით, მიმართვის კონკრეტული ფორმებით, მუსიკალურ-ინტონაციური მრავალფეროვნებით. მხატვრული საშუალებები ამაღლებს სასიმღერო ტექსტების ემოციურ ულერადობას. ლექსებში უფრო ხშირად გვხვდება რიტორიკული შეძახილი, შთაბეჭდილების გაძლიერების, ან მაგიური ზემოქმედების მიზნით ერთი და იგივე სიტყვებისა და გამოთქმების გამეორება, ხმაბაძვითი სიტყვები, რეფრენი-მისამღერი და სხვ.

ლიტერატურა

- აბაევი 1958:** Абаев В., Историко-этимологический словарь осетинского языка, т. 1, „наука“, Москва-Ленинград, 1958.
- აბაევი 1973:** Абаев В., Историко-этимологический словарь осетинского языка, т. 2, „наука“, Ленинград, 1973.
- აბაევი 1988:** ვ. აბაევი, ოსთა ნართული ეპოსი, წინასიტყვაობა წიგნისა „ნართები“, გამომცემლობა „ირისთონი“, ცხინვალი, 1988.
- ანთელავა 2012:** ნ. ანთელავა, ოსური მითები და რიტუალები, თბილისის უნივერსიტეტის გამომცემლობა, თბ., 2012.
- არაბული 2006:** შ. არაბული, ისტორიული თავგადასავალი ხევსურთა, 2006, <http://khevsureti.ge/?p=82>
- ელიადე 2009:** მ. ელიადე, მითის ასპექტები, ფრანგულიდან თარგმნეს მ. ბაქრაძემ და ბ. წვერაძემ, ილია ჭავჭავაძის სახ. უნივერსიტეტის გამომცემლობა, თბ., 2009.
- ვარზიათი 1995:** Уарзиати В., Из истории скифо-сакского наследия, журнал „Дарьял“, №4, 1995.
- კავკასიური პოეზია 1959:** კავკასიური ხალხური პოეზია, თარგმანი წინასიტყვაობითა და შენიშვნებით გ. კალანდაძისა, გამომცემლობა „საბჭოთა საქართველო“, თბ., 1959.
- კალევალა:** კალევალა, კარელურ-ფინური ხალხური ეპოსი, <http://interesi.files.wordpress.com/2011/06/kalevala.pdf>
- კიკნაძე 2002:** ზ. კიკნაძე, ხანში ირემი მოვიდა, „ოჩხარი“, ჯულიეტა რუხაძისადმი მიძღვნილი ეთნოლოგიურ-

ისტორიული და ფილოლოგიური ძიებანი, თბ., 2002.

კოტეტიშვილი 1961: ვ. კოტეტიშვილი, ხალხური პოეზია, გა-
მომცემლობა „საბჭოთა მწერალი“, თბ., 1961.

მამისიმედიშვილი 2008: ხ. მამისიმედიშვილი, პანკისი (წარსუ-
ლი და თანამედროვეობა), თსუ გამომცემლობა,
თბ., 2008.

ნადირაძე 2010: ე. ნადირაძე, ქართული ლუდი, მერიდიანი, თბ.,
2010.


ნართები 1988: ნართები, ოსურიდან თარგმნა მ. ცხოვრებოვამ,
გამომცემლობა „ირისთონი“, ცხინვალი, 1988.

ოსური სიტყვიერება 2005: ოსური ზეპირსიტყვიერება, წიგნი
შეადგინეს და ქართულ ენაზე თარგმნეს ნ. ბეპი-
ევამ და მ. ცხოვრებოვამ, გამომცემლობა „კავკა-
სიური სახლი“, თბ., 2005.

შანიძე 1931: ა. შანიძე, ქართული ხალხური პოეზია, I, ხევსურუ-
ლი, სახელმწიფო გამომცემლობა, ტფ., 1931.



ନେତ୍ରମିଳିତ କନ୍ଧିରା



ოს და ქართველ ხალხს ხანგრძლივი ურთიერთობის მან-
ძილზე მსგავსი წეს-ჩვეულებები ჩამოუყალიბდათ და, შესაბამი-
სად, საერთო თემებითა და მოტივებით გამდიდრებული ფოლ-
კლორი შექმნეს. ეს მსგავსება განსაკუთრებით ვლინდება სა-
ქორნილო ტრადიციებსა და საქორნილო პოეზიაში. ქართვე-
ლებსა და ოსებს შორის ხშირი შერეული ქორნინებები ხელს
უწყობდა საერთო ელემენტებზე დაფუძნებული საქორნილო
პოეზიისა და წეს-ჩვეულებების ჩამოყალიბებას.

დაქორნინება უმნიშვნელოვანესი მოვლენაა ადამიანის
ცხოვრებაში. ქორნინება აკავშირებს ორ ადამიანს, ანათესავებს
ოჯახებს, გვარებს, აახლოებს ხალხებს. ქორნინების შედეგად
იბადება შთამომავლობა, ხდება სხვადასხვა ტრადიციებისა და
კულტურების შერწყმა.

დაქორნინების შემდეგ, როგორც წესი, ადამიანის ცხოვრე-
ბა უფრო მაღალ საფეხურზე ინაცვლებს. ტრადიციულ საზოგა-
დოებაში ქორნინებას ჰქონდა რიტუალური სახე. დაქორნინებუ-
ლი იცვლიდა თავის ასაკობრივ და სოციალურ სტატუსს, ამი-
ტომ ქორნილისთვის საგანგებოდ ემზადებოდა როგორც საპა-
ტარძლოს, ისე სასიძოს ოჯახი.

ოსური საქორნილო რიტუალი გამოირჩევა მხატვრული
მთლიანობით. ქორნილის მონაწილეებს განაწილებული ჰქონ-
დათ თავიანთი როლები, რომელსაც სასიმღერო ლექსების, და-
ლოცვისა და სხვა სიტყვიერი ფორმულების წარმოთქმით ასრუ-
ლებდნენ. რიტუალში ვხვდებით საკრალურ და მაგიურ ქმედე-
ბებს. განვიხილოთ საქორნილო რიტუალის სტრუქტურა და მი-
სი შემადგენელი ელემენტები ცალ-ცალკე.

საპატარძლოს შერჩევა

ოსური საქორწილო რიტუალი სამ ნაწილად შეიძლება დავყოთ: წინასაქორწილო პერიოდი, ქორწილი და ქორწინების შემდგომი პერიოდი.

ტრადიციულად ქალ-ვაჟის დაქორწინების საკითხს მშობლები წყვეტდნენ. დაქორწინების პირველი ეტაპი იყო საპატარძლოს შერჩევა. ქალ-ვაჟის დაქორწინებაში დიდ როლს ასრულებდა მაჭანკალიც (მიჟავარ). ვაჟებს ქალის „დაკვლევა-გასინჯვის“ შესაძლებლობა ჰქონდათ ძუარების დღესასწაულზე, ქორწილში, სამგლოვიარო ცერემონიებზე, სოფლის წყაროზე და სხვ.

აუცილებლობას წარმოადგენდა საპატარძლოდ ისეთი ქალი შეერჩიათ, რომელიც „ერგებოდათ“, ანუ დასაოჯახებელი წყვილი არ უნდა ყოფილიყო ერთი გვარის, ფიცმოყვრობითა და ნათელმირონობით დაკავშირებული, ერთმანეთის მოსისხლე და საერთო ძუარის მფარველობის ქვეშ მყოფი. გასათვალისწინებელი იყო ქალ-ვაჟის სოციალური სტატუსი და ქონებრივი მდგომარეობაც. ქალის შერჩევისას დიდ ყურადღებას აქცევდნენ მის მუყაითობასა და გარჯილობას, აგრეთვე – გარეგნობას.

ოსური საქორწილო ლექს-სიმღერა „თოლძა“ ვაჟის მიერ საცოლის შერჩევას ეძღვნება. სიმღერას, როგორც ჩანს, გუნდი ასრულებდა, რადგან ტექსტში მთელი აქცენტი გადატანილია რეფრენზე:

„ვოი, თოლძა, თოლძა,
ლხინში სიარული რომ დავიწყე,
ვოი, თოლძა, თოლძა,
გოგოების თვალთვალიც მაშინ დავიწყე,
ვოი, თოლძა, თოლძა.
ლამაზების თვალთვალი როცა დავიწყე,

ვოი, თოლძა, თოლძა,

ჩემთვის გოგოს შერჩევაც მაშინ დავიწყე“.

(ოსური სიტყვიერება 2005: 54).

ხალხური სიმღერა ქალიშვილის გათხოვებასთან დაკავშირებით საპატარძლოს მშობლების განცდებსა და სასიძოსადმი მათ დამოკიდებულებასაც გადმოგვცემს:

„გოგოს დედამ ეს რომ შეიტყო,

ვოი, თოლძა, თოლძა,

ოხვრა-ვიში მაშინ დაიწყო,

ვოი, თოლძა, თოლძა,

ეს რომ გოგოს მამამ გაიგო,

ვოი, თოლძა, თოლძა,

ურვადზე საუბარი მაშინ დაიწყო“.

(ოსური სიტყვიერება 2005: 54).

სიმღერის მიხედვით, ქალიშვილის გათხოვება და მისი მშობლიურ კერასთან დაშორება იწვევდა მშობლების წუხილს. ქალ-ვაჟის დაქორწინებას ზოგჯერ დაბრკოლებას უქმნიდა ოსურ ყოფაში დამკვიდრებული ურვადის გადახდის ტრადიცია.

ურვადი და საპატარძლოს საჩუქარი

ჩრდილოეთ ოსეთის მთიანეთში, განსაკუთრებით დიგორიაში, დაქორწინების ერთ-ერთი კომპონენტი იყო ურვადის გადახდა. სასიძოს ქალის მშობლებისთვის უნდა გადაეხადა ურვადი, ქალის ერთგვარი გამოსასყიდი. ვაჟი ქალის მშობლებს ურვადს ნაღდი ფულით, საქონლით, სპილენძით ან სხვა სახით უხდიდა. ხშირად ურვადს დახარბეჭული მამა, ანგარიშს არ უწევდა ქალიშვილის ნება-სურვილს, მის გრძნობებს და მას მდიდარ, მაგრამ უღირს პიროვნებაზე ათხოვებდა. ხარბი, სასტიკი,

უსულგულო მამის სახე და უსიყვარულოდ გათხოვილი ქალის მძიმე სიციალური ხვედრი, ხალხურ ტრადიციებზე დაყრდნობით, შთამბეჭდავად ასახა ოსმა მწერალმა ჩერმენ ბეჯიზათმა თავის მოთხოვაბაში „ახლევათების რძალი“.

დაქორწინების მეორე ეტაპი იყო ნიშნობა (ныисангарз დათვინ), როცა დადებითად წყდებოდა ქალ-ვაჟის დაქორწინების საკითხი სიმბოლური ნივთის გადაცემით. ოსურად პატარძალს ჰქვია ჩინძ, საპატარძლოს – ჩნძაგ. ნიშნობას მოსდევდა ქორწილი საპატარძლოს სახლში, რომლის ოსური სახელწოდებაც არის ჩზგარვისთ (чызгэрвыйст). ამის შემდეგ ქორწილი გრძელდებოდა სასიძოს სახლში და მას ოსურ ენაზე სიტყვა-სიტყვით ჰქვია – პატარძლის მოყვანა – ჩნძხასთ (чындахаст). აღსანიშნავია, რომ ოსურ ენაში სიტყვა ქორწილის სემანტიკა უკავშირდება პატარძალს, რომელიც საზეიმო რიტუალის მთავარ პერსონაჟს წარმოადგენს. ალბათ, ამიტომ ქორწილს ოსურ ენაზე, ასევე სიტყვასიტყვით, ჰქვია პატარძლის ღამე – ჩნძხასაგ (чындахасав).

ოსური ტრადიციით, ქალს უნდა გაემზადებინა არა მხოლოდ მზითევი, არამედ საჩუქრებიც საქმროს ოჯახის წევრებისა და მისი ნათესავებისთვის. მაყრულ სიმღერაში „ალაი“ ჩამოთვლილია პატარძლის მზითევი და საჩუქრები, რომლებიც მას საქმროს ოჯახში მიჰქონდა: შვიდ-შვიდი ლეიბი, რვა-რვა საბანი, სკივრით ფართალი, აბრეშუმის თეთრი საპერანგე – დედამთილისთვის, თივთიკის საჩოხე – მამამთილისთვის, უმცროსებისთვის – ტოლალი და ქამარი, დამბაჩისთვის – სარტყელი. ამავე სიმღერაში მაყრული ლოცავენ და ხოტბას უძღვნიან საპატარძლოს (ჩინძაგს), რომელმაც ნაყოფიერება და ბარაქა უნდა შეიტანოს საქმროს ოჯახში. მაყრული სიმღერა საპატარძლოს მშვენიერებას მეტაფორებით გადმოგვცემს. საპატარძლო არის

შემოუსვლელი თავთუხი, კეთილი მერცხალი, ის ოჯახში თაფლ-ერბო, ხოლო უბანში ანგელოზი იქნება:

„ბედნიერი დღე გათენდა, ოი, ალაი, ოი, ალაი!
შემოუსვლელი თავთუხი, ოი, ალაი, ოი, ალაი!
კაცომოყვარე მერცხალი, ოი, ალაი, ოი, ალაი!
მოგვყავს ჩვენთან, ოჯახში ოი, ალაი, ოი, ალაი!
კარგად ზრდილი გოგონაა, ოი, ალაი, ოი, ალაი!
ოჯახში თაფლ-კარაქი, ოი, ალაი, ოი, ალაი!
უბანში ანგელოზი, ოი, ალაი, ოი, ალაი!
იქნება ის, ოი, ალაი, ოი, ალაი!
(ოსური სიტყვიერება 2005: 55).

სხვა ოსურ სიმღერაში ქალის შუბლი შედარებულია სავხო-ნის (შავი მთის) ჯიხვთან, წარბები – თეთრი მთის არჩვთან, ამა-ყი მზერა – დაბურული ტყის ირემთან, ხშირი თმა – ჩელის დათ-ვთან, ლალი ნავარდი – შავი ტყის შველთან, ფრთხილი მზერა – შემოდგომის მელიასთან, გულ-მკერდი – თეთრ გედთან და თვალები – ვარსკვლავთა სხივებთან (ოსური სიტყვიერება 2005: 54-55).

ვაჟისა და ქალის მშობლები ურთიერთშეთანხმების საფუძ-ველზე ნიშნავდნენ ქორწილის დღეს. ჩრდილოეთ ოსეთის მთია-ნეთში დანიშნულ წყვილს ქორწილს ძირითადად გიორგობის თვეში უხდიდნენ, კერძოდ, ჯეორგუბის დღესასწაულამდე ორი კვირის განმავლობაში, კონკრეტულ დღეს.

ვაჟის ოჯახი საპატარძლოს მოსაყვანად საგანგებოდ არ-ჩევდა მაყრებს, ჩინძხასაგებს – სიტყვასიტყვით, პატარძლის ნამყვანი – ყვინდვაშვილი (ოსური ლექსიკონი 2014: 787). ჩინძხა-საგები გამოირჩეოდნენ თვალტანადობითა და სიტყვა-პასუ-ხით. მათ შორის უეჭველად უნდა ყოფილიყვნენ მომღერლები და მოცეკვავები.

საქორნილო რიტუალის აუცილებელი მონაწილე იყო ხელისმომკიდე, რომელსაც ნიშნობის შემდეგ ახლო მეგობრებიდან ირჩევდა სასიძო. ხელისმომკიდეს პატარძლისთვის ძმობა უნდა გაეწია და მის ძმად იწოდებოდა. უფრო ხშირად ირჩევდნენ ორ ხელისმომკიდეს: პირველს ერქვა კუხლხაცაგი (კეუხილხაელ – სიტყვასიტყვით – ხელისმომკიდე), ხოლო მეორეს – ამძუარჯინ (ამ-ძუარ-ჯინ, ამძვარჯინი), იგივე მეჯვარე.

აცამაზის ქორნილი

ნართების ეპოსი მოგვითხრობს აცამაზის დიდებული ქორნილის შესახებ, რომელიც შეიძლება ოსური ტრადიციული ქორნილის არქეტიპად განვიხილოთ. საინაგ-ალდარის ქალიშვილზე დასაქორნინებლად სავხოხის მთაზე ნართ აცამაზს მაყრებად ზეცის ბინადრები – ვასთირჯი, ნიქოლა, ავსათი და ელია ახლდნენ. სავხოხის მთიდან საპატარძლო ნართების სოფელში ვერცხლის ეტლით წამოიყვანეს, რომელშიც შვიდი ქორნული ირემი იყო შებმული. „მაყრიონს დედოფლის მზითევი შვიდი ურმით გამოატანეს. აგუნდას ხელისმომკიდედ წმინდა ვასთირჯი ჰყავდა, მაყრად – ნართი ურუზმაგი, მათ წინ ნიქოლა მიუძღოდა, დროშა ველ-მინდვრის ღვთაებას მიჰქონდა, წმინდა ელია მაყრიონის წინ ცხენს მოათამაშებდა...“ (ნართები 1988: 289). ნართების ხაძარში მისულმა მაყრებმა საქორნილო სიმღერები დააგუგუნეს, უბადლო დიასახლის სათანას კარიდან მიუმღერეს, თეთრნვერა ურუზმაგმა დაქორნინებული წყვილი დალოცა, თათართუფმა კი ნართების სადიდებელი სიმღერა აღავლინა. აღსანიშნავია, რომ ოსურ საქორნილო სიმღერებში ხშირად არიან ნახსენები ნართი პერსონაჟები, მათ შორის, როგორც საპატარძლოს, ისე საქმროს ოჯახში მომღერლები მუსიკალურ

აკომპანემენტზე ასრულებდნენ ნართულ სიმღერებს (ქადა-გებს) აცამაზის ქორნილის შესახებ.

ოსურ ქორნილში ნართი პერსონაჟებისა და ზეცის ბინა-დართა როლები განაწილებული აქვთ საპატარძლოსა და სასი-ძოს ნათესავებს, მაყრებს.

გამოთხოვება მშობლიურ კერიასთან

ოსური ქორნილი საზეიმო ვითარებაში ტარდებოდა. მაყრე-ბი მხიარული შეძახილითა და თოფების სროლით უახლოვდე-ბოდნენ საპატარძლოს სახლს, სადაც იმართებოდა საქორნილო ნადიმი ცეკვა-თამაშისა და სიმღერის თანხლებით.

საქორნილო ცერემონიალის ერთ-ერთ დრამატულ ნაწილს წარმოადგენს პატარძლის გამომშვიდობება საოჯახო კერიას-თან. კერია და მასზე ჩამოკიდებული ჯაჭვი (raxis), რომელიც კერიის მფარველმა საფამ შექმნა, სიწმინდის სიმბოლოს და ოჯახის საკრალურ შუაგულს ნარმოადგენს. სანამ მაყრები პა-ტარძალს მამის სახლიდან წაიყვანდნენ, ხელისმომკიდე მას კე-რიის ირგვლივ სამჯერ შემოატარებდა, ყოველ შემოვლაზე ქა-ლი რახისს (ჯაჭვ-საკიდელს) ხელით უნდა შეხებოდა და სიმბო-ლურად გამომშვიდობებოდა მშობლიურ ოჯახს. გარშემოვლის დროს თან დაჰყვებოდნენ გოგონები სიმღერით, რომელსაც რეფრენად გასდევდა სიტყვები: „ალაი, ოი, ალაი, ალაი-ბულაი“. სასიმღერო ტექსტი მრავალ ვარიანტად იყო ცნობილი და ყვე-ლა ვერსია პატარძალს ასხამდა ხოტბას:

„აი ბედნიერება მივიდა!

კიდევ ვიტყვით: აი ბედნიერება მივიდა!

ბედნიერ დღეს საპატარძლო მიემგზავრება!

ასეთი საოცარი საპატარძლო არსად არავის უნახავს!

მშობლიურ სახლში ფარნა დატოვა,
თავის საკუთარ სახლში ფარნა შეაქვს.
მისი ხელისმომკიდე – წმინდა თათარუპი,
მისი მეგობარი – ლამაზი ლამაზთა შორის,
მად მაირამი – მისი მრჩეველი;
მისი მკერდიდან მზე ანათებს,
მისი თვალები – ვარსკვლავები,
მისი შუბლიდან ფარნა იყურება.
ნართი ურუზმაგი – უფროსი სტუმართა შორის,
ასეთი ლამაზი სტუმრები არსად არავის უნახავს!
ზღაპრულ საქორწილო სუფრას ამზადებენ!
უზარმაზარი ქვაბები შავი ლუდით,
ნართი სათანა – მათი დიასახლისი,
ნართი ახალგაზრდები ემსახურებიან,
ნართი სოსლანი – ანანილებს.
ასეთი ლამაზი სტუმრები არსად არავის უნახავს.“

(ძეგლები 1992: 95)

კერიასთან გამოთხოვების შემდეგ პატარძალს ოჯახის უფროსი ლოცავდა და არიგებდა, რომ მას არ დავიწყებოდა ახლობლები და არ შეერცხვინა მამის სახლი, ყოფილიყო გამრჯე, შრომისმოყვარე და ნამუსიანი.

სახლიდან გასვლამდე ვაჟის მაყრები იწყებდნენ საპატარძლოს დედასთან გამოსამშვიდობებელ ცერემონიას. მაყრები ასრულებდნენ სიმღერას „პატარძლის დედას“, რომელსაც ერთგვარი სამღლოვიარო ელფერი დაჰკრავდა. სიმღერაში გამოთქმულია წუხილი, თუ როგორ უნდა გაეძლო მოხუც დედას, როცა მზესავით მოციმციმე, ვარსკვლავივით მოციაგე მის ქალიშვილს სხვის სახლში წაიყვანდნენ. სასიმღერო ტექსტი წარმოადგენს პატარძლის დედისადმი მაყრების მიმართვას:

„ჰეი, დედი, დილა დგება, ვარაიდა!
ჰეი, დედი, პატარძლის წამყვანს შენი სულიც თან მიაქვს,

ჩვენ მიგვყავს შენი ლამაზი ქალი!
მიგვყავს შენი რიურაჟზე წამომხტომი ქალი
და, აბა, მზეს როგორღა დანახავ?
როგორ უნდა გაძლო, მოხუცო დედავ?“

(ოსური სიტყვიერება 2005: 57-58).

ლექს-სიმღერა ხოტბას ასხამს საპატარძლოს, მის სილამაზეს, შრომის სიყვარულს. ტექსტის მიხედვით, საპატარძლო არის რიურაჟზე წამომხტარი, გვიან ღამემდე მოფუსფუსე, დედის კალთაზე მიბმული, შუადლისას დაუზარელად წყლის მიმწოდებელი, კერის ნაკვერჩხლის შემხვევი, უთენია ცეცხლის ამნთები, ნებიერა ქალი, საპატარძლოდ გამზადებული. სასიმღერო ტექსტით მაყრები პატარძლის დედას უხატავენ იმ რეალობას, რომელიც მისი ოჯახიდან ქალიშვილის წაყვანას მოჰყვება:

„როგორ გაუძლებ დედი!
ლოგინის გამშლელ-ამკეცი შორ გზას გაუყვება,
დღეს დაგემშვიდობება და საცოლე ვაჟები
ალარც გამოიხედავენ შენი სახლისაკენ, დედი!
(ოსური სიტყვიერება 2005: 58).

სასიმღერო ტექსტი მთლიანად მოწოდებულია, რომ საპატარძლოს დედას კიდევ უფრო გაუმძაფროს საყვარელი ქალიშვილის მშობლიური ოჯახიდან წაყვანით გამოწვეული სევდა--მწუხარება. ლექსის ფინალი მკაფიოდ გამოხატავს იმ დრამატიზმს, რომელსაც ქალიშვილის კერიასთან დაშორება იწვევს:

„ჰე, ჰე, რომ უკვე მიგვყავს,
ჰე, ჰე, რომ შენ რა გეშველება,
ახლა მზე უკვე გადაიხარა,
გაამზადე შენი ნებიერა ქალი, დედი!“
(ოსური სიტყვიერება 2005: 58).

ლექს-სიმღერა „პატარძლის დედას“ (нанайы зарæг) თავისი ტემბრითა და მელოდიით, ლექსიკითა და ფრაზეოლოგიით გოდების უანრს უახლოვდება, რაც არ არის შემთხვევითი (ერმინა 1991: 137). ქორწილი და გარდაცვალება მიეკუთვნება გადასვლის რიტუალებს ერთი სოციალური კატეგორიიდან სხვა ფაზაში. საპატარძლო ამთავრებს თავისი ცხოვრების ერთ პერიოდს, როგორც ქალწული და „იბადება“ გათხოვილი ქალის სტატუსით, რომელიც ახალ ცხოვრებას დაიწყებს ქმრის სახლში.

სამგლოვიარო სიმღერის „პატარძლის დედას“ დასრულებისთანავე ქალის ნათესავები განსაკუთრებულ მხიარულ ჰანგზე იწყებდნენ სიმღერას მგზავრთა და მამაკაცთა მფარველ ვასთირჯიზე. სიმღერა მაყრიონს გამგზავრებას აუწყებს. ოჯახის უფროს ქალს ხაძარიდან გამოიქვს სამი ხაჭაპური, მოზრდილი თასით ლუდი. ლუდიანი თასით ილოცება უფროსი ქალი და ხელისმომკიდე. მაყრები კი ოჯახს ემშვიდობებიან სიმღერით, რომელიც საპატარძლომაც უნდა წაიღილინოს: „საფა, ზეციურო საფა, მომეცი ბედნიერი გზა, ბედნიერი ოჯახი, ბედნიერი მომავალი...“ ამით მთავრდება ჩზგარვისთი – ქორწილი პატარძლის სახლში.

პატარძლის ღამე – ჩინძახსავ

(კერიასთან ზიარება)

ოსური ქორწილი დატვირთული იყო სიმბოლური ქმედებებით. ვაჟის სახლში მიყვანისთანავე ხელისმომკიდე, კუხლხაცაგი (კეუხილხაევæг) საპატარძლოს კერიასთან მიიყვანდა და ჯაჭვსაკიდლის (რახისის) ირგვლივ სამჯერ შემოატარებდა. მათ თან მოჰყვებოდა გოგონების ჯგუფი სასიმღერო ტექსტით, რომლის მისამღერიც იყო „ალაი, ოი, ალაი, ალაი-ბულაი“. კერიის გარშე-

მოვლის შემდეგ სიმღერა წყდებოდა, ყველა დამსწრე ფეხზე დგებოდა, რადგან იწყებოდა საზეიმო რიტუალის ყველაზე მნიშვნელოვანი ნაწილი – კერის მფარველობის ქვეშ საპატარძლოს მიღების ცერემონია. ქალი მიდიოდა ჯაჭვ-საკიდელთან, მიიზიდავდა რახისს (ჯაჭვ-საკიდელს), მის ნინაშე ქედს მოიხრიდა, რაც სიმბოლურად ქალის საფას მფარველობაში შესვლას გამოხატავდა. დედამთილის მიერ თაფლ-ერბოს მომზადებას და პატარძლისგან მის დაგემოვნებას ასევე სიმბოლური დატვირთვა ენიჭებოდა: პატარძალს ოჯახი სიტყბოთი და ბარაქით უნდა აევსო, ხოლო დედამთილსა და რძალს ისეთივე ტკბილი ურთიერთობა ჰქონდათ, როგორი სიტყბოც გააჩნდა თაფლისა და ერბოს ნაზავს. ბარაქისა და სინმინდის სიმბოლოს გამოხატავს, აგრეთვე, პატარძლის მიერ საქმროს ოჯახში სალუდე თასის მიტანა. ოსებში ლუდი წმინდა სასმელია, ხოლო თასი, ისევე როგორც ლეგენდარული ნართების ვაცამონგა, ყველაზე პატივსაცემი და საკრალური საგანი.

საქორწილო ცერემონიალის ერთ-ერთი აუცილებელი ნაწილი იყო ოჯახის უფროსის მიერ პატარძლის დალოცვა. უხუცეს მამაკაცს სამ ხაჭაპურსა და ლუდით სავსე თასს მიართმევდნენ და ის წარმოოქვამდა ლოცვას. დალოცვა, როგორც წესი, იწყებოდა ღმერთის ხსენებით, რომელსაც უხუცესი, ძირითადად, დაქორწინებულთა გამრავლებასა და მტკიცე ოჯახის შექმნას შესთხოვდა:

„ოი, ღმერთო, დიდება შენს სახელს,
ღმერთო, საშვილიშვილოდ დაამოყვრე,
ნათესავ-მოყვარე უმრავლე,
შერიე, როგორც თივაში ბალახი,
ამყოფე, ვით კრუხი წინილებიანი,
დათვი ბელებიანი, ხე ფესვებიანი,
ოჯახში ტკბილი, სახელიანი.“

(ოსური სიტყვიერება 2005: 58-59).

საქორნილო ნადიმის დაწყებამდე პატარძალს მთელ სახლს შემოატარებდნენ და შემდეგ მისთვის განკუთვნილ ოთახში შეჰყავდათ, სადაც საქორნილო ზეიმის განმავლობაში მასთან მნახველები შედიოდნენ, ფატას ან ჩადრს უწევდნენ და ასაჩუქრებდნენ.

საქორნილო ნადიმი მიმდინარეობდა საკარნავალო გუნდური სიმღერებისა და ცეკვების თანხლებით, ზოგიერთი მათგანი შეიცავდა ეროტიკულ მოტივებს, მათ შორის ალსანიშნავია ცეკვა-სიმღერა „ჩეფენა“, რომელიც იმართებოდა მაშინ, როცა საქორნილო ნადიმი ექსტაზში შედიოდა. „ჩეფენა“ სიმდის ერთერთი სახეობაა და მას ვაჟები ასრულებდნენ. ცეკვა წრიული მოძრაობით სრულდებოდა. გუნდის ხელმძღვანელი ან მორიგე, როგორც მას უწოდებდნენ, უნდა ყოფილიყო მახვილგონიერი, შემოქმედებითი ფანტაზიით დაჯილდოებული ჭაბუკი, რომელიც დგებოდა წრის შუაგულში და სასიმღერო ტექსტს წარმოთქვამდა, ხოლო გუნდი – მისამღერს: „ოი, ჩეფენა, ჩეფენა!“ ან „ოი, ოი, ჩეფენა!“ მელოდიას ერწყმის მხიარული, სახუმარო, ხშირად ორაზროვანი ტექსტი, რომელშიც პატარძალსაც ახსენებდნენ:

„ახალ პატარძალს აკოცე,
გული ტრფიალით დაკოდე.
აბა, ყოჩალად, ყმაწვილო!
შე ქოჩორგადავარცხნილო!“

(კავკასიური პოეზია 1959: 90).

ტექსტის ყოველ სტრიქონს მოსდევდა რეფრენი „ოი, ჩეფენა“. ტექსტში თითო მუსიკალური პერიოდი წარმოდგენილია ორწინადადებიანი ფრაზებით. შინაარსობრივი და აზრობრივი დატვირთვა მოდის პირველ წინადადებაზე, ხოლო მეორე წარმოადგენს მისამღერს. ცეკვა-სიმღერა „ჩეფენას“ ჰყავდა თავი-

სი მორიგე. ვინც ცეკვის საერთო წესებს არ დაემორჩილებოდა, მორიგე მას მათრახს ურტყამდა. სასიმღერო ტექსტით ხშირად მორიგესაც კიცხავდნენ და ემუქრებოდნენ:

„ჩვენი მორიგე გავტყიპოთ! –
ნეტავ სად მიიპარება?
გოგოებს თვალით ანიშნებს –
შესთხოვს გაულონ კარები.“
(კავკასიური პოეზია 1959: 91).

ცეკვა-სიმღერა „ჩეფენა“ ზოგჯერ ქალ-ვაჟს შორის გაბაა-სებით სრულდებოდა. ქალ-ვაჟი ერთმანეთს მახვილგონიერება-ში ეჯიბრებოდა. სასიმღერო ტექსტში ქალი ვაჟს მიმართავს: „ – გადავიქცევი ჯიხვად, ავალ მთის მწვერვალზე, მაშინ რაღას მიზამ? გუნდი: ოი, ჩეფენა, ჩეფენა! ვაჟი პასუხობს: – გადავიქ-ცევი მონადირედ, დაგეწევი და მაშინ რაღას იზამ? გუნდი: ოი, ჩეფენა, ჩეფენა“ (გოზდანოვა 2010). საქორწილო სუფრა ხში-რად გათენებამდე გრძელდებოდა.

პატარძალს ფატას (ხყვ) ხელისმომკიდე – კუხლხაცაგი (კუხხალხაცაგ) ხსნიდა და ფატის მოხსნას (ხყვისახ) რიტუალუ-რი დანიშნულება ჰქონდა. რიტუალის დროს პატარძალთან მიჰ-ქონდათ სამი ხაჭაპური და თასით ლუდი, ხელისმომკიდე და-ლოცავდა, პატარძალს ცხრა ვაჟსა და ერთ ცისფერთვალება ქალიშვილს უსურვებდა, რის შემდეგაც მოხდიდა ფატას.

ვაისადინობა

ქორწილის დამთავრებისთანავე ქალი იწყებდა ჩვეულებრივ საოჯახო საქმიანობას, ხოლო პატარძლის ურთიერთობას ქმარ-თან, მამამთილთან და ქმრის ნათესავებთან განსაზღვრავდა

ოსებში მტკიცედ ჩამოყალიბებული წეს-ჩვეულება ვაისადინობა (уайсадын). ვაისადინობა წარმოადგენდა აკრძალვების მთელ სისტემას, რომელსაც ახალდაქორწინებული წყვილი უნდა და-მორჩილებოდა. მასში შედიოდა სახის დამალვა, უმძრახობის დაცვა, ხალხისგან მორიდება. ცოლ-ქმარს აკრძალული ჰქონდა საზოგადოებაში ერთმანეთთან საუბარი და ინტიმური გრძნო-ბების გამოხატვა. ვაჟს არ შეეძლო სხვების თანდასწრებით შვი-ლის ხელში აყვანა. ახალგათხოვილი ქალი, პატივისცემის გამო-ხატვის მიზნით, სამი წლის განმავლობაში არ საუბრობდა მა-მამთილის თანდასწრებით, ხოლო შემდეგ, აკრძალვის მოხსნის მიზნით, მამამთილი იხდიდა საღვთოს (ქუვდს), მფარველ ძუარს ცხვარს სწირავდა და რძალს ასაჩუქრებდა.

ოსურ ხალხურ პოეზიაში არის ერთი ლექს-სიმღერა, რო-მელშიც გამოთქმულია აზრი იმ მამაკაცთა შესახებ, რომლებ-საც ჰყავდათ კარგი, ცუდი, ავი ან მეორე ცოლი. ლექსი რიტო-რიკულ შეკითხვებზეა აგებული და ცოლქმრული ურთიერთო-ბების ერთგვარ ზნეობრივ შეფასებას შეიცავს:

- ვისაც კარგი ცოლი ჰყავს, ის ლხინში რატომ მიდის?
- გამუდმებით ლხინი შინ აქვს.
- ვისაც ცუდი ცოლი ჰყავს, მკვდრის სატირლად რაღად მიდის?
- მას ყოველდღე მკვდარი შინ ჰყავს.
- ავი ცოლი ვისაც ჰყავს, გველის რაღად ეშინია?
- ყოველდღე გველი შინ უზის.
- ორი ცოლი ვისაც ჰყავს, გამშველებლად სადღა მიდის?
- ყოველდღე ის თავის სახლში გამშველებელია.

(ოსური სიტყვიერება 2005: 59).

ოსური საზოგადოების ზედა ფენაში მიღებული იყო, აგ-რეთვე, ორცოლიანობა. ოს აღდარებს, უშვილობის ან სხვა მი-ზეზით და პირველი ცოლის თანხმობით, მათზე დამოკიდებული გლეხების ფენიდან მოჰყავდათ მეორე ცოლი, რომელსაც ერქვა

ნომილუსი. ნომილუსი ხშირად ქმრის ან მისი ოჯახის მხრიდან ძალადობის მსხვერპლი ხდებოდა და დისკრიმინაციას განიცდიდა. ნომილუსი ქალის მძიმე ხვედრს გადმოგვცემს ოსი მწერალი სოზირიყო ყულათი მოთხოვნაში „ნომილუსი“.

ლიტერატურა

გოზდანოვა 2010: Гозданова В.С., Традиционная осетинская свадьба: миф, ритуалы и символы, 2010.<http://www.iris-ton.com/nogbon/news.php?newsid=580>

ერემინა 1991: Еремина В. И., Ритуал и фольклор, „Наука“, Л., Наука, 1991.

კავკასიური პოეზია 1959: კავკასიური ხალხური პოეზია, თარგმანი წინასიტყვაობითა და შენიშვნებით გ. კალანდაძისა, გამომცემლობა „საბჭოთა საქართველო“, თბ., 1959.

ოსური ლექსიკონი 2014: ოსურ-ქართული ლექსიკონი (Иронгуйрдзиаг дзырдуат), მთავარი რედაქტორი ნ. ბეჭიევი, გამომცემლობა „უნივერსალი“, თბ., 2014.

ოსური სიტყვიერება 2005: ოსური ზეპირსიტყვიერება, წიგნი შეადგინეს და ოსურიდან თარგმნეს ნ. ბეჭიევამ და მ. ცხოვრებოვამ, გამომცემლობა „კავკასიური სახლი“, თბ., 2005.

ძეგლები 1992: Памятники народного творчества осетин, Трудовая и обрядовая поэзия, т. 1. Владикавказ, Ир., 1992.



Նայմուն Տողթօս



ოსი ხალხის პოეტურ შემოქმედებაში ღრმად აღიბეჭდა წარსულის პეროიკული მოვლენები, მთის ხეობებში მომხდარი ორთაბრძოლები და ცალკეული შეტაკებები. თუ ნართი პერსონაჟები ზღაპრულ სივრცეში ებრძვიან გოლიათებს, დემონურ ძალებსა და ზებუნებრივ არსებებს, ოსურ საგმირო ლექს-სიმღერებში მოქმედება რეალურ ყოფით გარემოში მიმდინარეობს. გმირი ებრძვის რეალურ მოწინააღმდეგებს, მტერს, რომელიც, ერთი მხრივ, საფრთხეს უქმნის საზოგადოების ფიზიკურ არსებობას, ხოლო, მეორე მხრივ, აერთიანებს ბრძოლაში ჩაბმულ ხალხს. ამ ტიპის ლექს-სიმღერების მთავარი გმირი არის რეალური პირი, რომელსაც იცნობს საზოგადოება. ტექსტების უმრავლესობა პერსონაჟებს საკუთარი სახელებით წარმოგვიდგენს. საგმირო ლექსები, როგორც წესი, აღვივებდა სოციუმის ნაციონალურ და პატრიოტულ გრძნობებს. მოგონება საერთო გმირებზე, საერთო წარსულზე და იმ კონკრეტულ ადგილებზე, სადაც სისხლისმღვრელი ბრძოლები გაიმართა, კიდევ უფრო აძლიერებდა საზოგადოების ერთიანობის განცდას.

საგმირო ლექს-სიმღერებმა, რომლებსაც განსაკუთრებული მნიშვნელობა მიუძღვით საზოგადოების კონსოლიდაციაში, სხვა უანრებთან შედარებით ოსურ ფოლკლორში ყველაზე მეტ მხატვრულ სრულყოფილებას მიაღწიეს და ისინი დღესაც აგრძელებენ სიცოცხლეს. საგმირო პოეზიას ვ. აბაევი უწოდებდა „ოსური ხალხური სიმღერის კლასიკას“.

ოსურ საგმირო ლექს-სიმღერებში ასახვა ჰქოვა ისტორიულმა მოვლენებმა, ყირიმელი თათრების შემოსევებმა და ყაბარდოელი თავადების ძალმომრეობამ, ოსური საზოგადოების შიგნით მიმდინარე გვაროვნულმა და ფეოდალურმა ურთიერ-

თობებმა, აგრეთვე, აბრაგობის თემამ, რომელიც აქტუალური გახდა XIX საუკუნის მეორე ნახევარში მთელ ჩრდილოეთ კავკა-სიაში, მათ შორის, ოსეთში. ამ უანრის პოეტურ ნაწარმოებებს, რადგან საფუძვლად უდევთ რეალურად მომხდარი მოვლენები და მასში მონაწილეობენ სავსებით რეალური, ზოგჯერ ისტო-რიულად ცნობილი პირებიც, უნდღებენ საგმირო-საისტორიო ფოლკლორს. მათში ასახული ტოპონიმები და ადგილობრივი გარემო აადვილებს ლექს-სიმღერებში გადმოცემული საგმირო ამბის ლოკალიზებას. მართალია, საგმირო-საისტორიო პოეზიაში არ გვხვდება ჯადოსნური ელემენტები და ზღაპრული სასწაულები, მაგრამ ის არც სინამდვილის ზუსტ სურათს ასახავს. ისტორიულ მოვლენებსა და გმირობა-ორთაბრძოლის სცენებს ოსური ფოლკლორი წარმოგვიდგენს ეპიკური და ბალადის ტიპის ლიროეპიკური სიმღერებით. ისინი აგებულია ტიპოლოგიურ მხატვრულ სიუჟეტებზე და მდიდარია ტრადიციული შედარებებით, მეტაფორებითა და ეპითეტებით. ჰიპერბოლიზებულია როგორც ბალადის მთავარი მოქმედი პირის თავგანწირვა, ისე მტრის სახე, რათა გადატანილი განსაცდელით გმირი კიდევ უფრო მეტი დიდებით შეიმოსოს მომავლის თვალში.

საგმირო ლექსს, მისი შესრულების წესის მიხედვით, საქართველოს მთაინეთში, კერძოდ, ხევსურეთში, სიმღერეს უზოდებენ. ოსურ ენაზე მას ჰქვია ზარაგ. სიმღერით, მუსიკალური აკომპანემენტის თანხლებით სრულდებოდა ბალადები კავკასიის სხვა ხალხებშიც. საგმირო ლექსს ჩეჩინურ-ინგუშურ ენებზეც ჰქვია სიმღერა – „ილლი“ („თურფალა ილლი“ – საგმირო სიმღერა). აღსანიშნავია, რომ ბალადის ტიპის ვაინახური და ოსური საგმირო სიმღერები, ქართულის მსგავსად, ყოველთვის გმირის დაღუპვით არ მთავრდება.

ოსურ საგმირო-საისტორიო სიმღერებს ტრადიციულად ყოფენ სამ ჯგუფად: 1. ლექსები გარეშე მტრების წინააღმდეგ;

2. გვაროვნული და ფეოდალური ურთიერთობების ამსახველი ლექს-სიმღერები; 3. ლექსები აპრაგებზე (ბეკოევი 2010: 37).

საგმირო სიმღერის მთავარი გმირი ძირითადად იპრძვის მა-მულისა და ლირსების დასაცავად. ძალიან იშვიათად სიმღერაში მთავარ პერსონაჟად ქალი გვევლინება, რაც თავისთავად სა-ზოგადოებაში მის მაღალ სოციალურ როლზე მიუთითებს.

ზადალასკელი დედა

საგმირო სიმღერა „ზადალასკელი დედა“ (ვარა ნანა) კონკრეტულ ისტორიულ ვითარებას ასახავს. ტექსტი ბარის დი-გორში მტრის შემოსევას სისხლის წვიმად წარმოგვიდგენს და ქვეყნის განადგურებას თემურ ლენგის შემოსევას მიაწერს. ლექს-სიმღერა ორი ნაწილისაგან შედგება. პირველი, ერთგვარი ექსპოზიციური ნაწილი, ტრადიციული მხატვრული ხერხებით გადმოგვცემს მტრის ნინააღმდეგ დიგორელი ვაჟების თავგან-წირულ ბრძოლას, აყვავებული სოფლების ნგრევასა და ბარდ-ეკლად გადაქცევას:

„სისხლის წვიმა წამოვიდა ბარის დიგორიაში,
შავ ბოლს უშვებს თემურ-ლენგი მწვანე მინდორში.
დიგორელი ვაჟკაცების დადგა დიდი რიგი,
როგორც რკინის ლობე, შემოერტყმნენ ირგვლივ.
იცლებოდნენ სისხლად, მიდიოდნენ მკვდრეთს,
წყდებოდნენ და მაინც არ იხრიდნენ ქედს.
ცეცხლი ბუგავს დაბლობს,
და დიგორა მაშინ უცბად წაილეკა.
ეს მწვანე წალკოტი დარჩა ბარდს და ეკალს.“
(ოსური სიტყვიერება 2005: 43).

ჩამქრალ კერიასთან მიტოვებული ბავშვების ტირილში ქვეყნის სრული დაქცევის სურათი იხატება. ლექს-სიმღერა უპატრონოდ დარჩენილი ბავშვების სავალალო, უნუგეშო ყოფას გვიხატავს:

„დარჩენენ უპატრონოდ, პატარები მაშინ,
ტირილით ქექავდნენ სახლის ნაცარ-ნახშირს.“

(ოსური სიტყვიერება 2005: 43).

მთავარი მოქმედი გმირი, ზადალასკელი დედა, სასიმღერო ტექსტის მხოლოდ მეორე ნაწილში ჩნდება. მისი საკუთარი სახელი სასიმღერო ტექსტმა ვერ შემოგვინახა და ის ზოგადი სახელით იწოდება – „ნანა“ – დედა, რომელიც უფროსი ქალისადმი მოკრძალებასა და პატივისცემას გამოხატავს. ზადალასკელი დედა იმ გმირთა რიცხვს მიეკუთვნება, რომლებმაც უკიდურესი გაჭირვების ჟამს თავისთავზე იტვირთეს დაობლებული ბავშვების გადარჩენის მისია. მან შეუძლებელი შეძლო, ფეხით შემოიარა დიგორიის გადამწვარი სოფლები, ერთად შეკრიბა უპატრონოდ დარჩენილი უდედმამო ბავშვები, მტერს გაარიდა და მიუვალ მთებში გაჭირვებით გაზარდა. ბალადა გვიხატავს ობლებზე მზრუნველ ნანას, რომელიც ბავშვებს დედობრივი სიყვარულით ზრდიდა და მტრისაგან იცავდა:

„უცბად, მათდა ბედად, გაჩნდა ერთი ქალი,
მიაწოდა პური, მააწოდა წყალი.
თან წაასხა ცველა, როგორც ცხვართა ფარა,
ვით საკუთარ შვილებს – ისე მოუარა.
მოარიდა ბოროტს, მტაცებელს თუ მპარავს.
აიყვანა ზემოთ – ზადალესკის თავზე,
ხან ბალახებს აჭმევს, ხან ჰყავს მხოლოდ წყალზე.“
(ოსური სიტყვიერება 2005: 43).

საგმირო ლექსებსა და ბალადებს ხშირად, როგორც წესი, თან ახლავს პროზაული გადმოცემაც, იგი ავსებს და აზუსტებს ტექსტში გადმოცემულ ამბავს, რის გარეშეც ბუნდოვანი იქნებოდა ბალადის შინაარსი. ზადალასკელი დედის კეთილშობილურ საქციელს სხვებიც განუწყვია სიკეთის საკეთებლად. ერთ-ერთი გადმოცემის თანახმად, ნანა როცა თავისი ბავშვებით ზადალეს-კში მისულა, იქ მისთვის ბავშვების სხვადახვა ოჯახში გადანაწილება და მათი აღზრდა შეუთავაზებიათ. ნანას ბავშვების გასხვისებაზე უარი უთქვამს. თუმცა სოფლელებს და უფრო ერთ შეძლებულ გვარს, თექიევებს ბავშვებისთვის ზადალესკში საერთო სახლი აუშენებიათ და, როგორც შეეძლოთ, ისე ეხმარებოდნენ ქალს ბავშვების აღზრდაში. ნანას ყველა ბავშვი ღირსეულად აღუზრდია: ქალიშვილები გაუთხოვებია, ვაჟები დაუქორნინებია და ნანას ოჯახიც უფრო გამრავლებულა:

ნამოზარდა ყველა, დავაჟყაცდნენ უკვე,
ისეთები გახდნენ – ყველა გამზრდელს უქებს.

ნანას გარდაცვალებამ ყველას გული ატკინა. პატივაცემი მოხუცი ღირსეულად დაუკრძალავთ და მის ხსოვნას ხალხი დღემდე პატივს მიაგებს:

მიიცვალა დედა, ირგვლივ გლოვა სუფევს,
დიდებით დაკრძალეს, – ყველას დედა უკვე.
დღესაც ყველა ამ ქალს სანთელ-საკმელს უკმევს.“
(ოსური სიტყვიერება 2005: 44)

ზადალასკელი დედის გმირობა და ხალხურ ტექსტში გადმოცემული ამბავი, როგორც ჩანს, საფუძვლად დასდებია სოფელში სიწმინდის, კულტის აღმოცენებას. ნანას გარდაცვალების შემდეგ ის სახლი, საადაც ქალმა ობლად დარჩენილი ბავშვები გაზარდა, წმინდა, სალოცავ ადგილად გამოუცხადებიათ და

დღემდე ყოველი წლის ივლისის მესამე შაბათს ოსები იქ აღნიშნავენ ნანა ზადალესკის დღეს (ზადალესკი ნანა ბარაგბო). ნანა ზადალესკის მსხვერპლს სწირავენ, ანთებენ სანთელს, ჭრიან ქადებს, დღესასწაულისთვის საგანგებოდ ამზადებენ ლუდს; ნანას შესთხოვენ ბავშვებისა და ახალგაზრდების მფარველობას, ავადმყოფობისგან განცურნებას. 6. ანთელავას აზრით, სავსებით შესაძლებელია, ნანას კულტი უკავშირდებოდეს ზადალესკში ერთ დროს არსებულ მარიამ ლვთისმშობლის სახელობის სალოცავს – „მად მაირამს“ (ანთელავა 2012: 70). ნანას განსაკუთრებით ის ოჯახები ლოცულობენ, რომლებსაც წლის განმავლობაში ქალიშვილები შეეძინათ. ისინი სალოცავში მიდიან ზვარაკითა და სანთელ-საწირით. ნანა ზადალესკის ქალებისა და ბავშვების სალოცავსაც უწოდებენ.

სიმღერა აიდარუყზე

ჩრდილოეთ ოსეთის დასავლეთ ნაწილში, კერძოდ, დიგორში, ფეოდალური ურთიერთობები თემურ ლენგის ლაშქრობის შემდეგ ჩამოყალიბდა, როცა ბარის ალანიიდან ადგილობრივი სოციალური ელიტა მთის ხეობებს შეეხიზნა და იქ ძალაუფლების მოსაპოვებლად დაიწყო ბრძოლა. გადმოცემის მიხედვით, დიგორში თავისი ხალხით მისულა ვინმე ბადელი და ადგილობრივი მოსახლეობისთვის შეუთავაზებია მტრის თავდასხმების-გან დაცვა. სამაგიეროდ დიგორელებს უნდა გადაეხადათ საფასური – ყოველ კომლს თითო საწყაო მარცვლეული ან ერთი ბატქანი. ბადელის შთამომავლები თანდათანობით დიგორის ორი ნაწილის – ვალაგქომისა და თაფან-დიგორის მფლობელები გამხდარან, დვალეთიდან მოსული ცარგასები სთირ-დიგორში

გაბატონებულან. თაგაურის ხეობაში კი დაწინაურებულ ფენას ალდარები შეადგენდნენ.

დიგორში ბარის ალანების გამოჩენას, როგორ ირკვევა, სო-ციალურ ჯგუფებს შორის შეტაკება მოჰყოლია. ალანელი ფეო-დალები ხალხურ ტექსტებში იდენტიფიცირებული არიან ბადე-ლიათებად. ახალ საცხოვრისში მათ ჯერ ერთმანეთთან, ხოლო შემდეგ მთიელ უხუცესებთან გააფთრებული ბრძოლებით მოი-პოვეს სოციალური პრივილეგიები. სისხლისმღვრელი ბრძოლე-ბის შედეგად მთიან ოსეთში ზოგიერთი დაწინაურებული გვარი განადგურდა, ზოგიც განიდევნა და იქ ალდარებისა და ბადელი-ათების ფეოდალური მმართველობა დამყარდა.

მკვლევართა ვარაუდით, ოსურ ფეოდალურ ელიტას სწო-რედ თაგაურელი ალდარები, დოგორელი ცარგასათები და ბა-დელიათები შეადგენდნენ. მათ შორის კი ყველაზე მეტად დაწი-ნაურებულან ბადელიათები.

ბადელიათების გამოჩენამდე დიგორელები ცხოვრობდნენ თანასწორი უფლებებით და საზოგადოებას უძღვებოდა ნიხასი, რომელიც იკრიბებოდა სტონას ველზე. დიგორელები სადაც საკითხების მოსაგვარებლად და საომრად ირჩევდნენ წინამ-ძღოლს. დიგორელთა ერთ-ერთი სახელგანთქმული წინამძღ-ლი ყოფილა აიდარუყი.

ოსურ ფოლკლორში მეტად პოპულარულია საგმირო ლექსი „სიმღერა აიდარუყზე“, რომელიც დიგორში ფეოდალური ურ-თიერთობების ჩამოყალიბების პროცესს ასახავს. საგმირო სიმ-ღერა მხატვრული სახეებით გადმოგვცემს აიდარუყის დაპი-რისპირებას ბადელაანებთან (ბადელიათებთან). ხალხურ ტექ-სტებში აიდარუყი წარმოდგენილია როგორც მამაცი მეომარი, გა-მოცდილი წინამძღოლი, ბრძენი მრჩეველი, სამართლიანი მსა-ჯული, საუკეთესო მხედარი, უბადლო მონადირე და გულისხმი-ერი ძმადნაფიცი. სულიერ თვისებებთან ერთად, ის ყოფილა მე-

ტად მოხდენილი ვაჟკაციც. გმირის მეტოქე ბადელიათების ქალ-რძალს აიდარუყი მამაკაცობის ეტალონად მიაჩინდა:

„აიდარუყი აი, მაშინ იყო აიდარუყი!
ახლად მოფიფქულ თოვლზე სანადიროდ რომ დადიოდა,
ბადელანთ ქალ-რძალნი მის ნაკვალევზე
ფეხსაცმლის თარგს რომ ჭრიდნენ,
ხოლო მის ჩრდილზე – ჩოხის თარგს.“
(ოსური სიტყვიერება 2005: 42).

ბადელანთ ქალებს განსაკუთრებით აიდარუყის ვაჟკაცური თვისებები იზიდავდათ. მსგავს მოტივს ვხვდებით ქართველ მთიელთა საგმირო პოეზიაშიც. ღირსეული მტრის მიმართ ქალის სათუთ განცდებს გადმოგვცემს ხევსურული საგმირო სიმღერა ხირჩლა ბაბურაულზე. მითხოელ ქალებს, ერთი მხრივ, ხირჩლა ბაბურაულის დანახვის სურვილი იპყრობთ, მეორე მხრივ, აშინებთ ქისტეთის დაუძინებელი მტრის გამოჩენა:

„ტიტულის კიდურ გაბერიტეს მითხოელთ ქალებმ ცქერითა:
„როს გამოჩინდება, წეტარა, ბაბურაული ფრენითა?
წირჩლავ, ნუმც გამასჩენილხარ თავის ლურჯაის ცხენითა!“
(შანიძე 1931: 12).

ოსური „სიმღერის“ მიხედვით, ბადელიათების ქალ-რძალს დიგორელი ჭაბუკი გულში ჩაუვარდა და აიდარუყისთვის თავის მოსაწონებლად ისინი ათას ხერხს მიმართავდნენ:

„ბადელანთ ქალებმა მკერდი მისთვის აიკოკრეს.
მათმა რძლებმა კი მკერდი წინ წამოიწყობეს.“
(ოსური სიტყვიერება 2005: 42).

აიდარუყმა შეძლო საზოგადოებაში სრული თანხმობის დამყარება. ის ძალ-ღონეს არ იშურებდა დიგორელთა დასაცა-

ვად. ზოგიერთი გადმოცემით, სწორედ მაშინ გამოჩენილა პირველად ბადელიათების წინაპარი ბადელი დიგორში. აიდარუყს ის მიუღია და თავშესაფარიც მიუცია. პირველი ცეცხლსასროლი იარაღიც დიგორში ბადელის შემოუტანია. პირველივე ბრძოლაში მას მომხდური მტერი დაუმარცხებია, ამის გამო ბადელის დიგორელთა ნდობა მოუხვეჭია. ის პირველი გადიოდა თურმე მტრის წინააღმდეგ საბრძოლველად. სამსახურის სანაცვლოდ ბადელი ყოველი ოჯახიდან თითო საწყაო პურეულ მოსავალს იღებდა. ერთხელაც მოუსავლიანი წელი ყოფილა და ხორბლეულის ნაცვლად მისთვის ბატკნები მიუციათ. დიგორელებისთვის ბატკნით გასამრჯელოს გადახდა ბევრად უფრო მოსახერხებელი იყო, რადგან მათ ძირითად საქმიანობას მეცხვარეობა-მესაქონლეობა წარმოადგენდა და თანაც ისინი მუდამ მარცვლეულის ნაკლებობას განიცდიდნენ. ამ ცვლილების შემდეგ ბადელი გამდიდრებულა – მალე კომლზე გადახდილი თითო ბატკანი დიდ ფარად გადაქცეულა (ბლიევი 2000). ბადელი ჯერ ლეზგორელ გოგონაზე დაქორწინებულა, შემდეგ კი – ყარაჩაელი თავადის ასულზე. მისი ოჯახი სწრაფად გაზრდილა. ბადელის ვაჟები გამოირჩეოდნენ განსაკუთრებული ძალ-ღონით. თუმცა, სიმღერის მიხედვით, აიდარუყს სიმამაცით მაინც ვერავინ ჯობდა.

საგმირო ლექსი ფრაგმენტულად გვიხატავს აიდარუყის სიმამაცის ძირითად ეპიზოდებს. ერთხელ დონიფარსელ ძმობილს თულიათ თულაბეგს აიდარუყისთვის საუკეთესო ცხენი უჩუქებია, რომლითაც ბადელიანთ რჩეულ ვაჟებთან ერთად საჯირო-თოდ წასულა. ბალადა გადმოგვცემს, რომ აიდარუყმა, ვისაც მხარი გაპკრა, „ყველა ყვავ-ყორნებივით მიმოფანტა“.

როგორც ჩანს, აიდარუყი არ ენდობოდა ბადელიათებს და არ აძლევდა მათ დიგორში გაბატონების საშუალებას. აიდა-

რუსს ბადელიათების დიდ ოჯახში მცველიც კი დაუყენებია, რა-
თა მათი მოქმედებისთვის თვალ-ყური მიედევნებინა:

„ბადელაანთ დიდი ბადელის – მაცუთის –
შუა სახლში მცველი რომ დააყენა,
აიდარუყი აი, მაშინ იყო აიდარუყი!“
(ოსური სიტყვიერება 2005: 42).

საგმირო ლექსი კონტრასტულად წარმოგვიდგენს, ერთი
მხრივ, აიდარუყის სიჭაბუკესა და მის ვაჟკაცურ თვისებებს, ხო-
ლო მეორე მხრივ, მის სიბერეს, როცა გმირს აღარ შეეძლო ბადე-
ლიათების მზარდი გავლენისთვის წინააღმდეგობის გაწევა:

„ახლა კი დაბერდა იგი,
ფარასკართის ნიხასში მყოფს გააურუოლა,
რაკი ბადელაანი რიგში ჩამსხდარან.“
(ოსური სიტყვიერება 2005: 42).

ფარასკართის ნიხასში აიდარუყის იმიტომ გააურუოლა, რომ
მას აწევს ასაკობრივი ტვირთი: მისი მეტოქე ბადილაანი „რიგში
ჩამსხდარან“, ხოლო მას, თავის დროზე გამორჩეულ ვაჟკაცს,
არ ხვდა წილად ბრძოლის ველზე სიკვდილი. მამაკაცის ნორმა-
ლური სიკვდილი კი არის სიკვდილი ბრძოლაში. ხევსურულ
ლექსში თინიბექი, იმის გამო, რომ სახლში დაუდგა დაღუპვის
წამი, „გულსუნადინოდ კვდებოდა“.

საბოლოოდ, მოხუცმა აიდარუყიმა ვერ შეძლო ხალხის დარ-
წმუნება, რომ ისინი არ მინდობოდნენ და არ დამორჩილებოდ-
ნენ ბადელიათებს. ფიზიკურმა სიძლიერემ, სიბრძნემ და სიმ-
დიდრემ ბადელი გავლენიან კაცად აქცია. თანდათან ის გახდა
დიგორელთა წინამძღვრი მტრის წინააღმდეგ ბრძოლებში და
მშვიდობიანი ცხოვრების დროს გადაწყვეტილების მიმღებიც.
ბადელის შვილებისგან მომდინარეობს შვიდი გვარი: აბისალთი,

ქუბათი, თუღანთი, ყარაჯთი, ბითითი, ჩეგემთი და ქაბანთი, თუმცა ყველა მათგანი იწოდებოდა ბადელიათად (ბადელის შთამომავლებად). ამ დროიდან ეს გვარები მართავდნენ დი-გორს და იცავდნენ ქვეყანას გარეშე მტრებისგან. ძლევამო-სილმა ბადელიათებმა სათემო საძოვრები და სახნავ-სათესი მი-ნები თავიანთ საკუთრებად გამოაცხადეს, ხოლო თავისუფალი დიგორელები გახდნენ მათზე დამოკიდებული. ისინი მუშაობ-დნენ ბადელიათების სასარგებლოდ (ბლიევი 2000).

საგმირო ლექსის მიხედვით, აიდარუყს არ დარჩა ლირსეუ-ლი მეკვიდრე, ხოლო მის ფაფარაშლილ მერანს აღარ ეყოლება მამაცი მხედარი. აიდარუყის „უგერგილო“ ვაჟი კი ვერც ცხენს მოუვლის და ვერც მამასავით იჯირითებს:

„აიდარუყი იმქვეყნად ხომ საფლავში გადაბრუნდება,
მის ფაფარაშლილ თეთრ მერანზე
მისი უგერგილო ვაჟი რომ შეჯდება,
შვიდი კაცის დიდ სტონაზე მის მერანს
დილიდან საღამომდე თოკზე მიბმულს,
მშიერ-მწყურვალს რომ დატოვებს.“

(ოსური სიტყვიერება 2005: 43).

უპატრონოდ დარჩენილი დიგორის სიმბოლური სურათი იხატება, როდესაც საგმირო სიმღერა აიდარუყის გარეშე, პატ-რონის მზრუნველობას მოკლებული ცხენის სავალალო მდგო-მარეობას გვიხატავს. ლექსში გამოთქმულია პესიმისტური დას-კვნები. ტექსტის მიხედვით, სხვა პატრონი გამოუჩნდება აიდა-რუყის ცხენს, რომლითაც შვიდი ვაყაცის ახალგაზრდობა შეუს-ვენებლად იჯირითებს, მისი უზანგებიდან რკინის ქალამანს გა-მოჭედავენ, სამკერდულს კი წვრილ-წვრილ თასმებად დაჭრიან, რის გამოც „იმქვეყნად მყოფი აიდარუყი, ალბათ, საფლავში გა-დაბრუნდება“.

საგმირო სიმღერა გამოხატავს წუხილს ბადელიათების გა-ბატონების გამო და აიდარუყის სიკვდილს დიგორელების და-ლუპვად მიიჩნევს:

„ჰაიტ, დიგორა, თქვენი დალუპვის დღე დამდგარა!“

დიგორში გაბატონების შემდეგ, ბადელიათები თავს ეს-ხმოდნენ ოსეთის სხვა ხეობებსაც. ერთ-ერთი საგმირო სიმღე-რის მიხედვით, მწვანე მდელოზე შეიყარნენ ბადელაანები და უმცროსებს მოუწოდეს: წავიდეთ ვალაგირში (ალაგირის ხეობა) საალაფოდ, წამოვასხათ დიდი ჯოგი და ჩვენს უფროსებს ვასია-მოვნოთო. მართლაც წავიდნენ და როცა დიდ ჯოგებს მოერეკე-ბოდნენ,

„ამოეფარა კარებს მოხუცი,
ყირიმული თოფი მოიმარჯვა,
დაუწყო სროლა მოძალადეებს,
პირველმა ტყვიამ გადმოაგდო
მათი სარდალი ლალი ცხენიდან.“

სხვებმა კი მიატოვეს ნაქურდალი და გაიქცნენ (ჩლაიძე 2006: 111). „აიდარუყის სიმღერაში“ რეალურობის განცდას ამ-ძაფრებს გმირის სამოქმედო გეოგრაფიული სივრცის, მიკრო-სამყაროს ასახვა. საგმირო ლექსში გვხვდება ტოპონიმები: დო-ნიფარსი, სადაც აიდარუყის ძმადნაფიცი თულიანთ თულაბეგი ცხოვრობდა, აგრეთვე, სოფელი ფარასკართი და მისი ნიხასი. გვხვდება დიგორის სხვა ტოპონიმებიც: დიდი სტონა, შვიდი ვა-ყაცი.

სიმღერა ყირიმის ხანის ლაშქრობის შესახებ

ოსურ საისტორიო ზეპირსიტყვიერებაში აისახა ოსი ხალხის ბრძოლა გარეშე მტრების წინააღმდეგ. მოძალადე აგრესორებად სასიმღერო ტექსტები ყაბარდოელ თავადებსა და ყირიმის ხანს წარმოგვიდგენს, ხოლო ბრძოლის ადგილად – ჩრდილოეთ კავკასიის მთის ხეობებს.

საგმირო სიმღერა „ელბერდუყ თუღანთი“ (ვარიანტ. „სიმღერა ყირიმის ჯარზე“) ისტორიულ რეალობას, კერძოდ, ყირიმელი თათრების წინააღმდეგ დიგორელების ბრძოლას ასახავს. მხატვრული თვალსაზრისით, ეს ბალადა ოსური საგმირო პეზიის საუკეთესო ნიმუშად ითვლება. ტექსტი გ. ძაგუროვს 1926 წელს ჩაუწერია თათარებან თუღანოვისგან. „სიმღერა ყირიმის ჯარზე“ წარმოადგენს ტიპურ ბალადას.

ბალადის მიხედვით, მაცნემ დიგორელებს თავზარდამცემი ამბავი აუწყა: ყირიმის ხანი უთვალავი ჯარით დიგორის დასაპყრობად წარმოსულა. მოულოდნელმა ამბავმა მთელი ხეობა ააფორიაქა. ტექსტში მოვლენები სწრაფად ვითარდება: მტერი ხეობისკენ მიიღევს და მთქმელს თითქოს დრო არ რჩება ამბის გადმოსაცემად. მთავარი გმირი ელბერდუყ თუღანთი, ბადელიათების სამაგალითო წარმომადგენელი, ბალადაში გვევლინება, როგორც მამაცი და უშიშარი წინამძღოლი. მან ჭენებით შემოირბინა დიგორის სოფლები შეძახილით: – „დიგორელებო, ყირიმელები ბევრი არიან, მაგრამ არც ჩვენ ვართ ლაჩრები. გავიდეთ მათ შესახვედრად, ვიდრე არ მოსულან. დავიკავოთ საბრძოლო კოშკები!“ დიგორელთა ყველა სოფელი მშობლიური კუთხის დასაცავად მტრის წინააღმდეგ დაირაზმა.

დაპირისპირებულ მხარეებს ბალადა მეტაფორულად წარმოგვიდგენს. ყირიმის ხანის ლაშქარი შავი ნისლია. მტრის ჯართან ელბერდუყ თუღანთის გამოჩენა კი – მეხის ჭექა:

„დარგონიდან დიგორიის ხეობამდე გზა შავმა ნისლმა დააბნელა.
მეხმა დაიგრიალა და მთებიდან თეთრი ღრუბელი ჩამოეშვა.
არა, შავი ნისლი არ იყო. ეს ყირიმელი ხანის ჯარი მოდის.
და მთებიდან წამოსული კვამლი არ არის თეთრი ღრუბელი,
დაბლა მეხის ნაცვლად სხვა რამ დაეცა,
ეს დიგორელი ელბერდუყ თულანთია.“

(ოსური პოეზია 1974).

ლექს-სიმღერა ელბერდუყ თულანთის მტერთან შეტაკებას
ბუნების სტიქიური ძალების გააქტიურებას უდარებს. ბალადაში
თითქოს კოსმიური ბრძოლის სურათი იხატება. ყირიმის ხანის
ლაშქართან დიგორელთა სისხლისმღვრელი შერკინება წარმოდ-
გენილია, როგორც მეხის ტყყორცნა, ქარიშხალი და სისხლის წვიმა.

„მთებში სისხლის წვიმა დიდხანს იღვრებოდა.
მეხი ჭექდა, ქარიშხალი არ ცხრებოდა“.

(ოსური პოეზია 1974).

სიმღერა ბრძოლის მხოლოდ მნიშვნელოვან დეტალებზე
ამახვილებს ყურადღებას. ელბერდუყ თულანთის გარდა, მტრის
წინააღმდეგ თავი ისახელა ძანყალიცის სამმა ვაჟმაც, რომლებ-
საც ბალადა კავკასიის მთის ხალხებში გმირის სიძლიერის გა-
მომხატველი მეტაფორით მოიხსენიებს და მგლებს უდარებს:

„ანაზდად სამი მამაცი მგელი შევარდა ფარის შუაგულში.
არა, არც მგლები იყვნენ და არც მგლის ლეკვები,
რომლებმაც ცხვრის ფარა გაანადგურეს.
ის ძანყალიცის სამი ვაჟი იყო,
ხოლო მათ წინ ყირიმელთა ურდო.“

(ოსური პოეზია 1974).

ლექსის ფინალში ბალადის ლირიკული გმირი დიგორელებს
აღმატებული ტონით ულოცავს გამარჯვებას და მტრის დამარ-
ცხებას ყირიმული ფოლადის დალენვას უწოდებს.

„ოი, დიგორელებო, გაიმარჯვეთ ხანებზე,
ყირიმული ფოლადი დალენეთ.
სისხლში მოთხვრილი თასოლთანი ბრძოლაში მოკლეს.
დიდია მათი მწუხარება?“

(ოსური პოეზია 1974).

დიგორელებმა ბრწყინვალე გამარჯვება მოიპოვეს, მაგრამ არ ჩანს, რა ბედი ენია ელბერდუყ თუღანთის. მთქმელი დუმს, არაფერს გვეუბნება. ვაჟა-ფშაველას პოემა „ბახტრიონშიც“ არ იციან გამარჯვებულმა ფშავლებმა თავიანთი ბრძენი მეთაურის ბერი ლუხუმის გაუჩინარების მიზეზი.

კიდევ ერთი პარალელიზმი შეინიშნება ვაჟას პოემასა და ოსურ ლექსს შორის. ორივე ნანარმოების ფინალი ამხელს მოღალატესა და ქვეყნის პირის გამტეხს: „ბახტრიონი“ – წინოლას, ხოლო ოსური ბალადა – იმ მოყმეს, რომელმაც ყირიმის ხანს დიგორში მისასვლელი ბილიკები მიასწავლა. სასიმღერო ტექსტი სარკაზმით გადმოგვცემს მოღალატის სამარცხვინო საქციელს, როცა დიგორელები მტერს გაცხარებით ებრძოდნენ, ის მსუქან მწვადსა და შავ ლუდს მიირთმევდა. ბალადა არაფერს გვეუბნება გამცემის დასჯაზე, რადგან ყველაზე დიდი სასჯელი მისთვის მოღალატის სახელია:

„მსუქანი მწვადითა და შავი ლუდით მუცელი ვინ ამოიყორა?
ეს ის არამზადაა, ვინც მთის ბილიკებზე
ხანს დიგორელებთან მისასვლელი გზა მიასწავლა“

(ოსური პოეზია 1974).

სასიმღერო ტექსტს აქვს ბალადებისთვის დამახასიათებელი დასრულებული კომპოზიციური წყობა და მყარი სტრუქტურა.

სიმღერა თაიმურაზზე

ყაბარდოელი თავადების ძალმომრეობა და მათი ცალკეული ჯგუფური თავდასხმები ოს ხალხზე აისახა საგმირო ლექსში „სიმღერა თაიმურაზზე“, რომელიც თავისი კომპოზიციური წყობით, სტრუქტურით, თემატიკით, მასში ასახული მძაფრი განცდებითა და ტრაგიკული დასასრულით მიეკუთვნება ბალადის ჟანრს. „სიმღერა თაიმურაზზე“ გმირის დალუპვით მთავრდება. ტექსტში მოქმედება ხდება რეალურ გეოგრაფიულ გარემოში, კერძოდ, ჩრდილოეთ ოსეთის მთიანეთში, ხარხის კლდოვან მთებში. ბალადის მთავარი გმირი არის თაგაურელი ჭაბუკი თაიმურაზ ქოძირთი. მსმენელზე მძაფრი, ემოციური შთაბეჭდილების მოსახდენად ბალადა თაიმურაზის სიკვდილისწინა განცდებს პირველ პირში გადმოგვცემს. ტექსტის ეპიკური ნაწილი მთავარი გმირის მონოლოგებზეა აგებული. თაიმურაზი მიმართავს დედას და უშუალოდ გმირის ამ მონათხრობიდან ვეცნობით დრამატულ ისტორიას.

პირველი მონოლოგი ბალადის ერთგვარ ექსპოზიციურ ნაწილს წარმოადგენს. თაიმურაზი დედას დიდთავა ირემზე (cæpræjinh sag) სანადიროდ წასვლის სურვილს უცხადებს და სთხოვს დილისთვის გემრიელი და მსუბუქი საგზალი მოუმზადოს. აქედან ჩანს, რომ გმირი საგანგებოდ ემზადება შინიდან წასასვლელად, როგორც ხევსურული ბალადის პერსონაჟი იონეური, რომელსაც: „დედა დაუცხობს საგძალთა, მამა უბანდავს ჯღანთაო.“

ბალადაში „სიმღერა თაიმურაზზე“ მოქმედება სწრაფად ვითარდება. მომდევნო ეპიზოდი უკვე ნადირობის შედეგს გადმოგვცემს. თაიმურაზის „ნადირობა“ წარმატებული აღმოჩნდა. ცოტა ხნის შემდეგ სოფელში სანადირო ადგილიდან თაიმურაზის მოკლული „ირმის“ ბლავილი შემოესმათ.

მაგრამ ნადირობა ბალადაში ალეგორიულ მნიშვნელობას იძენს. მოკლული „დიდთავა“ ირმის (cærdjinh sag) დაფარულ მნიშვნელობას გმირის სიკვდილისწინა მონოლოგში ვეცნობით. როგორც ირკვევა, თაიმურაზს მოუკლავს არა ქორბუდა ირემი, არამედ ყაბარდოელი ფეოდალების წინამძღოლი, მათი სასტიკი და ძლიერი თავადი:

„მთაში ირემი მოვკალ, გაგეხარდება განა?!...–
არც გაგეხარდეს, დედი, ნურც გეწყინება ნანა!
ო, განა მართლა ირემს გადავეყარე გზაში –
ყაბარდოელთა თავადს ტყვია გავარტყი თავში.“
(კავკასიური პოეზია 1959: 96).

გმირი მტერთან ბრძოლის მიზეზსაც გადმოგვცემს. ყაბარდოელი თავადები ოსეთის მთებში დათარეშობენ და ძალადობენ. ბალადის მიხედვით, მათ ავი ზრახვა ამოძრავებთ:

„სისხლის ამლები მოდის, ავად გვიპირობს წვევას,
ხარხის ხევიდან მტერი, შემოეფინა მწვერვალს.“
(კავკასიური პოეზია 1959: 97).

ისინი შეურაცხყოფენ და დასცინიან თაიმურაზს. მათ თავ-ხედობას საზღვარი არა აქვს. გმირი მიმართავს ყაბარდოელ თავადებს და ამხელს მათ უსამართლობას:

„თაიმურაზი ეტყვის: – სისხლისმწოველო მგლებო,
ჩვენი ნაშრომით ძლებით, ჩვენს ნასახლარზე მეფობთ!
და მწირ კლდეებშიც ახლა აღარ გვასვენებთ, გვდევნით,
ჩემს გმირობასაც ნახავთ, დაგინელდებათ დღენი“...
(კავკასიური პოეზია 1959: 97).

როგორც ცნობილია, ყაბარდოელმა თავადებმა ოსები აიძულეს ჩრდილოეთ კავკასიის ბარიდან მაღალ მთებში ასულიყ-

ვნენ. მათ ოსებს ხეობიდან ბარში გასასვლელი გზებიც ჩაუკეტეს და იქ ციხე-სიმაგრეები ააგეს. მთის ვიწრო და უნაყოფო ხეობებში მცხოვრებ ოსებს ყაბარდოელები მაინც არ ასვენებდნენ და ავიწროებდნენ. ბალადის ერთ-ერთ ვარიანტში თაიმურაზი მიმართავს ყაბარდოელ თავადებს:

„გაგვდევნეთ ჩვენი ლამაზი, აყვავებული ველ-მინდვრებიდან ყინულიან, მწირ მთებში და აქაც არ გვასვენებთ“ (ბეკოევი 2010).

ბალადაში კულმინაციას შებრძოლების ეპიზოდი წარმოადგენს. თაიმურაზი ურთულეს სიტუაციაში მარტოდმარტო ებრძვის მრავალრიცხოვან მტერს. ყაბარდოელ თავადთა ნასროლი ტყვიები მისკენ სეტყვასავით მოდიოდა. მომაკვდავი გმირი დედის შეკერილ ჩოხას ცერექის ჯაჭვის პერანგს (Церечы ვგეჭერა) აგონებს, რომელსაც ნართი სოსლანი ატარებდა. ცერექის ჯაჭვის პერანგი საბრძოლო განგაშის დროს გმირს თავისით ეცმებოდა. მას არც მტრის მახვილი ჭრიდა და არც ტყვია ეკარებოდა. მომაკვდავი გმირის დედისადმი მიმართვაში მკაფიოდ იხატება ვერაგ მტერთან ბრძოლის სურათი:

„როს შევეჯახე მთაში დუშმანს ვერაგს და აშარს,
შენი ნაკერი ჩოხა ჰყავდა ცერექის ჯავარს.
ვერც მტრის მახვილი სჭრიდა, ვერც მიეკარა ტყვია,
ჩემგან ნამუსრი მტერი ხარხის კლდეებზე ყრია.“

(კავკასიური პოეზია 1959: 97-98).

თაიმურაზი არ შეუშინდა მტრის სიმრავლეს, მან მედგარი წინააღმდეგობა გაუწია ყაბარდოელ თავადებს, მოკლა მათი წინამძღოლი, მაგრამ მტრის რიცხობრივმა უპირატესობამ თავისი გაიტანა და თაიმურაზი გმირულად დაიღუპა. ხარხის ხეობის მთები მისი გმირობის უტყვი მოწმენი გახდნენ:

„მაგრამ იმძლავრეს ჩემზე ახლად მომხდურმა მტრებმა – ხარხის ხეობამ ნახა, როგორ დამგლიჯეს მგლებმა.“
(კავკასიური პოეზია 1959: 98).

ბალადის ფინალში გმირი მოკრძალებულ საყვედურს უთვლის ქოძირაანთ, თავის ახლობლებს, იმის გამო, რომ ჭრელ ხარში არ გადაცვლევინეს თოფი, რომელიც მტრის წინააღმდეგ „საკვირველ საქმეს“ ჩაადენინებდა:

„ქოძირაანო ძმანო, ეგ თქვენი ჭრელი ხარი
დღეს ჩემს ქელებში დაჲკალთ, არ შემირცხვინოთ გვარი.
თოფში მინდოდა გაცვლა, არ დამანებეთ მაშინ,
თორემ საკვირველ საქმეს დღეს ჩავიდენდი მთაში.“
(კავკასიური პოეზია 1959: 98).

მომაკვდავი გმირი უკანასკნელად მიმართავს დედას თხოვნით, რომ არ მიეცეს მწუხარებას, რადგან მან სახელის სანაცვლოდ დათმო საკუთარი სიცოცხლე:

„შენ წუ იდარდებ ჩემთვის, ჩემო კეთილო ნანა,
ხარხის მაღალი მთანი წარბშეუხრელი დგანან.
აქ მოვამტვრიე, ნანა, იმ ჩემს „ქორბუდას“ რქები.
სახელოვანი წაველ, წინ წავიმძლვარე მტრები“.
(კავკასიური პოეზია 1959: 98).

ბალადაში მომაკვდავი გმირის მონოლოგი, რომელიც მისი სიცოცხლის უკანასკნელ წამებსა და დაღუპვას გადმოგვცემს, კიდევ უფრო ამძაფრებს ტრაგიზმის განცდას. ლექს-სიმღერის დასასრულს ბალადის მთემელი კიდევ ერთხელ მიმართავს გმირულად დაღუპულ ვაჟვაცს, რომლის სიმამაცემაც ხარხის მთები და ხეობა გააკვირვა:

„ხევი კლდოვანი ხარხის შენს სიმამაცეს ჰკვირობს,
ოი, იმედო ხალხის – ქოძირაანთა გმირო.“
(კავკასიური პოეზია 1959: 99).

„სიმღერა თაიმურაზზე“ გმირის მომხდურთან უთანასწორო ბრძოლას გადმოგვცემს. ამ ტიპის ბალადები მრავლად გვხვდება ქართულ ფოლკლორშიც. ტ. მახაური ბალადების ოთხ ტიპს გამოყოფს და ერთ ჯგუფს, მისი აზრით, სწორედ მოწინააღმდეგესთან გმირის უთანასწორო ბრძოლის ამსახველი ბალადები შეადგენენ (მახაური 2003: 28).

ქ. ცხურბაევამ გამოთქვა თვალსაზრისი, რომ საგმირო ლექს-სიმღერები სამგლოვიარო პოეზიის წიაღიდან აღმოცენდა (ცხურბაევა 1965). მიცვალებულის სახელზე ჩრდილოეთ ოსეთში, ისევე როგორც აღმოსავლეთ საქართველოს მთიანეთში, აწყობდნენ დოლსა და მიზანში სროლას. მაგრამ თუ ვინმე გმირულად დაეცემოდა ბრძოლაში, მისი სახელის უკვდავსაყოფად ქმნიდნენ საგმირო-სახოტბო სიმღერებსაც. ქ. ცხურბაევას აზრით, საგმირო სიმღერა ხმით ნატირლის შემდგომ განვითარებას, უფრო მაღალ საფეხურს წარმოადგენს. მკვლევარის თვალსაზრისი ანგარიშგასაწევია, რადგან ხმით ნატირლებსა და საგმირო ლექსებს ნამდვილად დაეძებნებათ საერთო ადგილები, საერთო თემატიკა და სტრუქტურული ელემენტები. ცალკეული საგმირო სიმღერები შეიძლება კიდეც შეიქმნა ხმით ნატირლების შემდგომი გადამუშავების შედეგად, მაგრამ უნდა ვითიქროთ, რომ ტრადიციულ საზოგადოებაში იმთავითვე იქნებოდა მოთხოვნა შექმნილიყო სახელოვან გმირებზე სახოტბო სიმღერები. საგმირო სიმღერებსაც და ხმით ნატირლებსაც თავისი ფუნქცია და დანიშნულება ჰქონდათ ხალხურ ყოფაში, რომელიც მათ უანრულ სპეციფიკას განსაზღვრავდა.

აბრაგული სიმღერები

ოსური საგმირო ლექს-სიმღერების ერთი ჯგუფი აბრაგთა მძიმე ცხოვრებასა და ხალხის მჩაგვრელებთან წინააღმდეგ მათ

ბრძოლებს ასახავს. მსოფლიო ფოლკლორი იცნობს არაერთ სიმღერასა და გადმოცემას სხვადასხვა ეპოქის ე. წ. „კეთილშობილ ყაჩაღებზე“. სოციალური უსამართლობის წინააღმდეგ მებრძოლი რობინ ჰუდი, ქოროლლი, არსენა და სხვები ხალხის საყვარელი გმირები გახდნენ. მათ საპატიო ადგილი დაიკავეს ზეპირ ისტორიებსა და ფოლკლორულ ტექსტებში.

XIX საუკუნის ბოლოსა და XX საუკუნის I ნახევარში აბრა-გობაშ კავკასიაში რთული სოციალური მოვლენის სახე მიიღო. აბრაგებს უწოდებდნენ ინდივიდუალურად, პარტიზანულად მებრძოლ მთიელებს, რომლებიც თავს ესხმოდნენ რუსეთის ჯარს და მათ ნახევრად სამხედრო ტიპის დასახლებებს. საბჭო-თა პერიოდშიც აბრაგებზე არაერთი ხალხური სიმღერა შეიქმნა (მამისიმედიშვილი 1997: 53-58).

ოსური ხალხური ლექს-სიმღერების მიხედვით, აბრაგები ებრძვიან როგორც ადგილობრივ ალდარებს, ისე მეფის რუსე-თის მოხელეებს. აბრაგები იყვნენ ამაყი და თავისუფლებისმოყვარე ადამიანები, რომლებმაც თავიანთი ცხოვრების გზად ვე-ლური თავისუფლება – ძარცვა და ყაჩაღობა აირჩიეს. ისინი ტოვებდნენ თავიანთ კერას, მშობლიურ ადგილს და მიდიოდნენ მთებში, ტყეებში და სხვა მიუვალ ადგილებში. არცთუ იშვიათად ეს ცალკეული მებრძოლები ერთიანდებოდნენ ყაჩაღურ ჯგუ-ფებად, აწყობდნენ გამუდმებულ თავდასხმებს ადგილობრივ ფეოდალებსა და სახელმწიფო მოხელეებზე. ნაძარცვ ქონებას, პირუტყვსა და სხვა ნაყაჩაღარს კი ისინი ღარიბებს ურიგებ-დნენ. ხალხური სიმღერები მათ გმირის თვისებებით, „კეთილ-შობილ ყაჩაღებად“ წარმოგვიდგენს.

ოფიციალური ხელისუფლება, რომელიც აბრაგობას ყაჩა-ღობასთან აიგივებდა, ეწეოდა მის წინააღმდეგ შეურიგებელ ბრძოლას, მიმართავდა მკაცრ ზომებსა და რეპრესიებს.

აბრაგი, ერთი მხრივ, თითქოს ასრულებდა კეთილშობილურ მისიას, იბრძოდა სოციალური უსამართლობის წინააღმდეგ, მე-

ორე მხრივ, კი თესავდა შიშს, გზას უკაფავდა ბოროტებას, აგრესიასა და ძალადობას. ხალხური სიმღერები განასხვავებს ჩვეულებრივი მძარცველებისგან აპრაგებს, რომლებიც გულწრფელად გამოხატავდნენ თავიანთ პროტესტს სოციალური უსამართლობის წინააღმდეგ.

ოსური აპრაგული სიმღერები გამსჭვალულია ხალხის თავისუფლებისმოყვარე სულით. მისი მთავარი პერსონაჟი არის ძლიერი, მამაცი და მეამბოხე სულის მქონე ადამიანი, რომელიც მიზნის მისაღწევად გაივლის მრავალ განსაცდელს. ხალხი ლექს-სიმღერებით ქმნიდა აპრაგთა პოეტურად განდიდებულ მხატვრულ სახეებს. ვ. ბეკოვეის აზრით, ამ ტიპის სიმღერებში იხატება აპრაგთა ცხოვრების ტიპური სურათები: მიუვალი მთის ხეობები, სწრაფი ცხენი, იარაღი და ბოლოს, თვითონ ბუნება, რომელიც საიმედოდ იცავდა მთა-ველად გაჭრილ მეამბოხეებს გარდაუვალი დაღუპვისგან. ხალხური ტექსტებიდან ჩანს, რომ ხალხი თანაუგრძნობდა აპრაგებს, რომელთა სიცოცხლესაც მუდმივად ემუქრებოდა საფრთხე. მძიმე და ხიფათით აღსავსე ცხოვრების მიუხედავად, აპრაგული სიმღერების გმირი სულიერად არ ეცემა და ბოლომდე თავისი იდეალების ერთგული რჩება.

ოსურ სასიმღერო ფოლკლორში, ისევე როგორც ჩრდილოეთ კავკასიის სხვა ხალხების ზეპირსიტყვიერებაში, მრავალად არის ტექსტები სახელგანთქმულ აპრაგებზე, მათ შორის ყველაზე ცნობილია „სიმღერა აპრაგ ყუდზე“, „სიმღერა ცომაყცირიხათზე“, „სიმღერა ქუცჩი ყუბალთიზე“, „სიმღერა სალა გაგლოვვზე“ და სხვა მრავალი.

ლიტერატურა

- ბეკოვი 2010:** Бекоев В. И., Народная поэзия в системе традиционной культуры осетин, Автореферат, диссертации на соискание ученой степени доктора филологических наук, Махачкала, 2010.
- ბლიევი 2000:** Блиев М.М., Бзаров Р.С., История Осетии с древнейших времен до конца XIX в. „Ир“, Владикавказ, 2000.
- მამისიმელიშვილი 1997:** ხ. მამისიმელიშვილი, ვაინახები და ქართველი მთიელები, „ლომისი“, თბ., 1997.
- მახაური 2003:** ტ. მახაური, ქართული ხალხური საგმირო ბალადა (სინამდვილე და პოეზია), „ლომისი“, თბ., 2003.
- ოსური პოეზია 1974:** Осетинская народная поэзия. Изд. второе, дополненное, Орджоникидзе, Ир., 1974. <http://iratta.com/pesni/3331-pesnja-o-krymskom-vojske.html>
- შანიძე 1931:** ა. შანიძე, ქართული ხალხური პოეზია, I, ხევსურული, ტფილისი, 1931.
- ჩლაიძე 2006:** ლ. ჩლაიძე, კავკასიური ფოლკლორი, „კავკასიური სახლი“, თბ., 2006.
- ცხურბაევა 1965:** Цхурбаева К. Г., Об осетинских героических песнях, Орджоникидзе, 1965.
- ხამიცაევა 1973:** Хамицаева Т.А., Историко-песенный фольклор осетин. Орджоникидзе, 1973.



ନୂଦିଗ୍ଲାନିକାଳି କର୍ମଚାରୀ



ხმით ნატირლები

ოსურ ტრადიციაში ადამიანის ყოფიერების საში უმთავრე-სი მომენტი: შობა, ქორნინება და გარდაცვალება – მხოლოდ ერთ კონკრეტულ ადამიანთან ან ერთ ოჯახთან დაკავშირებულ მნიშვნელოვან მოვლენას არ წარმოადგენდა. ბავშვის დაბადე-ბას, ქალ-ვაჟის დაოჯახებასა და მიცვალებულის დაკრძალვას, როგორც სამ ფუნდამენტურ ეტაპს ადამიანის ცხოვრებაში, სა-ზოგადოება აღნიშნავდა და მთლიანად რიტუალურ ხასიათს ატარებდა.

განსაკუთრებით მაღალი საზოგადოებრივი დატვირთვა ჰქონდა მიცვალებულის დაკრძალვას, როცა ადამიანი თავისი ნაკლითა და ღირსებით ასრულებდა ამქვეყნიურ ყოფას, საბო-ლოოდ წყვეტდა ხილულ ურთიერთობას საზოგადოებასთან, მის წევრებთან. სამგლოვიარო რიტუალი, როგორც მიკუთვნების ფაზა-ცერემონია (rites incorporation), ერთგვარად აჯამებდა გარდაცვლილის ამქვეყნიურ ცხოვრებას და გზას ულოცავდა მას იმ ქვეყანაში შესასვლელად.

ოსურ ტრადიციაში სამგლოვიარო რიტუალის ერთ-ერთი მნიშვნელოვანი ნაწილი იყო მიცვალებულის დატირება. მიცვა-ლებული არ უნდა დაეკრძალათ დაუტირებლად, რადგან ის, როგორც საზოგადოების წევრი, მთელი ცხოვრების მანძილზე თანასოფლელებთან ერთად შრომობდა, იბრძოდა, ლოცულობ-და, მონაწილეობდა საზეიმო დღესასწაულებში, საკულტო და სამგლოვიარო რიტუალებში. მისი გარდაცვალება ოჯახის წევ-რებში, მეზობლებში, ნათესავებსა და ნაცნობ-მეგობრებში ინ-ვევდა დარდსა და მწუხარებას.

შესრულების ტრადიცია

ისევე როგორც ხევსურულ ტრადიციაში, სადაც ქალს ეკ-რძალებოდა ქმრისა და ვაჟიშვილის სიტყვებით დატირება, ოსებშიც, რაც უფრო ახლობელი იყო მიცვალებული, ჭირისუფალს უფრო მეტი თავშეკავების გამოჩენა მართებდა. ოსი ქალები განსაკუთრებულ მოკრძალებას იჩენდნენ გარდაცვლილი ქმრის ცხედართან და მის სახელზე არ წარმოთქვამდნენ ხმით ნატირალს. სხვა მხრივ, ხმით ნატირლის შესრულება შეეძლო ყველას, ვისაც ჰქონდა სურვილი და, რაც მთავარია, ტექსტის წარმოთქმის ნიჭი და უნარი. ხმით ნატირლებს ოსებში ტრადიციულად ქალები ასრულებდნენ. ე. ბესოლლოვას ცნობით, ოს მამაკაცებს არ შეეძლოთ სიტყვებით, ანუ ხმით მიცვალებულის დატირება. თუმცა ეს წესი ზოგჯერ ირღვეოდა. ოსი მამაკაცები, ყოველგვარი მოკრძალების გარეშე, თავიანთ მწუხარებას გამოხატავდნენ მოთქმით იმ შემთხვევაში, თუ გარდაცვლილი იყო მთელ თემში გამოჩენილი და დამსახურებული კაცი. მამაკაცები დასტიროდნენ, აგრეთვე, ომში დაღუპულ მეომრებსა და განსაკუთრებულ სიტუაციაში ტრაგიკულად გარდაცვლილ ადამიანებს. შედარებით მცირე მოცულობა და ლაკონიურობა ახასიათებთ მამაკაცთა მიერ შესრულებულ ხმით ნატირლებს, რომელიც გამოირჩევან მძაფრი საგმირო-ეპიკური ელემენტებით.

ოსურ სოფლებში მრავლად იყვნენ შემოქმედებითი ტალანტით დაჯილდოებული პროფესიონალი მოტირლები – ყარაგანაგები (ხარაგავაგ), რომლებსაც შეეძლოთ ტირილით, მოთქმითა და გოდებით მიცვალებულის ღირსებების, მისი ამქვეყნიური ყოფის ოსტატურად გადმოცემა. მიცვალებულთან ხმით ნატირლების შესასრულებლად ისინი ხშირად ოსების შორეული სოფლებიდანაც მოჰყავდათ. მიცვალებულის პატივისცემა მოტირალთა (ყარაგანაგ უსთა) რაოდენობის სიმრავლითაც ფას-

დებოდა. პროფესიონალი მოტივირები, სამგლოვიარო ტრადიციების მცოდნე და საზოგადოებისგან პატივცემული ქალები, ღრმად განიცდიდნენ სხვების მწუხარებას და დატირების დროს ისინი ხშირად გამოდიოდნენ დაქვრივებული ქალის, დაობლებული ბავშვისა და მარტოხელა დედის როლში.

შენიშვნა: ყარაგანაგ (ხავავათახავ) ოსურ ენაზე სიტყვა-სიტყვით ნიშნავს მოტირალს, მოზარეს, ხოლო ყარაგ (ხავავ) – დატირებას, გლოვას, ნატირალს.

ოსური ტრადიციით, სამძიმარზე მისასვლელად ქალები ერთად იკრიბებოდნენ და ჯგუფ-ჯგუფად მიდიოდნენ ჭირისუფალთან სამძიმრის სათქმელად. ქალებს შორის ერთ-ერთი, ხმით ნატირლების ნარმოთქმაში ყველაზე დახელოვნებული, ჯგუფს მოთქმა-გოდებით წინ მიუძღვოდა. სხვები კი ხმამაღალი ტირილით ხმას უბამდნენ. მიცვალებულის დატირების ამ წესს ოსები უწოდებენ ირონ ფანდაგს (ოსური გზა). მიცვალებულის ცხედართან ქალები მონაცვლეობით ასრულებდნენ დატირების ტექსტებს (ჩეთითი 1988: 81).

ოსებში გავრცელებული ყოფილა როგორც ინდივიდუალური, ისე გუნდური ნატირლები. ორივე მათგანი შეიცავს იმპროვიზაციის ელემენტებს. გუნდური დატირების ნიმუშს ნარმოადგენს „დადაღ“ (დაძალი), რომელსაც, ს. უუსკაევის ცნობით, აღა-გირის ხეობაში XIX საუკუნის შუა წლებშიც ასრულებდნენ (უუსკაევი 1855). ძირითად ტექსტს ნარმოთქვამდა პროფესიონალი მოტირალი, გუნდი კი მღეროდა რეფრენს: „დადაღ, დადადაღ“ (დაძალი, დაძალავ). ე. ბესოლოვა ოსურ „დადაღასა“ და თუშურ „ზარს“ შორის საერთო ელემენტებზე ამახვილებს ყურადღებას (ბესოლოვა 2012).

ხმით ნატირლების თემატიკა და სტრუქტურა

შინაარსით ხმით ნატირლები განსხვავდებიან ერთმანეთის-გან, რადგან თითოეული მათგანი წარმოითქმის ერთი კონკრეტული მიცვალებულის სახელზე. ყოველ ხმით ნატირალს ჰყავს ერთი ავტორ-შემსრულებელი, თუმცა, როგორც წესი, ხალხურ ტრადიციაში არ განიხილება ავტორობის საკითხი, რადგან ინდივიდუალური შემსრულებელი მოთქმის დროს ეყრდნობა ხალხური პოეტიკის ფორმებს და ნატირალში იყენებს გლოვის ტრადიციულ ფორმულებს, რომლებიც უცვლელად გადადის ერთი ტექსტიდან მეორეში.

ინდივიდუალური შემსრულებელი ხმით ნატირალს (ყარაგ, ხეარა) ქმნის ყოველგვარი წინასწარი მომზადების გარეშე. დამტირებელს, მართალია, კონკრეტული სამგლოვიარო სიტუაცია წარმოათქმევინებს ტექსტს, მაგრამ მას თითქოს ტრადიცია კარნახობს, თუ როგორი ნატირალი უნდა შეასრულოს, რომლითაც იგი გამოხატავს არა იმდენად საკუთარ, არამედ უფრო იქ შეკრებილი საზოგადოების საერთო განწყობილებას. ხმით ნატირალში ხშირად არის მიმართვა მიცვალებულისადმი, თუმცა ეს მიმართვა უფრო სამძიმარზე მოსული ადამიანების გასაგონად არის გამიზნული, ვისგანაც ჭირისუფალი მოელის ყურადღებასა და თანაგრძნობას. ამდენად, საზოგადოება, რომელიც ბანს აძლევს მოტირალს და მიცვალებულის ცხედართან ქმნის სამგლოვიარო განწყობილებას, შეიძლება მხატვრული ტექსტის, კერძოდ, ხმით ნატირლის თანავტორად და თანამონაწილედ მივიჩნიოთ. დატირების ერთი კონკრეტული ტექსტი მხოლოდ ერთხელ წარმოითქმის და ის სხვა მიცვალებულთან აღარ მეორდება. მეორდება მხოლოდ გამოსახვის ფორმულები. ყოველ მიცვალებულს კონკრეტულ მოტივზე აგებული ტექსტი

ეძღვნება. ამიტომ ყოველი ახალი მიცვალებულის დატირების დროს იცვლება ხმით ნატირლის მოტივი.

ოსურ ხმით ნატირლებს (ყარჯთა, ხეარჯყათა) არა აქვთ ისეთი მკაცრი, კანონიკური აგებულება, როგორიც ბალადებს. ზოგიერთ ტექსტში დამტირებელი ვრცლად გადმოგვცემს მიცვალებულის ღირსებებს, ზოგი – უფრო მოკლედ. მართალია, ხმით ნატირლების სტრუქტურული მოდელი მეტ-ნაკლებად იცვლება ყოველი ახალი შესრულების დროს, მაგრამ ყველა ტექსტში იძებნება საერთო ადგილები და მზა სიტყვიერი ფორმულები. ხმით ნატირალს აქვს თავისი პოეტიკა, ტრადიციული სამგლოვიარო სიმბოლიკა, პოეტური გამეორებები, რიტორიკული შეკითხვა-შეძახილი და სტერეოტიპული გამოთქმები. ე. ბე-სოლოვას აზრით, ოსური ნატირლების პოეტურ ორგანიზებაში მნიშვნელოვან როლს ასრულებს კუმულაციური ფორმით წარმოდგენილი, ერთმანეთზე ასხმული მოტივები, როცა ერთ მოტივს მოსდევს მეორე, მეორეს – მესამე და ა. შ. ცალკეული მოტივები ერთმანეთს უკავშირდება პოეტური ინტონაციითა და სინტაქსური კონსტრუქციებით. ოსური ნატირალი იწყება მიცვალებულისადმი რიტორიკული შეკითხვით: თუ რატომ დატოვა და დააობლა გარდაცვლილმა ოჯახი. მოტირალი იქვე აღნიშნავს, თუ როგორ მძიმე იქნება გარდაცვლილის გარეშე ცხოვრება. შემდეგი სტრუქტურული ერთეული ნატირალში არის გარდაცვალების მიზეზის გადმოცემა, რომელსაც მოსდევს ტრადიციული სიტყვიერი ფორმულებით მიცვალებულის ქება.

ოსური ხმით ნატირალი, ყარაგ (ხეარაგ) არის ლიროეპიკური ჟანრის პოეტური ნაწარმოები, რომელიც მხატვრული ხერხებით გადმოგვცემს მოტირალის ემოციურ განწყობილებას, ძვირფას ადამიანთან დაშორებით გამოწვეულ მწუხარებას, ურთიერთობას გარდაცვლილთან, შეხედულებას სიკვდილ-სიცოცხლეზე. დამტირებელი ტექსტში ერთგვარად აფასებს მიც-

ვალებულის ამქვეყნიურ ცხოვრებას, წარმოგვიდგენს გარდაცვლილის პიროვნულ ღირსებებსა და დაფებით თვისებებს: შრომისმოყვარეობას, სამართლიანობას, სიწმინდეს, სტუმარმას-პინძლობას, მისი, როგორც საზოგადოების წევრის, ფუნქციასა და ავტორიტეტს. რაც უფრო ნიჭიერია დამტირებელი, მით უფრო მდიდარია ტექსტის სახეობრივი სისტემა.

მიცვალებული არის ხმით ნატირლის მთავარი პერსონაჟი. დამტირებლის მიზანია წარმოადგინოს გარდაცვლილი მამის, დედის, ძმის, ქალიშვილის იდეალური სახე (ბესოლოვა 2012). ზოგჯერ ნატირალში წარმოდგენილი მხატვრული სახე გარდაცვლილის რეალურ თვისებებს სცილდება, მაგრამ დამსწრე საზოგადოების თვალში ის მაინც არ კარგავს დამაჯერებლობას.

ოსური ხმით ნატირლები, რომელთა უმრავლესობა მონოლოგებზეა აგებული, მიეკუთვნება სინკრეტულ შემოქმედებას. ხმით ნატირლებისა (ყარჯთა) და სამგლოვიარო რიტუალის ერთი მთლიანი დრამატული სურათის ორგანიზებაში მნიშვნელოვან როლს ასრულებს როგორც ტექსტი და სიტყვა, ისე ბანი, ტირილი და პლასტიკური მოძრაობა. ყველა ელემენტი ერთად მნახველ-მსმენელში აღძრავს მძაფრ გრძნობებს, დრამატიზმის განცდას. საუკეთესო ნატირლებს არ ივიწყებდნენ და ადამიანები ერთმანეთს უზიარებდნენ. საბოლოოდ მას ხალხის ხსოვნა ინახავდა და მომავალ თაობას ზეპირად გადასცემდა.

ხმით ნატირალი „მოთქმა“

ოსური „მოთქმა“ მსგავსებას ამჟღავნებს თუშ-ფშავ-ხევსურულ ხმით ნატირლებთან. ოსური „მოთქმის“ საკმაოდ ვრცელ ტექსტს აქვს დასაწყისი და ერთგვარი დასასრული. დასაწყისში მოტირალი უბოდიშებს სამძიმარზე მოსულ საზოგადოებას,

რომ არ შეუძლია თავშეკავების გამოჩენა და საკუთარ ტკიფილს ყველას თვალწინ გამოხატავს, ყველას უზიარებს:

„ვოი, ნურავინ განმსჯის, ნურავინ, ჩემნო მზენო,
ასე რომ დამექცა ოჯახი,
ასეთი გლოვის დღე რომ დამიდგა!“
(ოსური სიტყვიერება 2005: 45).

„მოთქმას“ აქვს დასასრული, რომლითაც მოტირალს გა-
მოვყავართ ტექსტის ძირითადი ლიროეპიკური ნაწილიდან. ახ-
ლობლის დალუპვით სასონარკვეთილი ქალი ნატრობს სიკ-
ვდილს და ჰპირდება საზოგადოებას, რომ საკუთარ უბედურე-
ბას თავზე აღარავის მოახვევს. საერთო ემოციური ფონის გა-
საძლიერებლად ტექსტის ფინალში მოტირალი იყენებს რიტო-
რიკულ შეკითხვას და წყევლის ფორმულას:

„მაგრამ დაბნელდეს ჩემთვისაც მზე, დღე დამიბნელდეს,
განა ტირილით ვინმე მკვდრეთით მობრუნებულა?
ამაზე მეტად მოთქმა-გოდებით თუ შეგაწუხოთ,
პირი ამევსოს ქვითა და მიწით“.
(ოსური სიტყვიერება 2005: 46).

ტექსტის ძირითადი ნაწილი შეიძლება ხუთ ნაწილად დავ-
ყოთ. თითოეულ ნაწილში მოტირალი თანაგრძნობას ითხოვს
იმათგან, ვისაც შვილი ცეცხლში დაეწვა ან ადიდებულ წყალში
დაეხრჩო, ვისაც მარჩენალი დაბურულ ტყეში, ხის ძირას დაე-
ღუპა ან მტრის ტყვიამ იმსხვერპლა. ტექსტის ყოველი ნაწილის
ბოლოს მოტირალი სვამს რიტორიკულ შეკითხვას:

„რატომ არ მოთქვამს ისიც ჩემსავით
ამ საცოდავი მკვდრის სასთუმალთან?“

მოტირალი ღრმა მწუხარებით, პოეტური ფორმების გამო-
ყენებით გადმოგვცემს შვილის ცეცხლში დაწვით ან წყალში

დახრჩობით, ქმრის შრომის დროს ან მტრის ხელით დაღუპვის ტრაგიზმს:

„ვოი, ვისაც ძლივძლივობით გაზრდილი შვილი,
თავის შემნახველ-დამმარხველი
აღელვებულმა წყალმა მოსტაცა,
ქვიშა ლეიბად უქცია და წყალი კი საბნად.
თევზი უჩინა სამარემდე მიმცილებლებად,
ასე გაგზავნა მოშთობილი სულთ საუფლოში,
რატომ არ მოთქვამს ისიც ჩემსავით
ამ საცოდავი მკვდრის სასთუმალთან?“
(ოსური სიტყვიერება 2005: 45).

მთიან სოფლებში განსაკუთრებით ხშირი იყო უბედური შემთხვევები, როცა სიკვდილი უდროოდ სტაცებდა ოჯახს პატ-რონსა და უკანასკნელ მარჩენალს. მოტირალი არც იმათ ივიწყებს:

„ვოი, დაბურულ ტყის შუაგულში,
მარჩენალი რომ ხის ქვეშ მოუყვა,
ციგი თოვლი რომ სუდარად ექცა,
ქარი მოზარედ,
ხოლო ნადირი კი ჭირისუფლად,
რატომ არ მოთქვამს ისიც ჩემსავით
ამ საცოდავი მკვდრის სასთუმალთან?“
(ოსური სიტყვიერება 2005: 46).

განსაკუთრებით დრამატულად გვიხატავს მოტირალი „წყე-ულ ომში“ მამაკაცის დაღუპვით გამოწვეულ გულისტკივილს:

„ვოი, ვისი შემნახველ-დამმარხველიც, ვისი პატრონიც
იმ წყეულ ომში წყეული მტრის ნასროლი ტყვიით
ისე გაცივდა, თვალის დამხუჭიც არ გამოუჩნდა,
წყალიც ვერავინ მიაწოდა, როცა იძახდა: „წყალი, წყალიო!“
ისე წავიდა წყურვილისგან ხახაგამშრალი.

რატომ არ მოთქვამს ისიც ჩემსავით
ამ საცოდავი მკვდრის სასთუმალთან?“
(ოსური სიტყვიერება 2005: 46).

ხმით ნატირლებში რეალისტურად იხატება მარჩენლის გა-
რეშე დატოვებული ოჯახის უნუგეშო მდგომარეობა. ერთი
ოსური ნატირალი კი პოეტური სახე-სიმბოლოებით გადმოგ-
ვცემს დაობლებული ბავშვების მძიმე ხვედრს:

„ახლა მათ შესამოსად მზის სხივები ექნებათ,
შავი მინა – ფეხსაცმლად, ხის ფოთლები – ქუდად“.
(ბეკოევი 2012: 28).

განსაკუთრებული დრამატული პათოსით გამოირჩევა გარ-
დაცვლილ ბავშვზე ნატირალი. გულმოკლული დედა მწუხარე-
ბით ეკითხება სიკვდილს, რატომ დააშორა უმწეო პატარას, რო-
მელსაც ჯერ არ შეუძლია დამოუკიდებლად ცხოვრება, რომე-
ლიც ჯერ კიდევ დედის ალერსსა და ზრუნვას საჭიროებს. ამი-
ტომ უბედური ქალი მთელ ცხოვრებას მის ძებნაში გაატარებს.

ოსურ ნატირლებში სჭივის მიღმა სამყაროს რწმენა. დამ-
ტირებელი გარდაცვლილს აბარებს სათქმელს ამ ქვეყნიდან
უფრო ადრე ნასულ ნათესავებსა და ნაცნობ-მეგობრებთან. ის
მიცვალებულს ურჩევს, თუ როგორ უნდა მიაღწიოს ნართების
ქვეყნამდე, რომელიც ოსურ ხმით ნატირლებში მეტაფორულად
მიცვალებულთა სამკვიდროს განასახიერებს.

ლიტერატურა

ბეკოევი 2012: В. Бекоев, Народная поэзия в системе традицион-
ной культуры осетин, автореферат, диссертации на
соискание ученой степени доктора филологических
наук, Махачкала, 2010.

ბესოლოვა 2012: Е. Бесолова, Общее и особенное в структуре осетинского обрядового плача; Современные проблемы науки и образования, № 3, 2012; www.science-education.ru/103-6539

ოსური სიტყვიერება 2005: ოსური ზეპირსიტყვიერება, ნიგნი შეადგინეს და ქართულ ენაზე თარგმნეს ნაირა ბეპიევამ და მერი ცხოვრებოვამ, გამომცემლობა „კავკასიური სახლი“, თბ., 2005.

ჟუსკაევი 1855: Жускаев С., Похороны у осетин-олладжирцев; Закавказский вестник, № 9, 1855.

ჩეთითი 1988: რ. ჩეთითი, ოსური თეატრის ხალხური საწყისები, „ხელოვნება“, თბ., 1988.

საძიებლები

ადგილის სახელები

- ალაგირი 18, 77, 93, 95, 106, 108, 290, 293, 370, 387
ბურსაბქელა (ბრუტსაბქელა) 67, 70, 71
გალიათი 286, 290
გორი 24, 176, 177, 288
გურის ციხე 238
გუფთა 286
დარგონი 372
დვალეთი 18, 19, 20, 21, 77, 246, 247, 297, 364
დიგორი 18, 20, 21, 59, 77, 103, 106, 107, 112, 119, 123, 134, 135, 149, 158, 177, 196, 231, 289, 290, 293, 307, 309, 343, 361, 362, 364, 365, 366, 367, 368, 369, 370, 371, 372, 373
ედისი 286, 290, 291
ვაზკვიფის მთა 251, 272
ვალაგქომი 364
ვარფის მთა 309, 312, 313
ზადალესკი 362, 363, 364
ზარამაგი 20
ზილახარის ველი 238, 268
თაგაური 18, 20, 77, 105, 106, 124, 365, 374
თაფან-დიგორი 364
თერქ-თურქის ქვეყანა 157
ირყაუ 90
კახეთი 119
ლეჩხუმი 126, 127, 128, 129, 133, 278
ლიახვის ხეობა 286, 290
მოზდოკი 23
მსხლები 286
ოსეთი 18, 19, 20, 21, 22, 23, 24, 25, 51, 71, 75, 77, 78, 81, 83, 84, 93, 106, 107, 108, 117, 121, 122, 141, 149, 153, 166, 196, 231, 246, 286, 287, 288, 289, 290, 291, 293, 296, 321, 322, 331, 335, 343, 345, 360, 364, 365, 370, 374, 375, 378
ჟღელე 297
რეგაზი 76, 77, 91, 92
სავხოხის მთა 141, 238, 265, 345, 346
სანიბა 76, 77, 106, 290, 291
სთირფაზი 290
სთირ-დიგორი 364
სტონას ველი 365
ტიტულის კიდური 366
ფაიქომი 20
ფარასკართი 368, 370
ქალაქი 247
ქართლ-კახეთი 19, 21, 23
ქურთაული 18, 23
ქურთათი 77, 84, 85, 105, 106, 108, 247, 289, 290, 293
ყაბარდო 23, 93, 359,
შავი ზღვა 238, 271
ცეის ხეობა 21, 106
ცხინვალი 25, 81, 149, 196, 231
ძივდისი 19, 21, 76, 77, 84, 85, 86, 108, 109, 289, 290

ჩხერი 20
ხარხი 374, 375, 376, 377
ხვცე 289
ხიზის ციხესიმაგრე 238, 262, 264

ხურბადანი 67, 68, 70
ჯავა 24, 81, 286, 287, 288,
291, 293

**ძუარების,
სალოცავებისა და ზებუნებრივ
არსებათა სახელები**

ალარდი 50, 62, 106, 110,
112, 118, 119, 120, 121, 122, 126
ამინონი 62, 154, 159, 161,
162, 163, 164, 166, 250
აფსათი 50, 62, 110, 138, 139,
140, 141, 142, 143, 144, 145, 146,
148, 250
ბარასთირი 62, 155, 161, 162,
163, 169, 171, 177, 186, 219, 250
ბასილები 50, 103, 110, 134,
135, 136
ბასილი დიდი 134
გალაგონი 62, 65, 260, 323
მად მაირამი 50, 61, 82, 110,
115, 117, 118, 348, 364
მარიამ ღვთისმშობელი 364
წმინდა ნიკოლა 250
დალი 139, 140, 144, 255, 267,
268
დონბეთირი 62, 238, 253,
254, 256, 258, 260, 264, 323
დონ ჩიზჯითა 103
რექომი 19, 21, 76, 77, 88, 94,
95, 106, 130
საფა 62, 85, 124, 142, 158,
250, 259, 313, 347, 350, 351

ფალვარა 62, 79, 106, 124,
250, 260
ქურდალაგონი 62, 85, 87,
158, 250, 257, 258, 260, 273, 323
ყაუზადი 104
ძიღვისის ძუარი 19, 21, 77,
84, 85, 108, 109
წმინდა გიორგი 21, 85, 89, 110,
112, 113, 116, 124, 130, 139, 154
წმინდა მაქსიმე 89, 126, 127,
128, 131, 132, 133, 134, 278
ხუცაუ 79, 80, 82, 90, 91, 97,
250
მიქალგაბირთა 76, 77, 94, 95,
106
რეგახი ძუარი 76, 77, 92
თიხოსთი ძუარი 106
ლაშარის ჯვარი 85, 87
ლომისის ჯვარი 87
ტბაუ ვაცილა 77, 123
ვასთირჯი 50, 62, 79, 82, 85,
86, 88, 89, 90, 92, 93, 94, 108,
109, 110, 111, 112, 113, 114, 115,
121, 123, 130, 143, 157, 160, 250,
253, 260, 319, 320, 325, 326, 346,
350

ვაცილა 50, 62, 77, 82, 89, 104, 110, 122, 123, 124, 125, 126, 128, 129, 131, 143, 260, 291, 323
 ზაფი 158
 თათართუფი 346
 თარანჯელოზი 76, 94, 95, 106, 250
 თუთიშვილი 62, 88, 94, 103, 104, 250, 309, 314, 315, 326, 327
 იახსარი 95
 იესო 102, 171, 172, 174, 259, 273
 ირყაუ ხუცაუ ძუარ 90
 ჩირისტი (Чырысти) 112, 171

ფოლკლორულ და მითოლოგიურ პერსონაჟთა სახელები

აგუნდა 142, 248, 264, 265, 346
 ავსარონი 262
 აიდარუეყი 364, 365, 366, 367, 368, 369, 370
 ალეფი 262
 ამირანი 252, 255, 256, 259, 273, 274
 არზიმაიხა 153, 176, 177
 არიგი 71, 72
 არტური 274, 275
 აქულა 264
 აცამაზი, 142, 228, 237, 248, 346, 347
 აცირუხსი 239, 248, 264, 265
 ახვი 292, 300
 ახსართაგი 228, 234, 235, 236, 238, 239, 246, 257, 258, 264, 265, 271, 300
 ახსარი 228, 239, 257, 258, 300
 ბაბურაული 366
 ბადელი 364, 367, 368, 369
 ბათირი 88, 94, 95, 123, 173, 228, 236, 245, 250, 254, 255, 256, 257, 258, 259, 260, 262, 264, 265, 266, 270, 271, 272, 273, 274, 275, 276, 315
 ბალსაგი 267, 268, 269, 270
 ბედუხა 166, 187, 248, 264, 265
 ბიინოგერი 143, 144, 145
 ბიცენონი 248, 254, 255, 265, 271
 ბონვარონი 66, 67, 69, 70
 ბურაბერდი 300
 ბურანაგი 300
 ბურაფარნიგი 236, 270, 271
 გილგამეში 268
 გრიფლეტი 274, 275
 გურძიხანი 62, 66, 67, 68, 69, 70
 დალი 139, 140, 144, 255, 267, 268
 დევი 198, 199, 201, 203, 206, 208, 261, 262

- ელბერდუყ თუღანთი 371,
 372, 373
 ენქიდუ 268
 ვარხაგი 239, 249, 257
 ვარხთანაგი 232
 ვონი 264
 ზიმაიხო 153, 176, 177
 თაიმურაზ ქოძირთი 374
 თეხი 262
 თიხივზარი 202
 თოლძა 242, 243
 თოთრაძი 228, 263
 იალლუზი 329
 იონეური 374
 იშთარი 268
 კუძა 68, 69, 70
 ლოკი 237
 მაგირა 71
 მუქარა 262
 ნაღვილა 300
 სავა 228, 232
 სათანა 162, 219, 228, 236,
 245, 248, 250, 253, 254, 255, 260,
 263, 265, 270, 271, 300, 311, 312,
 320, 323, 324, 325, 326, 328, 329,
 346, 348
 საინაგ-ალდარი 245, 270,
 271, 346
 სანათა 312
 სიდამონი 329
 სირდონი 215, 228, 237, 253,
 254, 256, 257, 258, 268, 269, 270,
 273, 276, 277, 300
- სოსლანი 17, 59, 124, 142,
 153, 155, 158, 162, 166, 167, 176,
 177, 184, 187, 200, 228, 236, 237,
 241, 242, 244, 248, 254, 256, 257,
 258, 259, 260, 262, 263, 264, 265,
 266, 267, 268, 269, 270, 271, 275,
 276, 313, 323, 348, 376
 სტარეჯანი 200
 სუა 294, 295, 299
 ტყაში მაფა 139, 267
 ურუზმაგი 157, 162, 169,
 177, 200, 219, 228, 236, 238, 239,
 247, 248, 253, 261, 262, 265, 269,
 278, 299, 300, 320, 325, 328, 346,
 348, 399
 ფანკუზი 202
 ფიდალიზი 296
 ქარეიშვილი 127, 128, 129,
 131, 278, 279
 ყანძარგისი 264
 ყირიმის ხანი 371, 372, 373
 ყუსაგონი 329
 ჩელეხსართაგი 248, 264
 ცარძონი 64, 292, 293
 ძანყალიცი 372
 ძერასა 238, 249, 253, 256,
 264, 265, 320
 ხამიცი 236, 248, 254, 255,
 256, 258, 265, 269, 270, 271, 272,
 273, 300
 ხეთაგი 77, 92, 93, 94
 ხირჩლა 366

საგვარეულო, ხალხი, წარმომავლობა

- ალაგათები 234, 235, 236, 246, 248, 265 290, 291, 292, 293, 294, 295, 296, 297, 298, 299, 300, 301, 302
ახსართაგები 234, 235, 236, 246, 271 ბიღვილათები 285, 295, 296
ბადელიათები 248, 365, 366, 367, 368, 369, 370, 371 ბიცენტები 254, 255, 265
ბორათები 234, 235, 236, 246, 262, 270, 271
გვერდიანთები 292 თექიევები 363
ქოძირაანთები 377 წიბირთები 295, 296
ცარგასათები 248, 290, 365 ხეთაგურები 93
ცარციათები 15, 50, 62, 64, 65, 71, 285, 286, 287, 288, 289, ხვირიმთები 285, 295, 296
ჯერიათები 86, 87

Khvtsio Mamisimedishvili

Osetian folklore

Text-book for university students

Collective memory, artistic thinking, long life experience and cultural identity of the Osetian people are most clearly seen in the folklore of this people.

By considering the special interest of young students, this is the first text-book of Osetian folklore printed in Georgia. The author considers the genre content of the Osetian folklore based on the results of typological, structural and artistic analysis of concrete texts.

The book is designated for the students of higher educational establishments, specialists of humanitarian sciences and readers interested in Osetian folklore.

ხვთისო მამისიმედიშვილი

ივანე ჯავახიშვილის სახელობის თბილისის სახელმწიფო უნივერსიტეტის პუმანიტარულ მეცნიერებათა ფაკულტეტის ასოცირებული პროფესორი. რამდენიმე მონოგრაფიისა და ასამდე სამეცნიერო ნაშრომის ავტორი. მათ შორის ავტორი წიგნებისა: „ვაინახები და ქართველი მთიელები“ (1997), „პანკისი, წარსული და თანამედროვეობა“ (2008), „ჯვარ-ხატები საკულტო ტექსტებში“ (2009).

გამომცემლობის რედაქტორები:

გარეკანის დიზაინერი

დამკაბადონებელი

რუსულან მიქენაია

მარინე ჭყონია

ნინო ებრალიძე

ხათუთა ბადრიძე

0179 თბილისი, ი. ჭავჭავაძის გამზირი 14

14, Ilia Tchavtchavadze Ave., Tbilisi 0179

Tel 995(32) 225 14 32

www.press.tsu.ge